

The Ohio State University



3 2435 06198739 2

THE OHIO STATE UNIVERSITY BOOK DEPOSITORY



D	AISLE	SECT	SHLF	SIDE	POS	ITEM	C
8	04	20	01	7	11	018	3

AI-

OHIO STATE
UNIVERSITY
LIBRARIES

179



كچىش غىزىلرۇدە تۈرك جىياتى

Bizans karsısında Türkler


امدنيق

Shmet Redil

بیزانس قاپسىندە توركلر

(۶۹۹ : ۸۵۷)

این اوکنده توركلر - توركلر و بیزانس - یشیل بروسه دن کوزلجه
حصاره - ییلدیریمک اوغوللری - بیزانسک برنجی وایکینجی محاصره سی
بیزانسک صوک سنه لری - بیزانسک اوچونجی و دردنجی محاصره سی
بیزانسه توركلر



استانبول

کتابخانه حلمی — باب عالی جاده سی ، ۸۸

۱۹۲۷

معرفت مطبعه سی

يېزائىس قارىيىنىدە توركلار

۱ . اين او كىندە توركلار

چاوشلار ، شوق وشادى ايچىندە ، باغىرييورلردى :
— آب حياتلار ، صحتلار ، عافيتلار ، پادشاهلاق مبارك اولسون !
بوتون آغالار ، كىتىخدارلار ، جوارايللار كىمىل بىكلرى
طوپلانمىشلردى . آناطولو ، پارچالانمىق تىلەكسەنە معروضدى .
عصرلردىن بىرى سلطنت سورەن سىلچوقى خاندانى اداره ضعفيەلە ،
موغول تىلكىمىلە ازیلمىشىدى . (قونىيە) دە آرتق سلطاندىن
اثر يوقىدى : اوچونچى علاءالدين كىقباد ، موغوللاردىن غازان خانك
عسكىرلىرى طرفىدىن ياقالانمىش ، ايرانە كوتورولمىشىدى . موغوللار كى
تجاولزلىنە قارشى دورمىق ، (سو كود) و (اين اوگى) نە
ياشايدىن توركلار كىدە موجوديتلارنى قورومىق لازىمدى . بورالىرى

تورکلرک اوج بلده لیدی. اوغوز بکلری هپ طوپلانمشلر، موغول
تجاوزینه قارشى قویمق ایچین آناتولونک غربنده ده بر دولت
تشکیلنی دوشونیورلردی. قونیه سلطاننک موغوللر آلینه کچمه سی
سلچوق خانداننک خاتمه سیدی. سلطنته سلچوقیلردن برینک
کتیریلمه سی ایسه امکان خارجنده ایدی. آناتولونک هر طرفنده،
قارامان اوغوللری، کریمیان اوغوللری، صاروخان اوغوللری،
منتشا اوغوللری، اسفندیار اوغوللری هپ استقلاللرینی اعلان
ایتمشلردی.

اوکون عثمان بکده استقلالنی اعلان ایدیور، بیعت رسمی
اجرا اولونیوردی. اوغوز بکلری عثمان بکک اوکنده «اورطو-
روب اوغز رسمنجه اوچ کره یوگنوب» باش قویدیلر،
باللردن، قیمیزلردن عثمان بکه «صغراق» صوندیلر. عثمان بک،
قیمیزی ایچر ایچمز، چاووشلر:

— آب حیاتلر، صحتلر، عافیتلر و پادشاهلق مبارک اولسون!
دیه دعالر ایتدیلر.

اوتارنخده (۶۹۹ هـ، ۱۳۰۰ م)، عثمان بکک اداره سنده
بولونان اولکده ایکی مهم بلده واردی: سوکود، قرهجه حصار.
عثمان بکک باباسی ارطوغرول معیتنده کی تورکلرک آناتولوده
ایلك یاشادقلری یز، (سوکود) اولدی. ارطوغرول بک بورایه
یرلشدی، قبیله سنی بورایه کتیردی. (سوکود)، پایتختی (قونیه) ده

تشکل ایدن سلچوقی ایمپراطورلغنك اوج بکلکنی تشکیل ایتدی .
بوبکلک ، ارطوغرول بکه ویریلدی .

ارطوغرولك (سوکود) یرلشمه سی جوار بکلر ایچین
مهم بر حادته ایدی . هیچ بری ده سلچوقی سلطانك اولکک سینه
یاناشامیوردی . کر میان تورکلری اندیشه ایچنده ایدی . ارطوغروللیلر
اوج بکلکنی جاندن ویوره کدن مدافعه ایتدیلر . ارطوغرول
بك (سوکود) ده دائمی برجنك حیاتی کچیردی .

(قونیه) ده سلطانلرک دکیشمه سی وظیفه سینه اصلا خلل
کتیرمه دی ؛ او چونجی غیاث الدین کیخسرو (سوکود) جوارینی
تفتیشه کلدیکی زمان اونی حرمتله قارشیلادی .

ارطوغرولك اوج اوغلو واردی : کوندوز بك ، ساوجی
بك ، عثمان بك . ساوجی بك (صاری باتی) لقبيله معروفتدی .
لطفی پاشا دیورکه : « عثمان جمله سندن بهادر قوپدی . خلق
دخی عثمانه عزت و حرمت ایدوب اتراکک یکیدی و بکلری آوده
و شکارده یاننده جمع اولورلردی . و بالجمله سلچوقیلردن هر
قنغیسی پادشاه اولسه ارطغروله و عثمانه نظر حمایتلرین دریغ
ایتمزلردی . دخی غایتده دیندار و نامدار ایدی و شجاعته
موصوف کمنه ایدی . ارطغرول پیر فانی اولوب اوغلی عثمان
قاردشلی ايله کندو بویلری ایچنده حاکم اولوب نهایت کوچر
اولو اتراک آنک مخدومی و محکومی ایدیلر » .

ارطوغرول ، (سوکود) ده یارم عصر قادار یاشادی .
دوقسان ایکی یاشنده وفات ایتدیکی زمان (۶۸۰) ، نعشی
(سوکود) طوپراققرینه کومولدی . لطفی پاشا ، بو حادثه دن
بحث ایدرکن ، شو مصر اعلی یاد ایدیور :

چون دکلدربخت دولت پایدار
آنکی چون نا کرک بو کار وزار
چاره نه چون بویله کلدی روز کار
کیم دوکیلور کل قالور بیرنده خار

عثمان بك ، باباسنك وفاتندن صوکراده ، (سوکود) ده
قالدی . (بیله جك) و (اینه كول) تکفورلریله مناسبت پیدا
ایتدی ، اوغلو اورخان بك بوراده دنیایه کلدی (۶۸۰) .
(سوکود) عثمان بك زماننده اهمیتنی غائب ایتهدی .
اوراسی ، عثمانلی تورکار ایچین ایلک مرکز اولدی . عثمان
بك تکفورلردن مهم قلعه لر آلیور ، (سوکود) تورکلر نظرنده
قیمتنی غائب ایتموردی . حتی قونییه تختنه یکی جلوس ایدن
غیاث الدین مسعود ثانی ده (سوکود) اوجنی عثمان بکه ویردی .
ساجوقی دولتنگ حدودی غربه دوغرو ایلریله دجه ، عثمان
بکک اداره سی ده (یکیشهر) ه قادار کنیشه دی . (اسکیشهر)
تورك اداره سنه کچدی . (سوکود) ایله (اسکیشهر) دن مرکب
سانجاغه پنه عثمان بك تعیین اولوندی (۶۸۸) .

هر آقشام ، ایکندی وقتی ، (سوگود) افقلری طبل ومهتر
 آوازه لریله چینلاردی . یمکدر چیقار ، فقرایه آشور داغیدیلردی .
 طبهخانه چالینیرکن عثمان بك آیاهه قالقار ، باشنده خوراسانی
 صاریق ، آرقاسنده کنیش یاقالی وکنیش یگلی فراجه ، آلارینی
 قاووشدورر ، طبهخانه بی آیاقده دیگلدی .

عثمان بك زماننده بورالره (این اوکی) دیرلردی . (این
 اوکی) شیخلر و مریدلر مسکینیدی . عثمان بك قاش آتاسی اده بالی
 بوجوارده اوطوردی . بورالری وجد وتوکل ایچنده یاشایان
 آخیلرک زاویه لریله معموردی . عثمان بك ، اکثریا ، شیخ
 اده بالینک زیارته کیدردی . حتی اورخان بك آتاسی مال
 خاونه ده بوزیارتلردن برنده مفتون اولمشدی . کذا ، (این اوکی)
 حاکمی ده دائما زیارته کیدردی . برکون ، ینه (این اوکی) نده
 ایدی . ضیافته دعوت ایدلمشدی . (اسکی شهر) حاکمی بونی
 دویدی . اوزمان کوسه میخال دها اسلام اولمامشدی ؛ (خرمن
 قیا) حاکمیدی . کوسه میخالی چاغیردی ، ایکسی برابر اولدیلر ،
 (این اوکی) نی قوشاتدیلر ، عثمان بك تسلیمنی ایسته دیلر .
 (این اوکی) حاکمی راضی اولمادی ، حتی شاشیردی . عثمان
 بك مسئله بی آکلار آکلار (این اوکی) ندن چیقادی ، قلعه دن
 طیشاری فیرلادی . حیاته کوز دیکن دوشمانلرینه اویله بر
 ضربه ووردی که ، هپسی ده قچمقدن باشقه چاره بولامادی .

کوسه میخال بو محاربه ده اسیر دوشمش و نهایت اسلامی قبول ایله مشدی. بر آرزو کرا (۶۸۹) (این اوکی) ده عثمان بکک ایلنه کچدی. اوزمانلر (قره جه حصار) (قره جه شهر) دیرلردی. (این اوکی) اورایه تابعدی. (این اوکی) نه دها صوکرالری (سلطان اوکی) نامی ویرلدی.

(این اوکی) کیتدکجه بویوک بر اهمیت قازاندی. عثمان بکک زماننده پک معمور اولدی. عثمان بک بو کوزل بلده بی اوغلو اورخان بکک ویردی. صو باشیلغنه قارده شی کوندوز بکی تعیین ایتدی. قلعه سنک قوماندانلغنه ده آغود آپی موافق کوردی. (این اوکی) دائما عثمان اوغوللری طرفندن اداره ایدلدی. اورخان بک، دها صوکرابا بی عثمان بکک یرینه کچدیکی زمان، (این اوکی) نی اوغلو مراد بکک ویردی. کییکلی بابانک باغ و باغچه سی (این اوکی) نده ایدی.

(قره جه حصار) تکفورینک دوشمانانی ساجچوقی سلطانی غیاث الدین ابن مسعودی کوجندیرمشدی. قوتلی بر ساجچوقی اوردوسی (قره جه حصار) قوشاتدی. عثمان بکک ده معیتی خاقی ایلله بو محاصره یه اشتراک ایتدی. موغوللر تورکلرک بی امان بر دوشمانی حالنده (ارکلی) یه دوغرو ایلریله دیلر. ساجچوقی سلطانی تانار تخریباتنه میدان ویرمه مک ایچین وطنی مدافعه یه قوشلیدی. (قره جه حصار) اوگنده کی اوردونک سردارلغنی

عثمان بکه براقدی . عثمان بك محاصره يي شدتلندیردی ، و براقچ
کون ایچنده قلعه يي آلمایه موفق اولدی .

عثمان بك ، برمدت صوگرا ، قرارگاهنی (اسکیشهر) ه
نقل ایتدی . (قرهجه حصار) ك فتیحی ، حیاتنده مهم بر مرحله
اولدی . اوزمانلر عثمان بك اوتوز بش یاشنده ایدی (۱۹۰) .
(قرهجه حصار) ك فتیحی عثمان بكك پارلاق ظفرلرندن
بریدی . قاردشی آق تیموری سلطان غیاث الدین ابن مسعوده
یوللادی . بو موفقیت اوزرینه کندیسنه سلطاندن طاوول ،
سانجاق کوندرلدی . عثمان بك رسماً بك اعلان ایدلدی .
(قرهجه حصار) عثمان بكك مقرینی تشکیل ایتدی (۱۹۰) .
عثمان بكك ایلک ایشی (قرهجه حصار) ك تزین و اعماری
اولدی . شهر ك کلیساسنی جامعه تحویل ایتدی . کریمیان ولایتندن ،
جوار کویلردن فوج فوج اهالی کلیوردی . عثمان بك (قرهجه
حصار) ده بازار یرلری آچایه ، خالقك تجارتی آرتدیرمایه
چالیشدی .

شرعی ایشلری کورمك ایچین بر قاضییه احتیاج واردی .
بو وظیفه طورسون فقیهه ویرلدی . طورسون فقیه شاعر
و فاضلدی . او صراده پیغمبرك غزالرینه دائر منظوم بر
اثرده یازمشدی . عثمانلی توركلرك ایلک قاضیلری طورسون
فقیه اولدی . عثمان بك نامه (قرهجه حصار) جامعنده

ایلك خطبه بی طورسون فقیه اوقودی . بایرام خطبه سی ده
(اسکیشهر) ده اوقوندی .

(قره جه حصار) کوندن کونه شنلندی . (پورصاق)
صوبی کنارنده حاکم بر نقطه بی اشغال ایدن کوزل بلده تورکارله
دولدی . دایر تورک قیزلرینک بازار یرلرنده دولاشدقلری ،
تارلارده چالیشدقلری کورولوردی (قره جه حصار) ، (اسکیشهر) ،
یک یاقین اولدوغی جهتله ، اکثریا اورخان بکک آت ناللاقمق وبا
اشیا آلمق ایچین (اسکیشهر) بازارینه کیتدیکی واقع اولوردی .
عثمان بک ، استقلانی اعلان ایتدکن سوکرا ، بو
حوالینک قیمتی برقات داها آرتدی . (قره جه حصار) وجواری
عثمانلی تورکارک مرکزینی تشکیل ایتدی . عثمانلی آتلیلری
(بیله جک) باغلرنده ، ساقاریانک صارماشیقلی و چاملی قیالقلری
آراسنده ، طاتلی بر زمزمه ایله آقان چاغلایانلر اطرافنده
ظفردن ظفره قوشدیلر . آرتق عثمانلی دولتی تأسس ایتشدی .
بوحوالیده کی تورکارک حکم سوردکلری یرلرده باغلر ، باغچه لر ،
چیچکلرله مزین وادیلر ، چاملی تپه لر ، سوکودلر آلتندن
ساکتانه آقان یشیل دره لر واردی . بوکوزل بلده لرده غیرمسلم
کویلولر بیله ، تورکارک مردلکی وعدالتی سایه سنده ، مرفه بر
حیات کچیریورلردی . (قره جه حصار) بوتون بو اولککلرک
مرکزیدی . آده بالیلر ، مال خاتونلر ، نیلوفر خاتونلر ، قومرالی

دده لر ، صمصه چاوشلر ، آقچه قوجهلر ، قوگور آلپلر ، قره
 مرسللر ، غازی رحمانلر ، کییکلی بابا لر ، هپ بو بلده لرده
 یاشارلردی . بورالرك بالخاصه قاپلیجه لری مشهوردی . (اسکیشهر)
 یازارینه (بیله جک) دن قابلر ، اطرافدن قوماشلر ، کر میاندن
 امتعه کتیریلیردی . عثمان بك ، ایلک دفعه اولارق ، (اسکیشهر)
 یازارنده رسم وضع ایتشدی . بو یازار قاپلیجه لریاننده قورولوردی .
 (قره جه حصار) ، اوزمانلر ، (پورصاق) صوی کنارنده
 اوفاق جامعی ، غلبه لك چارشیسيله کوزل بر بلده ایدی . بهارک
 فیضلی دملرنده (قره جه حصار) حقیقه بر شعردر . ارغوانی
 افتملر آلتنده سیاه طاشلرله یوکسه لن حصارک ائکی سراپا چیچکله ،
 رنگ و بو ایله دولار . دیک قایالره طیرمانان چاملرک ازلی
 یشیللرکری ، چایرلری رنگدن رنگه صوقان اوفاق تورنجی
 کلینجکلر ، نفتی ، صاری ، لاجورد و مائی چیچکلر (قره جه
 حصار) ی رنگا رنگ برچلنکله احاطه ایدر .
 آقشام ، قلعه نك دیوارلرینی آل بر هاله ایله قوشادیر .
 آشاغیده سو کودلر ، صاری چیچکلر ، صارماشیقلر و کوموش
 یاپراقلی قاواقلر آراسندن پورصاق صوی کاه چاغلایانلر تشکیل
 ایدرک ، کاه سا کن و بیتاب ، قیرلرک صاری و پنبه چیچکلرینی
 اوپه رک یشیل چایرلره دوغرو سوزولور .
 (سو کود) و (قره جه حصار) غازیلر دیاری وقهرمانلریاتاغیدی .

عثمانلی تورکلرک آناطولوده ایلاک یرلشدکلری یر، (بیله جک)
ایله (قرهجه حصار) آراسنده ایدی؛ فقط (بیله جک) ده
یاقین بر محله ایدی. عثمان بک (بیله جک) تکفوریله دائماً
خوش کچینیدی. اونک اک زیاده فنالق کوردیکی، (اینه کول)
تکفوریدی. عثمان بک یازک صیجاق کونلرنده نه زمان یایلايه
چیقسه، (بیله جک) تکفورینه اثوابلرینی واکوزلرینی براقیر،
بوتون اشیایی قادینلرله کوندوریدی. یایلادن دونوشدهده
تکفورده هدیله اولارق پینیر، یاغ، قایماق، تله، خالی، کلیم
وجویر کتیریر، امانتلیرینی اکسیکسنر آلیدی. بوسیدن،
(بیله جک) تکفورینه آرزوسنی آچیقجه خبر ویردی.
— سزدن دیله دیکمز بودرکه، بزم کوچکونمزی یایلايه
کیتدیکمز وقت سزده امانت قویالم.

تکفورده بو آرزوی ممنونیتله قبول ایله دی.

او زمانلر عثمان بک (قرهجه حصار) ده اوطورردی
(۵۶۹۸)، و حربدن زیاده سیاستله بلدملر فتح ایتک ایستردی.
برکون، قاردهشی کوندوز بکله بومسئله یی مذاکره ایتدی.
مناقشه اپی حرارتلی اولدی. کوندوز بک دیدی که:
— نواحیمزده اولانی اورالم، ولایتلری بوزالم.

عثمان بک شو جوابی ویردی:

— بو رأیک فسادی واردر. آنکچونکیم نواحیلریمزی

یعقوب یاقیجق ، بو شهریمز که قره جه حصاردر، معمور اولماز.
اولاسی بودرکم قومشولریمزله دوستلق ومدار ایدلم .

عثمان بکک (بیله جک) تکفورینه قارشى کوستردیکی
معامله ، هپ بو سیاستک نتیجه سیدی . حتی بیله جکلرله
صمیمیتی هر کسک نظر دقتنی جلب ایدردی . بردفعه، کندیسنه
بونک سببى صور دیلر ، وشو جوابی آلدیلر :

— قومشولریمزدر . بز بو ولایته غریب کلدک . بونلر
بزی خوش طوتدیلر . ایمدی بزه واجبدرکم، بونلره حرمت ایدلم.
عثمان بکک (بیله جک) تکفورینه محبتی غیابادی. تکفورک
نه یوزینی کورمش ، نه ده بردفعه اولسون کوروشمشدی .
بونکله برابر، اکثریا دو کونلره کیدر ، آغیر هدیه لر ، خالیلر
وکلیمار ، سورولرله قویونلر کوتورردی . همان هر کس عثمان
بکک ویرکیسنی بکه نیر ، جومردلکنه حیران اولوردی . عثمان
بکک ائمه دش رقیبلری ، تکفورلردی . (بیله جک) تکفوری
بیله ، عثمان بکک بودرجه اعتمادینه قارشى، ینه طیشندن دوست،
ایچندن دوشماندی . عثمان بکی ایلک فرصته بو غمق ایستردی . کذا،
کرمیان اوغلو عایشیر و یعقوب بکلرده عثمان بکی چکه مزلردی .
عثمان بکک دوستی کوسه میخال ، بو سرلره تمامیه واقفدی .
کونلرچدی . (بیله جک) تکفوری اوغلونى اولندیرمک ایسته دی :
(یار حصار) تکفورینک قیزی آلا جقدی . عثمان بکی دعوت

ايچين ميخالى كوندردى، ميخال تىكفورك مقصدينى بىليوردى.
حقى عثمان بىكەدە آكلاتىشدى. عثمان بك ميخالە شو صورتە
تعايات وىردى :

— ميخال. بك قارداشمە بىندىن چوق چوق سلام ايرشدير.
ايشتە شمدى بزدخى يايلايه كيديورز. وهم قاين آنام و خاتونم
دخى قارداشمك خاتونيله بيليشمك اىستر. ايمدى قارداشم خود
بيلور، كرميان اوغلى بزملة نه حالده در. ينه كرم ايتسونلر،
دائم زحمتمز چكه كمشلردر. بو يىل دخى چكسونلر، آتامك
وبنم خوايجلر يىمىز ينه حصاره كوندردەلم.

ميخال، عثمان بكك تىكليفي (بيله جك) تىكفورينه
آكلاتدى، تىكفور سويندى. ميخالى تىكرار عثمان بىكە يوللادى.
عثمان بكك كەسى ايچين بر كون تعيين اولوندى. عثمان بك
تىكفورى قازديغى قويويه دوشورمه يە عزم ايتمشدى. ميخال
بىكە تىكفورە شو توصيه دە بولوندى :

— بزم خاتونلر يىمىز صحرايى او كرنمشلردر. (بيله جك)
طار يردر. دوكونى (چاقير پىكار) نده ايتسون.
تىكفورك مقصدى، اساساً عثمان بكك دوكونە كەسىدى.

راضى اولدى، دوكون خلقى (چاقير پىكار) طوپلاندى.
عثمان بك، وعد ايتدىكى كون، او كوزلر ينى يوكلىدى،
هر زمان كوتورەن قادينلرە وىردى، كچەلرك آراسنە بر چوق

آدام صاقلادی . او کوزلر برایکی قطاردی . اورتالق قاراردی .
عثمان بك قطارلری یوللادی . آقشام قارانلغنده حصاره کیردیله .
بر دنبره کچه لرك آراسندن چیقانلر اورتایه آتیلدیله ، حصارده
ذاتاً آز آدام قالمشدی . هپسیده ، (چاقیر پیکار) ه ، دو کون
یرینه کیتیمشدی .

عثمان بك ، قطارلری یوللادقن صو کرا ، کندیده
حاضر لاندی . غازیلرینی قادین قیافته صوقدی ، تکفورده
خبر یوللادی :

— بونلری آیریجه بر یره قوندورسونلر که ، خاتونلریمز
آنده کی تکفورلری کوروب اوتانمسون .
(بیله جك) تکفوری بوکا داها زیاده ممنون اولدی . اونک
فکر نجه ، عثمان بك قادینلری ده آله کچمش دیمکدی . او کون
قطارلری حصاره کیردیکی ساعتده عثمان بك ده قادینلرله برابر
(چاقیر پیکار) ه کلدی . تکفور سر خوشدی ، عثمان بکی اولامق
ایستر کن ، نهایت کندی اولاندی : بوتون مسافرلر اسیر ایدلدی .
اسیرلر ایچنده دلبر برسیما واردی : اوده (بیله جك) تکفورینک
کلینیدی . بوکلین ، نیلوفر خاتوندی (۶۹۸) .

عثمان بك بو قیزی اوغلو اورخان بکه ویردی . اورخان
بك ، او تاریخده اون دو قوز یاشنده ایدی . آناسی مال خاتون ،
آناسنک پدری اده بالی ، تمیز ایتمش سیالردی . اورخان بك

بر سنه لك اولیدی . زوجہ سی نیلوفر ، پارلاق بر ظفر غنیمتی
اولق اوزره آغوشنه ویرلشدی (۶۹۸). عثمان اوغولارینک بیزانس
باغچه سندن قوقلادقلری ایلك چیچك بوایدی . نیلوفر ، (یار
حصار) ك كلاری آرسینده بوئودی . (یار حصار) بیله جك
یاقینده ایدی . (بیله جك) ، (ویتینیا) نك اك كوزل شهرلرندیدر .
بلده نك یانندن (قره صو) چایی آفار . چای ، کاه یالچین قایالر
آراسندن ، کاه کوموش یاپراقلی سو کودلر آلتندن کچر . اطرافنده کی
اورمانلرده مائیلی یشیلمی آلاجه قارغالرك دالدن داله اوچو -
شدقلری کورولور . (چاقیر پیکار) ، (بیله جك) ك صولنده در .
شهرك آشاغیسنده دائمی بر چاغیلتی قولاققلری اوقشار . باغلری ،
باغچه لری ، دره کنارلرنده داللرندن کرازلر صارقان آغاجلری ،
تپه لرك قویتویشیللر ککرنده آغاجلری سوسله یین آصمالری ، یارلرینك
کنارلرنده یتیشن رنگارنگ چیچکلری کوزلری شنلیدیر .
عثمانلی تورکار (سوکود) اوواسنه یرلشدکلری زمانلر ،
اونلره ایلك خصومتی کوسترن ، (اینه کول) دی . اوتاریخلرده
(اینه کول) بیزانسلیلر آلدن ایدی . تکفورینه آیانیقولی
دیرلردی . عثمان بك نه زمان یایلاغه ویا قیشلاغه چیقسه ،
اینه کول بکی اونی راحتسز ایتکدن ، کوچلرینه هجوم ایله مکدن
کری دورمازدی . عثمان بکك قوتی ، او صرالرده ، (اینه -
کول) تکفورینی آزه جك درجه ده دکلدی . مع مافیہ عثمان بك

بنه اونكه او غراشمقن كرى دورمازدى . قوتجه ضعیف
 اولدوغنى بیلدیكى ایچین سیاستله مرآمه ایرمه یی دوشونوردی .
 نهایت ، برکیجه ، هرشیئی کوزینه آلدی . (اینه کول) ی
 یاغمایه قرار ویردی . اینه کولیلرک جاسوسلری واردی .
 چارچابوق خبر آلدیلر ، عثمان بکک کچه جکی یوله پوصولر
 قوردیلر . عثمان بکک هیچ تردد ایتمه دی ، کیجه نك قارانیلغنده
 (اینه کول) اوزرینه یورودی . عسکرینک هپسی ده یایا ایدی .
 دوشمانک آنسزین هجومی عثمان بکی تلاشه دوشورمه دی . ایکی
 طرف شدتلی مهاجمه لرله چارپیشدی . بو محاربه عثمان بکک
 بای خواجه یی شهید ویرمه سنه سبب اولدی . بای خواجه ،
 قارداشی صارو باتینک اوغلو ایدی . عثمان بکک بوسفر یالکیز بو
 ضربه ایله اکتفا ایتدی . دوندی ، یایلاغنه دوغرو چکیلدی ،
 کیتدی .

(اینه کول) ایچین بوایلک ، صادمه ، برفلا کت مقدمه سیدی .
 عثمان بکک سونجلی رؤیایر کوریوردی . شیخ اده بالینک کندیسنه
 بکک مژده سی ویردیکی تاریخدن اعتباراً عثمان بکک عزمی
 وامللری ده یوکسلیدی . آتاسندن قالان قیلیجی قومرال دده یه
 ویردیکی کوندن صو کرا طالعی کیتدکجه آچیلدی . هدفی معیندی :
 اینه کول .

عثمان بکک کندینی و قبیله سنی ازعاج ایدن بو نامرد دوشمانی

برآن اول محو ایتک ایستیوردی . فقط قوتی آزدی . او ،
 بو آزلغی کیجه نك قارانلقریله تلافی ایتک فکرنده ایدی .
 بر کیجه ، تکرار (اینه کول) اوزرینه یورودی ، ایچری
 کیره مه دی . مع مافیه ، یاننده کی (قولاجه حصار) ی یاغما
 ایتدی ، کوینی آتشلره یاقدی . خلقی قیلیجدن کچیردی .
 بوتجاوز روم تکفورلرینک عثمان بکه قارشى برلشمه لرینه سبب
 اولدی . (قولاجه حصار) ک فتیحی (۶۸۵) (اینه کول)
 تکفورینی تلاشه دوشوردی . اوزمان داها (قره جه حصار)
 آلینامشدی . درحال (قره جه حصار) تکفورینه قوشدی :
 — نه طورر سنکم سنی و نسلکی اسیرلر ایدرلر ، و هم
 بو ولایتی بزم آلیمزدن آلورلر ، خراب ایدرلر . کندولری
 خود بر صوفی ترکان دکالردرکه ، بزدهی انکله معامله ایدیدک .
 ایمدی بونلری بوولایتدن چیقارمزسکز و یاخود قوومازسکز
 آخریشمانلق فائده ویرمز .

دیدى . (اینه کول) تکفورى بوتون روملری برلشدیردی .
 عثمان بکه قارشى قوتلی بر اتفاق وجوده کتیرلدى . عثمان بک
 غازیلری طوپلادی ، (ا کینجی) یه کلدى ، (طومانلیچ)
 بلنی آشدی ، ایکی طرف شدتلی بر صورتده چارپیشدی .
 بو مجادله ده ایکی مهم آدام تلف اولدی : عثمان بکک قاردهشی
 صاروباتی ، قره جه حصار تکفورینک قاردهشی قالا قوز . « صارو -

بائينك قانك دو كولىكى طوپراقلرده بر چام آغاجي يتيشدى كه،
اوکا « قندیللی چام دیرلر . شیمدی آنده کاه کاه بر شعله
کورینور » (۱) . او تاریخدن صوگرا (۶۸۸) (قرهجه
حصار) ، (یله جك) ، (یار حصار) بری بری آرقاسنه سقوط
ایتمیشدی . (یار حصار) سقوط ایتدکدن صوگرا عثمان بك ،
طورغود آلی (اینه کول) اوزرینه کوندردی . شیمدی
تام صیراسیدی ؛ دوشمانك کیمسه ایله اتفاقنه میدان ویرمه مک
لازمیدی . عثمان بك بوتدیرنده موفق اولدی . طورغود آلپ
(اینه کول) ی چویردی ، عثمان بك ده آرقاسندن يتيشدی .
غازیلرک (اینه کول) کیریشلری پک فجیع اولدی : سنه لردن
بری تورکک اقبالنه مانع اولمایه چالیشان تکفور ، بر لحظه ده
حیاتنک و اقبالک سوندوکنی کوردی (۶۹۸) .

عثمان بك در حال اعماراته باشلادی . آلینان حصارلری بکلره
ویولداشلره آیردی . (اینه کول) ی ده طورغود علی یه ویردی .
بو دیاره (طورغود ایلی) دنیلیدی . (تاریخ آل عثمان)
دیورکه : « شیمدی دخی اول عزیزک آدی آکیلور . اینه کول
یوره سنده کویلری وارکم کا طورغود ایلی دیرلر » . اورخان بکک
بابالرله ، أرنرله مناسباتی ، طورغودا یلنده ، او تاریخدن صوگرا ،
کیتدکجه آرتدی . (اینه کول) جوارى کوزل کویلرله زینت

بولدی : بابا سلطان ، قوزلواورن ، بك يكت ، اده بك ، آهو طاغلری ، بوغازاوارلی عثمانلی تورکلر خوشنه کیدردی . کاه عثمان بکک معیتده ، بیزانس طوپراقلرینه دوغرو ایاریله مک ، کاه یالچین قایالر اوزرنده حصارلر فتح ایتک ، چیچکلی اویوکلر اطرافنده آت اوینا تمق ، اونلر ایچین بویوک بر ذوق یرینه کچردی .

(یکیشهر) ک فتحی (قرهجه حصار) ی اهمیتدن دوشوردی . عثمان بك اکثر زماننی (یکیشهر) ده کچیریدی . زوجه سی مال خانون ایله قاین آتاسی اده بالی ، اوغلو علاءالدین (بیله جک) ده ، کندی ده اکثریا (قرهجه حصار) ده ، بعضاً (سوکود) و (یکیشهر) ده اوطورردی .

عثمانلی تورکلر اولکهلرینی بویولتمک ایچین کیجه کوندوز چالیشیورلردی . بر کون ، عثمان بك (یکیشهر) ده غازیلری اطرافنه طوپلادی . کندیلرینه دوشمانک احوالنی اوزون اوزادی آ کلا- تدی ، صوک سوزی ده شو اولدی :

— ها غازیلر ، سزی کورهم ، دین یولنه نیجه تیره نیرسز ؟ آجه قوجه ، قو کور آلب ، غازی رحمان و کوسه میخالدن مرکب مجاهدلر زمره سی ایچنده اوغلوده واردی .

آجه قوجه ، عثمان بکک صمیمی آرقداشلر ننددی . عثمان بك ، اونی اکثریا اوزاق سفرلره اوغلو اورخان بکله برابر

یوللاردی . او کوندده اویله یاپدی . اورخان بکک معینه آقچه
 قوجه یی ویردی . (قره جیوش) و (قره تکین) حصارلرینک
 فتحنه یوللادی . اورخان بکک ، داها اول ، (قره جه حصار)
 چاودار تاتارلرینک هجومی ، (اسکیشهر) ده آتی ناللاتیرکن
 خبر آلمش ، اونلری (اویناش حصار) نده بوزمشدی .
 اورخان بکک آقچه قوجه دن حقیقی بر یولداشلق کوردی .
 (قره جیوش) ه اوچ قولدن هجوم ایتدی . بر قول حصار
 کیردی ، بر قول دره یه صاقلاندی . حصاره کیرنلر دوشمانلار
 بر مدت چارپیشدیلر . بر آرزو کرا قاچدیلر ، دوشمان آرقالری
 بر اقمادی ؛ فقط دره یه صاقلانان قولدن خبری یوقدی . بوقول
 چارچابوق ایلریله دی . قلعه دن چیقان دوشمان عسکرینک آرقاسندز
 حصارک قاپیلرینی قاپادی . دوشمان ایکی آتش آراسنده پریشان اولدی
 آقچه قوجه (عیان ، صبانجه کولی) نک آقدیغی یره ، (بشر
 کوپرو) طرفلرینه کلدی ، (بورغازجق) ده یرلشدی
 اورخان بکک ده (یکیشهر) ه ، باباسنک یاننه کلدی . قو کو
 آلب (آق یازی) ایله ، آقچه قوجه ده (ایزمید) له مشغولدی
 « بوغازیلر شویله طورشدیلر که ، کیجه لرده اویقواو یومازلردی
 و کوندوزده آت آرقه سندن اینمزلردی . »
 تورکلرک بواننده آلمق ایسته دکلری اوچ مهم بلده واردی
 ایزنیق ، بروسه ، ایزمید .

اساساً (يکيشهر) آليندقدن صوگرا ، (ايزنيق)
 ايچين تهلكه باشلامش ديمکدي (۷۰۴) . تورکلر ايزنيق
 اوکلرندە دائماً کورونورلردی . نهايت شهرک قاپیسی تحکیم
 اولوندى . ايچنده کيلرله کونلرجه جنک ايدلدى . اطرافى کاملاً
 آليندى . (ايزنيق) ى کوزه تمک ايچين حاکم تپه لره حصارلر
 ياپيلدى ، ايچنه اۇلر قونولدى ، آلينان يرلر « تيمار اۇرلرینه
 ويرلدى » . (ايزنيق) ى کوز اوگنده بولوندورمق ايچين
 (قره جيوش) ه قوت کوندرلدى ؛ بوراسى (ايزنيق)
 محاصره سنه اشتراك ايدە جکدى . فى الحقيقه (قره جيوش) ده کى
 اۇلر آرا آصيراديشارى چيقارلر ، (ايزنيق) باغچه لرینی خراب
 ايدرلر ، خاقنه راحت ويرمزلردى . ايزنيق محاصره سى
 سنه لرجه سوردى .

آرتق عثمان بك سفرلره اشتراك ايتيوردى (۷۴۵) .
 بويوك اوغلو علاءالدين بکله برابر (يکيشهر) ده اوطورييور،
 يوتون سفرلره آقجه قوجه لر ، قوگور آلپلر ، صمصه چاوشلرله
 برابر کوچوك اوغلو اورخان بکى کوندريوردى .

عثمان بك زمانده بيزانس ايمپراطورى ، ايکينجى آندرو -
 نيقوسدى (۱۲۸۳ - ۱۳۳۸ م) . آندرونيقوس ، سکزنجى
 ميخائل پاله اولوغوسك اوغليدى . زمانده ، آناطولو پریشان
 برحاله ايدى . باباسى ميخائلك دورنده آناطولونك (ويتنيا)

و (فیریکیا) کی طاعلق یرلر اهاالیسی ویرکیدن معافدی .
 بوکا مقابل اونلرده یرلی عسکر تشکیل ایدرلر ، مملکتک
 مدافعه‌سنه چالیشیرلردی .

ایمپراطورلغک حدودنده کی حصارلرک قوماندانلری فضاه
 اولارق آیلقدی آلیرلر ، اراضی و غنائم خصوصنده امتیازلر
 مالک بولونورلردی .

میخائل ، خزینهنک ضرورتی کورونجه ، قوماندانلرک
 آیلقلرینی قالدیردیغی کی ، اونلردن فضله ویرکیلرده آلمایه‌باشلادی
 کذا ، اهاالینکده ویرکیلرینی آرتدیردی . اودرجه‌ده که ، ولایتلر
 آرتق حکومتدن امدادشویله دورسون ، کندیلرینی بیله مدافعه‌دن
 عاجز قالدیلر . ایمپراطور ، تورکلرک کوندن کونه ایلریله دکلرینی
 کوریوردی . حتی بونک ایچین قارشیلرینه مقتدر برجنکاور
 (فیلانتروپینوس) ی کوندرمش ، نتیجه‌ده اونیده یاردیمسز
 براقشدی . فیلانتروپینوس ، ارزاقدن ، سلاحدن و پارادز
 محروم قالدیغی کورونجه ، چاغیریلماستی ایسته‌مش . حکومت بو
 حرکتی اهانت تلقی ایدر اتمز ، اوده عسکرلرینک آرزوسن
 تابع اولارق ، کندیسینی ایمپراطور اعلان ایتدیرمشدی . ا
 صراده (ساقاریا) نک طاشماسی بیزانس ایچین آیری بر فلاکت
 اولدی . ساقاریا ساحلنده کی حصارلری کاملاً صوباصدی . شهر
 بر آی صوکر ایاغنه چکیلدیکی زمان ، چامورلری وقوماری د

برابر سور و کله دی ، ساقاریانك درینلکی آزالدی . آرتق اوندن
صوکرانه ری کچمك ده قولایلاشمش ، سرحد حصارلرنده هیچ
بر محافظه قوتی قالمامشدی .

بیزانس ایمپراطورلغك ضعفی ، آناطولوده کی ایالتلرینك
حصارلرندن باشقه معنوی هیچ بر مدافعه قوتی بولونمیشی ،
عثمانلی توركلرك نظرلرینی بیزانس افقلرینه جلب ایتدی . فقط
بیزانس طوپراقلرینه کوز دیکن یالکیز عثمانلی توركلر دکلدی ؛
آناطولوده ، ساچوقیلرك انقراضی اوزرینه ، استقلاللرینی اعلان
ایدن سائر تورك بکلری ده ایمپراطورلقدن برر پارچه یر قوپارمق
ایستیورلردی . کر میان اوغلو علیشر بك (مندره س) اوزرنده
کائن (تیرسپولیس) ی آلمش ، (آلاشهر ، فیلاده لفی) ی قوشا-
تمشدی . آیدین اوغلو (سارت) شهرینی آلمشدی . اسفندیار اوغلو
(کنگری یی) ی قوشاتیوردی (۷۰۳ هـ) .

ایمپراطور بوتون تورك بکلرینه قارشى بیزانس طوپراقلرینی
مدافعه دن عاجزدی . تام او صراده ایدی که ، روژه دوفلور
ایمپراطور آندرو نیقوسه مراجعت ایتدی . روژه ، جسارتی
وشجاعتیله مشهوردی . سیجیلیا قرالی (فره دریق) ه ، تامل
شوالیه لرینه بر مدت خدمت ایدن بو آدام ، ایشسز کوچسز
قالنجه ، یکر می آلتی کمی و سکز بیک عسکرله ایمپراطورك
خدمتنده بولونمای تکلیف ایتمشدی . معیتنده کی عسکرلر

مغربیلرله اسپانیوللردی . بونلره (قالاطان) یعنی (قاطالونیالی) دیرلردی .

آندرونیقوس ، دوچار اولدوغی تهلهکدن قورتولمق ایچین بو تکلیفی قبول ایتدی . روژه یی یکنلرندن بریله اولندیردی . عهدہ سنه (مه غادوقس ، غراندوق) رتبه سنی ویردیکی کبی ، معیتده آلانلردن و تورقوپوللردن بر قطعه تعیین ایتدی . قاطالانلر ، آیدین ، صاروخان ، منتشاء ، قره سی و قارامان اوغوللریله اوغراشدیلر . بونکله برابر ، قاطالانلرک غالبیتی بیزانسلیلرک اصلا ممنونیتلرینی موجب اولمادی ، هپسی ده بوجسور عسکرلرک بر کون کندی مملکتلرینی ده ضبط ایده جکلرندن قورقدیلر . اوصیراده ، بولغارلرک بیزانسه هجومی ، آندرونیقوسی تکرار قاطالانلره مراجعته مجبور ایتدی . فقط بو فرصتدن استفاده ایدرک قاطالانلری روم ایلیده کی قطعه لرینه تقسیم ایتک ، اونلری بوصورتله پارچالامق ایسته دی . قاطالانلر ایمپراطورک مقصدینی آکلادیلر ، تورکلردن آلدقلری یرلری کاملاً تخریب ایتدیلر . اوردولرینی پارچالامق و بیزانسه ارزاق و سائره کوندر - تمه مک ایچین (چاناق قلعه) بوغازینی طوتدیلر ، (کلیبولی) یه یرلشدیلر . ده ها صوکر ، روملرک خدعه لرندن دلگیر اولدیلر ، اونلره قارشى اك مدھش محاربه لردہ بولوندیلر .

قاطالانلر ، آناطولوده کی تورک بکلریله مشغول اولدقلری

صیراده، عثمانلی تورکلر فورطنه نك كچمه سنی بکلیورلردی . (قره جه .
حصار) ده، ساجوقی انقاضك بر كوشه سنده تشكك ایدن یكى حكومت ،
بویوك بر قوته قارشى دورا بیله جك حالدده دكلدی . بویوكنج
وقابلیتلی خلقك، دهانشو و نماز ماننده، بویوك بر تهلكیه آتیلاماسی
موافق دكلدی . عثمانلی توركلر بونقطه لری دوشوندیله .
قاطالانلرك (کلیولی) یه یرلشمه لرندن برسنه صوكره، بیزانسی
قارشى یاپیلان مهاجمه لردن استفاده ایتمه یه باشلادیله .

قاطالانلرك (کلیولی) یه یرلشمه لرینك سبیلری واردی .
ایمپراطور میخائل پاله اولوغوس ، قاطالانلرك رئیسى روژه یی
(ادرنه) ده اولدورتمشدی . قاطالانلرك (کلیولی) ده عقد
ایتدكلری بر اجتماعده رئیس لرندن به رانثره برنطق ایراد ایتدی .
بونطقده شو سوزلرده واردی : « آناطولوی سلاهمزك قوتیا
توركلرك ظلمندن قورتارمق لغمز بزم ایچین نه درجه ابدی
برشان و شرف بخش ایدمك ، و نامزى اك اوزاق خاقلریمز
قادر انتقال ایتدیرمك بر حادشه در . بونی بزم بومرته نارو
معامله لرده بولونان روملرك ده حیرتله تقدیر ایتمه لری غیرقابلدر
بوخائنلر شیمدی مظفر قوللریمزك قوتنى آ کلا سینلر ، چونك
اوقوللری كندی مدافعهلری ایچین محافظه ایتمه یی بیله مه دیله
اونلر، هیچ شبهه سز بزم ایچین كمیلریمزه بینوب (سیجیلیا) ی
کیتمكدن باشقه چاره قالمادی صانیرلر . اوپله ظن ایتسینلر

بز، هر نه صورت له اولورسه اولسون (کلیولی) بی اله بولوندورمالی بز .

قاطالانلرک بوانتقام حسلرینی ایکنجی آندرونیقوسک سلطنت شریکی و اوغلو ایمپراطور دوقوزنجی میخائل ده آکلادی . فقط هیچ برشی یایمایه قادر اولامادی (۱۳۰۷ م ، ۷۰۷ هـ) . قاطالانلر مرمره و تراکیا ساحلرینی پریشان ایدیورلردی . فقط بوسفر، قاطالانلرله آناطولوده کی تورکلرده برلشدیلر، (غانوس) طاغنی آلدیلر، بورالرده اوردوگاهلر قوردیلر، تورکلرک بر قسمی ده (اکنز امیل) ی آله کچیردیلر . ایمپراطور بومهم بلده بی تورکلردن آلق ایچین چوق چالیشدیسه ده، صلا موفق اولامادی . بوصیراده آناطولودن ملک اسحاق قومانداسنده ایکی بیک پیاده و سکزیوز سواریدن مرکب آیدین تورکلری کلدی ، اونلرده قاطالانلرله برلشدیلر . بوقوت ، قاطالانلرک جسارتی برقات داها آرتدیردی (۷۰۸ هـ) . پاپالر خریستیانلرک تورکلرله برلشمه لرینی چوق قبیح ایتدیلر . فقط بو ، یالکز پاپالره دوقونمادی ؛ ایمپراطور آندرونیقوسک ده جانی صیقدی . ایمپراطور هر طرفدن تورک هجومه معروض قالمشدی . کذا (ویتینیا) ده ، عثمانلی تورکلرده بوش دورمیورلردی .

آندرونیقوس، بوا اتحاد مانع اولق ایچین، تدبیرلر دوشوندی . ملک اسحاقی آله ایتدی . متقلرندن ایریلاجق اولورسه ،

کندیسنه ساجچوق بکلرندن مسعودك قیزی ویره جک
 سویله دی . مسعود ، ساجچوق سلطانلردن عزالدینك اوغلیدی
 عزالدین ، قاردهشی رکن الدین قیلیج آرسلانلار قاجش ، (علائیه)
 طریقیه (استانبول) ه کلشیدی . اوزمان ایمپراطور ، میخائیل
 پاله اولوغوسیدی . عزالدینك والدهسی خریستیاندی . کندی
 خریستیانلغه تمایل کوستردی . بویله اولدوغی حالده ، بیزانسلر
 بر دورلو یارانامادی . ایمپراطور عایهنده عصیان چیقاراجق دی
 اتهام اولوندی . (اینوز) قلعه سنه حبس ایدیلدی . بالا آخر
 جنکیزك حفیدی برکه خان طرفندن قورتاریلدی ، وقریمه کیتدی
 صالتق سلطانله برابر دوبریچه یه کلن تورکلرده عزالدین
 آرقاسندن کیتدیلر .

عزالدین فرار ایدرکن ، والدهسی ، زوجهسی وایک
 اوغلونی ایمپراطور نزدنده براقشیدی . اوغلارندن بری تنه
 ایدرک (ملك قسطنطین) نامنی آلدی . دیکری ، مسعود ، باباسنا
 وفاتندن سوکرا (قسطنونی) دن کچرکن زوجهسی و کریمه
 ایمپراطور آندرونیقوسه رهن براقیدی . ایشته ، ایمپراطور
 ملك اسحاقه ویرمک ایسته دیکی ، بو قیزدی .

ملك اسحاق ، ایمپراطورک بوتکلیفه صورتا راضی اولدی
 فقط بونی قاطالانلر خبر آلدیلر ، ملك اسحاقه صورددیلر
 اسحاق ، بو حیلهدن مقصدی متفقاری اولان تورقوپوللرک ایمپراطور

نده بولونان چولوق و چوقلرینک قورتار یلماسی مقصدینه مبنی
دوغنی سویله دی . قاطالانلر ، تورکلر و تورقوپوللر ،
مره ساحلارینه دوغرو، یکی ظفرلر پیشنده اوزاقلاشدیلر .
بیزانس ایمپراطورلخی هر طرفدن تورک تجاوزلرینه معروضدی .
طولوده (آیانلوغ) تورکلر طرفدن آیینمشدی . عثمانلی تورکلر
یزنیک) و (پیتیا) حوالیسنی ضبط ایدیورلردی (۵۷۰۸)
سأبوتون تورکلک بیزانسه هجوم ایدیورلردی . تورقوپوللر ، بیزانس
متمنه کیرن تورکلردی . قاطالانلرده ، (الموغابار ، المغربی)
له یاد اولونیورلردی . شوخالده اونلرکده اصلاً سیجیلیالی
بلر اولدقلرینه حکم ایدیله بیلیردی (۱) . کیون دیورکه :
« قاطالانلردن و اسپانیوللاردن ترکب ایدن بوقافله نك الك
یعلری کندیلرینه (المغربی) دیورلر .

دوقاس ، بونلرک غوطلردن ، پاخیمه ریس ایسه عربلردن
دوقلرینی سویلیور . ملی و دینی غروره رغماً بنده صوکنجی
ره حق ویریورم . »

تورکلر قاطالانلرله برابر مرمره ساحلرینی کاملاً آلد
یلر . (رودوستو) ، (مهریت) ، (سیلیوری) ، (تونا) ،
فیتیا) ، (مه غاریس) ، (کلیولی) ، (اکزامیل) ،
کلرله قاطالانلر آینه چکدی . بوضورتله تراکیا ساحلی ،

آناطولودن کچہ جک تورکار ایچین بوسبوتون آچیلدی .
 قاطالانلر، تورکارلرہ برابر بوموفقیترلی قازاندقدن سوکرا،
 (آتہ) دوقہ لغنہ کادیلر . (آتہ) اوردوسنی محو ایتدیلر ،
 شہرہ کیردیلر . بورادہ ، بونیفاسی کندیلرینہ حکمدار انتخاب
 ایتدیلر .

تورکارلرہ تورقوپوللر، قاطالانلرک (آتہ) یہ یرلشدکلرینی
 کورونجہ ، اورادہ قالمق ایستہ دیلر . قاطالانلر اونلرہ اراضی
 و املاکدہ ویرمک ایستہ دیلر . تورکارلرہ تورقوپوللر قبول
 ایتہ دیلر، کادکلری یولدن دوندیلر ، ہر طرفی تاراج ایتدیلر
 (۷۱۳ ھ) . ما کہ ونیایہ کادکلری زمان ، تورقوپوللر ملک
 اسحاق قومانداسندہ بولوندقلری حالہ صرب قرالنک خدمتہ
 کیردیلر . تورکاردہ خلیک معیتندہ آناطولویہ دونمک، اورادہ
 چوجوقلری و عائلہ لریلہ غنیمتلرینی پایلاشمق ایستہ دیلر .
 فقط بونک ایچین پک چوق زورلق واردی : اول (خریستو
 پولیس) کچبدندن کچمک لازمدی . سوکرا دہ ، (چاناق قلعہ)
 بوغازینی کچمک ایچین کملرہ احتیاج واردی .

ایمپراطور آندرونیقوس ، تورک اسمنی ایشیتمک بیلہ
 ایستہ میوردی . خلق دہ ، ایمپراطورلردہ ، تورکلردن اودرجہ
 ییلمشاردی کہ ، لوبونک تعبیری وجہ ایلہ : « قاپلانلرک و آرسلانلرک
 اوگندن اک ضعیف حیوانلر اورمانلرہ ناصل قچارلرسہ ،

لرده توركلرك او گنده اويلا قاجيشيورلردى . «
 خيلاك معيتنده كى توركلر بيك بش يوز كشيدي . ايكنجى
 دروني قوس ، توركلرك ياقلاشد قلرينى خبر آلير آلمانز ، اونلرى
 كمتدن بر آن اول چيقارمق ايسته دي . اياقلىرى يغمما ايتمه مك
 طيله ، كنديلرينه هر نه ايسترلر سه ويره جكنى وعد ايتدى .
 ون كچيدلرى آچدى . كميلره بينمه لرني تأمين ايتدى .
 ساندانلرندن سه ناخيريمى اوچ بيك كيشى ايله يارديمه كوندردى .
 صيراده توركلر (كليولى) يه ككشاردى .

سه ناخيريم ، بو بر آووج توركى كورونجه ، اونلرى صاليو يرمه يي
 داييلغه يديره مه دي . توركلرى اولدورمه يه قرار ويردى .
 ط توركلر ، بوتديرى در حال آكلاديلر ، كنديلرينى طوپلاديلر .
 ن جوارده بر قلعه آلد ايتديلر ، قوتليجه يرلشديلر ، قانلرينك
 ك داملاسه قادار مدافعه يه قرار ويرديلر . سه ناخيريم ، توركلره
 شى هيچ بر موفقت آلد ايدمه دي . ايمپراطوره يازدى ،
 چ بر جواب ككه دي .

توركلر ، تحكيما تى وقوتلرينى كيتد كجه آرتديرديلر . آنا طولودن
 - ادقوتلرى آلديلر ، روملره اوزون مدت قارشى قوياجق بر
 نه كلديلر (۷۱۴ هـ) .

كنج ايمپراطور ميخائل توركلره قارشى حركت ايچين
 سندن امر آلدى ، ايمپراطورلغك كزیده عسكرلرينى

طوپلادی. ایچلرندە کوبولورده واردی. قسماً اعظمك سلاحلری اوراق وبلدن عبارتدی. میخائل، کندیسینی قوجه بر اوردونك باشنده کورونجه، قطعياً مظفر اولاجغنه و توركلرك بیزانس بایراقلرینی کورور کورمن قاجقلرینه ذاهب اولدی. عسکرلرینی غیرمنتظم بر صورتده ایلری یوروتدی. توركلر هیچ قورقما دیلر، حصاردن چیق دیلر، دوشمانه قارشى یورودیلر. میخائلك معیتندە کی کوبلو آلایى، توركلری کورر کورمن دوگما قال دیلر. تورك سواریلرینك هجومی بونلری بر آنده محو ایتدی. ایمپراطورك منتظم عسکرلری بیهوده یرە چابالادیلر، قاجانلری دور دور مق ایستە دیلر، بر درلو موفق اولامادیلر. توركلر، ظفرلرینی بر اقامدیلر، ایمپراطورك چادیرینه قادار کیر دیلر. مقصدلری، ایمپراطوری یاقالامقدی. فقط ضابطلری کندیلرینی فدا ایدەرك اونى قورتارمشلردی. ایمپراطور میخائل آغلایه آغلایه قاجش، حیاتی آنجق (ادرنه) یه صیغینارق محافظه ایدە بیلیمشدی.

توركلر، روملرك اور دوگاهنی یاغما ایت دیلر. ایمپراطورلغك سانجاغنی آلدیلر. ایمپراطورك اكر طاقملرینی ضبط ایت دیلر. پك چوق پارا، مجوهرات، حتی برده ایمپراطور تاجی بول دیلر. تاجی خلیله ویر دیلر. خلیل تاجی باشنه کچیردی. سلطنتنی غائب ایدن ایمپراطورلر حقنده مستهزیانه سوزلر سویله دی. بو ظفرله، بوسبوتون حاکم اولونجه، تراکیایی تخریبه باشلادی.

روملر تورکلردن او درجه ییلمشلردی که ، بو حالله نهایت ویرمک ایچین اولرندن چیقمايه ، حتی تارلارینی سورمه یه جسارت ایدهمیورلردی . هر طرف محسولاسزدی . تحصیلات یوقدی . یکی قوت طوپلامق امکانشزدی . سرای ، اندیشه ایچنده ایدی . نهایت پاله اولوغوس خاندانندن فیلیس کندینی اورتایه آتدی ، تورکلره قارشى یوروکم ایچین ایمپراطوردن مساعده ایسته دی . ایمپراطور ایکنجی آندرونیقوس اولاهیرت ایتدی؛ فقط فیلیس ک فضیلتلرینی بیلدیکی ایچین راضی اولدی . فیلیس منتظم عسکرلر یتشدیردی . عسکرلرینک انتظامنه قائل اولور اولماز سفره باشلادی (۷۱۵ هـ) . خلیک (بیزی) ویزه ، طرفلرنده مشغول اولدوغنی خبر آلدی ، رجعت یولنی کسمه یه قرارویردی . تورکلر روملری کورونجه ، ایلك حملاهده شاشیردیلر؛ فقط چار چابوق کندیلرینی طوپلادیلر . اولا آرابالرله برطابور یاپدیلر ، آغرلقلرله اسیرلرینی بورایه دولدوردیلر . صوکره محاربه نظامی آلدیلر ، هجومه باشلادیلر . محاربه ایکی طرفندن ده غایت مدهش اولدی : روملرک صاغ جناحی بوزولدی ، بو جناحده رجعت بیله باشلادی . فیلیس بونک فرقه واردی . امدادلرینه قوشدی . بوسفر تورکلر چکیلمه یه باشلادیلر . بو حال روملرک جسارتلرینی آرتدیردی . تورکلر کلیولی شبه جزیره سنه ، (تراکیا کرسونه زوسنه) طوپلاندیلر . ساحل کیملرله دولو ایدی .

بوکملر تورکلرک هم رجعتلرینه ، همده آناطولودن امدادقوتی
 آلمالرینه مانع اولدی . وضعیت جداً مشکادی . بو بر آوج
 تورک ، هر طرفدن ، دکزدن ، قره‌دن دوشمانله چویرلمشدی .
 فقط اونلر جسارتلرینی ینه قیرمادیلر ، شهره کیردیلر ، دوشمانه
 تسلیم اولمقدنسه ، شهرک انقاضی آلتنده اولمیه قرار ویردیلر .
 او اشناده‌ایدی که ، ایمپراطور ، دامادی صرب قرالنه مراجعت
 ایتدی . صرب قرالندن ایمپراطور آندرونیقوسه ایکی بیک صرب
 امداد قوتی کلدی . فیلیس درحال تورکلرک صیغیندقلری شهری
 محاصره‌یه باشلادی . آیدین تورکلری قانلرینک صوک داملاسنه
 قادار چارپشدیلر . سورلری و شهری ، فیلیس حرب آلتلریله او
 درجه شدتلی دوکیردی که ، دیوارلر هر طرفدن چوکه‌یه
 باشلادی . تورکلر ییلمیورلردی . اسکیسندن داها زیاده شدتله
 مدافعه ایدیورلر ، تسلیم اولمای عقللرینه کتیرمیورلردی . نهایت
 فلاکتک محقق اولدوغنی اونلرده آکلادیلر . فقط هرشیئی
 کوزلرینه آلدیلر ؛ کیجه یاریسی دوشمانه هجوم ایدهرک دوشمان
 خطنی یارمایه قرار ویردیلر . اولا روملرک قرارگاهنه هجوم
 ایتدیلر ؛ بونده موفق اولامادیلر . نهایت ، برکیجه یاریسی
 قلعه‌دن چیقمایه ، روملردن داها زیاده انسانیته‌لی بیلدکلری
 جنویزلره التجایه قرار ویردیلر .
 فی الحقیقه کیجه یاریسی ، روملرک خبری اولمادن ، قلعه‌دن

چیقدیلر. فقط بوجیقیش بدبخت تورکلرک فلاکتیله نتیجه لندی. تورکلرک روملردن قاچانلری شهادت مرتبه سینه ایردیلر؛ جنویزلرک ناموسنه التجا ایدنلری ده اسارت فلاکتیه اوغرا دیلر (۷۱۵ هـ).

عثمانلی تورکلر بوسیرالرده (ایزمید) طرفلارینه آچقه قوجه ایله غازی رحمانی و قره مرسل یوللا مشلر؛ کندیلری ده (بروسه) نی آلمایه حاضر لاشلردی.

فی الحقیقه (بروسه) آله ایدیله جک اولورسه (ایزمید) ک آلیناسی ده قولایلاشه جق، اس الحركات هدفه داها زیاده یاقلاشدیرلش اولاجقدی. (بروسه) تکفوری تورکلره قارشى دائما خصومت کوستیردی. بر دفعه سنده، (آطرانوس) و (کستل) تکفوریله برلشمش، عثمانلی تورکلره هجوم ایتشدی. نهایت (قویون حصار) محاربه سی (بروسه) تکفورینی حصارینه قاپانمغه مجبور ایتدی (۷۱۷). عثمانلی تورکلر (بروسه) نی تورک شهرى کورمک ایسته یورلردی. تورکلر اوزمانلرده بورایه (بروسه) دیرلردی. شهرک آدینی شیوه لرینه ده او یغون بولورلردی. آلینان دیکر شهرلره ایسه، هپ تورک آدلری قویمشلردی: (قره جه حصار)، (اینه کول)، (بیله جک)، (سو کود)، (اسکیشهر). روملر بورالره (مه لانکیا)، (آنکه لوقوما)، (به لوقوما)، (ته وازیون)، (دوریه ثون) دیرلردی.

عثمان بك (بروسه) یی هر نه صورتله اولورسه اولسون
آلمايه قرار ویردی .

فقط او دورده ، آ ز بر قوتله ، نقصان بر مالزمه ایله
(بروسه) نك فتحي قولای دکلدی . بونی عثمان بك ده آکلادی :
— بوگا صبر کر کدر .

دیدى ، (روسه) اطرافنه حواله لریا پیلمايه باشلادی . فی الحقیقه ،
(بروسه) یی آلابیلک ایچین حواله یایمقدن باشقا چاره یوقدی .
طوپله ، تفنکله آلینامایان قلعه لرك ، حاکم نقطه لرینه قوله لر یایمقله ،
ایچنه ارلر قویمقله ، شهرى آجلقدن بزديرمکه آلیناسی قابلدی .
عثمانلى تورکلر اول (قاپلیجه) طرفنه بر حصار یایدیلر . بورایه
عثمان بك قارده شک اوغلو آق تیموری مأمور ایتدیلر ، یانه ایجه
برقوت براقدیلر . آق تیمور غایت جسوردی .

بر حصارده طاغ طرفنه یایدیردیلر . اورایه ده بالابانجی
تعین ایتدیلر . قاپلیجه حصاريله طاغ حصارى بر ییلده
یایدی (۷۱۷) . آرتق تکفور کده ، خلغنک ده (بروسه) دن
طیشاری چیقمالری امکانسزدی . یوللر تماماً کسيلمشدی .
شهره ارزاق تدارکی قابل دکلدی . طیشاریدن امداد آلمق
ایچین ده هیچ بر چاره یوقدی . آ ز برقوت ، (بروسه) یی قوشاتمق
ایچین کافیدی . بوتون قوتلر (یکیجه) لرك ، (آق حصار) لرك
(آق یازی) لرك ، ضبطيله مشغولاردی . غازی رحمان (یالاق

اووه ، یالوه) او کنده استانبول تکفورینک امداد قوتلرینی باصیوردی . قره مرسل (ایزمید) ساحلارینی آلیوردی . صمصه چاوش ، اورخان بك معیتند ایدی . اورخان بك (قره تکی) ك آدیله شهرتله ن حصار او کنده ایدی . بوتون بوغیرتلر (بروسه) اطرافنی تمیزله مک ، اورالرده هیچ بر دوشمان قوتی بر اقامق ، ساقاریا ساحلارینی ، منبت اووالری ، فیضلی صحرالری تورک ایللارینه قاتمق ایچیندی . بو وظیفه ده ارلر ، ارنلر ، بکلر ، اخیلر ، عین عزمی ، عین ایمانی طاشیورلردی . سلاجوقی خانداننك انقرا ضندن صوکرآ تورکک یاشامق عزمی شدتله اویانمشدی .

مع مافیله تورک نسلنی یاشاتمایه چالیشان مجاهدلر قافله سنك مرشدلری و مربیلری ده واردی . عصرلردن بری عرقلارینك شرفیله دولان تاریخی بیتیرمه مهیه ، اوکا شانلی صحیفه لر علاوه ایتمه عزم ایدن غازیلر ، بوتون قوت و ایمانلرینی فضیلتدن آلیورلردی . تورکلر آلتایدن طوغان ظفر کونشیلله ، (یچ) قاپیلرینی آچاجقلر ، (سن سته فان) کلیساسنك آیینی وییلدیزینی سوندوره جکلردی . بو غازیلری ظفره ایصال ایدن بر روح واردی که ، اونی تلقین ایدنلر ، ابدی ویگیلمز بر قوتك توکنمز قدرتنه ایمان آیله ینلردی . حتی برچوغی « جذبه صاحبلی » ، « صاحب کرامت » عزیزلردی : اخی اورهن ، قومرال دده ، آبدال مراد ، کییکلی بابا .

آق تیمورله بالابانجق (بروسه) یوللرینی کسن حصارده
ایدیلر . شهر قوشادیلالی سکزییل اولمشدی (۷۲۵) .
بروسه تکفوری محبوس کیدی . شهرده ییه جک قالمامشدی .
برچوق کیشی آق تیمورله بالابانجق آرا صیرا یاپدقلری هجومدن
زیاده ، آجلقدن تلف اولیوردی .

آرتق محاصره یی صیقیشدی رملق وشدتی آرتدی رملق زمانیدی .
(بروسه) قلعه سی اطرافنده آلینماق حصار ، بروسه یاننده
تورک ایلینه قاتیلماق دیار قالمامشدی . شمدی ، اصل قلعه نکه ده
فتحی لازمدی . (ایزنیق) محاصره سی حالا دوام ایدیوردی .
(بروسه) ده خلک آجلقدن قیریلدیغنی سویلیورلردی . اهالی
تورکلره تسلیم اولمق ایچین بهانه آرایوردی . عثمان بك ، اوغلو
اورخان بکی چاغیردی :

— اول سن (آدرانوس) . وار کم اول کافرك آتاسی
(دین بوز) غزاسنده بنم بای خواجه نك دوشمننه اول سبب
اولدی .

دیدى . کندى ، آياغندن راحتسزدى . مع مافیه اورخان بکه
برابر بروسه نك محاصره سنده بولوندى ، و اوغلونه شوو صیتی ایتدی :
— اوغل . بن اولدیکم وقت بنی بروسه ده شول کومشلی
قبه نك آلتنه قویاسن .

کوموشلی قبه ، اسکی بریزانس مناسیریدی . « اول وقت

کافرلر مناستری یکی اورتمشلردی . کونش کبی یلابردی ،
ایراقدن کورن کونش صانردی « (نشری) .

بعده ، سوزینه شو صورتله دوام ایتدی :

— وبرکیمسه کم سکا تکری بیورمادیغی سوزی سویلیه ،
سن آنی قبول ایتمه . واکر بیلیمزسهک ، تکری علمنی بیله نه
صور ، وبردخی سکا مطیع اولانلری خوش طوت .

عثمان بك مضطربدی . اوچ آی اول قان پدری ادهبالی
ایله زوجہسی مال خاتونی کندی ایلہ (بیله جک) ه کوممشدی .
احتمالکه خسته لغک شدتلمه سنه بو آجی ده سبب اولمشدی .
عثمان بك راحتسزلغنه مبنی (سو کو) ده دوندی . فقط عزمندن
وأملمدن دونمہدی . اورخان بکک معیتنه طورغود آلپله میخال
بکی ویردی . اورخان بك ، شیخ محمودله اده بالینک قاردشی اخی
شمس الدینک اوغلو اخی حسنسر کیتمک ایسته مهدی . عثمان
بك بوکاده راضی اولدی .

کیتدیله ، (آطرانوس) ه چیقدیله ، هپسی ده آتلیدیله .
(آطرانوس) تکفورلی فلاکت خبرینی دویدی ، (بروسه)
طاغلرینه قاچدی . خلق ده اونکله برابر دی . اورخان بکک
غازیدری آتلرندن ایندیله ، اورمانلره کیردیله ، طاغلره طیر-
ماندیله ، تکفورک پیشنی بردرلو براقادیله . تکفور قاچدی ،
یاچین تپه لره صیغیندی . داها صو کرا ، صیغیناجق یربولاما نجه ،

کندیسنی قایلردن آشاغی فیلاتدی ، حیانتدن اثر قالمادی .
تکفورله برابر قاچان خلق ، بوفلاکت اوزرینه ، عثمانلی
تورکلره صیغیندیله . آرتق (اطرانوس) ده ، خلقی ده تورکلرک
آلنده ایدی .

عثمانلی تورکلر بوغلبه دن صوگرا ، تپه لردن ایندیله ، بروسه
جوارینه کلدیلر . (پیکارباشی) نك یوکسک آغاجلری آلنده
چاغلایان صولر کنارنده آتلینی دیکلندیله .

قلعه یه صاحبا کیرمک ایستیورلردی . نته کیم اوپله اولدی :
بروسه قلعه سی آلیندی ؛ فقط « باش یارلما دن وقان دو کولمدن »
آلیندی . اورخان بك بروسه نك تکفورینه میخال بکی یوللادی ،
تسلیم اولماسنی تکلیف ایتدی . تکفور شو جوابی ویردی :
— عهد ایدلم . بزه کیمسه نك ضرری دگمسون .
حصاری ویره لم .

میخال بك تکفورک جوانی اورخان بکه آکلاتدی .
اورخان بك راضی اولدی . تکفور قورقویور ، حصاردن
چیقارکن باشنه برفلاکت کلیر دییه چکینیوردی . تکرار میخال
بکله خبر یوللادی :

— بکا برقاج یارار آدم کوندرسون که بز حصاردن چیقارکن
بزی تورک اینجتمسونلر .

میخال بك تکفوردن بوزحمتک بدانی آلمق ایسته دی :

— واران آدمیره نه وررسن کم کله لر .

تکفور هر نه ایسترلر سه ویرمه یه راضی اولدی . اوتوز بیک
فیلوری یه قرار ویرلدی .

نهایت (بروسه) دن چیقدی ، شهر تورکلرله دولدی .
اخنی حسن ، حصارک برجلری اوزرنده دولاشیوردی .
اورخان بکک آداملری تکفوری کمی یه بئندیردی لر . کمی
بیزانس ساحلارینه دوغرو آچیلدیغی صیراده (بروسه) ده
دوشماندن اثر قالمامشدی .

اورخان بک (بروسه) خلقنه عادلانه طاوراندی . اها لیدن
نه برچوپ آلدی ، نه ده کیسه یه آلدیردی . یالکز تکفورک
ثروتی غازی لرله اولشیدیردی .

خلق ممنوندی . شهرده ایجه تلفات واردی . اورخان بک
تکفورک وزیریه کوروشدی ، وصوردی :

— بو حصاری ویردیکز ، نه دن بونالدیکز ده ویردیکز ؟
وزیرک جوابی برچوق حکمتلری جامعدی :

— بریجه نسنه ایچون ویردک : بری بو کم سزک دولتکز
یوما فیوما زیاده اولدی . و بزم دولتمز دوشدی ، تحقیق بیلدک .
وبری دخی بو کم ، باباک اوزرینه حواله یاپدی کیتدی . انک دولتی
کویلریمزی ضبط ایتدی ، سزه مطیع اولدیلر و بزی هیچ
آکازلر . بری دخی راحتلغه هوس ایتدک . بری ده بو کم تکفورمز

مال قودى ، فائده ويرمدى . انكچونكه مال ويرمكه نسنه بولمادى . وقتيله آنجق نسنه آلمادى . احتياجزر وقتى صاتيحي بولمادى . حصار بزه حبس اولدى . وبرى دخی پادشاهكم زبون اوله ، مملكت تيز خراب اولورمش . وبرى دخی بوكم يارامزه اويدقكم ، ينه اول تكفوردى . وبرى دخی عالمك تبدلاتى اكسيك دكل . ايمدى بوتبدلات بزه دخی اولدى .

عثمان بك ، خسته وبى مجال ، (سو كود) ده ظفر مرده سنه منتظر دى . اورخان بك (بروسه) ده مشغولدى . عثمان بك صوك نفسى ويرمك ايچين عادتاً (بروسه) ظفرينى بكه يوردى . نهايت بو سعاده نائل اولامادن وفات ايتدى . نعى موقتاً (سو كود) ده طوپراغه قونولدى . اورخان بك (بروسه) ده ايدى ؛ باباسنك ضياعنى خبر آليز آماز قوشدى (۷۴۶) . عثمان بكك ثروتى لاشى حكمنده ايدى : دكزلى بزندن ايچ طرفى علملى برصار يخلق بز ، آته مخصوص بززره طاقى (يانجوق) ، برطوزلق ، برقاشيقلق ، برچفت چزمه ، آلاشهرده دوقونان قرمزى رنكلى سنجاقلىر ، برقيليج ، برتيركش ، برمزراق ، برقاج طويله كهيلان ، اوچ سوروده قويون ... (سلطان اوكى) نده برقاج يابانى قيصر اقله برقاج ده چفت حيوانى واردى .

اورخان بك باباسنك نعىنى (بروسه) يه كتىردى ، برزمانلر كنديسنه ظفر هدى اولمق اوزره كوسترديكى (كوموشلى كنىد) ك آلتنه گومدى .

۲. توركلر و بيزانس

بروسه نك فتحى توركلرى بيزانس حدودينه برقات داهما
ياقلاشديرمشدى . او صيراده اورخان بك ، قرق آلتى ياشنده
ايدى . توركلر تمام يكرمى سنيه ياقين ، آچه قوجه لر ،
كوسه ميخاللر ، صمصه چاوشلرله برابر ساقاريا اووالرنده ،
اين اوگى قياقلرنده ، عيان كولى قييلرنده جنك ايتشلردى .
چاملق قايلر اوزرنده يوكسه لن بيزانس حصارلرى تعقيب ايتدكلرى
ظفريولى اوزرنده اونلرى اصلا دور دورامادى . بيزانسه قارشى
يايدقلىرى مجادله ده هيچ بر زمان مغلوبيت كورمه ديلىر . بوتون امللرى ،
بيزانسه دوغرو ايلريله مك ، بيزانسى ضعيف دوشورمك ، حتى
ايجاب ايدرسه ، اطرافنده كى يرلى ده آلارق «بلده لر مليكه سى» نى
تورك طوپراغى آراسنده محصور براققدى . ذاتا بوده برنوع
« حواله » ديمكدى . (بروسه) ده اويله آلتامشميدى ؟ (ايزنيق)
محاصره سى آلآن بو طرزده دوام ايتيورميدى ؟
عثمانلى توركلرك بيزانسه يكانه خصمى ، اختيار ايكنجى

آندرونیقوس پاله اولوغوسدی . بونکله برابر پاله اولوغوس ،
 ساچوق تورکلکنک انقاضی اوزرنده یرلشن عثمانلی تورکارک
 عزمنه قارشى هیچ برشیئک مانع اولامایاجغنی بیلمز دکلدی .
 بوسبیه مبنی ایدی که ، ایمپراطورداها عثمان بک زماننده بوتهلکه یی
 آکلامش ، ایرانده کی موغول حکمدارینه مراجعت ایتمشدی .
 مع مافیہ بیزانسیک تورکه قارشى موغولدن امداد اومماسی بیزانس
 سیاستنک اوتهدن بری مراجعت ایتدیکی چاره لردندی . بومراجععت
 وقتیه هولاکویه ، آباقاخانه ده یاپیلمشدی . ایمپراطور بوسفر ،
 غازان خانہ مراجعت ایدهرک قیزقاردهشی ماریقای بیله تکلیف
 ایتدی . غازان خانک وفاتی اوزرینه ماریقا خدابندهیه میراث
 قالدی . (ایزنیق) محاصره اولوندیغی صیراده ، عثمان بکه
 مخاصماتدن وازکچمه سنی تهدید صورتنده سوبله یین ، ایشته بوپرنسس
 ماریقا ایدی .

فقط بوتهدیدلرک هیچ اهمیتی اولمادی . ساقاریاوادیسنده کی
 حصارلرک کافه سی تورکارک آلینه کچدی . اختیار آندرونیقوسک
 موغوللردن بکه دیکی امیدلردن ده شمدی اثر یوقدی . تورکک
 بیزانسه قارشى تعقیب ایتدیکی سیاستده دکیشیکلک اومماق امکان
 خارجنده ایدی .

عثمانلی تورکارک نفوذی آناطولونک غربنده یکانه حاکمدی .
 واقعا کوتاهییه ده کریمیان اوغولاری ، آنقره ده اخیلر ،

قسطمونیده اسفندیار اوغوللاری، جنوبده صاروخان اوغوللاری،
واردی . عثمانلی تورک‌لر ایچین او طرفلردن بویوک برتلهکه
اولامازدی . چونکه هپسی ده عینی عرقک و عین ملتک مختلف
زمره لیدی . اولری بربردن آیران نقطه ، هرزمره نك باشنه
کچن بکلردی . دها دوغروسی ، ساجوق تورکلری آناطولوده
مختلف بکلر اطرافنده اوفاق دولتلر تشکیل ایتشار ، قوتلرینی
بومرکز لر اطرافنده طوپلامشاردی .

بوزمره لری قوی ، مترقی ، متعین ، منور برمرکز اطرافنده
طوپلامق و برلشدیرمک ایچین ، ایچلرندن برینک قوت ، عرفان
جهتیه او برلرینه فائق اولماسی لازمدی . بونک ایچین سلاح
قوتنه ده احتیاح یوقدی . چارپیشیلاجق ملت کیمدی ؟ برقاچ
سنه اول برلکده یاشانیلان ، برلکده چالیشیلان خلق دکلیدی ؟
اونلرک عراقدا شریله برلشمه لری ایچین قانلرینی دوکمک دکل ،
بکلرینک نفوذلرینی قیرمق کافیدی . عثمانلی تودکلر بوتون سلاحلرینی
وقوتلرینی بیزانسه چویرمش اولدقلری ایچین بو طرفلردن کندیلرینه
ایلیشیک ایده جک یوقدی . ذاتاً اختیار آندرونیکوسکده
قورقدوغی بو نقطه ایدی . بیزانس تهلهکه ده ایدی . عصرلردن
بری سرایلرنده ذوق و احتراض حکم سورهن شوق و حظوظ
شهری ، شمدی تورک تهلهکه سنه معروضدی . کچمش عصرلرده ،
بیزانسیک اهمیتتی بویوکدی . زمان اولدی که ، بیزانس تک باشنه

بر ایمپراطورلق کبی یاشادی . محو اولاجق صانیلدی ؛ فقط
بردنبره تجمدد ایدهرک قوجه بر ایمپراطورلغک خلاصنه سبب
اولدی . حتی ایمپراطورلق اولد کدن صوکرآ ، بیزانس داها بر
عصر مدت یاشادی .

میلادک بشنجی عصرنده ایمپراطور ایکنجی ته اودوزیوس
مرمره قییلرندن خلیج ساحلرینه قادار اوزانان سورلری
پایدیردیغی کوندن اعتباراً بیزانسیک عسکری قیمتی آرتدی ،
بلدهنک یکانه قوتی سورلرینه منحصر قالدی . ایمپراطور
ههراقلیوس (ولا کرنا) محلهسنی سورک ایچنه آلدیردی .
قومه نوس خاندانی ظریف قولهلری سوسلهدی . قایلرندن
برنده شوکتابه واردی : « معبودیمز جناب عیسی ، سنک بلدهکی
هردرلو اغنشاشدن ، هردرلو حربدن اسیرکه سین . دوشمانلرینک
قوتی مظفریتکله قیرسین »

فی الحقیقه بو سورلره عثمانلی تورکلردن اول کیملر هجوم
ایتمه مشدی ؟ هونلر ، آوارلر ، بولغارلر ، روسلر ، پهچه نه کلر ،
عربلر ، لاتینلر . بالخاصه لاتینلر ، ظلمدن واعتسافدن باشقا خاطره
براقمامشلردی .

بیزانسیک زنکینلک نه عثمانلی تورکلرده واقفدی . مثلاً خلیجده
منتظم ترسانه لر واردی . (مانغان) قوله سندن غلطه برونه
بر زنجیر کریلیر ، دونانما خلیجده حفظ ایدیلیردی . بیزانس

ایچنده کی قیشلارده شهرک محافظه قوتی اولق اوزره یکر می دوت بیک عسکر واردی . اصل شهر ، بالخاصه میلادک اون ایکنجی عصرنده ، شرقک اک کوزل بلده سیدی . غلبهلق سوقاقلرنده خلق دولاشیر ، باغچه لرینک آغاجلقلری آراسنده کلیسالر ، مکتبلر و خسته خانه لر کورولوردی . شهرده بیزانس زنکینلرینک محشم سرایلری واردی . بوکامقابل ، بعض محله لرده کورولوردی که ، کونش یوزی بیله کورمزدی . ستونلر ، آبدلر ، هیکالرله سوسلو جاده لرک و میدانلرک یاننده ، پیس و چامورلی سوقاقلرده کوزه چارپاردی . کیجه لری جاده لرده هیچ برایشیق کورولمزدی . ایصسز کوشه لرده کوپکار و خیرسزلر دولاشیردی . اون ایکنجی عصر محررلرندن بری دیورکه : «استانبول واقعا زنکینلکجه بویوک شهرلردن اوستوندور؛ فقط رذالت جهتیله ده اویله در .»

استانبولک ستونلرندن و آبدلرندن باشقا ، اک محشم بنالری سرایلردی . آت میدانندن مرمره ساحلارینه دوغرو اینن صرت اوزرنده (مقدس سرای) ک مختلف بنالری واردی . بوراسی ، عادتاشهر ایچنده برشهر کییدی . استانبولک تأسیسندن صوک زمانلره کلنجیه قادار ، نه قادار ایمپراطورکلدیسه ، هپسی ده ذوقه و مزاجنه کوره بر دائره یاپدیرمش ، سرای بو صورتله بویومشدی . (مقدس سرای) قارما قاریشیق برچوق بنالردن

مرکبدي . اوراده ، قبول سالونلري ، يشيللر ايجنده غائب اولمش كوشكلر ، سرايلر ، قيشلر ، حماملر كتيخانه لر ، كليسالر ، محبس لر ، اوزون غاله ريلر ، بوغازك يشيللر كاريينه ، مرمره نك كنش مائيدكلرينه ناظر تراسه لر ، مريدونلر ، قوله لر وباغچه لر واردی . بونلر ك هيچ بري ده منتظم بر پلانه كوره ترتيب وتنظيم ايدلمه مشدی . دائره لر كاملاً آلتون موزاييقلر ، پارلاق مرمرلرله مزیندی . بو محتشم دائره لر ده دولاشانلر ك قیافتلری ده اونسبتده شمعشعلی ، مكلف و پارلاقدی . بوراده فسونكار واسیلیسالر دن ، جاذبه لی قیزلر دن ، آناطولونك ، ویتینیانك مستثنی كوزلر دن مركب ، شوخ و ظریف ، موسیقییه مجلوب ، اكلنجه لره مقتون ، حيله كارلقلره مألوف بر خلق یاشاردی . استانبولی كلوب كورنلر : « دنیاده بویله بر شهر بولوناماز » دیرلردی .

استانبول ، شوق و حظوظ بلده سی اولقله برابر ، ایمپرا - طورانك اك مهم دینی مركززیدی . مناسترلری واردی كه ، سرین باغچه لر نده پرنسلر و زنكینلر عبادتله مشغول اولورلردی . آیاصوفیا ، استانبولك ممتاز بر خارقه سیدی . سهاره یوكسه لن قبه سی ، بر بیزانس محروینك دیدیكي كبی ، « كوك یوزینه آلتون زنجیرله آصیلمش » ظن اولونوردی . حواریون کلیساسی ، آیاصوفیادن صوكرابویوك بر قیمتی حائزدی . كذا سنت ایرهن ، كوچوك

آیا صوفیا ، ته عوطوقوس کلیسالیله متعدد مناسترلر ، شهرک
 منظره سنه یوکسک قبه لریله باشقه بر لطافت ویرییوردی . بوتون
 بو کلیسالرده پارلاق و مطمئن آینلر اجرا اولونوردی .
 استانبولک تجارت و صناعی ده یولنده ایدی . لیمانده ، بالخاصه
 خلیجده ، مرمره قییارنده ، مختلف ملتله منسوب تاجرلر
 کورولوردی . بابلدن ، سوریه دن ، مصر دن ، ایران دن کلنلرک
 عددی نهایتسزدی . ایکنجی ته اودوزیوس زمانندن اعتباراً
 علم و معرفت ده ایلریله مشدی . پاله اولوغوسک زماننده ایسه
 بیزانسه مقتدر مدرسلر ، عالم مؤرخلر بولونیوردی .
 شهرده ذوق و نشئه اکسیک دکلدی . آت میدانی بوتون
 اکلنجه لری مرکزیدی . قوشولر و سیرق منظره لری بوراده
 کورولوردی . ایمپراطورلر خلقی او یالامق واکلندیرمک ایسته دکلری
 ایچین اکلنجه لرده دءا ئمابرد کیشیکلک اولماسنه اهمیت ویرلردی .
 بودور ، بیزانسیک تدنی زمانلریدی . لاتین اشغالندن صو کرا
 میخائل پاله اولوغوس تکرار استانبولی آلدیغی زمان (۱۲۶۱ م
 ۶۵۹ هـ) شهر خراب بر حالده ایدی . استانبول الی یدی سنه
 مدت اجنبی اشغالی آلتنده قالدقن صو کرا صویولش ، مقدساتی
 بیله تجاوزه اوغرامشدی . استانبولک ظرافتنی و کوزللیکنی
 وجوده کتیرن ثروتلر ، مقدس اشیا ، نفیس صنعت اثرلری ،
 هیکلار هیچ قالمامشدی (۱۲۰۴ م ؛ ۶۰۱ هـ) .

فلا کتدن صو کرا استانبول متماً یا غما ایدلمشدی. استانبولی
اشغال ایدن لاتینلر بو کوزمل بلده نك اك مقدس اشیا سنی
صاتمشلردی. آیا صوفیا کاهنلا صویولمشدی. حواریون کلیسا سنده کی
ایمپراطور مزارلری خرد و خاش ایدلمشدی. کلیسا لرده مقدس
قابر، محراب زینتلری، پاپاس اثوابلری یوقدی. بویوک میدانلری
تزین ایدن هیكللر اریدلمش، و قیرلمشدی. اشغال کوننده ظهور
ایدن یانغینده استانبولك اك کوزل بنالری یانمشدی. (ولا کرنا)
سراینك دائره لری بیله اوطور و لامیه جق درجه ده ایدی. صالونلرده
یا قیلان آتشلر دیوارلری سیم سیاه ایتمشدی.

شهر تکرار ایمپراطورلر طرفندن اشغال اولوندیغی کون
بیزانس خلقی ممنوندی. بیزانس مؤرخلرندن بری نقل ایدیور:
«اواثاده ته ئودور طور نیقوس نامنده عاقل و فطین بر ذات خسته
ایمش. کندیسنه استانبولك بیزانسلیار آلنه کچدیکی سوبلنمش، بونی
دویار دویماز کوزلرندن یاش دو کهرک :

— ایواه ! بو، خریستیانلق ایچین بر فلاکت اولاجق .

دیمش . شاشیرمشلر :

— سه نیور ، نه دیورسکز ؟ وطنکیز قور تولدی ، سز

ایسه آغلایورسکز .

— خیر ، آغلادیغم بوشنه دکل .

دیمش . ایمپراطورلق ، پاتختنی (ایزنیق) دن استانبوله نقل

ایدنجه ، آناطولوده تورکارک بوسبوتون سربست قالا جقارینی ،
برکرده آناطولودن روم ایلینه کچدیلمی ، استانبولک ده ، بوتون
ایمپراطورلغک ده آلدن چیقاجغنی آکلاتمش . مؤرخ دیورکه :
« بو سوزلری سویله دکن صو کرا ، یوزینی دیواره دوندی ،
براز صو کرا ده روحنی تسلیم ایتدی . »

فی الحقیقه ، ایمپراطورلق استانبولده یکیدن تشکل ایتشدی ؛
فقط بو تشکل ، ضعیف بر طاقم انقاضدن مرکبیدی . لاتین
اشغالندن اول ایمپراطورلغک مالک اولدوغنی اراضی بی الدهایتمک
امکانسزدی . تراکیانک بر قسمی صربلرله بولغارلر الدهایدی .
یونانستانک بر قسمی لاتین سه نیورلردی آلمشلردی . آطه لر
دکترینک بر پارچه سی وندی کلیاردهایدی . جنویزلرک قره د کزده
برچوق یرلری واردی . تورکار ایسه ، آناطولوده ، تهدیدکار
بر وضعیتده ایدیلر . بوقادار مهالکه قارشى بیزانس متحد بر کتله
تشکیل ایتموردی . طربزونده کی روم ایمپراطورلغنی آناطولونک ،
آپیر ده سپوطلغنی ده روم ایلینک آنجق بر قسمی اشغال ایدیوردی .
پاله اولوغوسلرک اللرنده بولونان قسم ، عادتاً ضعیف ، عاجز
و نحیف بر وجوددی ؛ بو جلیز و چلیمسز وجودک قوجامان
بر باشی واردی که ، اوده بیزانسدی .

حال بو که ، بومشوش ایمپراطورلغنی اداره ایچین مهم منبعلر ،
یکی بروضعیت لازمدی . استانبولده ایسه احتراضدن باشقه برشی

یوقدی. ماضینک شرفلی میراثی استانبولک ضعیف اوموزلرینه
 پک آغیر کله جکدی. اوردو یوقدی، دونانما یوقدی، پارایوقدی.
 ایپراطور، مملکتی مدافعه ایچین اجنیلردن اجرتلی عسکر
 طوپلایوردی. نته کیم قاطالانلرده بو مقصدله کلدکلری حالد
 (کلیولی) یه یرلشمشلر، سکز سنه مدت استانبولی ازغاج
 ایتشلردی. دکزده، همان هر طرف قورسان تجاوزلرینه معروضدی.
 او درجه ده که، ایپراطور بیله ساحلارده اوطوران اهالی یه داخله
 چکیلمه لرینی توصیه ایتشدی. مملکته حکومت نفوذی یوقدی.
 جنویزلرله وندیکیلر، ایپراطورک کوزی اوکنده بوغاز ایچی
 صولرنده چارپیشیرلر، شهرده یانغینلر، جنایتلر ایقاع ایدرلردی.
 استانبولده ایپراطوردن زیاده کندیلری حاکم اولدقلری ایچین
 اوکا حقارت ایتمکدن بیله کری دورمازلردی. کیلرینی خلیجه،
 حتی ایپراطورک سرایی دینه سوقارلر، ایپراطوری سلاملامایه
 بیله تنزل ایتمزلردی. دونامالری بعضاً پانخته ده تجاوز ایدردی.
 اللرندن کلسه، قره دکزدن بغدادی و بالق بیله سوقایا جقلر،
 استانبولی آجاقله ضبط ایده جکلردی. ایتالیان جمهوریتلری
 استانبولله صلح حالنده یاشامق ایسته سه لر بیله، ینه تجارت
 معاهده لر بیله، ویرکیلردن معافیتله ایپراطورلرک قانی اتمکدن
 کری دورمازلردی (۱).

بوتون بو فئالقلرك اوكنى آلمق اچين متين و عزمكار
 حكمدارلره احتياج واردى. حال بو كه بيزانسده وراثت قاعدهسى ده
 بوزولمىشدى. همان هر ايمپراطورك وفاتنده داخلى عصيانلر
 چيقار، و بو عصيانلر اثناسنده سلطنت مدعيلرينك هر يري
 ايمپراطورلغك دوشمانلرينى، توركلرى، صربلرى، بولغارلرى
 امدادلرينه چاغيرىلردى. ونديككيلرله جنويزلرده عصيانلرى
 كوروكلرلر، بو سايلهده هريارديمده ايمپراطورلغك برپارچهسى
 قوپايرىلردى. ايمپراطورلاردن برى تاجنك الماسلرينى رهن قوپار،
 اوبرى بورجندن دولايى ونديككيلر طرفندن حبس ايديلىردى.
 بيزانسكر دوچار اولاجنى تهلكهلىرى بيلنلر يوق دكلدى.
 ايمپراطور ايكنىجي آندرونيقوسك ناظرى مهطوخيتيس، عالم،
 فاضل، حكيم برذاتدى. ايمپراطور كنديسنى صوك درجه سوردى.
 مؤرخ غريغوراس، اونك هم شا كردى، هم ده اك صميمى
 دوستيدى. مهطوخيتيس بيزانسكر كچيردىكى فلاكت ساعتلرينى،
 ايمپراطورلغك انقراضه سوروكانديكنى، اسكى شوكت وعظمتدن
 هيچ بر اثر قالماديغنى كوروپوردى. يازدينى برچوق خطرهلرده
 بيزانسكر انقراضنى، معروض اولدوغى تهلكهلىرى، آناطولو
 آيالتلرينك پریشاناغنى كوسترمشدى. كندى اساساً ايزنيقليدى.
 كنجلهكنى همان كاملاً آناطولوده كچيرمشدى. آناطولونك يشيل
 ظاغلرى، چاغلایان ايرماقلىرى روحنى سرمست ايدردى. مهطو

خيتيسك پازدقلىرى برر فرياددى. تورك تەلەكەسنىڭ كوندن كونه بويودىكىنى كورييوردى. فلاكت پك ياقىندى. بو مرضه سريعا بردوا بولمى لازمدى. مەطوخيتيس اختيار آندرونيقوسى عطالتدن اويانديرمايه چايشىدى، بعضاً شديد و مؤثر برلسانله اونى توركلره قارشى ابدى حربلره تشويق ايدردى.

فقط بيزانسده بو حربلىرى اداره ايدەجك نەمعنوى، نەدە مادى، هيچ بر قوت يوقدى (۱).

صوك زمانلرده ايمپراطورلك بوتون نفوذلىرى قيرلمشىدى. عصرلردن برى طونا بويلرندن، دجله ساحلارندن اسنانبول سورلرینه آتيلان استيلا كارلرك هجومى، «مقدس بلده» نك معنوى موجوديتنى دە صارصممشدى.

بوكانك مهم سەببەدە، بيزانسیك داخلى مرضلريدى. تحکم، احتراض، شهوت، سفاقت، جنایت، عصیان، بيزانس سرايى كوندن كونه انقراضه سوروكلهين عامللردى. اورخان بك زماننده بيزانسیك سياسى وادارى مؤسسەلىرى انحطاطه اوغرامش بر حالده ايدى. عثمانلى توركلرك تشكيلاتى مكمل، اوردولرى كوندن كونه متزايد، اراضيلرى كيتدكجه متوسع اولدوغى حالده، بيزانس ايمپراطورلغىك اراضيسى كوچولمش، اوردوسى اسكى انتظامى غائب ايله مشدى.

بیزانس اوردوسنك آزماسنه اك مهم سبب ، آناطولوده
 توركلرك بیزانسه عائد پك چوق اراضي ضبط ایتمه لیدی .
 ایمپراطورلق اك برنجی عسکرلرینی آناطولودن آلیدی .
 بیزانس دوناماسنك افرادینی ساقیز وحوالیسی تأمین ایدردی .
 (ایزاوری) ، (لیقااونیا) ، (طوروس) ، و (فاپادوکیا) ده دینج
 و کوربوز عسکرلر یتیشیردی . بابادن اوغله انتقال ایدن واسع
 تیمارلر آناطولوده ایدی . شمدی بویرلر کاملاً تورکلر آلینه
 کچمشدی . بورالری ، بیزانس ایچین ، اون برنجی عصردن اعتباراً ،
 برداها عودت ایتمه مك اوزره ، آلدن چیقمشدی . اون دردنجی
 عصرده ایسه ، بیزانس طوپراقلرینك قسم اعظمی عثمانلی تورکلرله
 صربلر آئنده ایدی . او درجه ده که ، ایمپراطورلغك عسکر
 طوپلایاجنی اراضی ، هان هان استانبول جوارینه منحصر ایدی .
 یالکیز آناطولوده ، بیزانسك ۳۶۰۰۰ تیمارلیسی واردی .
 شمدی بوده آلدن چیقمشدی . بیزانس سرحدلرینك محافظه سی
 ایسه آنجق بو قوتله ممکن اولابیلیوردی . عسکرده حرب
 وجنك هوسی قالمامشدی . بیزانس اوردوسی آنجق اجر تلی عسکرله
 موجودیتنی ادامه ایده بیلیوردی .

مؤرخ پاخیمه ریسك روایتنه کوره : (۵۷۲) سنه سنده ،
 آناطولودن کان عسکرلر مملکتلرینك استیلایه معروض اولدوغنی
 خبر آلیر آلماز داغلامشیر ، کندی پوردلرینی کندیلری

محافظه يه قوشمشاردى . غريغوراسك روايتنه كوره : ۱۳۲۹
(۶۲۹ هـ) ده ۲۱۰ اتلى استئنا ايديله جك اولورسه ، اوردو ،
اصناف و صناعت صاحبلىرىدن مركبى . بونلر ايلك فرصته
قاجق ايجين فرصت بكايلوردى . بوسيدن ، حكومت اك
زياده اجرتلى عسكرلره اعتماد ايدىوردى .

فى الحقيقه ، بوعصرده اجرتله عسكرلك ايدى جك سراسر يلى
يك چوقدى . آلانلر ، صربلر ، بولغارلر ، قاطالانلر ، ايتاليانلر ،
آلمانلر و حتى توركلردن بعضيلرى ، بيزانس سانجاغى آلتنده
اجرتله عسكرلك ايمه يه تشنه ايدىلر . فقط بو عسكرى دشمن
آتشنه قارشى چاليشدير ايلمك ايجين پارايه لزوم واردى .
ايمپراطورلرايسه ، اسكيسى كى ، زنكين دكلردى . اجرتلى عسكر
ايسه چوق پارا ايسته يوردى . ايمپراطورلر ا كثر يا خزينه ، صرفنك
فوق العاده آرتاجغنى نظردقته آلارق اجرتلى عسكر قوللانمقدن
صرف نظر ايدىلردى . بوسيدن اوردونك قوتى دها آزر مقدارده
بولونوردى . بونكه برابر ، بودورده ، برقاج بيك كيشى مهم
برقوت ديمكدى . ا كثر سفرلره اون اون ايكي بيك كشى ايله
تشبث ايدىلردى . بونكه برابر عثمانلى توركلرك قوتى ده بيزانس
اوردوسنك قوتندن يك فضله دكلدى . (۳۲۹ : ۵۷۲۹ هـ) ده اورخان
بكك اوردو موجودى ۸۰۰۰ كشىدن عبارتدى . فقط بو اوردو
انضباط ، اداره ، و جنگاورلاك شرفى نقطه نظرندن ، بيزانس اوردوسنه

قات قات فائقدی. غنا و غنیمت فکری تورک اردوسنده ظفری
 تأمین ایدن الهمهم عامللردن معدوددی. اوردو، ملی ایدی.
 بکلرک باشنده تجربه کورمش یکتلر و بکلر واردی. زمان
 اولوردی که، برقلعه یی آلق ایچین سنه لرجه محاصره ایدرلر،
 کیجه کوندوز آت اوستندن اینزلردی. هر ظفر، بکلره بر
 تیمار ویا زعامت تأمین ایدردی. اوردوده انضباط اساسلیدی.
 بیزانس اوردوسنده ایسه، اجرتلی عسکرک مطالباتی بعضاً
 ایمپراطورلر ایچین تحمل ایدیله میه جک برحاله کلیردی. بونلر
 مملکتدن یاشارلر، خلقی صویارلردی. محاربه زماننده، هله
 براز ایمپراطوره کوجه نیرلرسه، محاربه میدانندن درحال فرار
 ایدرلردی. اوزون سفرلره تحمل ایده مزلر، همان مأذونیت
 ایسترلردی. ارزولرینه ممانعت ایدلدیکی زمان، عصیان ایدرلر،
 جنراللرینی اولدورورلردی. ایچلرندن کوزده اولانلری چکه مزلر،
 بعضاً آرالرنده قانلی مصادمه لره سبیت ویررلردی.

بیزانس اوردوسنده اجرتله قولالانیلان تورکلرده واردی.
 فقط بونلرک مقداری اوقادار چوقدی که، ایمپراطورلر اداره دن
 عاجز قالیرلردی. صداقت و اطاعتلری مفقوددی. بعضاً،
 ایمپراطورلرک ضعفی و عجزینی آکلارلر، استفاده لرینی تأمین
 ایچین، خزینهنک ضررینه حرکت ایدرلردی. اوردو افرادینک
 هربری کندی حسابنه چالیشیردی. یوتون غایه لری یاغما اتمک

وپارا قازانمقدی. ایمپراطورلغک مدافعه سنی قطعیاً خاطرلرینه کتیرمزلردی .

بیزانسلک قولاندیغی اجرتلی عسکرلرک اک مدهشی ، تورکلردی . ایمپراطور قانتاقوزینوس دییورکه : « تورکار ایچین اولدورمک بر ذوق ، اسیر آلمق واسارته دوچارایتمک ، هر هانکی بر غنیمتدن ده ازیاده موجب مسرتدر . هیچ آجیازلر ، یچاره لره هیچ رحم ایتمزلر ؛ دین آیریلدیغندن دولای روملرک طبیعی دوشمانلریدر . » غریغوراس دییورکه : « تورکلر خریستیانلردن نه قادار اسیر آلدیلر ، نه قادار یاغما ایتدیلر ، مقدس محللره نه قادار تجاوزلرده بولوندیلر ، بونی آکلاتمق قابل دکدر . » « تورکلرک معتاد ظلملری روم ایمپراطورلغنی معتادندن فضاه خسته لاندیرمشدی . »

بیزانس اوردوسنی بو وضعیتده اداره ایتمک قابل دکلدی . اجرتلی عسکرلرک قوماندانلری ده کندی عرقلرندندی . بونلر ، ایمپراطورک سردارلرندن زیاده کندی قوماندانلرینه اطاعت ایدرلردی . بو غیر منتظم اوردوی اداره ایده بیلیمک ایچین مقتدر قوماندانلره احتیاج واردی . بیزانسه ایسه بویله قوماندانلر یوقدی . عثمانلی تورکلره قارشیک زیاده موفقیتله حرکت ایدن سردارلر ، بیزانس حسابنه ، خریستیانلق تعصبی ایله ویا شهرت قازانمق ایچین چارپیشان فرانسلرلدی .

بناءً عليه تشکیلاتی بود درجه دوشکون بر آورد و ایله ایمپراطور لک
 اداره سی قابل دکلدی . و قتیله ایمپراطور لخی محافظه ایدن قوت ،
 قلعه لریدی . (بروسه) ، (ایزمید) ، (ایزنیک) بو مستحکم
 قلعه لرك اك مهملر ننددی . بو قلعه لر ا کثریا بیزانس خاندانه
 منسوب پرنسارک و پرنسارک اداره سنده ایدی . پایتختک ضعفی ،
 ایالتلرک فقری ، خلقتک ممنونیتسزلکی ، قلعه لرله پایتخت بیتنده کی
 روابطک گوشه مه سنه سبب اولمشدی . مثلاً آناتولوده (مغنسیا)
 و (آلاشهر) ، روم ایلنده (دیمتوقه) و (سلانیک) کی مستحکم
 موقعلر پایتختدن اوزاقده و جمله سی ده تورک طوپراقلری آراسنده
 ایدی . بو قلعه لر عادتاً تورکلر طرفندن دائمی بر آبلوقه آلتنده
 ایدی . کندیلرینه بیزانسدن امداد کلک احتمال خارجنده
 اولدوغی کی ، مدافعه قوتلری ده آنجق کندی سپرلرینه
 منحصر دی . صربلر ، تورکلر ، بولغارلر ، هیچ بر مانعه یه دوچار
 اولمادن ، ایمپراطور لک قابکاهنه قادار کیره بیلیرلردی . بناءً عليه
 بیزانسیک بوتون عسکری قوتلری ، قلعه دیوارلری آرقاسنده
 محصور کیدی . هر قلعه ، مدافعه سنی آنجق کندی حسابنه تأمین
 ایدردی . آناتولوده (قره جه حصار) ، (بیله جک) ، (اینه کول) ،
 (قره تکین) ، (ایزنیک) ، (ایزمید) ، (آیدوس) ، هپ
 بو وضعیتده ایدی .

بیزانس ایمپراطورلری اوردولرینی تنسیق ایتک ایسته رلردی ؛

فقط حادثات ، عصیانلر ، بالخاصه تورك تهديدی بوقادائمامانع اولوردی . اون دردنجی عصر میلادیده ایسه اوردوده انضباط قالمامشدی . اکثری ، محاربه میدانندن قاچارلردی . یوآنیس قانتاقوزینوس اوردوی و دونانمای اصلاح ایتک ایستهدی . فقط ایمپراطورلق ، پایتختنه بیله صاحب دکلدی . بیزانسیک جنوبنده وندیک نفوذی هرشیئه حاکمدی . بیزانسیک قوتلنمهی ، اونلرک اقتصادی و تجاری منفعتلرینه بویوک بر مانعدی . بوسیدیدن اوردونک تنسیقی ایشلرینه کلزدی . بیزانسیک کندیسینی طوپلاماسنه دائمامانع اولورلردی . ایمپراطورلرایسه ، دوشمانلرینک مطالبنی رد ایدمک هیچ بر قوته مالک دکلردی . بناءً علیه ایمپراطورلق کوندن کونه ، ایچندن چورییور ، وسقوط ایدیوردی . اداره سنده بولونان اراضی ایسه ، سندهن سنه یه پارچه پارچه ارییور ، آووجندن حقیقوردی .

اون اوچونجی عصرک نصف اخیرنده پاله اولوغوس خاندانی (بیزانس) ده یرلشدکلری صیراده بیزانس ایمپراطورلغی اداره سنده بولونان یرلر آناطولونک شمال غریبی ، آوروپاده (بیزانس) ایله (تراکیا) ، ماکدونیانک بر قسمی ، (سلانیک) ، آطه لرد کزینک شمالنده بر قاق آطه ، یونانستانک ده بر قسمندن عبارتدی . بوندن باشقا ، قره دکزک شمالنده طربزون ایمپراطورلغی واردی . بوا ایمپراطورلق (ارکلی) دن قافقاسیایه قادار قره دکز ساحلنی

اشغال ايدى يوردى . تسالياده اېبرده سىوطلغى ، بويوك افلاق پرنسلىكى
 بيزانسه تابع يرلردى . بوكا مقابل ، پهلويونه زده ، قورقوده ،
 سه ريغوده ، كرېدده و نديك مستملكلرى موجود اولدوغى كې ،
 اطه لرد كزنده ده و نديك سينيورلقلرى ، آناطولوسا حانده و آناطولو
 اطرافنده ساقز و مدلى كې بويوك اطه لرده بجنوز مستملكلرى
 واردى . اورتا يونانستانده آتنه دوقه لى ، مورده ده (آخاه)
 پرنسلىكى موجوددى . روم ايمپراطورلغك اداره سنه تابع اراضيه
 يكرمى حاكيت تأسس ايتمشدى .

اون دردنجه عصرده عثمانلى توركلرك ايمپراطورلغه قومشو
 اولمالرى بيزانسكر خراپىنى بوسبوتون ياقلاشديردى . شمالده ،
 بالقان شبه جزيرده سنده ، كنج حكومتلر كيتدكه بويويوردى .
 آتيهن دوشان ، هان بوتون ماكه دونيايى آلمش ، كنديسىنى
 (صربلرك و رومانلرك چارى) اعلان ايله مشدى . بولغارستان
 (تراكيا) ده كيتدكه بويويور ، توركلر ايسه آناطولو طرفلرينى
 آله كچيريوردى . (بروسه) نك فتحى ، آناطولوده بيزانسى اك
 مهم بربلده دن محروم ايتمش ، توركلر ايجين بالعكس كوزل بر
 پايتخت ، متين براس الحركه وجوده كتيده مشدى .

زراعت ، بيزانسكر اك مهم قوت منبعيدى . تورك استيلاسى
 بيزانسى بوقوتندن ده محروم ايتمشدى . اك زنكېن ايلاتلر ، توركلر
 آنده ايدى . ايمپراطورلرك اداره سنده بولونان اراضى يه ايسه

تورکلر ، صربلر و بولغارلر دائما هجوم ایدیورلر ، کیردکاری
 کویلری تخریب ایلورلردی . اودرجه ده که ، اون دردنچی
 عصر میلادینک ایلک زمانلرنده ، (بیزانس) کاعاشه سی آنجق
 قره دکزدن کله جک بغدادیله بالغه انحصار ایله مشدی . ما که دونیانک ،
 تراکیانک اک محصورلدار صحرالری تورک و قاطالان هجومنه
 معروضدی . بو تورکلر ، یالکز عثمانلی تورکلر دکلدی ؛
 خساراتی یان ، دها زیاده آیدین تورکلریدی .

حکومت بر زمان ، بویوک املاکک چوغالماسنه ، احتکارک آزالما
 سه چالیشمشدی . شمدی اوده ممکن دکلدی . کویولر سربست دکلدی ؛
 بناء علیه سربست مالکانه ده یوقدی . زراع ، افندیسنک طوپراغنه
 مربوطدی ؛ اوکا برچوق ویرکیلر و تکالیف ویرمکه کلفدی .
 صوک زمانلرده سربست زراع جماعتلرندن اثر قالمامشدی .
 طوپراغک قسم اعظمی ایمپراطوره ویا بیت الماله عائددی . ایمپراطورلر
 بو اراضی بی ملتزم لره ویرلردی . کذا ، کلیسارک و مناسترلرک ده
 جسیم مالکانه لری واردی . بو مالکانه لر واقعا دواته ویرکی
 ویرمکه مکلفلردی ؛ فقط اکثریا استثنا ایدیلیلر ، خصوصات
 فوق العاده ده ایسه تکالیفدن معاف طو تولورلردی . بونک خارجنده کی
 یلر ، خصوصی املاکی تشکیل ایدردی . فقط بورالری ده
 زادکانک املاک خصوصیه سیدی . بورالری کندی آداملرینه
 آکدیرلر ، بر قسمی ده کیرایه ویرلردی . عسکری زعامت

صاحب‌لری ، صرف حرب وظیفه سیله مکلف اولانلردی .
 اهالی ، خزینه‌یه متعدد ویرکیلر ویردکاری کبی ، منسوب
 اولدقلری سه‌نیوره قارشیده بعض مکلفیتلری واردی . بناءً علیه
 بویوک مال‌کانه لرك چوقاغی ، اراضینک ایشلتمه اصولی ، طوپراقدن
 قابلیتی نسبتنده محصول آلتماسنه مانع‌دی . اهالی عظیم بر
 ممنونیتسزلك ایچنده ایدی . بویوک املاک صاحب‌لرینک اکثر
 تکالیفدن معافیتلری املاک ویرکیسینک مقدارینی آزالتیر ،
 تکالیفک همان کاملاً فقیرلره تحمیل ایدلمه‌سنه سببیت ویرردی .
 بو حال ، طبیعتیه خلقک جسارتسزلكنی ، عصیان حسلرینی
 آرتدیردی . بوندن باشقا ، ویرکیلرک چوقاغی ، ویرکی تحصیلنده
 کوستریلن ظلمده ، خلقک سغفالتیه برلکده تزايد ایدردی .
 خلقدن ، بورجنک عادتاً اون اون ایکی مثلی مقدارده پارا
 آلینیردی . بیزانس اختصار حالنده بولوندوغی دملرده ، خلق
 آرتق باشقا بر حکومتک اداره‌سنه کیرمه‌یه تشبث ایتدی . تورک
 اداره‌سی ، بیزانس اداره‌سندن یوزقات داها عادلانه و داها مشفقانه
 ایدی . تورکار طرفندن فتح ایدیلن اراضیده کی روملرک وضعیتی
 اونلری داها زیاده منجذب ایدیوردی .

روملر ، تورک اداره‌سنه کیرمه‌یی بر نوع قورتلوش صایارلردی .
 حکومتلرینک ظلملری آلتنده ازیلن روملرک قاچ دفعه لرتورکاری
 کندیلرینک امداد لرینه چاغیردقلری و یاخود ایمپراطورلغه قارشیده

عصیان ایدنلره التحاق ایله دکلی کوردولمشدی. اکثریسی، ویرکی
ظلمندن قور تولق ایچین طاغلره قاچارلر، اجنبی مملکتلره
سیغینیرلردی. آناطولوده برچوق باغلری و تارلاری خراب
برحاله براقیرلردی. بو حال بیزانس مالیه سنی کو کندن صار صاردی.
زراعت بویله اولدوغی کی، تجارت ده کاملاً یابانجیلر آلنده
ایدی. اون دردنجی عصرک باشلرنده، شرق د کیزلرینک
کافه سی لاتین مستملک لریله دولو ایدی. فوچه، ساقیز، مدالی،
اینوز، جنویز لر آلنده ایدی؛ کفه، طانا و طربزونده جنویز
جماعتلری واردی. غلطه اونلرک حاکمیتنه تابعدی. (۱۳۴۳ م،
۷۴۳ هـ) ده جنویز نفوذی بر مرتبه ده ایدی که، کندیلرندن
مساعده آلمان هیچ برون دیک، حتی بروم کمپسی قره دکزه
چیقامازدی. کذا، ناقسوس، آندروس، پارس، تینوس،
سانطورین، سهریغو، قورون، مودون، نقره پون، کرید هپ
وندیکلیرک آلنده ایدی. بیزانسه وسلانیکده وندیک جماعتلری واردی.
روملر، کندیلرینه دوشمان اولدوقلری حالده اونلر بوکاینه موفق
اولمشلردی. بعضاً، آرالرنده حرب بیله اولوردی. ۱۳۰۵ (۷۰۵ هـ) ده
وندیک دونانماسی (پرس آطه لری) فی یاغمالیتش، ایمپراطوری
وندیکه معاهده لری یکیله مکه زورله مجبور ایله مشدی. ۱۳۵۱
ده وندیک، بیزانس ایمپراطورینی جبراً بیطرفلقدن چیقارارق
جنویزله قارشی کندیسيله حربه صومقشدی. ۱۳۷۵ ده ده

عینی صورتله حرکت ایتدی . (تهنه دوس ، بوزجه آطه) پی
 بیزانسدن زورله آلائی . بونک اوزرینه جنویزلر (بیزانس) ده قانلی
 بر سرای اختلالی چیقار تارق بشنجی یو آنیس پاله اولوغوسی دویرمه یه
 موفق اولمشاردی . لاتین کیملری بیزانس سراینک اوکندن
 کچرکن سرایی سلاملامق اصولدندی . وندیک و جنویز کیملری
 بوکاده رعایت ایتمز لردی . ۱۳۴۸ (۸۴۸) ده یو آنیس قانتاقو -
 زینوس بیزانس دونانماسنی اصلاحه تشبث ایتدی . (بیزانس)
 کومروکنک فعالیتنی آرتیرمق ایچین ، کومروک رسمی تزیل
 ایتدیکی زمان ، جنویزلر تجارتلرینه ضرر ویرن بو حالدن ممنون
 اولمادیلر ، (بیزانس) ه تعرض ایتدیلر ، یاپیلان و یاپیلماقده
 اولان کیملری تخریب ایله دیلر ، (خلیج) ده دوران تجار کیلری
 یاقیدیلر . اون اوچنجی عصرک صوکنده بیزانس دونانماسی همان
 یوق کیدی . آرتق دونانما بسله مک بیزانس ایچین بهوده بر
 مصرفدی . خلیجده یاتان برقاج کمیدن ماعدا ، دیگر کیلر بوم
 بوش ، عسکر سز ، دکز اوزرنده چورو یوب کیدیوردی .
 روملر انحطاطه دوشدکجه ، روم صولرنده لاتینلرک استفاده لری
 آرتیوردی .

ایمپراطورلنی صویماق ایچین لاتینلرله جنویزلر بو فرصتدن
 استادانه استفاده ایدیوردی . بیزانس فقر و انحطاط ایچنده اولدوغی
 حالده ، قارشیسنده جنویز (غلطه) سی خارق العاده بر فعالیت

کوستریوردی. بیزانس کومروکنک وارداتی، غلطه‌نک وارداتنک آلتی بوچوق مثلنه یاقیندی. ایمپراطورلرک بعض امتعه حقنده قویدقلری تقیداتک هیچ اهمیتی یوقدی. قاچاق مال، بیزانس کومروکلرندن مبدولاً کچیور، بو صورتله بیزانسنک کومروک وارداتی ده آزالیوردی. بونکه برابر (بیزانس)، شرقک اک غلبه‌لق و اک زیارتگاه بر لیمانیدی.

میلادی اون دردنجی عصرده، بیزانسنده، جنویزلرله وندیکیلرک یاننده، فلورانسه‌لی، آنقونالی، را کوزه‌لی، بارسلونلی، مارسیلیالی تاجرلرده واردی. قادیقس، سهویل و حتی لوندره‌دن بیله بیزانسه تبحار کلیردی. روم ایمپراطورلغنک لیمانلری، اک بویوک تجارت یوللرینک مخرجلری اولمق اعتباریله، دائماً خارق‌العاده بر فعالیت مرکزى تشکیل ایدرلردی. فقط بوفعالیتدن مستفید اولانلر اجنبیلردی. مورخ غریغوراس دییورکه: «لاتینلر یالکیز بیزانسنک بوقوت و ثروتی و بوتون دکز وارداتی ضبط ایتمکه قالمادیلر؛ حکمدارک خزینه‌لرینی زنکینلشدیرن بوتون منابعی ده آله کچیردیلر». اودرجه‌ده که، بیزانس نه لیمان رسمی، نه کومروک رسمی، هیچ برشی آلمایه موفق اولامادی.

بو وضعیت قارشیشنده بیزانس مالیه‌سی موضوع بحث اولامازدی. ایمپراطورلغنک ایکی مهم منبعی، املاک ویرکیسی ایله کومروک رسمیدی. املاک ویرکیسی خزینه‌یه پک آز برشی تأمین

ايدىيوردى . كومروك رسمى ايسه ، كوندن كونه آزالىوردى .
 ايمپراطورلغك مالى و اقتصادى وضعيتى بو مر كزده اولدوغى
 حالده ، ايمپراطورلر غنغوى دبدبه لرندن واز كچميورلردى .
 اونلر ايچين عظمت و احتشامى محافظه ، عزت نفس مسئله سیدی .
 ايمپراطورلر عزت نفسلرينى تطين ايچين ايمپراطورلغك مدافعه
 واسطه لرندن اقتصاد ايدىيورلر ، عظمت و حشمتلرينى محافظه يه
 اعتنا ده قصور ايمه يورلردى . ظاهرى آلايشلرينى محافظه ايچين
 اقتصاد ايديلن پارا ، دونامادن ، تحکياتدن و تسليحاتدندى .
 ايمپراطور ، اوردو بودجه سنى آزالتيوردى ؛ فقط بودجه نك
 آزالتيلماسى ايمپراطورلغك استيلايه معروض براقيلماسى ديمكدى .
 واقعا بودجه آزالتيلوردى ؛ فقط اوردو بودجه سندن كسيلن
 پارا يوزندن ايمپراطورلغك تجاوز ايدن صربلره ويركى ويريليور ،
 توركلرك هر ارزوسنه مطاوعت ايدىليوردى . بو صورتله مملكتك
 مالى فلاكتى برقات داها آرتديريلوردى . بوتون بو اقتصادى
 تدبيرلرله آرتديريلان پارا ايله سرايك دبدبه سى محافظه اولونيوردى ؛
 چونكه ايمپراطورلغك ك زيا ده اهميت و يرديكى ، بونقطه ايدى . اسكى
 ايمپراطورلر زماننده كى عظمتى ادامه ايتديره رك خلقك كوزينى
 بويامق ايچين ايمپراطورلغك مدافعه سى اهمال اولونيوردى .
 اصل غريى ، ايمپراطورلغك فقر و ضرورت ايچنده بولوندوغى
 بر زمانده ، مراسم و تشريفاته دائر نظامنامه لر وجوده كتيرله سيدى .

بو نظامنامه لرده سرای ارکانک اونیفورمالری ، شاپقارینک
رنکی، رتبه علامتلی، تشریفانده کی صیرالری تثبیت ایدلمه سیدی.
بو کتابی اوقویان بر انسان ، بیزانسی ینه اسکیزی کبی الماسلر
و صیرمالر ، مدبدب و مطمئن تشریفات ایچنده یاشایور ظن
ایدردی. حال بو که ایمپراطور قانتاقوزینوس خاطر اتنده دیور که:
« هیچ بریده پارا یوق . احتیاط آقچه بيله صرف ایدلمش ؛
ایمپراطورک مجوهرلری صاتیلمش، مملکت کاملاً محو اولمشدی.
ایمپراطورک زوجہ سی بيله، ایمپراطورلغک سقوط و اضمحللانی
اعتراف ایدیوردی. حتی بیزانس عنعنہ سنه تابع اولارق، وطنک
مدافعہ سنی عظمت و دبدبہ سنه فدا ایدن سرای بيله ، باطناً
دوچار اولدوغی سفالت و ضرورتی کیزله یه میه جک برحاله کلشدی.
ایمپراطور بشنجی یو آنیس پاله اولوغوسک دو کوننده
(۱۳۴۷ م)، دو کون ایچین ویریلن ضیافتده، یمکلر طوپراق
وقالایلی قابلا ایچنده ویرلمشدی. ایمپراطور سراینک صوفراسنده
آرتق آلتون و کوموش قابلا کورولمیوردی . ایمپراطورک
قوستومی و تاجی ، الماس یرینه یالانجی طاشلر ، صیرما یرینه
یالیزلی کوسه لرله مزیندی. غریغوراس دیور که : « ایشته ،
روم ایمپراطورلغک اسکی رفاه و طنطنہ سی بو درجه خراب
اولمشدی . و بونی ده حجاب ایدرک یازیورم » .
بیزانس سراینک بویه برتنزله تحمل ایده بیللمه سی ایچین ،

مالی سفالتک غایت فجیع اولماسی ایجاب ایدردی . حقیقت ده بو مرکزده ایدی . خزینه بوم بوشدی . حتی غریغوراس ده دیورکه : « خزینه ده هوادن و توزدن باشقه برشی یوقدی » (شارل دیل ، بیزانس ، ص ۲۲۵) . بیزانس احتضار حالنده ایدی . محض پایتخت ، خراب ایمپراطورلغک ماتمنی طوتیور کیدی . واقعا بیزانس حالا بر چوق تاجرلری و سیاحلری کندیسنه جلب ایدیوردی ؛ فقط اونک حائز اولدوغی وضعیتدن استفاده ایدن ، اهالیسندن زیاده اجنبیلردی .

بیزانس اهالیسنگ اجتماعی سقوطلی ده ، ایمپراطورلغک انقراضنه سبب اولان عامللرک اک مهمیدی . بیزانش خلقنک اک مهم مشغله لرندن بری ، (سیرق) اویونلریدی . ایمپراطوردن صوک نفرینه وارنجیه قادار بوتون خلق (هیپودورم) له علاقه داردی . بوراده (مائی) و (یشیل) لرک مسابقه سنه ایمپراطورده اشتراک ایدردی . اودرجه ده که ، مائیلرله یشیللر مملکتده آیری آیری فرقه لر تشکیل ایدرلر ، اکثریا سیاسی مجادله لره سببیت ویرلردی . هیپودورم ده ، یاریشلردن ماعدا ، انسان کوره شلری ، حیوان دوکوشدورمه لر ، جانبازلر ، پالیاچولر ، هپسی یاپیلردی . خلق بوراده هم اکلنه نیر ، هم ده سیاسی احتراضلرینی میدان قویاردی . ایمپراطور ، تبعه سیله ایلک دفعه سیرقده تماس ایدردی .

کذا، دین ده بیزانس عالمنده مهم برعاملدی . خلق کلیسا آیینلرینک طنطنه سندن ذوقیاب اولوردی . اعزه تصویرلرینه کرامت عطف ایدر، هر آبدوده خارق العاده و پیغمبرانه بر قوت تصور ایلردی . بیزانسیک عابد و دیندار خالق کلیسا نفوذینه بویوک بر اهمیت ویرردی . دینی مناقشه لر بیزانس خلقنک اک طاتلی مشغولیتلرندن برینی تشکیل ایدر، بر بیزانسیلینک تربیه سنده دینی مشغولیت مهم بر موقع احراز ایلردی . کلیسا ایله هیپودورم، خلقنک اک مهم اجتماعی محللریدی . خصوصیه ایمپراطورلر روحانی صفتلرینی محافظه ایچین کلیسا مراسمیله سرای طنطنه سنی یکدیگرینه مزج ایدرلردی .

بیزانس خلقی، دیندار اولمقله برابر، صوک درجه ده حيله کاردی . بیزانسیک اصول اداره سی، مطلقیتدی . مطلقیت اداره ده هرشی ایمپراطورک آرزوسنه تابعدی : سرای بوتون ایشلرک مرکزیدی . بو سببدن، منفعتلرینی تأمین ایتمک ایسته ینلر، هپ انتریکه لرینی سرایده ایمپراطور اطرافنده تدویر ایدرلردی . سرای، خادم آغلری، قادینلر و ایشسز کوجسز دولت رجالیه دولو ایدی . بناءً علیه حيله و دسیسه حرمدده جاری اولدوغی کبی، خاصه عسکرلری آراسنده ده بوتون فجاعتیه حکم فرما ایدی . هر کس، ایمپراطورک کوزده سنی ده ویرمه یه چالیشیر، مداهنه، افتراء، پارا، جنایت، کافه سی مباح عد ایدیلریدی .

سرایده قادینلر مهم بررول اوینارلردی . اخلاق دوشکون ،
تفسخ کالنده ایدی . بوتون بیزانس حیاتی هیپیودورم ایله آیا صوفیا
و مقدس سرای اطرافنده جریان ایدردی .

بیزانس خلقی ، اجتماعی صنفلرک هانکیسنه منسوب اولورسه
اولسون ، عصی ، سریع التأثر ، دیندار ، موسوس و محترصدی .
ذوقدن ، اویوندن ، مطمئن کلیسا مراسمندن حظ ایدردی .
قلباً ظالمدی . جزالری بيله برون کسمک ، کوز اویمق ، قولاق
کسمک ، عذاب و اضطراب ایچنده جان ویردیرمکدی . خلق ،
سقوط ایدن برایمپراطوره بيله اظالمانه معامله لردن چکینمز لردی .
بونکله برابر ، بیزانس خلقنک تدقیقه ، تبعه ، فکری اینجه لکاره ده
تمایلی واردی . خلق ، معجزه لره ، کاهنلره ، سحره ، فالجیلره ،
علم نجومه اعتقاد ایدردی .

بیزانسیک صولک زمانلرنده دوچار اولدوغی بواداری ، سیاسی ،
اجتماعی قصورلری ، عثمانلی تورکلره قارشى اک مهم ضعفلرینی
تشکیل ایدیوردی . بعضاً عثمانلی تورکلری چکمه مهین آیدین
وصاروخان تورکلری ، کندی استفاده لری ایچین بیزانسه برلک
اولورلردی . فقط اونلرک بو اتحادی ده بیزانس ایچین مهم بر
قوت تشکیل ایده مزدی . بیزانسه یارديم ایدن تورکلرک بکلری ،
هان عمومیتله ، عثمانلی تورکلرک سطوتی ، فتوحاتی ، موفقیاتى
چکمه مهینلردی . بناءً علیه کنديلرینک بیزانسه یارديم ایتمه لری ده

ضعفلىرىنە بويوك بىر دىلدى .

عثمانلى توركلار كادارە سىندەكى دولت، عسكەرى، ادارى و سىياسى تەشكىلات اعتبارىلە، آناطولودەكى سائر تورك بىكلىكلەرىك فۇقئەدە ايدى . خصوصىيە عثمانلى توركلەر، دوراندیشانە بىر سىياسەت، بىزانسك دوشمانلىرىنى كاملاً آكلامشەر، ايجابىندە بىزانسى ضعيف دوشورمك ايجىن وندىك و جنوبىز جەھورىتلىرىنىك احتىراضلىرىنى دە سىياسى برواسطە كى قوللانمىق چارەلىرىنى بولمىشەردى . بىزانس، عثمانلى توركلەر غايەلىرىنە مانع اولاجىق بىراقتدارى حائز دىكەدى .

بويىپىرانمىش و صارصىلمىش بىنەك سىلطان او كىندىن و طورغود ايلارندىن (يالاق اووا) ساحللىرىنە، حتى (اىزنىكىمىد) اوكلرىنە قادار ايلرلىلەين دىنىج وفدا كار توركلەر قارشى قويايىلە جىكى شەبەلەيدى . بو حقىقىتى ، توركلەر كىزغا منقەبەلىرىنى مقدس سىرايدە خىلجانلارلە دىگىلەين مؤرح غىرىغوراس دە تصدىق ايدىيوردى :

« توركلەر بىزانس ايشلىرىنىك پىك فنا كىتەدىكىنى بىلدەكلەندىن كىملەر حاضر لايارق بويوك قوتلارلە دىكەزلىردە دولاشمايە باشلايدىلەر . برطرفدىن ، آشاغى يوقارى كىدن تىجار كىملرىنى هجوم ايجىن كوزەتلىرلەر ؛ دىكر طرفدىن ، ما كەدونىيا و ترا كىيايە و كوچوك آطەلرە هجوم ايدەرك فلاكت اوستەنە فلاكت ياغدىرلىردى . بو صىرادە اىمپراطور خىزىنەسى طام طاقىر اولدوغىندىن اسكى اىمپىرا- طورلەر خىزىنەدە محفوظ قىمەتلى اشىياسى دە ، ضرورت پوزىندىن

صاتیلیدی .

(بروسه) نك آلینیشندن اولکی وقوعاتی ده شو صورتله یازمشدی :
 « ایمپراطور ، شبه جزیره جوارنده آوله مشغول ایکن بر
 دکنر قضاسی نتیجه سنده تورکلردن یتیش کیشی بو طرفلره
 کلدیله . ایمپراطورک معیتله چارپیشدیله . کندیلرینه برشی
 اولمادی . روملردن ایسه چوغی یارالاندی ، ایمپراطورک یاراسی
 آیاغنده ایدی . یویارادن چوق راحتسز اولدی . او صیراده
 شرق ایشلری اھال ایدلکی ایچین (ویتینیا) یه تابع شهر
 وایالتلرک چوغی تورکلر الینه کچدی . (بروسه) ده محاصره
 ایدیلهرک آجلقدن تسلیم اولدی . »

عثمانلی تورکلرک (بروسه) ایله قالمایاچقلری آشکاردی . عثمان
 بکک وفاتی ، سرحدلرده وحواله لرده دشمن کوزله ین غازیلرک عزمنی
 اصلا خللدار ایتمه مشدی . اورخان بک ذاتاً سنه لردن بری ایش
 باشنده ایدی . عثمان بک حیاتنک صوک سنه لرده (۷۲۵) هان
 بوتون دولت ایشنی ، غزا و جهاد مصلحتنی اوغله براقشدی .
 بویوک اوغلو علاءالدین بک (یکیشهر) ده علم و معرفتدن باشقه
 بر شيله مشغول اولمازدی .

(ایزنیکمید) اوکلرنده الا آن محاربه لر دوام ایدیوردی .
 تورک نفوذی (پهله قانون ، مالتیه) اوکلرینه یاقلاشمشدی .
 بو ائنده ایدی که ، قو کورآلب (آق یازی) یی آلدی . بودیاره

(قو کورپه ایلی) دینیردی . (بولی) و (مدرنی) تورکلر الینه کچدی . قو کور آلپ (أبه صوی) نه قادار ایلریله دی . بك رحمانی اوراده براقدی . آقچه قوجه یی (فاندیری) یه کوندردی . مقصدی (صامان دره ، سمندره) یی آلمقدی . غازیلر کیجه کوندوز چالیشیورلردی . گاه قلعه بککریله خوش کچینیورلر ، گاه چارپیشیورلر ، و بو صورتله قطعی فرصتی کوزه تیورلردی . نهایت ، (صامان دره) تکفورینک اوغلو اولدی . جنازه سی طنطنه ایله حصاردن دیشاری چیقاریلدی . تورکلر ، تام بواشناده حصاری باصدیلر ، قاپیلرینی قاپادیلر ، و بو صورتله فتحه موفق اولدیلر . حصارک فتحه دائر شو روایت واردر : بککریلر حصاری آلمازدن اول تکفوری جنازه ده یاقالامشیر ؛ حصارک اوکنه کتیرمشیر .

— کلک بو تکفوری صاتون آلاک ، حصاریکیزی بزه ویرک . دیمشیر . اونلرده :

— استانبوله یوللایک ، اوراده صاتک .

جوابی ویرمشیر . بونک اوزرینه مسئله یی اورخان بکه صورمشیر . شو جواب کلش : « صاتون ، غازیلره خرچلق اولسون . غازیلر تکفوری استانبوله یوللامشیر . اون پارا ویرن اولمامش . نهایت حصاری زورله آلمشیر .

(صامان دره) نک دوشمه سی ، (ایزنیکمید ، ایزمید) کده

فلا گتته سبب اولدی . بوتون بوساحه لرده فعالیت کوسترن ، آچه قوجه ایدی . حتی (صامان دره) یی اشغال ایدن ده ، او ایدی . (تاریخ آل عثمان) دیورکه :

« آچه قوجه کلدی ، صماندره یی مقام ایدندی . استانبول تکفور . یله و آیدوس تکفوریله دائم جنک ایدردی ، و هر دم آچه قوجه یله غازیلر آت آرقه سندن اینمزدی . آنکچونکم استانبول تکفورینک دائم جنکی اکسیک دکل ایدی . آنکچونکم آیدوس حصار ی ترکی سورمک ایستردی . آچه قوجه اطرافک کویلرینی مقرایتمش ایدی . نهایت صرا (آیدوس) حصارینه کلدی . (آیدوس) ، حقنده ده شو روایت واردر :

تکفورک قیزی ، رؤیاسنده بر کنج کورمش . بو کنجه عاشق اولمش . قلعه تورکلر طرفندن محاصره ایدیانجه ، رؤیاسنده کوردیکی قهرمانی در حال غازیلر آره سنده طانیمش . کندیسيله ، اوزون محاصره لر ائاسنده ، بر فرصت بولوب کوروشمش . غازیلری قلعه یه صوقایه موافقت کوسترمش . طاشه بر مکتوب باغلا یوب حصاردن طیشاری آتمش . غازی رحمان مکتوبی آچه قوجه یه کتیرمش . روجه بیلن برینی بولمشلر ، مکتوبی او قوشمشلر ، مسئله یی آکلامشلر ، قیزک سوز - لرینه اینانما مازاق ایتمه مشلر . آچه قوجه دیمش که :

— غازیلر ، کیمدرکم بویوله ، حق یولنه باش قویه و بر نشان قویه وین آنکله اولام ؟

غازی رحمان بردنبره آتیلمش :

— بن حاضرم .

قوکور آلپ سوزه قاریشمش :

— بر حال دخی ایدلم .

— نه ایدلم ؟

— اوطوردیغمن: حصاری اوده اورالم .

قبول ایتشلر ، (صامان دره) پی آتشه اورمشلر ، اوزاقلره دوغرو صاووشوب کیتمشلر .

فی الحقیقه ، تکفور کندیسنی تورک هجومندن قورتولدی صاعش .
 یک زیاده مستریخ اولمش . وقتلر کچمش ، قیزک مکتوبنده تعین ایتد-
 یکی کیجه کلش . غازیلر مکتوبیده یازیلان یره کیتمشلر . قیز ، غازی
 رحمانی کورمش ، حصاردن بر ایپ صارقیتمش . بر اوجنی حصارک
 مازغالنه باغلامش ، غازی رحمان ایپه صاریلارق چیقمش . ایچری
 کیرمش . قاپیلر آچیلمش . آنی بر هجوم تکفوری پریشان ایتمش .
 صباحلین آقچه قوجه ده حصاره کلش ، (آیدوس) بو صورته تورکلر
 آینه کچمش .

اوصیراده اورخان بک (یکیشهر) ده ایدی . بک رحمان ده ،
 قیزله برابر (یکیشهره) کلشدی . اورخان بکه هم قیزی ،
 هم ده تکفورک ماللرینی تسلیم ایده جکدی . اورخان بک آیدوس
 کوزه لانی بک رحمانه ویردی . بک رحمانک نسلندن اولان قره جه رحمان
 بوایللرده استانبول فتحنه قادار یاشادی . قره جه رحمان ده ، جدینک
 یاپدیغی کبی ، استانبول تکفورینی راحت بر اقامازدی . عاشق پاشا
 زاده دینورکه :

« آنک زماننده اوغلانجقلر آغلاسه : هی ! قره جه رحمان
 کلدی دیرلردی . هی بکلر ، بو مناقبی کم یازدم ، والله جمعیسنه
 علمم یتیشوب یازدم ؛ صاعمه کز کم یاباندن یازدم » (ص ۳۵) .
 آقچه قوجه بوایللرک قهرمانیدی . نهایت بودیارده اونک

نامی ویرلدى . (قوجه ايلي) ، بيزانسه قارشى بر اوج دیاری
اولدی . طورغود ايلي ، قو کورپه ايلي ايله برابر ، سقاریلری ،
نیلوفرلری ، پورصاقلریله عصرلرجه تورك اتلیلرینه جولانگاه
تشکیل ایتدی . آچقه قوجه نك بىكلری سقاریانك چاملى بلارنده ،
(خنكارچایری) نك چىچىكللى اووالرنده سنه لرجه ات اوینا تدیله .
توركلرك تجاوزلرینه قارشى دواملى بر مقاومت کوسترلدىكى
یوقدی . اساساً بو حصارلرك ، كندى باشلرینه قارشى دورمالری
قابل دکلدى . توركلرك عسکرلری هم قوتلى ، هم ده حربه
آلیشغیندى .

استانبول ایسه اونلره نه یارديم ایتمه یه مقتدردی ، نه ده یارديم
ایتمك ایستهردی . توركلرك ایلر یله مه سی ، استانبولده بوسبتون
یاشقا بر ذهنیت حاصل ایتمشدى . (روسه) نك سقو طى استانبولك
قوة معنویه سنى قیرمشدى . بيزانس ایچین آرتق توركلره قارشى
دورما یه امكان یوقدی .

ایمپراطور کنج آندرونیقوس آلتی سنه دن برى حکومته
اشراك ایتمه دىكى حالده ، شیمدی اختیار آندرونیقوسى غریب
بر سلطنت حرصی استیلا ایله مشدى . حفیدی کنج
آندرونیقوسدن دائماً اندیشه ایدیوردی .

خصوصیله ، بولغارلرله تعرضى و تدافعى بر معاهده عدایتش
ولماسى ، اندیشه سنى بوسبتون آرتدیرمشدى . بوسبیدن ، اوده

خارجده کندیسنه قوتلی بر متفق آرامق ایسته یوردی . اونک ایچین ده قوتلی متفق، اورخان بك اولاییلیدی .

اورخان بكك شرفی کوندن کونه آرتیوردی . بوسیدن، اختیار آندرونیقوس بر دقیقه تردد ایتمه دی . کنج آندرو - نیقوسك (سلانیک) ی آلا دیغنی و بوتون ما که دونیای تسیخیر ایدهرک (استانبول) اوزرینه یورودیکنی دویار دویماز ، اورخان بکه مراجعت ایتدی . اورخان بك اختیار آندرونیقوسك تکلیفی مع الممنونیه قبول ایتدی ، کندیسنه امداد قوتی اولق اوزره بر قاچ بيك کیشی یوللادی . بونکله برابر ، اختیار آندرونیقوسك اوردوسی (سیلیوری) ایله (چورلو) آراسنده مغلوب اولدی ، بوتون اوردو (استانبول) ه التجا ایله دی . بونک اوزرینه اختیار آندرونیقوس سلطنتدن فراغت ایتدی . بیزانس تختنده ، اوچونجی کنج آندرونیقوس قالدی . اورخان بكك امداد قوتی آناطولویه چکادی (۷۴۸) . عثمانلی تورکلرک آوروپا ایشلرینه ، ایلک مداخله لری ، بیزانسله سیاسی مناسبتلرینک ایلکی، بوایدی . داها صوگرا بومناسبت کیتدکه آرتدی (اوقزا ، دولت عثمانیه تاریخی ، ص ۹۱) . (ایزمید) اطرافی تورکلر آلینه کچمشدی . فقط (ایزمید)ک ، حصارینک ده آلیماسی لازمدی . حصار آینادجه ، مرمره ساحلرینه حاکم اولق قابل دکلدی .

مؤرخلرىمىز كاكثرى (ايزميد) ك (ايزنيق) دن اول
 آلىنديغنى ذكر ايدرلر . يالكنز لطفى پاشا ، بيزانس مؤرخلرىله
 هم فكر اولارق ، (ايزنيق) ك داها اول آلىنديغنى يازار
 (تاريخ آل عثمان ، ص ۱۸ : ۴۱) .
 كيون ديوركه :

« اورخان بكك (ايزنيق) ي ۱۳۳۰ (۱۳۳۱ هـ) ،
 و (ايزميد) ي ده ۱۳۳۹ (۱۳۴۰ هـ) ده آلىدى آگلاشيلوركه ،
 بو ، توركلرك قبول ايتدكلرى تاريخلره تماميله موافق كليونر .
 عثمانلى توركلركاك زياده اهميت ويردكلرى ، (ايزنيق) دى .
 عثمان بك زماننده برى قوشا دييلان حصار ، آلآن دوشميوردى .
 شيمدى ، بيزانس ايمپراطورى كنج آندرونيقوس حصاره يارديم
 ايتميه ده قالقشمشدى . ايمپراطورى هر حالده يولندن آليقويمق
 لازمدى . بيزانسكر تنبل اوردوسى (ايزنيق) اوكلرينه كلنججه يه
 قادار ، عثمانلى توركلرك داها اول قارشى چيقا بيلمه لرى قابلدى .
 اساساً (ايزنيق) ايله بيزانس بيشنده (ايزميد) محصور ،
 (قويون حصار) ، (آيدوس) و (صامان دره) آقجه قوجه
 ايله قوكور آليك غازيلرى آلنده ايدى .

اورخان بك ، ظفردن امين ، اوردوسنى طوپلادى . (ايزنيق) ي
 قور تارمق ايچين استانبولى تهديد باشلادى . اوردو استانبوله

دوغرىو ايلريله يوردى .

عثمانلى توركلرك مرمه قىلارنده قازانقلرى بويوك ظفر،
مالته مظفريتيدىر . بو ظفرك منقبه لرىنى بيزانس مورخلىرىنىك
آغرىندن ايشىتمەلیدىر . بولردن غرىغوراس ايله قانتاقوزىنوس
محاربە يە بالذات شاهد اولمشلردىر . مثلاً قانتاقوزىنوس، محاربە دە
(مە غادومە ستىقوس) صفتيله حاضر بولونىوردى . مع مافيه قانتا -
قوزىنوس حقيقتى بوزمشدر . غرىغوراس ايسە شو صورتە
آ كلاتيور :

« يازك مبارك الى يريوزىنى كونا كون آغاجلر ورنكا رنك چىچكلرە
سوسلەدى . ايمپراطور، بيزانس اوردوسىنىك حاضر لائىسانى امرایتدى .
بوکا برچوق سبىلر واردى : (ويتىنيا) شىرلىرىنىك اك اسكىسى واک
مهمى اولان (ايزنىق)ى آجلق وقوتلە محاصره ايدىن (ويتىنيا) بىكى
اورخان ايله چارپىشماق اىچىن آناطولويه كچمك فىكرىندە ايدى . عسکر،
بىرارصوكلارندە ، بيزانس بوغازندىن ايمپراطورلە برابر آناطولويه كچدى .
اوردونىك اك سىچمە قىسمى ايكى بىك كىشىدى . چوغى ايسە درمە چاتما
ايدى ؛ بولرك محاربە يى بوزاجقلىرىنە شىبە يوقدى . بوزغونلق وقوعندە
قاجابىلەك اىچىن برابرلارندە ھان كىندى نفوسلرى نىسبتەندە قايىق وىندال
كوتورىورلردى كە ، بۇدە قورقاقلىرىنىك كورونور علامتلىرىندى . تعقيب
وظفرى ايسە ھىچ دوشونمىورلردى . (ويتىنيا) بىكى ، عسكىرلىرىنىك
اك تىجرىبە كورمىشلىرىنى سىچوب كوندردى . كىندىسى دە سىكز يوز كىشى
آلارق ايمپراطورك قارشىسىنە چىقدى .

ايمپراطور آناطولويه كچدى ، اوچ كون ساحل بويىچە كىتدى ،
(فىلوقرىنى ، طاوشانجىل) قىصبەسىنە كەلدى . اورخانك عسكىرى

جواردر بندلری اشغال ایتشدی. کندیدی ده یاقین بریده اوطوریوردی. ایمپراطور بونی خبر آلدی. اوردو کاخی قوردی، کیجه یی اوراده کچوردی. کونش دوغار کن اولا خفیف، صوکر آغیر تورک پیاده لری، آرقالرن دن ده تورک آتیلرینک طاغلردن ایندکلرینی کوردی. در حال سلاخلاندی، اوزرلرینه یورودی. تورک‌لر بزمکیلره یاناش-میورلر، اوزافدن اوق یاغدی رییورلردی. ایمپراطور تورک‌لرک بویله عادتلی اولمادیغنی بیلدیکی ایچین بونی نورقدلرینه حمل ایتدی، داهای زیاده جسارتلندی، ایلری یه دوغرو یورودی. ایمپراطورک معیتنده کی تجربه کورمش کیمسه لر بونک آئی بر نتیجه یه منجر اولمایا جغنی آکلادیلر، فقط ایمپراطوری دور دورمایه موفق اولمادیلر.

کونش نصف النهاردن کچوردی. محاربه غیر منتظم بر صورتده دوام ایدیوردی. هوا صیجاقدی. اورخان روملرک صیجاقدن و یورغونلقدن درمانسز قالدکلرینی تپه دن کوردی، بویوک بر قوتله طاغلردن آشاغی یورودی، تورک‌لر هم باغیریور، هم اوق یاغدی رییور، آرا صیراده کوکس کوکسه، قیلیج قیلیجه چارپیشیوردی. روملر بوجومه جسورانه قارشی دوردیلر، ساعتلرجه دایاندیلر، برچوقده تلفات ویردیلر.

نهایت اورتالق قاراردی. روملر دوشمان طوپراغنده کیجه یاریسی محاربه یه دوام ایته نک تهلمکلی اولدوغنی آکلادیلر. عجله عجله اوردو. کاهلرینه دوغمه یه باشلادیلر. ایشته اوزمان تورک‌لر داهای زیاده برصولته آتیلدیلر. اورتالق قارارنجیه قدار، انسان، حیوان، نه وارسه، قیلیچدن کچیردیلر. برچوق یارایلر آراسنده ایمپراطورده بر آیاغندن اوقله خفیفجه و تهلمکسزجه یارالانمشدی.

اوکیجه، مششوم بر حادثه حقک غضبنی کوستردی: تورک‌لر روملرک تسلیحاتی و مقاومتی آکلادیلر. اونلرک بوراده دورمایا جقلرینه

و ایرته-ی صبح تکرار هجوم ایدە-جکاربینه ذاهب اولدیلر . گوزجی اولارق اوچ یوز سواری برافدیلر . یولاری و کچیدلری طومق ایچین اوردو ایله داها ایلرلره کیتدیلر .

اورخان بوصورتله آیرلدی . ایمپراطورده یاراسنی صاردیرمق ایچین (طاوشانجیل) قصبه-سنة کیتدی ، روم عسکرلری بونی دوینجه ، ایمپراطوری قاجدی ظن ایتدیلر . فی الحقیقه ، اوکیجه اورخانک بویوک بر قوتله هجوم ایتمه-سی ، صباحه قادار ایچلرندن کونش کوره-بیله جک بر فرد بر اقاماسی قابلدی . یانلرنده قایق کتیرنلر ، چیر چییلاق قایقلره بینهرک صاووشدیلر ، بر قسمی قصبه-نک حصار قاپیلرینه قوش-شدیلر . بربرینی چیکنه-یه-رک تلف اولدیلر . بر قسمی ده بربرینک اوموزلرینه بینهرک مازغالاردن آتلا یورلردی . آرقه دن کندیلرینی چکمنلری و وارلانیورلر ، یرلره دوشهرک تلف اولویورلردی . حتی دوردقلری یرده قورقولرندن نفسلری طوتولارق اولنلر بیله اولدی .

کونش بوصیراده افقلرده یوکسلمش ، روملرک اومولماز فلا کتتی اوچ یوز تورکه کوسترییوردی . بونلر همان قوش-شدیلر . اوردوگاهه کلدیلر . چادیرلر بوم بوش-شدی . ایمپراطورک قیرمنی پالانلی آتاریله چادیرلرینی کوردیلر . ایچلرندن ایکی یوز کیشی بونلری یوکله-نوب دوندیلر . یوز نفری داها زیاده یافلاشدیلر ، کندیلرینی قایقلره آتمايه وقت بولامایانلره یاغمور کبی اوق یاغدیرمایه باشلادیلر . ایمپراطور بو فلا کتتی دویار دویماز آرتق هیچ بر تدبیر قوللانامادی ، اوده بر کمی-یه آتلادی ، (بیزانس) ه دوغرو دونوب کیتدی (فصل ۹ ، باب ۹) .

غریغوراس ، محاربه-نک (طاوشانجیل) ده اولدوغنی یازدیغی حالده ، قانتاقوزینوس صراحة (پهله قانون ، مالتیه) ده جریان ایتدیکنی و ایمپراطورک مغلوب و پریشان اولدقدن صوکر

(فیلوقرینی) حصارینه چکادیکنی یازیور .

قانتاقوزینوسک روایتنه کوره ، ایمپراطور صوک برتدبیرده بولونمق ایسته مش . قوتلرندن برقیمنی (طاوشانجیل) ه ، بر قسمنی (لییدسا ، ککبوزه) یه ، برقیمنی (ریچیون ، داریجه) یه ، برقیمنی ده (نیکه تیاطوس ، اسکی حصار) ه کوندرمش . فقط نتیجه ، ینه روملرک پریشانلغنه منجر اولمش .

تورکەر ممنوندی . مالشه ظفرلریله بیزانسیک آناطولودن کاملاً آلنی کسمشلردی . ایمپراطورک تورکهره قارشى آرتق نه دورلو داورانمق لازم کلدیکنی آ کلاماسی ایچین بو درس کافیدی . تورکەر بوتون قوجه ایلینه حاکم دیلر . غریغوراس دییورکه :

« تورکەر ایکیده برده قرهیه چیقیورلر ، کویا دوست بر مملکتده ایمشارکی کندیلرینه قارشى دوراجق برفرده تصادف ایتمیورلردی . »

تورکهرایچین آرتق بیزانسدن هیچ بر تهلکه قالمامشدی . (ایزنیق) ک محاصره سینه سربستجه دوام ایده بیلیرلردی . ذاتاً مقصدلری ده بوایدی . نته کیم ، دوشمان پریشان بر صورتده دکزه دو کولدکن صو کرا ، تورکەرغازیلرینی طوپلادیلر ، (ایزنیق) یوللرینه دوغرو اوزاقلاشدیلر .

(ایزنیق) خلقی صولک رادهیه کلمشلردی . آجلغنه وصیقینتی یه

دایانامایورلردی. زمان اولدی که ، (ایزنیک) ک قاپیلرینی بیله
 آچمایه جسارت ایدمه دیلر . شهرک اطرافی تورک اتلیلری ایله
 دولو ایدی . جوارده کی کویلر غازیلره تیمار اولارق ویریلشدی . بونلر
 حصار خلقنه کوز آچدیرمایورلر ، ییه جکده ویرمیورلردی .
 بعضاً ، اورالرده کی روملرده تورکلرله برلک اولورلر ، (ایزنیک)
 شهرینه قارشى محاربه یه کیدرلردی . تورک اداره سی هپسنی ده
 ممنون ایتشدی . (ایزنیک) خلقی ایسه بالق اولامق ایچین
 کوله بیله چیقماز اولمشلردی .

نهایت اهالی ، غازیلره خبر یوللادیلر . شهرک مضایقه
 ایچنده قالدیغنی آکلاتدیلر . اورخان بك (ایزنیک) اوکنه
 کلدی . تسلیم مذاکره سی باشلادی . ایزنیکلیلرک تکلیفی شوایدی :
 — بزمه عهد ایدک ، بزى قیرماییک ، و کیده نمز کیتسون
 و طورانمز طورسون . حصاری سزه تسلیم ایددم .

اورخان بك راضی اولدی ، شهرک تکفوری استانبول
 قاپیسندن چیقوب کیتدی ، اهالی وعسکر قالدی . اورخان بك
 (ایزنیک) تکفورینی کمی به پندیرتدی ، استانبوله یوللادی .
 کندی ده (یکیشهر) قاپیسندن شهره کیردی . قاپی جوارنده
 بر باغچه واردی : اورخان بك بو باغچه یه کلدی . بوتون خلق
 قارشیلایه چیقمشدی . آرالرنده پک چوق قادین واردی ،
 چوغی ده قوجه سزدی .

اورخان بك مراق ايتدى :

— بونلك ارلرى قانى ؟

جواب و يرديلر :

— قيرلدى . كيمي جنكدن ، كيمي آجلقدن .

ايچلرندە مستثنا كوزەللردە واردى . بونلردن ايستەكى اولانلر، غازيلرە نكاح ايدلدى . شەرك اولرى غازيلرە تقسيم اولوندى . (ايزنيق)، توركلر طرفندن فتح ايدلەكن صوكر (۷۳۱)، تەكرار روملك ائىنە كچدى . ايكي سنە قادار روملك ائىنە قالدى . نھايت ۷۳۳ دە (۱۳۳۲ م) تەكرار توركلر طرفندن صورت قطعىدە فتح ايدلدى .

لوبو ، بيزانس مؤرخلرينە استناداً دييوركه :

« بواثنادە توركلر (ايزنيق) اوكنە كلديلر ، بوراسى تەكرار ايمپراطورلق اداره سنە كيرمشدى . چونكە اوزمانلر بورالرى روملردن توركلرە ، توركلردن دە روملرە كچردى . بوسفر توركلر ، معظم شەرك معبدلرينى يغما ايتديلر . زينتلرينى ، تصويرلرينى ، مقدس اشياسنى وبرچوقدە كىتابلر شى المقلە اكتفا ايلەديلر . بونلرى روملرە غايت بهالى ساتديلر . اورادن (ويتىنيا) نى احاطە ايدن دكزك بوتون ساحللرينى دولاشديلر ، بورالردە يرلشديلر ، وبوحوالينك بوتون شەكلرينى خراجە باغلاديلر » (۱) .

شو حالده ، (ايزنيق) ك صورت قطعيه ده فتحي ، تورك مؤرخلرينه كوره ۷۳۱ ، بيزانس مؤرخلرينه كوره ده ۷۳۳ ده در . غريغوراس (۱۳۳۲ م) ۷۳۳ سنه سي وقوعاتي صيراسنده (ايزنيق) ك سقوطني شو سطرلرله قيد ايتمشر :

« توركلر ابي مدتدن بري محاصره ايتدكلري (ايزنيق) شهريني بو صيراده فتح ايتديلر » (فصل ۹) . اورخان بك (ايزنيق) ي اعمار ايتدي . (يکشهر) قاپيسنده بر عمارت ياپدي . عمارتك شيخلكني ده اده بالينك مريدي وقارده شتك اوغلو آخي حسنه ويردي .

شهرده مدرسه آچدي . مدرسلكنه داود قيصر يي ، داهي صوكراتاج الدين كردي يي ، خطيبلكه ده قره خواجه يي تعيين ايتدي . شهر ي اعمار ايچين ابي زمان (ايزنيق) دن آيريلادي . (ايزنيق) ي مقر اتخاذايدندي . قاضيلغنه چاندارلي قره خليلي تعيين ايتدي . چاندارلي ، ايلك اول (بيله جك) ، داهي صوكراده (بروسه) قاضيسي اولمشدي . (ايزنيق) ي چوق سوردی . توركلر ايچين ، مالتيه ظفرنندن صوكراتاج ، استانبول يولي آچيلمش كييدي . بوني بيزانسليلرده آكلاء شلردی .

مؤرخ غريغوراس دييوركه :

« يازهدوغرو ، ايمپراطور سفره حاضر لانديني صيراده ، آناطولودن دهشتلي بر خير كلدي : ويتينا يكي اورخان چوقدن بري كيزلي كيزلي

طوپلادیفی قوتلری حاضر لامش، قسماً (ابیہ رون)، قسماً (پروپوندیس) یولندن بیزانسه کچه جکمش. بویرلر او زمانه قادار دشمن تجاوزندن مصون قالمشدی. تورکەرک مقصدی یازین خرمن و حصاده مشغول اولان و بالخاصه کویلره چیقان اهلری و ورمق، بر ایکی قلعه الده ایتدکن صوکرا، اولری اس الحركات کبی قوالانارق بیزانس اوزرینه یورو مکدر. چونکه کرک مالی مضایقه ده بولون دقلرندن و کرک دشمنلرینک متوالی جوولرندن دولایی روملرک اولره قارشى قویاجق قوتلری یوقدی. بوندن باشقه، تورکەر غلطه ده کی لاتینلرک ده رأیلرینی و موافقتلرینی آلمشاردی. بوسبیدن، بیزانسی فتح ایده جکارینه تمامیه قانعدیلر. »

ایشته بوقناعته مبنی ایدی که، سنه لردن بری محاصره ایدیلن (ایزمید) اوزرینه بر اوردو یورو یوردی. بو اوردوده اورخان بکک اوغلو سلیمان بکله قره مرسل ده واردی. آچقه قوجه، ساقاریه اووالرینه نامنی یادکار بر اقدقن صوکرا، دنیادن آل چکمشدی (۷۳۸). کذا، قو کور آلپ ده اولمشدی. اورخان بک، باباسی عثمان بک زماننده یاشادیفی و اداره ایتدیکی سلطان اوکی سنجاغنه اوغلو مراد بکی متصرف ایتمش، بوکا قو کور آلپک ایالتی ده الحاق ایدلمشدی. آرتق (ایزمید) ک فتحی قولایلاشمشدی؛ اورخان بکک یوله چیقماسی ده بوسبیه مبنیدی. (آیدوس) ایله (بروسه) بیننده، دوشمان النده قالان، بر (ایزمید) واردی. شیمدی اوده فتح ایدیله جکدی. بوتون غازیلر سرور ایچنده ایدی. اورخان بکک (ایزمید) ده دوغرو یوله چیقادیغنی دویار دویماز، (آیدوس) قلعه سنده کی غازیلر هپ (کیوه) یه کملشردی.

(کیوه) ، یشیل اورمانلری ، چاملی قایالری ، سرین
 صولریله بر شعردر . (طوغان چای) یوکسکلردن « زمرد
 یاققلر ، چیچکلی دالار آراسندن پارلاق اینجیلر کی دوکولن
 صولری فیاض آناطولونک دامارلرندن صیزان زمزمملر کبیدر .
 (کیوه) ، اوکون اورخان بکیده ، آیدوس قهرمانلرینی ده
 کولکهلری آلتنده دیگنلندی . برقاج کون صوکراده ، عظمتلی
 تورک آتلیلری (ایزمید) اوکلرنده کوروندی .
 (ایزمید) بیزانسیک مهم مرکز لرلندی .

عاشق پاشا زاده دیورکه :

« آنک صاحبی بر خاؤن ایدی . استانبول تکفورینه تعلق واردی .
 آدینه بلقونده دیرلردی . یلاق اوواسنک صاحبی ایدی . درهده کی
 حصار آنکدر ، وهم بر قارداشی واردی . آدینه قابون دیرلردی .
 یوقارده کی حصار آنکدر . شمدیکی حینده ترک اکا قویون حصاری
 دیرلر » (ص ۳۸) .

عاشق پاشا زاده نیک ایتدیکی (بلقونده) ، پرنسس ماریقا
 پاله اولوغوسدر . قاردهشی (قابون) ده ، (قالویانی) در . تورکار
 محاصره نی شدتلندیرمه یه باشلانجه ، قالویانی دایانامیه جغنی آکلادی .
 داها یوقاری یه ، (قویون حصار) ، کیتدی . تورکار اورایی ده
 قوشا تدیلمر ، قلعه یی آلدیلر ، ایچنده کیلری اسیر ایتدیلمر .
 (ایزمید) ، بو پک مهم استناددن محروم اولونجه ، چار ناچار
 تسلیم اولدی .

(ایزمید) محاصره سی حقنده (مخالف الاخبار ، جلد ۳ ،

ص ۲۸) - ویریان معلومات داها صریحدر :

(ایزمید) محاصره سنه آچه قوجه طرفندن باشلانمشی .

حتی (ایزمید) ک آلیماسنی ، وفات ایدرکن ، وصیت بیله ایتمشی .

اورخان بکه آچه قوجه نک وصیتنی آکلاتدی . اورخان بکه ،

بونک اوزرینه آچه قوجه نک ایالتی اوغلو سایمان بکه ویردی ،

کندی ، (ایزمید) نتیجه یورودی . (ساقاریا) کوپروسنی

تعمیر ایتدی . کوپرونک باشنده برقریه تأسیس ایتدی .

اهالیسنی کوپرونک تعمیرینه مأمور قیلدی . بوکا مقابل کندیلرینی

هردرلوتکالیفدن معاف طوتدی . بلاقونیه (عاشق پاشا زاده ده کی

بلقونده) نک قارده شی قلا یون (عاشق پاشا زاده ده قابون)

قویون حصاری مدافعه ایدیوردی . اورخان بکه بورایه قره

علی ایله او یغور آلی کوندردی . (قویون حصار) آلیندی . قالو

یانینک باشنی کتیردی . (ایزمید) حصارینک اوکنه آصدیلر .

بلاقونیه (پرنسس ماریقا) ، قارداشک باشنی کورونجه ، دایانامادی ؛

حصاری تسلیمه راضی اولدی .

تسلیم شرطلرینی عاشق پاشا زاده شویله روایت ایدیور :

« خاتون ایدر : بن بو ترکه جنک ایتیزین ، آنکچوننکم اکر بونلر

بزدن اولدرلر سه اولان کیتدی . یرینه قالان فائده نه ؟ وا کر بیز

بونلردن اولدرلر سه ک بونلرله قان دشمنی اولورز . تاقیامته دکن جنک

اکسیک اولماز دیدی . بو خلقتک بر یرار کیشی واردی ، آنی

کوندردیکم عهد ایدلم ، حصاری دخی ویردم دیدی . اورخان بك دخی قبول ایتدیکم اول عورت هر نه سی وارسه آله ، دخی حصاری تسلیم اید . خاتون خبر کوندردیکم بن کیجه چیقارم ، والابنی تورکلردن یکلکسون دیدی وهم آنک کی ایتدیلر ، وه کافرك کیتمه ده و طور مه ده اختیاری النده اولسون دیدیلر . اسکایه کی کتیردیلر ، مراد لر نه طولدوردیلر . اورخان بك ایدرم : صاقینك بر چوپي کتیه سنکم ، بز عهدیمز ده خائن اولما یا ووز . دیدی ، وهم او یله اولدی « (ص ۳۸) .

(ایزمید) فی الحقیقه ۷۲۸ (۱۳۲۸) ده آلمشدی . فقط

روملر طرفندن تکرار استرداد ایدلمشدی . بوسیدن ، تورکلر ۷۳۲

(۱۳۳۱ م) ده (ایزمید) ی تکرار قوشا تمایه مجبور اولمشاردی .

لوبو دیورکه :

« اورخان ، روملرک تورکلردن استرداد ایتدکاری (ایزمید) ه

کلش ، شدتله صیقیدش دیریوردی . فقط (ایزمید) ی بالذات مدافعه

ایچین ایمپراطورک کلدیکنی ایشیدنجه ، استقبالی ضمننده ایلچی کوندردی .

صلحه ده ، حرب ده ، هانکیسینی ایسترسه ، موافقت ایده حکمی خبر

ویردی . ایمپراطور ، اورخانک نزا کتنه کبارانه مقابله ایتدی . کندی

محاربه ایچین کلدیکنی ، فقط اورخان ایسته دیکی تقدیرده صلحه ده راضی

اولاجغنی سویله دی . نهایت ایکی طرفک ناظرلری کوروشدیلر ، بر معاهده

تنظیم ایتدیلر ، بومعه ده یه نظراً سلطان ، ایمپراطورله دوست اولاجق ،

روملرک شرق ده متصرف بولونقلاری شهرلردن هیچ برینی تعجیز ایتیه جکدی .

بعده ایکی طرف بر برینه هدیه لر کوندردیلر . مسلمانلرک هدیه لر

آتلر ، آو کوپکاری ، خالیلر و قاپلان پوستلردن عبارتدی . نندرو

نیقوس ده اورخانه کوموش قابیلر ، یوکلای و ایپکلی قوملرله کندی

اثوابلردن بر دانه کوندردی . اورخان بوکا ممنون اولدی ، ایمپراطوره

تشکر ایتدی . صوکر ا عسکرینی آلوب چکادی . اورخان صاووشدقدن
 صوکر ا ، آندرونیکوس قرهیه چیقادی ، (ایزمید) ه کادی ، دونماسنده کی
 ارزاقک قسم اعظمی اهاییه داغیتدی . یدمی کون شهری و جوارینی
 کزدی . بورالری شیمدی یه قدار هیچ کورمه مشدی . صوکر ا استانبوله
 دوندی . « (لوبو، بیزانس تاریخی، کتاب ۱۰۹ ، ص ۴۳۰)
 آرادن سکیز سنه کچدی ، تورکەر (ایزمید) ی تکرار
 آلدیلر (۱۳۳۹ م ۷۴۰ ه) . مؤرخ غریغوراس تورکەرک
 بوموفقیتنی شو سطرلرله حکایه ایدیور :

« ویتینیاک مرکز حکومتی اولان (نیکومیدیا) ده ، قحط و مضایقه یه
 و دوشمالرک مصرانه محاصره سنه دایانامیه رق تسلیم اولدی . اوراده
 بولونان مقدس تصویرلرله کتابلرک برچوغنی و ایکی عزیزه نک نعشی
 قسطنطنیه یه پارا ایله ساتدیلر . تورکار آرتق (ویتینیا) ساحلارینه
 بی پروا یرلشمشیر ، برقاچ قصبه یه آغیر ویرکیلر قویمشلردی . حتی
 بو ویرکیلردن استفاده ایچین یرلی اهاییی وقایه ده ایتشلردی » (فصل
 ۹۰) .

(آیدوس) ده برچوق تورک واردی . اورخان بک اونلری
 کاملاً (ایزمید) ه کتیردی ؛ شهرک اداره سنی ده اوغلو سلیمان
 بکه ویردی .

قوجه ایلی (ایزمید) ک فتحیله تمامیتنی تأمین ایتمش دیمکدی .
 اوراده تک بر دوشمان نفری یوقدی . بوکا آقچه قوجه نک
 روحی ده ممنون اولاجقدی . قوجه غازی ، (قاندیری) ده ، برطاغ
 تپه سنده یاتیوردی . (کای یوز) ده تکیه سی اولان فضل الله قاضی
 اونک نسلنددی .

اوصیراده (یالاق اووا، یالوه) ده آلمشیدی. ایزمید ساحلاری
قره مرسلک اداره سنده ایدی. قره مرسل، استانبول تکفورینک
کمیلرینه قارشی دائماً اویانیق بولونوردی.

یکی تورک دولتنک غرب حدودی (ایزمید)، (آیدوس)،
(صماندره) و (قویون حصار) ه قادار ایلر یله مشدی. قیلیجدن
زیاده عدالت قوتیله فتح اولونان بو طوپراقلرک طاغلرنده،
یاما جلرنده، یایلالرنده، یشیل کویلرنده، هپ برر غازی
یاتیوردی.

(سوکود) ده ارطوغرول، (طومانلیج) ده صاروباتی،
(قویون حصار) ده آی دوغدو، (بیلجهک) ده شیخ
اده بالی، (چاووش کوی) نده صمصه چاووش، (قو کورپه) ده
قو کور آلپ، (قاندیری) ده آچقه قوجه، (ایزنیق) ده
کوندوز آلپ...

آرتق، بیزانسیک آناطولوده کی اوچ بویوک مرکزی تورکارک
آلنده ایدی: بروسه، ایزنیق، ایزمید.

مع مافیه تورکار بونکله ده قالمادیلر. (ایزنیق) کسقوطندن
اوچ سنه صو کرا (کیلیوس، کملیک) ی ده آلدیلر. بوراسی،
کورفزک اک مستحکم نقطه سیدی. کملیکک اساطیرده ده موقعی
واردی: آرغونو طلر سفرنده، بلده یی قافقاسیادان دونن
بر آرغونو ط تأسیس ایتمشدی. آرغونو طلر کورفزک قیلرینه

کلدکری زمان، (هرکول) ک ندیمی ایلاس صو آلمق ایچین قره یه
 چیقمش، اوراده پریر طرفندن یاقالانمشدی. کملیک اهاالیسی
 (ایلاس) ک یاقالاندیغی کونک دور سنوینسی تسعید ایچین قاطیرلی
 طاغلرینی دولاشیرلر: «ایلاس! ایلاس!» دییه باغیرلردی.
 داهاصو کرا، (آناخور) ده، (آرهودلی) ده، (کملیک) ک
 عاقبتنه اوغرادی.

عثمانلی تورکەرکنج ایمپراطور آندرونیقوسله عقدایتدکری
 ۷۳۲ معاهده سنه صادق قالمق ایسته دیلر. فقط بیزانس احوالی
 قاریشیقدی. عثمانلی تورکەرله صلح عقدایتدکن صوکراده،
 صالح و مسالمت ایچنده یاشامق آندرونیقوس ایچین ممکن دکلدی.
 بوسفرده، آیدین و صاروخان اوغوللری، بولغارلر، صربلر
 و جنویزلر بیزانسه تجاوز ایدیورلردی. بالخاصه آیدین و صاروخان
 اوغوللارینک (تراکیا) یه یایدق قری تجاوزلر ایمپراطوری بیقیدیرمشدی.
 حتی مؤرخ غریغوراس، تورکەرک تراکیا یه قارشى رقوع بولان
 متوالی تجاوزلری ایچین تاریخنده: «معلوم و معتاد اولدوغنه
 مینی دائما ایرادی جان صیقان کستاخانه و متادی مهاجرلر»
 دییوردی.

فی الحقیقه، آیدین و صاروخان اوغوللارینک دکزدکی
 قوتلری مکملدی. بونلر قره یه بردنبره عسکر چیقاریرلر،
 ساحلده کی شهرلری یاغما ایدرلردی. ایمپراطور آندرونیقوس،

وقتيله ميخائل پاله اولوغوسك ياپديني كي ، لاتينلردن امداد اومدى . شرق و غرب كليسالرينك برلشديريله جكنه دائر پايه اميدلر ويردى . پاپا اون ايكنجي ژانله مذا كرهيه كيريشدى . فقط پاپا ، بيزانسه امداد عسكرى كوندره جك يرده ، كليسالرك برلشديرلمه سنى مذا كره ايچين برهيئت كوندرمكه اكتفا ايتدى . بومذا كره لر استانبولده مناقشه لرى و منازعه لرى موجب اولدى . اوصيراده آيدين اوغوللارينك تجاوزلرى حالادوام ايدىوردى . ايمپراطور ، خريستيانلردن اميدنى كسينجه ، اسلاملردن مدد اوممايه چاليشدى . مه غلو دومه ستيقوسى قانتاقوزينوسى آيدين توركلريله مذا كرهيه مأمور ايتدى . بو مذا كره اوقادار كوزل جريان ايله دى كه ، ايكي طرف آراسنده يالكز صلح عقد ايدلمكه قالمادى ؛ (مدلى) و (فوجه) ده محصور قالان جنويزلره قارشى ده امداد كوندريله جكنه دائر وعدلر آليندى . صاروخان اوغلو يكرمى دوت كمى ايله ايمپراطورك يارديمه كلدى ، آيدين بكى ده اوغلو اوموربكي اوتوز كمى ايله كوندردى . بوقوتلر لاتين دونانماسنى تماماً مغلوب ايتديلر . بومهم يارديم ، بيزانس ايله آيدين و صاروخان اوغوللارينك صميميتلرني آرتيردى . اومور بكه قانتاقوزينوس آراسنده دائمى بر رابطه پيدا اولدى . آندرونيقوسك وفاتى (۷۴۳) بو صميميته اصلا خلل كتيرمه دى . آندرونيقوسه ، اوغلو ، اون ياشنده ، يو آنيس

پاله اوغولوس خلف ، قانتاقوزينوس ده وصی اولدی .
ایمپراطورک کوچوکلکی بیزانسه احتراملر میدان آچدی .
قانتاقوزينوس بوا احتراملرک هپسینه مانع تاقی ایدلدی ، کنديسینه قارشى
هر طرفه درین خصوصتلر اویاندی . قانتاقوزينوسک اک بویوک
دوشمانی ، سرایک پروطووهستیارییوسی ، یعنی اثوابجی باشیسی
آپوقاقوس دی . بطریق ده اونکله برابر اولمشدی . هرایکسی ده
ایمپراطورک چوجوقلغندن بالاستفاده ، حکومتک اداره سنی کندی
الارینه آلمق ایسته یورلردی . نهایت قانتاقوزينوس علیهنده
ایمپراطورک والده سینه بیک دورلو بهتانلر آکلاتدیار ، قانتاقو -
زینوسی وطن خائنی تاقی ایلهدیلر . قانتاقوزينوس ایسه ، او
صیراده ، پهلوپونه زوسده کی عصیانى باصدیرمق ایچین ، (دیمتوقه) ده
اوردونک باشنده بولونیوردی . پهلوپونه زوس اهالیسی لاتین
تحکمندن قورتولمايه حاضر لاشلردی .

قانتاقوزينوس ، پایتختده ، علیهنده جریان ایدن حادثه لری
خبر آلیر آلماز ، ایمپراطور یچیه آداملر کوندردی . مقصدی
صداقتنی و فداکارلغنی آکلاتمقدی . فقط قانتاقوزينوسک
آداملرینی آپوقاقوس داها یولده لرکن یاقالاتدی ، الارینه کلچه لر
ووردوردی .

قانتاقوزينوسک آناسنی و اوغلونى طوتدوردی ، ماللرینی
مصادره ایتدیردی . بو غدارانه معامله قانتاقوزينوسک بوتون

دوستلرینی قیزدیردی . آناسی محبسه اولدی . قانتاقوزینوسک طرفدارلری کندیسنه مراجعت ایتدیلر ، ایمپراطورلغنی اعلان ایتمه‌سنی تکلیف ایتدیلر . قانتاقوزینوس برمدت تردد ایتدی ، نهایت راضی اولدی ، کندیسینی ایمپراطورک سلطنت شریکی اعلان ایتدی ، (ادرنه) اوزرینه یورودی .

آپوقاقوس ، بوحوادث اوزرینه ، اداره‌یی آینه آلدی . کندیسینی مه‌غادوقس یاپدیردی ، دوشمانی دوردورمق ایچین لازم کلن تدبیرلری آلمایه باشلادی . بوتون زادکان قانتاقوزینوس طرفداریدی . آپوقاقوس هرطرفه خفیهر یوللادی . اهاالی پی قانتاقوزینوس علینه قالدیرمق ایچین آلدن کلنی یایمقدن کری دورمادی . ایمپراطورلقده مدھش بر داخلی حرب باشلادی . آپوقاقوس بوتون تدبیرلرنده موفق اولدی . قانتاقوزینوسک (ادرنه) یه قارشى حرکتی کاملاً دوردورولدی . (بهره) ، (آناسطاسیو پولیس) و (سلانیک) شهرلرینه قارشى یاپدینگی حرکتده عین موفقیتسز لکه دوچار اولدی . قانتاقوزینوسک آلدن یالکز بر (دیمتوقه) قالدی . بووافق موفقیت اوزرینه ، قانتاقوزینوس دیشاریدن ده امداد آلمایه باشلادی . زوجہ‌سی ایمپراطور یچہ ایرینی پی (دیمتوقه) ده براقدی . کندی ، صرب قرالی آسته‌فان دوشانه مراجعت ایتدی ، صربلردن امداد ایستهدی .

دوشانک غایت واسع فتوحات امللری واردی . مقصدی ،

بیزانس انقازی اوزرنده بر ایمپراطورلق تأسیس ایله مکدی . قانتاقوزینوسک تکلیفی در حال قبول ایتدی . فقط ایمپراطورلقدن آلاجنی شهر لرك کافه سی کندیسنده قالمق اوزره یاردیم ایده بیله جگنی سویله دی . قانتاقوزینوس بوتکلیفی رد ایده بیله جک وضعیتده دکلدی ؛ راضی اولدی . بر آرزو کرا ، قرال حقیقه حاضر لایمايه باشلادی ، نه ضبط ایتدیسه محافظه ایتدی ؛ او صورتله که ، آپوقاقوس کندی اداره ایتمک ایسته دیکی ایمپراطورلغی بو صورتله انقسامه اوغراتمش اولدی . کذا ، بولغارلرده قانتاقوزینوسه یاردیم ایتمک بهانه سیله (دیمتوقه) یه دوغرو یورودیلر ، شهری مدافعه ایده جک یرده ضبطه قیام ایله دیلر . قانتاقوزینوسک ایشی فنا لاشمايه باشلادی . حتی جسارتی ده کیتدجه غائب ایتدی . اوصیراده ایدی که ، (دیمتوقه) یی محاصره ایدن بولغارلر بردنبره قاچدیلر . سببی ، بالاخره آکلاشیلدی : آیدین اوغلو اومور بک ، قانتاقوزینوسک مشکل وضعیتده قالدیغنی دویار دویماز امدادینه قوشمیشدی . اومور بکک معیتده کی قوت غایت مهممدی : آیدین اوغلو ، اوچ یوز سکسان کی ایله (نه بروس ، صریح) منصبه کلشیدی . کمیلرک اوزرنده یکر می دو قوز بیک کیشی واردی . ایمپراطور یچه ایرینی ، عالیجناب متفقنک کلدیکنی ایشیدیر ایشتمز ، بوتون زادکانی ، ضابطالرینک الک کزیده لرینی قارشیلایمايه یوللادی . هیئت ، عین زمانده یوزده آت کو توریوردی .

ایمپراطور یچه ، احوالک غایت فنا کیتمش اولماسندن دولایی
 آنجق بوقادار آت کوندره بیلدیکنی آیریجه معذرت مقامنده
 بیان ایتشدی. اومور بک، بویوز آتی غازیلرینک الک یاشیلرینه
 هدیه ایتدی . کندی ، غازیلری آراسنده یولنه دوام ایلهدی .
 (دیمتوقه) یه کلدی ، اهلینک معنوی قوتلرینی آرتدیردی .
 غازیلرینک آلارنده بولونان غنیمتلری کندیلرینه داغیتدی ،
 (دیمتوقه) ده دوقوز بیک کیشی براقدی ، شهرک محافظه سنده
 بش یوز کیشی تخصیص ایتدی . آرتان قوتی معیتنه آلدی ،
 قانتاقوزینوسله برلشمک اوزره یوله چیقدی . (خریستوپولیس)
 سورلرینه یاقلاشدی . سوری محافظه ایدنلر قورقولردن قاچیشدی .
 اومور بک سورک بر چوق یرلرینی ییقیدردی ، اوردوگاهنی
 یانی باشنده قوردی . (فەر، فەر، جک) اهلایسی تورکلرک کله سندن
 بوسبتون تلاشه دوشدی . ایمپراطور قانتاقوزینوسک آغزندن
 اومور بکه ساخته مکتوبلر یازدیردی . بو مکتوبلرده کویا
 قانتاقوزینوس ، اومور بکه آرتق داها فضله ایلریله مه مسنی ،
 شاید ایلریلیه جک اولورسه صرب قرالنک اندیشه یه دوشه جکنی
 یازیوردی . اومور بک مکتوبی اوقوینجه ، وهله اولاده
 شاشیردی . نه صورتله حرکت ایده جکنی بیله مه دی . بوسورتله ،
 وقتده کچمش اولدی . صوغوقلر باشلادی . اوردوگاهنده ایکی
 یوز کیشی تلف اولدی . دونانماسی (بهرره) یه دمیرله مشدی .

اوراده ده اوچ يوز قادار كميچي اولدى . اوموربك قانتاقوزينوسه
 بوقادار يارديمي كافي كوردى ، ايمپراطور يچه يه وداع ده ايتمه دي ،
 يالكز برآدام كوندردى . معذرت بيان ايدەرك (۱۳۴۳ م ،
 ۷۴۴) صاووشدى كيتدى .

اوموربكك (ديمتوقه) ده براقدينى تورك قوتى قانتاقوزينوسك
 سعادتتى تامين ايدىوردى . بونلر آراصيرا ديشارى چيقارلر ،
 اطرافى تاراج ايدرلردى . جوار شهرلر بوتجاوزلردن بيزار
 اولمشلر ، ايمپراطور يچه ايرىني يه مراجعت ايدەرك قانتاقوزينوسك
 تابعيتنى قبول ايله مشـ.ـلردى . فقط (ديمتوقه) اهالىسى راضى
 اولماديلر . مقصدلرى ده غريبدى : « شايد بونلر له دوست اولاجق
 اولورسه ق ، هانكى شهرى يغما ايدەجكز ، ارزاقمىزى نره دن
 تدارك ايدەجكز ؟ » ديورلردى (۱) .

اوموربك جداً عاليجنابدى . دوستى قانتاقوزينوس نه زمان
 مشكلاته اوغراسه ، درحال قوشوب امدادينه يتيشيوردى .
 برسنه صوكرائينه كلدى ؛ فقط بوسفر قانتاقوزينوس طرفندن
 دعوت ايدلمشدى .

(ترا كيا) ساحللىرى ايمپراطورك كميلريله محافظه ايدىليوردى .
 اوموربككه خبر كوندرك غايت مشـ.ـكلدى . قانتاقوزينوس
 بوكاده موفق اولدى . يوللاديني آدام (ازمير) ه كلدى .

اومور بك، قانتاقوزینوسی اولمش ظن ایدیوردی . آپوقاقوس اورتایه مخصوص بویله برشایعه چیقارمشدی . قانتاقوزینوسك مکتوبنی آلتجه ممنون اولدی . چارچابوق بردونانما حاضرلادی . مکمل بر صورتده تجهیز ایدر ایتمز یوله چیقیدی . اومور بکی سفردن وازچیرمك ایچین آپوقاقوسك یاپدینی تدبیرلردن هیچ بر نتیجه حاصل اولمادی .

اومور بك ، برمدت صوکر ، (نه غره پون) ه کلدی . روزکار فنا لاشمدی ، بوراده دورمایه مجبور اولدی ؛ فقطینه صبر ایدمهدهدی ، اوردوسنك اك مقتدر غازیلرینی طوپلادی ، بونلره کیلری کاملاً یاقارق ما که دونیاده قرهیه چیقمالرینی تکلیف ایتدی :

— اولابن کندی کیمی آتشیلیه جك ، و سلاحم المده اولارق یورویه حکم . بنم کی یایمايه جسارت ایدمه یینلر کرییه دونه بیلیرلر .

دیددی . کندیسنه امثال ایدنلر یتش دوت کیدی ، قصوری راضی اولمادیلر . اومور بك یاقیلاجق کیلرده کی ارزاقی ، سلاحلری ، جیبخانه یی بوشالتمقله مشغول اولدوغی صیراده ایدی که ، روزکار بردنبره ده کیشدی ، هوا کیلرک حرکته مساعد بر جریان آلدی . اومور بك ، چیقاریلان ارزاقله جیبخانه نك تکرار یوکلهدلمسینی امر ایتدی ، (سلانیک) ه

قره دن كيتمكدن واز كچدى .

بركون صوكر ا ، بوتون غازيلرله برابر ، (سلانيك) ده
قره يه چيقدى . اومور بك آپوقاقوسله بالذات چارپيشمق
ايستردى . اونك آنسزىن (بيزانس) ه قاچديغنى دوينجه ، جاني
صيقلدى . فقط بواوزون يولجاغنى ده بوسبوتون ثمره سز براقق
ايسته مەدى ، عسكرلى (سلانيك) جوارنده ايسته دكلرى كى
طويوم اولديلر .

اومور بك قانتاقوزينوسه اول اولدجه مهم بر قوت
يوللامشدى . قانتاقوزينوس ، او صيراده ، (بهرره) شهرنده
ايدى . بوامداد قوتى آلنجه (سلانيك) ه كلدى . اومور
بك آتنبينهرك قانتاقوزينوسى قارشيلادى . ايكي دوست برمدت
(سلانيك) ده قالديلر .

اومور بك ، هيچ وقت غائب ايمەدن ، سلانيكه هجوم
ايتك ايسته يوردى . فقط قانتاقوزينوس ، (سلانيك) ك حاميسى
آياديميتريتك حشمندن قورقدى . شهرى آجلقله دوشورمك
ايسته دى . اومور بك ، يكي ايمپراطورى قبول ايتدكلرى تقديرده ،
توركلرك كنديلرندن آلدقلى بوتون اسيرلى صاليويره جكلرىنى
سويله مك اوزره سلانيكه ادام كوندردى . سلانيك خاقى
بوسبوتون قيزديلر . قانتاقوزينوس طرفدارلرينك برونلرىنى
وقولاقلرىنى كسەرك اومور بكك قرارگاهنه كوندرديلر . قانتاقو-

زینوس بومنظره دن اورکدی ، (تراکیا) یه دونمک ایسته دی ،
 اومور بکده برابر کیتدی ؛ فقط (سالانیک) ی آلمق ایچین
 هیچ بر تشبث یاپیلما دینگی ایچین جانی صیقیلدی .

اومور بکله قانتاقوزینوس (خریستوپولیس) سورینی
 هیچ بر زورلغه اوغرامادن کچدی لر ، (پهری ته اورییون)
 اوکنه کلدیلر ، بورای صبط ایتدی لر . (آبده را) شهریده
 بومیانده تسلیم اولدی .

او صیراده ، (بیزانس) ، قانتاقوزینوسله ایمپراطوریچهنک
 آراسنی بولق ایچین ایکی ایلچی کیتمشدی . ایلچیلردن بری ،
 اومور بک طرفدن ، صلاح الدین ؛ دیکری ده ، قانتاقوزینوس
 طرفدارلرندن ، ژاق برولاسدی .

ایکی ایلچینک بیزانس سراینده ، صالح ومسالت حقنده کی
 ذهنیتلری دفته شایاندی : بری ، تورک نجاتنی بوتون صفوتیه
 کوستریور ، اوبری روم نانکورلکنه صریح برمثال وجوده
 کتیریوردی .

برولاس ایمپراطوریچهنک حضورینه چیقدیغی زمان ، اول
 اونک رقتی جلب ایتک ایسته دی :

— قانتاقوزینوس واقعا تورکلری چاغیردی ؛ فقط اوکا
 مثال کوسترنلر اولدی . آپوقاقوس ایلک اول ناصلکه تورکلره
 باش ووردیسه ، قانتاقوزینوسده ینه بو باربارلره مراجعت

مجبوریتده قالدی .

دیدى . اومور بکک ایاچیسی، قانتاقوزینوسک ایمپراطور یچه
 نزدنده کی تسکلیفلرینی قبول ایتدیرمک ایچین برولاسه یاردیم
 ایده جکدی . اومور بکک، ایاچیسنه ویردیکی نامه ده قانتاقوزینوسله
 آرالرنده موجوداسکی دوستقلرندن بحث ایدیور، ایمپراطورلق
 اراضیسنه محضا دوستنه اولان حرمتدن دولایی رعایت ایتدیکنی،
 نته کیم اولجه فوچه لیلرله آرناوودلره قارشى ده کنج آندرونیقوسه
 یاردیم ایتمش بولوندوغنی ایمپراطور یچه یه خاطر لاتیوردی . اومور
 بکک، قانتاقوزینوسدن بحث ایدرکن، غایت احترامکارانه برلسان
 قوللانمشدی . قانتاقوزینوسه صادق قالاجق روملره قطعاً
 ایلیشمیه جکنی، بناءً علیه قانتاقوزینوس صاحبه طالب اولدقدن
 صوکر ا ایمپراطور یچه نك ده بونی قبولده تردد ایتمه مه سی ایجاب
 ایده جکنی سویلیوردی .

آپوقاقوس بو هیئتدن هیچ ممنون اولمادی . مع مافیه
 اومور بکک ایاچیسنه چوق حرمتلر ایتدی، حتی هدیه لر
 ویرمکده ده قصور ایتدی . فقط قانتاقوزینوسک ایاچیسنه
 بوسبوتون باشقه معامله ایتدی : ایاچینک صاحنی، صاقالنی
 کسیدردی، بروتنی ازدیردی، باجاقلرینی قیردیردی، شهرک
 میدانلرنده بو حالدده دولاشدیرتدی . داها صوکراده محبسه
 آتدیردی . اومور بکک ایاچیسنه برمکتوب ویردی . بومکتوب

حرمتکارانه یازیشدی . مکتوبده اومور بکدن عاصی بر آدامه
 یاردیم ایتمه مسنی رجا ایدیوردی . قانتاقوزینوسه یازیلان مکتوب
 ایسه ، کفرلرله دولو ایدی . اومور بک بو مکتوبی آلدی ،
 قانتاقوزینوسه کندی کوتوروب تسلیم ایتدی . قانتاقوزینوس
 آرتق کندیسنی حربه دوام ایتمه یه مجبور کوردی . مومیچیل
 آدلی بر بولغارلرله برلشدی : بوبولغار ، عسکرلکی وجسارتیه
 ممتازدی . صوکر ، بر اوردو طوپلادی . فقط پیزانسه تابع
 شهرلره قارشى هیچ بر موفقیت آلدی ایدمه دی . اومور بکله
 برابر (دیمتوقه) یه دوندی ، شهره آلقیشلر ایچنده کیردی .
 بر آز صوکر تکرار چیقدی ، (دیمتوقه) جوارنده
 ایمپراطوره راست کلدی ، ایمپراطور (موره) دن دونیوردی .
 ایکی رقیب آراسنده شدتلی بر مصادمه اولدی . اومور بک
 خسته لقدن یکی قالمیشدی . فقط محاربه ده اوپله قهرمانجه
 چارپیشدی که ، اوچ یرندن عزراق یاراسی آلدی . زرهی قوروماسه یدی ،
 تلف بیله اولاجقدی . اومور بک خسته لخدن دولایي محاربه یه
 کیرمه جکدی ؛ فقط قانتاقوزینوسک اصرارینه دایانامامشدی .
 ایمپراطور مشکل بروضعیتده ایدی . قانتاقوزینوسه قارشى
 بولغار قرالی آلکساندر ایله اتفاق ایتک ایسته دی ؛ فقط قرال ،
 تورکلردن قورقدی . تورکلر ، (تراکیا) یی اشغال ایتدجه
 کندیسنه یاردیم ایدمه یه جکنی سویله دی .

ایمپراطور، بوسفر باشقه بر چاره دوشوندی. قانتاقوزینوسک دوستی اومور بکی آلدی ایتک، اونی مملکتنه چارچاقوق دونمهیه مجبور قیلمق ایستهدی. امور بک بوتکلیفی شدتله رد ایتدی. بیزانس سرایی اومور بکی مذاکره لرله اقناعه موفق اولاماینجه، حیللهیه سلوک ایتدی. آپوقاقوقوس، ماوروماتی اسمنده برینی بولدی. بو آدام قانتاقوزینوس طرفندن بوتون ایشلرینه باقمق اوزره اومور بک معیتنه ویرلمشدی. بونک ایچین، تورکلرله مناسباتی زیاده ایدی. بوندن باشقا، تورکجه بی ده غایت کوزل بیلوردی. ماوروماتی، اومور بکک عسکرلرینی آیارتدی، آناتولویه دونمه لری ایچین تشویق ایتدی. اومور بک، عسکرلرینک دونمک ایسته دکلرینی ایشیدنجه شاشیردی. اونلری فکرلرندن واز کچیرمک ایچین تمام اون بش کون اوغراشدی، هیچ بر شیئه موفق اولامادی. نهایت دونمهیه راضی اولدی. قانتاقوزینوسه مسئله بی آکلاتدی، مع مافییه ینه دونه جکنی وحتی کندیسيله برابر یا اولمک، یا غالب کیمک ایچین یکی عسکرلرله کله جکنی وعد ایتدی (۷۴۵ هـ).

قانتاقوزینوس، ایمپراطورک والدسینه تکرار بر ایایچی کوندومه سی ایچین اومور بکه رجا ایتدی. اومور بک راضی اولدی. امور بکک ایایچیلری ایمپراطورک مجلسنه قبول ایدلدی. تورکلرک مقصدی ایمپراطوریمچهیه صالح تکلیف ایتک، قانتاقو-

زینوسله آرالرینی بولمقدی . آپوقوقوسله آرقاداشلری اومور
 بکک قانتاقوزینوسله برابر چالیشدیغدن دولایی ایاجی به
 ممنونیتسزلك کوستردیلر . آناطولو بککری آراسنده مهم
 موقع اشغال ایدن بر بکک ، قانتاقوزینوس کبی رحریف
 یاننده عادتاً خدمتکارلق ایتدیکنه ، او اوپورکن ، راحت
 اوپوسون دییه چادیرینی بیله بککدیکنه حیرت ایتدکلرینی
 سویله دیلر . مع مافییه ایمپراطور یچهنک اومور بکک حرمتی اولده غی
 ایچین نه زمان آناطولویه کچرسه ، کندیسنه کیم کودره حکمی ،
 حتی عسکرلرینک معاشی بیله ویره جکی آکلاتدیلر تورک
 ایاجینک رئیس بوسوزلره قارشى :

بولافلری سویله ینلر غالباً دوستلرک به حوققدن ،
 هده وظیفه لرندن آکلایورلر . برانساک دوسته خدمت
 اتمه سنده عیب برشی یوقدر ، اصل عیب ، قانتاقوزینوسک حشمتی
 افترالره تلویث ایدنلره ، کندیسندن کوردکلری ایسکلری
 او بونارک اوکا قارشى حرب ایدنلره توجه ایدر .

حواسی ویردی

تورک ایاجینک رئیس ، روملری کندی وجودلری کیردن
 حیوانه تشبیه ایتدکدن صوکرآ ، سوزلرینی شو جمله لرله یتیردی :
 بکمزک حاکمی مردانه و عالیجنابان . سز لر ایسه
 بوتون شرفی ور دو ککدن سات فن ایدر .

اصلاً یار اولمایان باربارلر کی حرکت ایتدیکیز .
ایمپراطورک مشاورلری، تورک ایلیچیلری رئیسک کندیلرینه
فضیلت درسی ویرن بو انسانیتکارانه سوزلرینه شاشا قالدیلر .
فقط اومور بکله اویوشمای ده پک زیاده ایسته دکلری ایچین بو
سوزلردن هیچ آلینادیلر . نهایت مذا کره باشلادی . اومور
بکی آناطولویه کچیرمک ایچین کمی یوللامایه، عسکرلری ایچین
پارا ویرمه یه قرار ویرلدی . قانتاقوزینوس ، اومور بکک بو
ائتلافنه هیچ سس چیقارمادی، حتی آل آلتندن کندی ده یاردیم
ایتدی . بو ، اونک ایچین برتصرف دیمکدی ؛ چونکه اومور
بکک مصرفلری دوشمانلرینک جیبارندن چیقاجقدی .

قانتاقوزینوس اومور بکی (طرایانو پولیس) ه قادار تشیيع
ایتدی . بوشهر (سریچ) اوزرنده ایدی . اومور بک بوراده
کندیسنی کوتوره جک دونانمای بکله دی . قانتاقوزینوس ،
اوصیراده (کوملجنه) ده خسته لانان اوغلو ماته ثوسی زیارته
کیتمشدی . یانه ایکی ده تورک آلمش ، یوله ، ترا کیا ساحللرینه
چاپول ایچین کلن آناطولو تورکلرینه راست کلشدی .

قانتاقوزینوس (طرایانو پولیس) ه کلدیکی زمان ، اومور
بک حالا اوراده ایدی . فقط برآز صو کرا ، (اینوز) ه
حرکت ایتدی . ذاتاً بیزانسدن کلن دونانما ایله کندی
دونانماسی اوراده طوپلانمش ، کله سنه انتظار ایدیورلردی .

اوموربك، مملكتنه دوندونمز، مدهش برهجوم قارشيسنده بولوندى . ايمپراطورك آناسى ايمپراطورچيچه آنادو صاووا (آپوقاقوسله برابر اهل صليب دونانماسى تشكىل ايتديرمشلر، (ازمير) ي، اومور بكك مقرينى تهديد ايدىيورلردى . سفره اشتراك ايدنلر : پاپا ، ونديك ، قبريس قرالى ، رودوس شواليه لريدى . اهل صليب دونانماسى يكرمى دوت كميدن عبارتدى . ايمپراطورچيچه آننا عرب كليساسيله شرق كليساسنى برلشديره جكي پاپا آلتنجى قله مانه وعدايتمكه بوقوتى يوللا تمايه موفق اولمشدى . لاقرووا دييوركه : « بودونا ئا ۱ تشرين ثانى ۱۳۴۲ ده (نه غره پون) ده طوپلانا جقدى . قوماندانلق پيه رزه نونك النده ايدى . زه نو ، (نه غره پون) ه كيتدى . بوراسى توركلارك محاصره سنده ايدى . اورادن توركلرى قاچيردى . اوسنه نك اياوانه قادار اهل صليب دن امداد آلفله وقت كچيردى . ۱۳۴۴ ده مقدس اتفاق بوتون اعضاسى طوپلانير طوپلانماز ، (نه غره پون) دن قالقدى . آطه لر دكيزينك اك مهم ليانلرندن (ازمير) ي محاصره ايتدى . » (عثمانلى تاريخى ، جلد ۱ ، ص ۹۹) اهل صليب توركلارك برچوق كميلرينى ياقديلر ، ساحلى مدافعه ايدن طابيه لردن برينى آلديلر . قانتاقوزينوس بوخبرى دويدوغى زمان ، متأثر اولدى . فقط بو حادته نك اوموربك (ترا كيا) ده بولوندينى صيراده اولما ديغنه چوق تشكر ايتدى . چونكه اوزمان ، كندى سبب اولمش اولاجقدى . مع مافيه اوموربكك باشنه كلن بوفلا كت ، ينه اونك يوزندندى . شيمدى اصل كندى ، مشكل وضعيته ايدى . اومور بك (ترا كيا) دن كيدر كيتمز اطرافنى

بوتون دوشمانلری صاردی. بونکه برابر قانتا قوزینوسی بومشکل
وضعیتدن ینه آیدین تورکلری قورتاردیلر .

آپوقاقوس ، قانتاقوزینوسه قارشى حرکت ایتدی ،
قانتاقوزینوسده (غراتییانوپولیس) ی قوشاندی . صربلرله
بولغارلرده ، تورکلر کیدر کیتمز ، (تراکیا) یه یورو دیلر .
صرب قرالی ، کیلرک آزلغندن دولایى آناطولویه کچمه یین
اومور بک معیتنده کی تورکلردن بر قسمنک کری یه دوندیکنی
ایشیدنجه ، بوتون قوتیله اوزرلرینه یوکلندی ؛ فقط موفق
اولامادی . تورکلر ماهرانه بر مانوره ایله صربلری آلداتدیلر ،
قرالی قاچایه مجبور ایتدیلر . اورادن ، قانتاقوزینوسک
یانه کلدیلر ، (غراتییانوپولیس) ی آلمق ایچین کندیسنه یاردیم
تکلیف ایتدیلر . قانتاقوزینوس ایسه معین بر پارا مقابله
کندیسنه قرق کون خدمت ایتهلرینی قبول ایتدی . تورکلرک
مقداری اوچ بیکدی .

بونکه برابر، قانتاقوزینوس ینه تورکلر سایه سنده مظفر
اولدی . ایمپراطورک (پهرینتوس ، ارکلی) ده بولوندوغنی
ایشتدی، اورای ده آلمق ایسته دی. فقط تورکلر کیتماک ایسته -
مه دکلری ایچین واز کچدی. تورکلرک مقصدی بولغار مومیچیلدن
انتقام آلمقدی. چونکه او، تورکلر ده، روملر ده اهانت ایتمشدی -
مع مافیه بو انتقامی ده آلمایه موفق اولدیله، مومیچیلی (پهری ته -

اورییون) شهرینه قاچیردیلر .

قانتاقوزینوسک تورکلر سایه‌سنده قازاندیغی موفقیتلر ،
علیمنده کی حسلری کلیاً تعدیل ایتدی . هر کس ، بوداخلی حربه
سبب اولدوغی ایچین آپوقاقوسه لعنت ایتمه یه باشلادی . حتی برچوق
شهرلر قانتاقوزینوسه تسلیم اولدیلر . یالکیز ، (بیزانس) ایله (ادرنه)
مستثنی ایدی . آندرونیکوس کیتدکجه جسارتی آرتدیردی .

اودورده ، آناطولوده ، آیدین اوغولار ندن ده قوتلی بربک
واردی : اورخان بک . فی الحقیقه اورخان بکک نفوذی هپسینه
فائقدی . اورخان بک بدایتده ایمپراطورک والده سی آنا دوصاوا
ایله اوغلونی التزام ایدر بروضعیتده ایدی . شیمدی قانتاقوزینوس ،
اورخان بکله اتفاق ایتمه یی تصور ایدیوردی . اورخان بکک ، قیزی
ته ئودورایه غیاباً مجلوب اولدوغنی بیلیوردی . واقعا دلبرته ئودورانک
کوزللیکی ، نادر وصفلری بروسه سراینده سویله نیر طورردی .
بونى قانتاقوزینوس ده ایشیتدی . قیزی تکلیف ایده جک اولورسه ،
اورخان بکک بو اتفاق رد ایتمه چکنه قانع اولدی .

اوصرالرده ، اورخان بک (ویتینیا) نی ده ، (پافلاغونیا) نی ده
فتح ایتشدی . بناءً علیه (بیزانس) ده ها یاقین بروضعیتده ایدی .
(بیزانس) ک یانی باشنده ، (ایزمید) ، اورخان بکک النده ایدی .
بو سببدن قانتاقوزینوس اورخان بکله اتفاق ایتمکدن کری دورمادی
(۷۴۷) . بوسایه ده ، (سوزه بولی) دن ماعدا ، قارادکنر ساحلنده کی

يوتون شهرلری آلدی. (بیزانس) لك يانی باشنده کی (آصفیریت) شهرینی ده ضبطه موفق اولدی. قانتاقوزینوس اوردوسنده کی توركلر، کندیسینی هم مظفر ایدیورلر، هم ده قافله لرله اسیر آلیورلردی.

قانتاقوزینوس بر درلو بیزانسه اویوشامیوردی. یکانه مانع ده، آپوقاقوسدی. بناء علیه (تراکیا) ده یکیدن محاربه یه مجبور اولدی. اومور بك، بوسفرده دوستنك امدادینه قوشمق ایسته دی. فقط کیلری یوقدی: لاتینلر برچوغنی یاقشیلردی. بوندن باشقه، (لیدیا) بکی صاروخان بكك موافقتی اولمادن (آق دگز بوغازی، ههله سپون) ی ده کچمك قابل دکلدی. اساساً آرالرنده برحدود مسئله سی ده واردی. اوموربك قانتا - قوزینوسله برلشمه یی صبرسنزقله آرزو ایدیوردی. نهایت منفعتنی فدایه قرار ویردی. منازع فیه اولان اراضی یی صاروخان بکه براقدی. فقط متفقنه کیتمك ایچین کندی طوپراغندن کچمه سنه مساعده ایتمه سنی شرط قویدی. صاروخان بك بو تکلیفی ممنوتیتله قبول ایتدی. حتی جنك صنعتی او کرنسین، غزایه آلیشسین دییه اوغلونی ده اومور بکه برابر کوندردی. اومور بك (ههله سپون) دن کچدی. یکرمی بیک سواریله (تراکیا) یه ایندی، (دیمتوقه) یه کلدی. قانتاقوزینوس اوراده ایدی. هیچ وقت کچیرمك ایسته مه دی، بولغار مومیچیله قارشی

حرکت تکلیفنده بولوندی .

رومار حاضر دکلاردی . اوموربك اوکاده اهمیت ویرمه‌دی ، بولغارستانه کیردی . غنیمتله دوندی . صوگرا (دیمتوقه) یه کلادی ، قانتاقوزینوسی کندیسيله برلکده سفر ایتمه‌سی ایچین صیقیشدیردی . ایکی اوردو مومیچیه قارشی یورودیلر . مومیچیل (قیسانتیا ، اسکچه) ده ایدی . اوموربك مدهش برمحاربه یاپدی : مومیچیل تلف ، اوردوسی پریشان اولدی .

اوموربك سلاحك قوتيله قانتاقوزینوسی ظفردن ظفره دولاشدیررکن ، آپوقاقوس ده بیزانسه خصملرینی محبساره آتمقه مشغولدی . فقط بو ظلم چوق سورمه‌دی : برکون ، حبس‌خانه‌ی کزرکن محبوسلر طرفندن اولدورولدی .

قانتاقوزینوس مدهش دوشماندن قورتولدی . ذاتاً صرب قرالی ده (فهر) شهرندن اوزاqlاشمیشدی . شیمدی بورای ده الده ایتك لازمدی . قانتاقوزینوس مجلسی طوپلادی . مجلسده اومور بکه برابر صاروخان بكك اوغلو سلیمان بك ده واردی . قانتاقوزینوس ، (فهر)ك اشغالندن بحث ایتدی . فقط اومور بکه سلیمان بك (بیزانس) اوزرینه یورونمه‌سینی تکلیف ایتدیلر . مطالعهلری شو ایدی : قانتاقوزینوس تك بر شهر آلمق ایچین حرب ایتمه‌لی ایدی . بوتون ایمپراطورلق ایچین حرب ایتمه‌لی ایدی . پایتختی ضبط ایتهدکن صوگرا ، ایمپراطورلغه کندیسینی

حاکم عدایده مزدی. بوندن باشقه، آپوقاقوسک اتلافیله وضعیت ده مساعد بر شکل آلمشدی. بوندن ده استفاده لازمدی.

بو فکری هرکس قبول ایتدی. اوردو (بیزانس) دوغرو یورودی. (بیزانس) ذاتاً هر طرفدن تهدید آلتنده ایدی: آنالولودن اورخان بك، روم ایلندن قانتاقوزینوسله اومور بك بیزانسیك اك باریشقمق بیلمز دوشمانلریدی. نهایت اوردو (بیزانس) اوکلرینه کلدی. شهرده هیچ قارغاشالق یوقدی. بوسکونت اومور بکلده، قانتاقوزینوسکده املارینی قیردی. تکرار دوندیلر، (ما که دنیا) یه کلدیلر. (آپاه) ده دورمایه مجبور اولدیلر. بو صیراده صاروخان بكك اوغلو سایمان بك بردنبره خسته لاندی.

خسته لق، فضله بر صیتما ایدی. کندیسنه صوغوق صو ایچیره رك ضدیله تداوی ایتك ایسته دیلر. آتش کیتدکجه آرتدی. سایمان بكك کنج سیاستده اولوم علامتلی کورولدی. اومور بك چوجوغك بو حالندن پك متأثر اولدی. چونکه باباسی اونی کندیسنه امانت ایتمشدی. یانه کلدی، تیریا که ییلاقمش شراب ایچیردی. سایمان بك بر آز آچیلیر کی اولدی؛ فقط آتشی کیتدکجه زیاده لشدی؛ تکرار بوزلو صو ویردیلر؛ فقط اولومی دور دورمایه موفق اولامادیلر. اومور بك اندیشه ایچنده ایدی: صاروخان بكك حدتندن قورقو یوردی. احتمالکه بوکا قیزار،

اولکه سینه تجاوز ایدردی. آرتق (تراکیا) ده بردقیقه دورامادی. صاروخان بك، دها اوغلونك اولومنی خبر آلمادن حرکت ایتدی، (ایزمیر) هاکلدی. اومور بك دوغرو دوشونمشدی: صاروخان بك، اوغلونك اولومندن صوك درجه متأثر اولدی. اومور بك چوق اوغراشدی. فلاکتزده پدرك حدتی بردرلو تسکینه موفق اولامادی. اومور بکک دونوشی، قانتاقوزینوس ایچین بویوک برفلاکت اولدی. دوشمانلری تکرار آیاقلاندیلر. معافیله آرتق بونك اودرجه اهمیتی یوقدی: ولایتلر کاملاً قانتاقوزینوسك آئنده ایدی. ایمپراطوریچه آئنا دوساواوانك نفوذی (بیزانس) سورلرندن اوتیه کچه میوردی. قانتاقوزینوسك طرفنده ایسه آناطولوك اك قدرتلی بر بکی واردی: عثمان اوغلو اورخان بك، قانتاقوزینوسك وعدینی بکلیوردی. نهایت بو وعد ایفا ایدلدی. اورخان بك ته ئودورا ایله اولندی (۷۴۷هـ، ۱۳۴۶م). او زمان، قانتاقوزینوسله اورخان بك آراسنده کی صمیمیت بوسبوتون آرتدی. بیزانس سرایی تلاشه دوشدی. ایمپراطوریچه آئنا تکرار تورکلرک یاردیمه باش ووردی. (لیدیا) بکی صاروخان بکله برائتلاف عقد ایتدی. اومور بك بونی خبر آلدی. قانتا قوزینوسه یاردیم ایچین ایکی بیک تورک کوندردی. بونلر صاروخان بکک اوردوسنه مقابل کله جکلر، سرایک تشبثنی عقیم براقاجقلردی. قانتاقوزینوس صاروخان بکک عسکرلرینی آلدی ایتدی.

استانبولدن (سیلیوری) اوکلرینه برقاچ کمی کلدی . ایکی حکمدار بو کیلرده ایدی . فقط کمیده کیلر ، قانتاقوزینوسه قارشى حرکت ایده جک اولان تورکلرک، بالعکس اونى مدافعه ایتکلرینی کورونجه دورامادیلر، صاووشوب کیتدیلر . قانتاقوز-ینوس تورکلره ابدیاً منتدار اولدی . تورکلر بوش دونه مشلردی : بولغارستانه کیرمشلر ، ایجه دویوم اولمشلردی .

(بیزانس) ک وضعیتى کوندن کونه قانتاقوزینوسک لهنه دونیوردی . قانتاقوزینوس بو فرصتدن استفاده ایتدی . (سیلیوری) دن (بیزانس) اوزرینه یورودی . (یدی قوله) ده کی یالیزلی قاپو (خیریسو پورطا) دن آنسزین شهره کیردی . ایمپراطور یچه بر هیئت کوندردی . قانتاقوزینوسله ایمپراطور یچه آراسنده برائتلاف عقد ایدلدى . قانتاقوزینوسه قارشى هر کسک اعتمادى آرتدی . (بیزانس) ده دواملى برسکون حاصل اولمايه باشلادی (۷۴۸ هـ) .

قانتاقوزینوس مرادینه ایرمشدی . آرتق (بیزانس) تختنده ایمپراطورله برابر سلطنت سوره جکدی . فقط بوتون بوظفرلری وموفقیتلری تورکلرک سلاحنه بورجلیدی .

اورخان بك قان پدرینک (بیزانس) تختنى آلدہ ائمه سندن پک ممنون اولدی . ایکی حکمدار بیتنده کی صمیمیت کیتدکجه آرتدی . قانتاقوزینوس اورخان بکک قوتنه کووه ندی . (تراکیا) دن آلدیغی

یرلری صرب قرالندن ایسته‌دی ؛ قرال قطعاً راضی اولمادی .
ایکی طرف حربه حاضر لاندی . قانتاقوزینوس ، دامادی اورخان
بکه در حال بر مکتوب یوللادی . اورخان بکدن امداد ایسته‌دی .
اورخان بک سفره کله‌دی . دورت اوغلو ، سلیمان ، مراد ، ابراهیم
وخلیل بک‌لرله برابر قان پدینه اون بیک کیشی کوندردی .
تورک قوماندانلری تراکیایه کیرنجه ، ایشک‌رنکی دیکشدی .
تورکلر ، صربلری مدھش برھزیمته اوغراتدیلر . (میغدونی) یه
قادر کلدیلر ؛ اطرافی هرج و مرج ایتدیلر (۱) . اورادن
دوندیلر ، آناطولویه کچوب کیتدیلر .

مع مافیہ آناطولوده یاشایان تورکلردن بر قسمی تراکیایه
الآن تجاوز ایدیورلردی . بر دفعه ، ینہ ایکی بیک کیشی
(تراکیا) یه کچدی . اوصیراده قانتاقوزینوس ، کندیسنه اطاعت
ایتمه‌ین (مہده) شهرینی تأدیبدن دونویوردی . بوشهر ، مرمره
ساحلنده ایدی .

قانتاقوزینوس ، قارشیسنده تورکلری کورونجه قورقدی .
کندیلریله محاربه‌یه کیریشدی ؛ فقط تمامیلہ مغلوب ایده‌مه‌دی .
تورکلر طاغلرہ چکیله‌رک مدافعہ‌یه باشلادیلر . قانتاقوزینوس
عسکرلرینه محاربه‌یی کسیدردی ، تورکلرک یانہ کیتدی ،
طاتلی سوزلرله اونلری اقناعه موفق اولدی . تورکلر بونا زکانه

معامله یه قارشى قانتاقوزینوسه حرمت ایتمه یه باشلادیلر قانتاقوزینوس
 هپسنى اطرافنه طوپلادی . اونلره تورکجه نصیحتلرده بولونمايه
 باشلادی . تام بو صیراده ، دامادی نیکه فوروسله زادکاندن
 بر قاج کیشی تورکلرک اوزرینه آتیلدیلر ، ایچلرندن بر قاجنی
 شهید ایتدیلر . ایشته بو ، بویوک بر فلاکت اولدی . تورکلر
 بردن بره ایر کیلدیلر ، خنچرلرینی چکدیلر . برشی یامایا جقلردی ،
 بوذلیلانه تجاوزه قارشى یالکیز کندیلرینی قورو یا جقلردی . مع
 مافیه ، ایسته سه لردی ، اودقیقه ده ایمپراطوری ده تلف ایدرلردی .
 فقط قانتاقوزینوسک بوندن ممنون اولمادیغنی کوردوکلری
 ایچین برشی یامادیلر . قانتاقوزینوس دامادینی ده ، زادکانی ده
 شدتله تکدیر ایتدی . تورکلری طاتلی سوزلرله یاتیشدیردی ،
 هدیه لرله تلطیف ایتدی . بو حادثه یی ده شو صورتله آتلاتمايه
 موفق اولدی . او صیراده ، ینه بر تورک قافله سی (خالکیدیکیا) یه
 تجاوز ایتمش ؛ اوراده ، قانتاقوزینوسک بویوک اوغلو ماته ئوسله
 چارپیشیوردی (۷۴۹) .

عثمانلی تورکلر بیزانسیک داخلی ایشلرینه بالذات قاریشنجیه یه
 قادار ، آنادولوده کی تورک بکلریله (بیزانس) بیتنده کی مناسبتلر بو
 درجه ده ایدی .

اورخان بکک مقصدی ، بیزانس وصایتی آلتنده بولوندورمق ،
 اوراده هیچ بر یابانجی قوتک پرلشمه سنه میدان ویرمه مکدی .

اوموربك ايسه (بیزانس) ه يارديم ايدمرك اورخان بكى ضعيفتمك ايسته يوردى . اوصيراده جنويزلر متصل قانتاقوزينوسه تجاوز ايديوورلردى . قانتاقوزينوس بوتجاوزلردن قورتولمق ايجين ونديكليارله اتفاق ايتدى ، بوصورتله جنويزلرى انقسامه دوچار اتمك ايستهدى . حالبوكه قانتاقوزينوسك ونديكليارله اتفاق اورخان بك ايجين بويوك برتهلكه ايدى . قانتاقوزينوس ناصاكه كندى متفقلريله برلشدى ايسه ، جنويزليارده قانتاقوزينوسك متفقلريله برلشمه يه قرار ويريديلر ، اورخان بكه بر معاهده عقد ايتديلر . اورخان بك جنويزلياره ، امداد اوله رق ، برسواري قطعه سى كوندردى .

جنويزليار تورك سواريسنى (بیزانس) قارشيسنه يرلشديرديلر . اورخان بك ، بومسئله ده قان پدرينك منفعتنى قطعياً نظر اعتباره آلامادى : اولاً : جنويزلياردن كليتلى پارا آلا جقدى ؛ ثانياً : ونديكليار كندى اولكه سى جوارينه كلدكلرى حالده كنديسنه هيچ بر خبر ويره مملرىنى سياست نزا كتنه مغاير كورمىشدى ؛ چونكه كندى ، ديپلوماسى مراسمنه دائماً رعايت ايديووردى . ثالثاً : قانتاقوزينوس ونديكلياره استناد ايدمرك اولورسه ، كنديسنك وصايتى آلتدن چيقمىش اولاجقدى .

اورخان بك ، بوسبيلرله قان پدرينه قارشى جنويزليارله اتفاق ايتديكى كى ، بالا آخره پنه عېن سبيلرله پو آنيس پاله اولوغوسه ده

یاردیم ایتدی . فقط کنج ایمراتورک ، کندیسنک یاردیمیه قناعت ایتمه رک صربلر ، بولغارلر ، حتی وندیکیلرله ده اتفاق ایتدیکنی کورونجه، درحال قانتاقوزینوس طرفی التزام ایتدی . اوغلو سایان بک معیتله اون بیک کیشی کوندردی . صربلرله بولغارلر، قانتاقوزینوسک رقیبی یو آنیس پاله اولوغوسله برلشمشله ، (آمفیتیون) قلعه سنه هجوم ایدیورلردی . سایان بک بوجادلده دوشمانلرینه اودرجه شدتلی برتعرض اجرا ایتدی که ، ایلک حمله ده صربلری ده ، بولغارلری ده هزیمته اوغراتدی . تورکەر (ادرنه) یه دوغرو یورودیلر ، آلدقاری غنیمتلی قانتاقوزینوسه کتیردیلر . پیشلرنده بر سورواسیرلر و حیوانلر ده واردی . یو آنیس پاله اولوغوس ده ، طرفدارلری ده ، بو انهزامدن متأثر اولدیلر . سایان بکک عسکرلری بر قاق کون دیکلندیلر . داها صو کرا ، بولغار کویلرینه شدتلی بر آقین یاپدیلر ، بوتون غنیمتلی یانلرینه آلارق آنا طولویه دوغرو چکیلوب کتیدیلر .

سایان بک داها (تراکیا) دن چیقما مشدی که ، یو آنیس پاله اولوغوس کندیسنه بر هیئت کوندردی . بو هیئت ، سایان بکدن یو آنیس پاله اولوغوسه یاردیم ایتمه سنی رجا ایده جمکدی . کنج ایمراتورک بمعوثلری ، سایان بکه بر چوق هدیه لرله برابر ، ایمراتوردن برده مکتوب کتیر مشلردی . بو مکتوبده یو آنیس پاله اولوغوس ، قانتاقوزینوسی قطعاً ایمراتور صایمیوردی .

سایمان بك يو آنيسك اياچيلرينه غايت ناز كانه معامله ايتدی ؛
ایمپراطورلرينه قطعاً ضرر ویرمك نیتنده اولمادیغنی ، فقط هدیة لرینی
قبول ایدهمیه جکینی سویله دی . یو آنیس پاله اولوغوسك مکتوبنی
قانتاقوزینوسه یوللادی . سببی ، کنج ایمپراطورك قانتاقوزینوس
حقنده تعقیب ایله دیکی کیزلی امللری کندیسنه آکلاتمقدی .
حالبوکه قانتاقوزینوس اورخان بکدن هم امداد آلیر ،
همده آلدن کلسه ، اونی محو ایتیه چالیشیردی . قانتاقوزینوس
بو غایه سنه ایرمك ایچین اك زیاده پایا آلتنجی قله مانه کووه -
نیوردی . حتی ، بیزانسه مدهش بروبا وقوعه کلدکن صوگرا
ایدی که (۱۳۴۸ م) توركلرك استیلا سندن قورتولمق ایچین
پاپیه مراجعته قرار ویردی . اساساً سلفلری ده مشکلاته اوغرار
اوغراماز ، هپ بو چاره یه باش وورورلردی . قانتاقوزینوس کندیسنه
یاردیم ایتمه سی ایچین پاپیه اوچ ایلی کوندردی . فقط پاپا ،
قانتاقوزینوسك علیهنده ایدی . خصوصیه ، قیزی ته ئودورای اورخان
بکه ویرمه سی اونی بوسبوتون اغضاب ایتشدی . پاپی قانتاقوزینوس
علیهنه اك زیاده تشویق ایدن ده ، ایتالیا لی برقادین ، زامیه ایدی . بو
قادین ، وقتيله آننادو صاووایی کنج آندرونیکوسله اولمك ایچین
(بیزانس) ه کتیرمشدی . ایتالیا یه دونوشنده ، قانتاقوزینوسدن
بحث ایتش ، اونی آننا یه قارشى حرکتدن دولایى تقيح
ایله دیکی کی ، توركلره اولان صمیمیتى ، حتی اونلره قیزینی

ويرهرك قاننى بيله قارىشديرديغنى پاپايه مفصلاً آكلاتمىدى .
 شيمدى قانتاقوزينوس، پاپانك فكرىنى دوزه لىك ايسته يوردى .
 قانتاقوزينوسك اياچيلرى كنديسىنى يوآنس پاله اوغوسله ياپديغى
 محاربهدن دولايى تبريه ايدى جكلر ، توركلرله اولان مناسباتك
 صرف احوال ايجانبندن اولدوغنى سويليه جكلردى . خصوصيه
 قانتاقوزينوسدن اولده، كنج ايمپراطورله والده سنك اسلامرله
 اتفاق عقد ايتمش اولدوغنى ، قانتاقوزينوسك ده اونلرك اثرينه
 بيعيت ايله مش بولوندوغنى آكلاته جكلردى . قانتاقوزينوس، اياچيلرىنه
 بالخاصه شونى سويله مەلرىنى تنييه ايتمىدى : قانتاقوزينوس تورك
 عادتلرىنى قبول ايدى ميه جكى كى ، اونلرك دينلرىنى ده هيچ بر زمان
 تصويب ايتمز . اكر آوروپا حكمدارلىرى توركلره قارشى اتفاق
 ايدرلرسه ، كنديسى اونلرى مملكىتىدن كچيرمه يه يارديم ايدى جكى
 كى ، كنديلرىنه ده التحاق ايدى جك ، وتورك عرقنى محو ايتك
 ايجين اهل صلييك باشنه بيله كچه جكلر .

اياچيلر بوتون بومطالعلىرى پاپايه آكلاتديلر . پاپانك ممنون
 اولدى . اياچيلره عزت و اكرامده قصور ايتمەدى . حتى (بيزانس) ده
 دونمك اوزره حركت ايدى جكلرى صيراده ، قانتاقوزينوسه ممنونيتنى
 آكلاتمالرىنى ، وياقينده مذاكراته دوام ايتك اوزره (بيزانس) ده
 مرخصلر كوندره جكنى سويلەدى (۱) .

او صیراده سایمان بك آناطولویه دونمشدی. قانتاقوزینوس
تکرار دامادی یو آنیس پاله اولوغوسله اوزلاشمق ایسته دی .
ایمپراطور بردرلو یاناشمایوردی : (ادرنه) اساساً یو آنیسك
آلندن چیقمشدی. قانتاقوزینوس اورایه ده تمامیه حاکم دی. بو
سبیدن، یو آنیس پاله اولوغوسه قارشى شدتلى بر حرب باپمایه
قرار ویردی. کنج ایمپراطوری شهر دن شهره قوغدی. یو آنیس
بوسریع ظفر لره قارشى دورامیه جغنى آکلاینجه، (ته نه دوس، بوزجه
آطه) یه التجا ایتدی. زوجہ سی، وقانتاقوزینوسك قیزی آلہ نی ده
برابر دی. آلہ نی بو حرب بلر ده زوجہ صوگ درجه صااق قالمشدی .
یو آنیس، (ته نه دوس) دن بر قایغه یینه رك (بیزانس)، کیرمه یه چالیشدی.
قانتاقوزینوس پایتخته دکلدی، (وهره) ده ایدی. فقط زوجہ سی
ایرینی او یله مصیب تدبیرلر اتخاذایتدی که، یو آنیس هیچ برشى
یاپمایه موفق اولامادی. آرتق بیزانس خلقی تاج و تخت غوغا لرندن
بیقمشدی. قانتاقوزینوس، اوغلو ماته اوسی ایمپراطور انتخاب
ایتدیردی .

(بیزانس) ده بو حادثه لر جریان ایله دیکی صیراده، سایمان
بك (هه لاسپون) اطرافنده بلده لر فتح ایدیوردی . تورکلر
بو صورتله ایلریله مه لری قانتاقوزینوسی اندیشه یه دوشوردی .
اورخان بكك آنی بر تعرضه (بیزانس) ی آلماسندن قورقویوردی.
(تراکیا) نك برچوق شهرلری واز جمله (چنی) تورکلر آلنده ایدی.

قانتاقوزینوس بوبله لری تورکلردن زورله آلامازدی. بوسبیدن اورخان بکه یازدی: (تراکیا) ده کی شهرلری کندیسنه تسلیم ایتمه سی ایچین شهزاده سایمان بکه امرویرمه سنی رجا ایتدی. ایمپراطور انک اک کوزل نقطه لرینی ضبط ایدهرک آرالرنده اوتهدن بری موجود صمیمیتی شهزاده سایمان بکه خللدار ایتمه مه سنی استرحام ایتدی. اورخان بکه، اوغلونه برای تراکت برمکتوب یازدی. سایمان بکه باباسنک امرلرینی ایسته میهرک ایفا ایتدی. (چنی) پی براقق ایسته میوردی. قانتاقوزینوس اون بیک آلتون کوندرنجه، راضی اولدی (۷۵۵).

اوسنه، مدھش بر زلزله (تراکیا) ساحلارنده کی شهرلرک چوغنی خراب ایتشدی. اھالیدن بر قسمی انقراض آلتنده قالمش، بر قسمی ده آجلقدن وسفالتدن قیرلرده تلف اولمشاردی. (کلیبولی، قالی پولیس) او درجه خساره اوغرامشدی که، داخلمده همان آز بر نفوس قالمشدی.

سایمان بکه، او اثناده، (ههله سپون) جوارنده (پهژ) ده اوطورییه وردی. (تراکیا) شهرلرینک زلزله دن دوچار اولدوقلری خساری خبر آلنجه، بو وضعیتدن استفاده ایتمک ایسته دی. (تراکیا) نک بوتون شهرلرینی دولاشدی. اک زیاده خساره اوغرایان بلده لری تعمیر ایتدی. نفوس سزقلانلره اھالی پرلشدی.

سایمان بكك الك زياده نظر دقتنى جلب ايدن، (كليبولى) ايدى.
 (كليبولى) نك سورلرني ياپديردي، استحكاملرني تعمير ايتدى.
 قلعه يه كاملاً توركلرى يرلشديردي. قانتاقوزينوس بوتد بيرلردن
 چوقه تئارا اولدى. أئنده، قارشى دوراجق، هيچ بر قوت يوقدى.
 نهايت اورخان بكه شكايته مجبور اولدى. سايمان بك (چنى) يي
 داها تسليم ائتمه مشدى. اورخان بك سايمان بكه امر كوندردى.
 (تراكيا) دن آلدىغى شهرلرى، حتى (چنى) يي ده سريعاً تسليم
 ائتمه سنى طلب ايتدى. حالبوكه سايمان بكك بو حركتنى معذور
 كوستره جك سبيلر واردى: سايمان بك (تراكيا) شهرلرني
 مسلح قوتلارله آلمادىغنى، بورالرى كاملاً خراب و پریشان
 و نفوسدن ده محروم بولوندوغنى جهتله كنديسنك اورالره صلاحاً
 كيرمش اولدوغنى، بناءً عليه هيچ بر شخصك حقوقنه تجاوز
 ائتمه مش بولوندوغنى سويله دى. اورخان بك ايمپراطوره قارشى
 واقعاظواهرى محافظه ايدىوردى؛ فقط سايمان بكك بوبلده لرى
 اشغال ائتمه سنده كنديسنك ده دخلى واردى. مع مافيه، قانتا-
 قوزينوسك مشروع آرزولرني يرينه كتيرمك ايچين، هيچ
 بللى اتمك ايسته مه دى.

قانتاقوزينوس، اورخان بكه يالكسز رجاده بولونمقلا ده قالمادى:
 آرالرنده قطعى بر ائتلاف زميني حاضر لاق ايچين (ايزميد) ه
 كله جكني، كنديسييله (ايزميد) ده مذاكره ده بولونا جفني ده

آكلاڭدى . اورخان بك خسته لغنى وسيله ايدەرك كىتمەكن
اجتناب ايتدى . نھايت برچوق مشكەلەردن و مذا كرەلەردن
صوكرە ، سليمان بك اشغال ايتدىكى بوتون شەرلرى قرق بىك
آلتون مقابلەدە تسەلىمە راضى اولدى (۷۵۵ ھ) .

قانتاقوزىنوس ، آرتق بوفلا كىتلەر قارشىسىندە ، دامادى ايمپرا-
طور يوآننىس پالە اولوغوسەلە برلشمەكن باشقا چارە كورەمەدى .
اوصىرادە ، قانتاقوزىنوس عليھىندەكى جريانلەر كىتەكچە آرتماشدى .
(سەلانىك) شەرى پالە اولوغوسەلەن طرفە اولماشدى . جنويز-
لەلەدە ايمپراطورە يارديم ایدیورلردى . حتى (بيزانس) دە بىلە
يوآننىس پالە اولوغوسەلە طرفدارلەر ظهور ایتەپ باشلاماشدى .
قانتاقوزىنوس آرتق يورولماشدى . نھايت ، دامادى يوآننىس -
پالە اولوغوسەلە مذا كرەپە كىرىشىدى . ايكى ايمپراطور بىتندە
ائتلاف حاصل اولدى . يوآننىس (بيزانس) ە كەلدى ، ايكى طرفك
بربرىنە اعتمادى چارچابوق آرتدى . ھەر كۈن مەطوخىتەسك
اويندە طوپلانان مجلسە كىدەرلەر ، مذا كرەلەردە بولونورلردى .
بومذا كرەلەردن بىرندە ، (تراكيا) يە دولان توركلەر ، بولغارلەر
و صربلەر چىقاريلماسى موضوع بحث اولدى . روملر بونلەر
كافەسە (باربار) دىيورلردى . قانتاقوزىنوس بومسئەلەپە دائىر برنطق
ايراد ايتدى . توركلەر حرب صنعتەدە پەك ايلەپلەش اولدۇلرىنى
سويلىدى . پاراسزلەدن بحث ايتدى . پارا و قوت اولمادىقچە

بونلره قارشى مقاومتك امکانشز اولدوغنى آکلاتدى، وسوزينه شو صورتله دوام ايتدى :

— بزم محاربه ايدە جکمز يالکمز اورخان دکلدرد. اوزمان بربرينى چاغيرارق ترا کيايه کومه لرله دولاجق اولان بوتون آناتولو تورکلر بدر. بوباربارلر بزه قارشى دينلرينک واضعى طرفدن کنديلرينه الهام ايديلن وعدلرک تلقين ايله ديكى وحشيانه برقوتله هجوم ايدە جکلردرد. پينمبرلرى، بزمه حرب ايتدکلرى تقديرده، جنتده کنديلرينى ابدى تاجلر بکله دیکنه اولنلرى اعتقاد ايتديرديکى کي، عسکرلر يمزدن ده نه قادار آدم اولدورورلرسه، او بر دنيا ده او قادار مکافاته نائل اولاجقلرينه ايمان ايتديرمشدر.

قانتاقوزينوس نطقنى بيتدردیکى زمان، اطرافدن ميريلتيلر باشلادی. کنديسى اورخانه متفق بولوندوغى ايچين حرب ايتمک ايسته مە دیکنى، دامادى مسلمان اولدوغى ايچين ترا کياده کى تورکلرى التزام ايله دیکنى يوزينه قارشى سويله ديلر. قانتا - قوزينوس بونلره جواب ويره مە دى. نهايت، مجلسى تعطيله مجبور اولدى.

آرتقى قانتاقوزينوس بومجادله لرك دوام ايدوب کيده جکنى آکلادی. نهايت، تاج وتختنى او غلوماته اوس ايچين تأمين ايتدى. کندى، سلطنتدن چکيلمه يه مجبور اولدى. سرايده بوتون اثوابلرينى

چیقاردی ، صاچارینی کسیدردی ، آرقاسنه بر پاپاس البسه سی کیدی . بیتاب و بی مجال ، (مانغان) مناسترینه چکیلدی .
 زوجہ سی ، ایمپراطور یچہ ایرینی ده بالآردد قوجہ سنہ اقتفایتدی ،
 یوزینی قاپادی ، قوجہ سنک تصرفندہ بولونان (مارط) مناسترینه
 کیتدی .

قانتاقوزینوسک سلطنتدن فراغت اوردخان بکک (بیزانس)ه
 قارشى تعقیب ایتدیکی سیاستی بوسبوتون د کیشدیردی . آرتق
 اوردخان بک بیزانسه قارشى هیچ بر تعهدہ باغلی دکلدی .
 بیزانس تختندہ ایکی ایمپراطور واردی : یوآنیس پالہ اولوغوس ،
 ماتہ اوس قانتاقوزینوس . بونلردن ، یوآنیس باجناغی ؛ ماتہ اوس
 قان برادری ایدی . اوردخان بکک یوآنیسہ هیچ اعتمادی یوقدی .
 خصوصیلہ ، کندیسنک قانتاقوزینوسلہ اتفاقندن بری غزالرکده
 آرقہ سی کسيلمشدی . آرتق بیزانسه قارشى مجادلہ یه دوام ایتک
 لازمدی . بوملی حرکتک باشنه آنجق سلیمان بک کچہ بیلیردی .
 اوردخان بکک بویوک قارده شی علاءالدین بک (ایزنیق) فتحی
 متعاقب (۷۳۴) وفات ایتمشدی (۱) . اوصیراده ، عجلان بکک
 اوغلوندن آلنان (قره سی) ایالتی ۷۳۷ سنہ سندن بری سلیمان
 بکک اداره سنده ایدی . ذاتاً اوردخان بکک بیزانسه یارديم اچین
 (تراکیا) یه دائماً سلیمان بکی کوندرمہ سی ده ، موقعک یاقینانی

وسایمان بکک بهادرانی سببیه ایدی .

اوبراوغلو مراد بک (بروسه) سنجاغنه متصرفدی . بورایه (بک سنجاغی) دیرلردی . شهزاده خلیل بک ده (ایزمید) حوالیسنه متصرفدی . بوصیراده ایدی که ، دیگر اوغلو خلیل بک (ایزمید) کورفرزنده کزرکن فوچه قورصانلری طرفندن اسیر ایدیلدی . اورخان بک ، یوآنیس پاله اولوغوسک نفوذندن استفاده ایتک ایسته دی . یوآنیس ده ایمپراطور ماته اوسه یاردیم ایتمه سی شرطیه اوغلونی قورتاراجغنی وعد ایتدی . نهایت موفق اولدی . خلیل بکی ، باباسی اورخان بکه کوندردی .

اواثنالرده ، یوآنیس ، ماته اوسله بوزوشدی . ایکی ایمپراطور آراسنده تکرار حرب باشلادی . ماته اوس ، یوآنیه قارشی مشکل وضعیتده ایدی . صربلر کندیسنه یاردیم تکلیف ایتدیلر . ماته اوس بوتکلیفی قبول ایتدی . فقط صربلری مملکتنه صوqq ده تهلکه لی ایدی . ایجابنده اونلری (بیزانس) طوپراغندن قووابیله جک بر قوت ده لازمدی .

ماته اوس ، انشته سی اورخان بکه مراجعت ایتدی . اورخان بک واقعا یوآنیس پاله اولوغوسه سوزویرمشدی ؛ فقط صربلرک بیزانسی نفوذلری آلتنه آلماسی کندیسسی ایچین ده تهلکه لیدی . بوسیدن قاشن برادری ماته اوسه یاردیم ایتیهی ده اوافق کوردی . بیزانسه بش بیک تورک کوندردی . بوعسکرلر بیزانسه کلیر

گلز بر لحظه بيله صبر ایدمه دیلر . کندیلرینک در حال دوشمانه قارشى سوق ایدمه لرینی ایسته دیلر . ماته اوس هنوز حاضر لانه . مشدی . اونى ده بکله مه دیلر ، دوشمانه قارشى یورویشه باشلا دیلر . ماته اوس ، ایسته رایسته مز ، اونلری تعقیبه مجبور اولدی . تورکلر (فەر) جوارنده دوشمانه شتلی بر هجوم ایتدیلر ، اولا بوزولور کبی اولدیلر ؛ فقط بالا آخره کندیلرینی طوپلایارق صربلری قاجیرمایه موفق اولدیلر .

ماته اوسک موفقیتلری چوق سورمه دی . دعواسنی کیتدکجه غائب ایتدیکنی آکلادی . نهایت خصمنک ألنه اسیر دوشونجه ، اوده باباسی کبی فراغته مجبور اولدی .

اورخان بك ، باجاناغی یو آنیس پاله اولوغوسله قارشى قارشى یه قالدی . آرتق بیزانسه قارشى بسله دیکی حسلرک تظاهرینه هیچ بر مانع یوقدی . قانتاقوزینوسله یو آنیس پاله اولوغوسک مجادله لری اثناسنده او یله آنلر کلمشدی که ، جنویزلیلر ویا وندیکیلرله بر اتفاق ایتسهیدی ، (بیزانس) او دقیقه ده تورکلرک ألینه کچه بیلردی ؛ فقط ایمراطورله صهریتی بوکا مانعدی . قاج دفعه لر ، روم ایلنده ، (تراکیا) ده فتح اولونان یرلری بيله اوغلو سلیمان بکه کری ویردیرمشدی . اورخان بك ، قانتاقوزینوس درجه سنده ده بیزانس سلطنته لیاقت ادعا ایده بیلردی : او دوردی قسطنطینوسک پایتختی مختلف قوتلر آراسنده بازیچه ایدی .

قانتاقوزینوسله اوغلوماته اوسك فراغتندن سوکرا، اورخان
 بك (بیزانس)ك ضعفندن استفاده ایتك ایسته دی. یکی املرینك
 قوه دن فعله کتیریله سنه اوغلو سایان بکی مأمورایتدی (۷۵۸).
 معینه، كرك مشاوردده بولونمق، و كرك عسکری حرکتلری اداره ده
 یاردیم ایتك اوزره حاجی ایل بکله أجه بکی وغازی فاضل بکی ویردی.
 سایان بك اساساً تراکیایه برقاچ دفعه کچمشدی. تراکیا
 شهرلرینك حالنه تمامیه واقفدی. ارتق بوسفر اورایه تمامیه
 یرلشه جکدی. سایان بك، بومقصدله قوتلی بردونانما حاضرلادی.
 لوبو دیورکه: «سایان، بوسفر ایچین دکزجیلک فتنده هنوز
 عجمی اولان باربارلردن بکله نه میه جك درجه ده قوتلی بردونانما
 حاضرلادی. قانتاقوزینوسك اصراری اوزرینه اولجه روملره
 براقش اولدوغی شهرلرک قسم اعظمی و از جمله (کلیولی) یی
 آلدی. روایت ایدرلرکه یوآنیس پاله اولوغوس (کلیولی) نك
 آلیندیغی ایشتیکی زمان، ملتك فلاکتلریله استهزا ایتمه سی
 لازمکلن بر حکمدارک آغزینه یاقیشمایاجق بر سوز سویله مش:
 تورکلر اولسه اولسه بر طوموز آخوری آلدیلر دیمش.
 ایمپراطورک بوندن مقصدی، (کلیولی) نك مدافعه سنه یارایان
 (خريدوقاسترو، طوموز حصار) نی ایما ایش. حال بوکه
 (کلیولی)، بوندن اولده ایضاح ایتدی کمزوجه ایل، بیزانسك
 اك قوي آناختاریدی، آطه لر دکزندن بیزانسه کیدن بوغاز

کچیدینی قاپاتیوردی « (لوبو، بیزانس تاریخی، کتاب ۱۵، اول
ص ۴۰۳) .

مؤرخلریمز تورکارک شهزاده سلیمان بک معیتله روم ایلینه کچیشنی
ایلاک کچیش عه ایدرلر . ۸۹۱ دن صوگرا یازیلان (تواریخ آل عثمان)
تورکارک روم ایلینه کچیشلریخی شویله تصویر ایدر :
«راویلر شویله روایت ایدرلر کیم سلیمان شاه ولایت صیر ایتمکه
چیتدی . صیران ایدرکن ناکاه (آیدنجی) ده تماشاغه کلدی .
کوردیکم عجایب غرائب بنالردر کیم سلیمان علیه السلام بنا اتمشدی .
پس سلیمان پاشا تماشائی تفرج ایدرکن عجبه قالدی ، و برآز فکره
واردی . زیاده پهلوان آر ایدی . اجه بک ایتدی :
— ای جانم ، نه عجب فکره وارد کوز و فراستکوز واردرددی .
سلیمان پاشا ایتدی :

— نعم . اشبو دکیزی اوته کچمکه فکر ایدرین . عجب ممکن
اولامیکه ، اول یرک کافرلری خبر آلمدین بو دکیزی اوته کچه بلهوز .
اکا نجه تدبیر ایده لوم دیو اول فکردهیم .

سلیمان پاشا ایله دیجک ، اجه بک و فاضل بک درلردی ایکی
دلاور وار ایدی . بو ایکسی ایتدیلر :

— ای خان . اکر دستور ویررسکوز ، بز ایکیموز بودکیزی
اوته کچلوم . تقدیرده نه ایسه کوروز .

ددیلر . سلیمان پاشا ایتدی :

— نه یردن کچرسک ؟

ددلر ، آنلر ایتدیلرکه :

— ای شاه . بونده یرلر واردرکه کچدی یقندر . هم آساندر .

ددیلر . بونلر ایله دیجک سلیمان پاشا دخی آنلره دستور ویردی .

پس آنلر دخی سوردیلر ، واردیلر بر یول بولدیلر ، آدنه (وارنجه)

بر حصاردر ، (کویرجکی) دن (۱) اشغه دگیر گنارنده
بولیدن یقارو و (چلنک) (۲) حصاری دیرلر. آنک مقابله سنده
روایی طرفه اجه بک وفاضل بک اول ایکی غازی برصال دوزدیلر.
دخی کیجه ایله (جمین) قلعه سنک نواحیدینه کچدیلر، باغلر آراسنده بر
کافر دوتدیلر. اول کافری صنداله بندروب علی الصباح سلیمان پاشا اول
کافره ایتدی :

— بزه حصاره کرمکه برچاره وارمدرکه ، کافرلر بزی دویمه .
ددی . اول کافر ایتدی :

— ای شاه بن سزی بریردن ایلتیم که کمنه کورمدین حصاره
گیره سز .

ددی . هاندم سلیمان پاشا امر ایتدی . بر قاچ صال دوزدیلر.
آندن سلیمان پاشا یتمش سکسان بهادر دلاورلر آلوب اول سالاره
بینوب وقلان لشکری آناطولی یقاسنده قیوب وکندو کیجه ایله روم
ایلی یقاسنده کچدیلر . بو کافر بونلری طغری (جمین) قلعه سنده
کتوردی (۳) ، بر ترسلک وارایدی ، قلعه قرشو چکلمش ایدی .
قلعه دن زیاده یوکسک . قدرت الهی کورکه ، اولدم قلعه نک ایچنده
کسه یوغدی . زیراکیم خرمن وقتیدی . جمیع خلق هپ خرمنده
ایدیلر . قلعه شویله خالی قلمشیدی . سلیمان پاشا دخی اول یتمش سکسان
کشیه اول ترسلک دن قلعه کیردیلر . قلعه فتح ایتدیلر و لکن قلعه

(۱) عاشق پاشا زاده (ص ۴۸) (کویرجکی) یی (کوره جه)

دیه بازار .

(۲) چلنک ، اساساً (چنلک) در .

(۳) عاشق پاشا زاده ده بو حصار ، (چین حصاری) دییه بازیشدر .

حال بو که عاشق پاشا زاده نک (چین) و تواریح آل عثمانک (جمین) دیدیکی

(چینی) در ، بیزانسلیلرک (چیمپه) سیدر .

کافرلاردن بر قاج کافرکه آدی بللوجه در، آنلرک کبی صقلدیله کرک اولادیلر . پس تورکار قلعه نیک لیمانده کھیلر بولدیلر، اول کھیلری آلدیلر . و اول کافرلری کھی ایچنه قودیلر، و قرشو آنا طولی یقاسنه تورکاره و لشکره کوندزدیلر . آندن غازیلردن ایکیوز مقداری کھیلر آرقیوب قلعه قودیلر و قلعه آتلی بولدیلر . غازیلر آتندیلر و (بولایر) یاننده (آچقه لیمون ، آچقه لیمان) درلردی ، بر لیمون واردی ، سلیمان پاشا غازیلرله اول لیمونه واروب خیلی کھیسین اوده اوروب یقدیلر وینه قلعه کردیلر . آندن طورمادین اوتیه یقادن آدم چوردیلر . بویله ایده ایدیه چوق لشکر جمع آلدیلر . اول قدم روم ایلده کچمک سلیمان پاشادن اولدی » (ص ۱۴) .

نشری ، عاشق پاشا زاده ، لطفی پاشا ، سلیمان بکک روم ایلینه کچیشنی هپ بوصورتله تصویر ایدرلر .
مؤرخ عالی دیورکه :
« وزبان حالله کویا که بو ابیاتی اوقودیلر :

نظم

آق دکزی کچمشوز بز برایکی صالله .
همت مردانله ، غیبدن ارسالله .
اولدی بزم صالمز، تخت سلیمان بیزه .
کوزلرمز آچمشوز احسن اعمالله .

حتی ناظم مولود نبی سلیمان چلبی که مشارالیه سلیمان پاشای غازی نیک سمی هم مشربی و احیاناً سرخلقه بزمه داخل اولوب مصاحبتیه شرف کسب ایدن همنام مؤدبی ایدی ، مجاهد بزر

کوارک روم ایلی یقاسنه کچدیکن اشدی، تهذیب غزایه دعا نامه
بی همتا انشا ایدوب بومناستله بومطالع غزایی املا ایتشیدی، بیت :

ولایت کوستروب خلقه صویه سجاده صالمش سین

یقاسین روم ایلینک دست تقوا ایله آلمش سن .

حال بوکه ، سایمان بکک (کلیولی) قلعه سنه یرلشمه سی ،
تورکلرک روم ایلینه ایلک کچیشلری دکلدی ؛ فقط ایلک
یرله شیشلریدی . اولجه قانتاقوزینوسک خاطری ایچین (کلیولی) یی
کری ویرمشلردی ؛ شیمدی بوکا آرتق امکان یوقدی .

کیبن دیورکه :

« شیمدیکی تورکلر چاناق قلعه یی ایلک کچیشلریله صوک کچیشلرینی
قاریشدی رارق اورخانک اوغلونی سکسان یاغماجی ایله پک آز معلوم اولان
بر دوشمان طوپراغنه حیله ایله کچمش باربارلر کی کوستریورلر .
حالبوکه سایمان اون بیک کشیلاک برتورک سواریس-یله ده اول روم
ایمپراطورینک کیدسنه دوست ومتفق کی قبول ایدلمش ، ذخیره لرینی ده
ایمپراطور تدارک ایتشدی » (بیرانسک سقوطی تاریخی ، ص ۷۹۸) .

کیبنک بومطالعاه سی ، شهراده سایمان بکک روم ایلینه کچیشنه
عائدد . مع مافیله (شیمدیکی تورکلر) ک ۷۵۸ ده روم ایلینه
کچیشمیزی هیچ بیلنمه یین بر اولکدیه کچیش صورتنده تصویر
ایتمه لری تماماً یا کلشدر .

سایمان بک (کلیولی) نک احواله واقفدی . کذا ۷۴۷ ده

تەئەددورايى آلمق ايچين (سيلوردى) يە اوتوز قادار كمى يوللايان
اورخان بكك ۷۵۸ دە روم ايلينه عسكەرىنى سالارلە كچيرمش
اولماسى دە دوغرو اولاماز . توركلار روم ايلينه سالارلە دكل ،
يېزانس مؤرخلرينك تصوير ايتدكلرى كچى ، بويوك بر دونانما
حاضرلا يارق كچمشلردر .

سايمان بك برقاج كون ايچندە روم ايلينه ايكي بيك كيشى
كچيرمە يە موفق اولدى . عالى ديوركە : « اول (اودكوكلك)
قلعه سنى آلديلر ، خلقن عموماً قليچدن كچيروب بعدە (اكسميل ،
بولاي) قلعه سنى فتح ايدوب ايچندە كيلرى خراجە كسدیلر .
سايمان بك آلديغى حصارلرى تعمير ايتدیردى ، ايكي آى
بونك ايچين چالیدشدی ، باباسى اورخان بكە خبر كوندردى :

« دولتو همتكە روم ايلي فتح اولمغه سبب اولندی . كافرلر
زبوندر . ايمدى شويە معلوم اولە كم بو طرفدن فتح اولان
حصارلرە وولايتلرە اهل اسلامدن چوق آدم كر كدر . بو فتح
اولان حصارلرك ايچنە قومیه . وهم يارار غازيلر كوندرک . »

اورخان بك روم ايلينه (كوچر قرە عرب اولرى) نى
كوندردى . بونلر (كليولى) نواحيسنە يرلشدیرلدى . سايمان
بك (تكفور طاغى ، رودوستو) يە دوغرو ايلریلەدى .
(كل كل حصارى) نى آلدى ، (خيرە پوليس ، خيرە بولى) يە
يورودى . بواثناده ، (قرەسى) دن آقین آقین توركلر كليور ،

تراکیایه دولویوردی .

اوسنه اورخان بك روم ایلینه ایکنجی بر اوردو کوندردی .
 بو اوردو کوچوک اوغلو مراد بكك قومانداسنده ایدی . سایان
 بك (ایصاله) پی آلمشدی . مراد بك ده (قو کور حصار) ی
 قوشاتدی . آیوقاقوس ، بیزانس ایمپراطورندن بر جزا کوردیکی
 تقدیرده صیغنیق ایچین بورای غایت مکمل صورتده تحکیم ایتشدی .
 عاشق پاشا زاده بو حصاردن بحث ایدرکن دینورکه :

« قو کور حصار ی نك تكفورینه قالا قونیا دیرلردی ، خیلی
 بهادر کافر ایدی . ترك کم روم ایلینه کچدی ، اول آت
 آرقه سندن ایندی » .

مراد بك حصار ی آادی . استانبول ایله ادرنه آراسنده
 (چورلو) اوزرینه یورودی . بوراسنی آنجاق فضله تلفات
 ویره رك آلمایه موفق اولدی . حصار ی اوصورتله ییقدیردی ، که
 سورلرندن اثر بیله قالمادی . (چورلو) نك یاقیننده (پیرغوس ،
 برغوس) اهالیسی صوك درجه قورقیدیلر ، هپسی ده شهرلرینی
 براقوب قاچدیلر . مراد بك (برغوس) ی اشغال ایتدی ،
 بو پارلاق ظفرلردن صو کرا آنا طولویه دوندی . او ائناده اورخان
 بك (بروسه) ده ایدی .

بو سفر ، مراد بكك فتوحاتنه سایان بك دوام ایتدی .
 سلیمان بك ، تراکیای کاملاً فتحه عزم ایتشدی . حتی بو عزمی

معیتده کی غازیلرده تلقین ایچین شو سوزلری سویله دی :
 — یولداشلر سزه وصیت ایدرمکه بن بو یقینده دنیادن
 کدیسرم . امدی بنی بو ولایتده دفن ایدمسه ، واکر سزه
 کافر غلبه ایدوب اوزریکوزه کلورسه زنه ار صقنه سز . کافردن
 یوز دوندرمیه سز . اللهه توکل ایدوب دورمسه سز . حق تعالی نك
 حکمتن کورمه سز .

اوصیراده سایان بلك معیتده غزا ایدنلر : حاجی ایل بکله ،
 اجه بکله ، اورمئوس بکلردی . حتی (قو کور حصار)
 طرفلرینی اجه بکه تیمار ویرمشلر ، احوالی یه (اجه اوواسی)
 دیمشلردی . کذا ، غازی فاضل بلك ده بو ولایتده تیماری
 واردی . حتی فاضل بلك ده ، اجه بلك ده ، اولدکلری زمان ،
 بو ولایتده کومولمشلردی .

سایان بلك (قو کور حصار) نی غازی اورمئوس بکه ویردی .
 کندیده آرا صیرا آقینلر یاپار ، (کلیبولی) یه دونر کلیردی .
 سایان بلك ، ترا کیایه کچدکن صو کرا ، هیچ راحت
 کورمه دی . (پیرغوس ، برغوس) ك مراد بلك طرفندن
 فتحنی متعاقب اوده (ادرنه) اوزرینه یورودی .

مؤرخ لوبو دیورکه :

« سایان ادرنه یی قوشاتدی ، شهر اوزون مدت قارشی
 قویدی . سایان ، (ادرنه) یی ده آلدقن صو کرا ، ایمپراطورلغك

بوتون مالكانه سنى آلمانى دوشونمىشدى . آرتق ظفردن ظفره قوشيوردى . نهايت اولوم ، اونى ظفر كوكبهسى اوزرنده ياقالادى » (كتاب ۱۱۵ ، ص ۴۰۳) .

فى الحقيقه « آوايدركن اوقله بر جانور اورديلر ، بو جانور قاجدى ، سايمان پاشا آردينه دوشدى ، آتينك آياغى بردليكه كچدى ، آتى دوشدى ، سايمان پاشا بيله دوشدى ، اول آراده شهيد اولدى (۷۵۸) . (عاشق پاشا زاده ص ۵۱) .

لطيف پاشاده سايمان بكك وفاتى شويله تصوير ايدييور :
« سايمان پاشا آت بنبوب اول يرلرى سير ايدركن آتى آياغى بردلوكه كچوب آتيله تكررنبوب اول آراده شهيد اولدى .
هجرتك يدى اللى طموزنده » (ص ۲۵) .

غريغوراس ده شو مطالعه ده بولونيور :
« خليل بكك تخليصى ايله مشغول ايكن اورخان بكك سلطنت وارثى ودولتلك اداره سنه مأمور اولان بويوك اوغلونك وفاتى وقوع بولمىشدى » (۷۵۷) .

سايمان بكك وفاتى روملر ايچين بويوك برفرست اولدى . درحال كميرله (كليبولى) طرفلرينه هجوم ايتديلر ، توركلر « سايمان پاشانك تابوتين بر ديوار آلتنده كومديلر ، و اوزرينه طاش ييغديلر . بلورسز ايلديلر كم ، انى كافر بولوب بر حدث ايتسونلر » . بعدد روملره شدتله مقابله ايتديلر ، و نهايت

موفق اولدیله .

سایان بکک وفاتی اورخان بکی دلخون ایتشدی . اساساً کندی ده ، بروسه ده ، خسته ایدی . اوغلونک وفاتی ایشیدنجه چوق آغلادی . او درجه ده که ، الم و اضطراب خسته لغنی بوسبوتون آرتدیردی . ذاتاً اختیارلامشدی . اورخان بک ، مالانی ظفرله اولسون تسکین ایتک ایستهدی . حاجی ایل بکله اوره نوس بکی (دیمتوقه) اوزرینه کوندردی . (دیمتوقه) حیلله آلیندی : (دیمتوقه) محافظی بومهم موقعی محافظه ایتمه نک اهمیتنی آکلامشدی . استحکاملارینی آرتدیرمش ، اطرافنده کی چفته سوری تعمیر ایتدیرمشدی . حتی هر طرفدن برچوق عمله کتیردی . تورکلردن بر چوغی ده عمله صفیله حصاره کیردیله . برقچ کون صو کرا عمله لر بر برینه طوتوشدیله . قارغاشالقدن بالاستفاده سلاخیخانه یی باصدیلر ، محافظلارینی اولدوردیلر ، شهرک قاپیلارینی جوارده پوصوده یاتان تورکلره آچدیله . شهر بر آنده فتح ایدلدی . اهلیدن بر چوغی قارشی قویمق ایسته دیله ؛ فقط پک چابوق جزالارینی کوردیلر .

تورکلر (دیمتوقه) یی اوزون مدت محافظه ایتدیله . نهایت قانتاقوزینوسک رجاسی اوزرینه تکرار کری ویردیله . قانتاقوزینوس بیزانس تختندن محروم اولدوغی حالده ینه مملکتینک مناقعی کوزه تیوردی . تعقیب ایتدیکی دستورده شوایدی : « ای

بر وطنداش، وطنی اداره ایدنلرک یاپدقلری حقسنزلقلرک جزاسنی
وطنه چکدیرمز .

اورخان بك، قائن پدرینك آرزوسنی بو سفرده یرینه
کتیردی . فقط آرتق تورکلرایچین تراکیادن چیقماق احتمالی
یوقدی . تورکلرک روم ایلینه یرلشمه لری بیزانسه قارشى بویوک
بر موفقیتدی .

بیزانس، بوصورتله، تورک اردولریله دکل، تورک حصارلریله
قوشادیلیوردی . دها اول (بروسه) ، (ایزنیق) ، (ایزمید)
فتحلری ده حواله لرله ممکن اولابیلیمشدی . بیزانسه قارشى ده عین
اصولک تطبیقی ، اطرافنی آنجق دائمی حصارلرله قوشاتماق
سایه سنده ممکن اولابیلیردی . تورکلر ، قرون وسطا تاریخنی
ابدیاً قاپایاجق معظم حادثه نك ایلک اساسلرینی قوردوقلری ایچین
بختیار دینر .

۳ . یشیل بروسه

عثمانلی تورکلر، آناتولونک اڤ قدر تلی برزمره سی ایدی .
 اولاً (قره جه حصار) ی ، صو کرا (یکیشهر) ی پایتخت
 اتخاذایدن عثمانلی تورکلر، (ویتینیا) نک اڤ کوزل مرکزینی ده
 آله ایتمشلردی . (یشیل بروسه) ، بودیادک اڤ جاذب بلده سیدی .
 تورکلر (بروسه) ی پایتخت ایدند کدن صو کرا ، (ایزنیک) ی ده
 المشر ، بوسفر اوراده اقامتی اختیار ایله مشلردی . بونکله
 برابر ، تورکلرک مقرایدن کلری بلده لر ایچنده هر زمان اهمیتی
 محافظه ایدن ، ینه (بروسه) ایدی .

(بروسه) اولمپوس طاغنک اٲکننده ، یشیل بر اووا
 کنارنده ایدی . یانندن کوموش کبی بر صو آقیوردی . تورکلر
 لماغه (کشیش طاغی) ، صویه ده (نیلوفر ، اولوفر صوی)
 یدیلر .

ابن بطوطه ، اورخان بک زماننده (۷۳۲) ، بروسه یی
 و صورتله تصویر ایدیور :

» بر بلده کبیره و عظیمه اولوب چارشولری لطیف
 سوقاقلری فسیحدر . هر طرفی بساتین و میاه جاریه ایله

محاطدر . خارجنده شدیدالحراره بر صو جریان ایدوب بویوک
بر حوضه منصب اولور . بونک اوزرینه ، بری ذ کوره ، دیکری
اناه مخصوص اوله رق ، ایکی بنا یاپیلماشدر . مرضی شفا
بولق مقصدیه ، بوقا پلیجه یه عزیمت و حتی بعضیلری الک بعید
اقتار و محال دن اختیار سفر و مشقت ایدرلر . واردین ایچون
بر زاویه بولنور . کلانلر ، اوراده سسا کن اوله رق ، مدت
اقامتجه یعنی اوچ کون مدتجه اطعام ایدیلورلر (ص ۳۳۹) .
(بروسه) ، رومالیر زماننده ده ، بیزانسلیلر زماننده ده
معمر دکلدی . بروسه یی ، الک زیاده اعمار ایدن ، تورکلر اولدی .
ثروت و قوت هپ (بروسه) اطرافنده طوپلانیدی . نیلوفر
خاتون ، کندی آدیله آکیلان صوا اوزرینه بر کوپرو ، بر عمارت
یاپدیردینی کبی ، اورخان بک ده ایچ قلعه ده بر جامع بنا ایتدیردی .
جامعک انشاسنه ۷۳۶ ده باشلانیدی ، ۷۳۸ ده ختام بولدی .
قایسینک اوزرنده شو کتابة واردی :

«بسم الله الرحمن الرحيم

قل هو الله احد

الله الصمد

لم یلد ولم یولد

ولم یکن له کفو احد

فی تاریخ سنة ثمان و ثلاثین و سبعمائنه »

«اللهم اغفر لصاحب هذا المسجد وهو الامير الكبير المعظم المجاهد سلطان الغزاة غازي بن الغازي شجاع الدنيا والدين الافاق بهادر زمان اورخان بن عثمان ادام الله تم مسجد المبارك لرضا الله تعالى من بني مسجد الله بني الله بيتاني الجنة»

اوليا چايي بوجامعدن بحث ايدر كن دييور كه :

«ايچ قلعه ده در. طولاً و عرضاً يوزاون آياق در. بر طبقه مناره سي وارد در. اورخان بك بوراده مدفون در. اورخان طاوولي ديدكلري قرصلي قيلقلو طبل كبير بو جامعك بر طاقدده آصيليدر . دولت عثمانيه ده ابتدا بو طاوول چالمنشدر . سلف پادشاهلرينه مخصوص سراي بو قلعه ده در . فاتحه كلنجه يه قدر پادشاهلرك سرايي بوايدي » (جلد ۲ ، ص ۱۰).
ايچ قلعه نك يوللري بويوك طاش دوشه ليدي . اولرينك بر قسمي روملردن قالما ايدي . طاش و طوغله ديوارلري اوزرنده روجه يازيلر و تاريخلر واردی .

اورخان بك بوجامعدن ماعدا بر تابخانه ، برده عمارت ياپي ردي . حصارده كي مناستري مدرسه يه تحويل ايتدي . مدرسه يه آريجه اوقاف تعيين ايله ديكي كي ، طلبه نك ، خدمه نك وظيفه لرني ده وقفيه سنده تعيين ايتدي ردي . بيزانس ظوپراقلرنده توركلردن ايلك جامع انشا ايدن ، اورخان بك اولدي .

نشري دييور كه : «هان بك سراي ياننده برمسجد بنا ايتدي . (ايلاري خواجه مسجدی) درلر . بروسه قلعه سنده اول بنا اولان مسجد بودر . صكره اخي حسن دخی بومسجدك قوربنده بر زاويه بنا ايتدي » (ص ۷۰) . اخي حسن ، شيخ اده بالينك قارده شي اخي شمس الدينك اوغلو ، يعني مال خاتونك عموجه سي اوغلو ايدي .

اورخان بکک بروسهده عمارت یاپدیردیغی پر حقنده نشری شو معلوماتی ویریور :

« بروسهده پیدردوغی عمارت یری بر ایسوز یری ایدی . اکنودن صکره آدم ورمغه وهم ایدردی . زیره (کوکدره) صوی اول ایامده (بالیق پازاری) نده آقردی . اول سبیدن دره اوتیه قایه کچمکه خوف ایدرلردی . صکره دره نك اوننه چایدن یکا طرفنه (آت پازاری) اولیجق حصاردن یانی بر آزامین اولدی . شمیدی اول آت پازارینک یری سلطانی اولمشدر » (نشری ، ص ۱۰۴) .

اورخان بک حصار ایچنده کی سرایده اوطوروردی . فقط بروسهده اوطوردوغی نادریدی . اکثریا (ایزنیق) ده بولونور ، استانبوله قارشی یاپیلان حرکتلری اورادن اداره ایدردی . اودورده پادشاهلره (سلطان) دنیلمزدی . مثلاً عثمان غازی یه عثمان بک ، عثمان شاه ، عثمان خونکار دنیلدیکی کبی ، اورخان غازی یهده عین عنوانلر ویریلردی .

اولیا چای دیورکه :

« تا ابوالفتح سلطان محمد کلنجه آل عثمانه عثمان بک ، اورخان بک ، مراد بک دیرلردی » (جلد ۲ ، ص ۳۷) . اورخان بکک ایلک زوجہ سی ، (یار حصار) تکفورینک قیزی نیلوفر خاتوندی . نیلوفر خاتونله اولندیکی زمان (۶۹۸) ، اون سکیز یاشنده ایدی . همان بوتون کنجلیکی آت اوزرنده و بیزانس حصارلری اوکینده کچمشدی .

اورخان بکک نیلوفر خاتوندن ایکی اوغلو دنیایه کلدی :
 سلیمان بک ، مراد بک . بونلردن باشقه ، اوچ اوغلو دها
 واردی : ابراهیم بک ، خلیل بک ، قاسم بک . نیلوفر خاتونله
 ازدواجندن برقچ سنه صوکرا (۷۲۳) ، اسپورجه خاتونله
 اولمش ، اونندن ده ابراهیم بک دنیایه کلمشدی . اوغوللارندن ایکینسی ده
 بروسه نك فتیح سنه سی دنیایه کلمشاردی (عاشق پاشا زاده ، ص ۳۱) .
 اورخان بکک صوک زوجه سی ، بیزانس ایمپراطوری قانتا
 قوزینوسک اورتانجا قیزی ته ئودورا ایدی . اورخان بک اولندیکی
 صیراده (۷۴۷) آلتمش یدی یاشنده ایدی . قانن والده سی ،
 ایمپراطور یچه ایرینی ایدی . قانتا قوزینوسک کوچوک قیزی آلہ نی
 ایمپراطور بو آنیس پالہ اولوغوسلہ ، بویوک قیزی ماریقـاده
 آنکه لوس خاندانندن نیکه فوراس دو قاسلہ اولمشاردی . قانتا
 قوزینوسک زوجه سی ایرینی ، بولغار قرالی یوآن آسانک
 حفیده سیدی . بناء علیہ ، اورخان بکک کرک بیزانس ایمپراطورلریله ،
 کرک بولغار قرالریله صهری مناسبتلری واردی .

اورخان بک بو مناسبتلرک صمیمیتنی محافظه یه دائما چالیشیردی .
 اورخان بکک ته ئودور ایله دو کون مراسمی غایت پارلاق
 اولمشدی . او صیراده اورخان بک (بروسه) نه ایدی . ته ئودورانک
 کوزللسکنی اوتهدن بری ایشیدیردی . قانتا قوزینوس ، شرقده
 قوی بر متفق قازانمق ایچین ، کندیسنه کنج پرنسیس تکلیف

ایتدیکی زمان، چوق ممنون اولمشدی . قانتاقوزینوس، کندیسى
ایچین اورخان بکله خوش کچینه مک قادار بویوک بر فلاکت
اولامیه جغنی بیامز دکلدی . مع ماهیه بوتون سرای خلقی قانتا
قوزینوسه معارضدی . قانتاقوزینوس بومسئله یی قرارلاشدیرمق
ایچین نهایت بر مجلس طویلادی . مجلس اعضاسی اورخان بکله
اتفاقک بیزانس ایله غایت نافع اولاجغنی ، حتی بونک ایچین هر
نه فدا کارلق لازمه، یاقمقدن کری دورولماسنی سویله دیلر .
قانتاقوزینوس متفقاً ویریلن بوقرارلده قنع اولمادی . دوستی،
آیدین بکی اومور بکده بر مکتوب یازدی . اومور بک بواتفاقی
غایت مصیب کوردی . حتی مکتوب بنده ، اورخان بکک قانتا
قوزینوس قادار کندیسنى سومیه جکی آشکار ایسه ده ، (بروسه)
بکنک قومشو اولمق حیثیتیه ، کندیسنه چوق فائده سی
دوقونا جغنی ؛ واقعا کندیسى ایمپراطوره یاردیم ایتیه هر زمان
حاضر ایسه ده ، بویله بر زمانده اوزاق مسافه قطعنه مجبور
اولاجغنی، اورخان بکک ایسه بر اشارتله اوردوسنى ایسته دیکی
یره دوکه بیله جکنى قطعی دلیلرله آکلاتدی . بوندن باشقه ،
بیزانس ایمپراطورلرینک قیزلرینی مسلملرله تزویجدن اوته دن بری
کری دورمادقلرینی ده مثالرله کوستردی .

قانتاقوزینوس ، بومسراجعتلردن صو کرا قیزی اورخان بکله
ویرمه یه راضی اولدی، قرارینی بیایدیرمک اوزره بروسه سراینه

ایاچیلر کوندردی. عین زمانده کلینی آلمق وئالکتنه کچیرمک
ایچین ده عسکر کوندرمه سنی رجا ایتمشدی .

اورخان بک بوخبردن چوق ممنون اولدی . درحال اوتوز
قادر کمپله بر چوق عسکر، سرای ارکانندن ده اک مهملرینی
کوندردی . قانتاقوزینوس (سیلیوری) یه کلدی . ییزانس
ایمپراطورلری قیزلرینی یابانجی حکمدارلره ویردکلری زمان ،
دو کونک (سیلیوری) ده یاپیلماسی عادتدی .

او کون (سیلیوری) خارجنده ، قیرده ، پرنسسلی هر کس
کوره بیله جک قادر یو کسک برسدیر یاپیلدی ، سدیرک یانی باشنه
بر چادیر قورولدی . ایمپراطور یچه ایرینی ، ته ئودورا ایله ، برده
او بر قیز یله برابر ، کیجه یی بو چادیرده کچبردیلر . قانتاقوزینوس
اوردو کاهده قالدی . ایرته سی کون ته ئودورا آناسنک چادیرندن
آیریلدی . کیمسه کوره دن سدیره چیقدی . سدیرک اطرافی
غایت قیمتمدار پرده لرله اورتولوایدی . پرده لری هپ ایپکلی
وصیرمالیدی . پرده قالدیریلر قالدیرلماز ، کوزل ته ئودورا ظریف
اثوابیله میدانه چیقدی . یاننده خادم آغالر ، اللارنده مشعله لر ،
دیز چوکشاردی . مراسمه حاضر بولونانلرک هپسی آیاقده
ایدی . یالکیز ایمپراطور آته بینمشدی . ته ئودورا هر کسه
کرزو کدیکی صیراده ، موزیقه جنک هواسی چالمايه باشلادی ،
بو هوانک آرایرلرند مملکتک اک کوزل سسلیلری اوقویورلردی .

اورخان بکک دلبر زوجه سی ایچین مدحیه لر اوقونیوردی . بو مدحیه لر ی دورک الک یوکسک شاعرلری تنظیم ایتشلردی . مراسمه بر ضیافته نهایت ویرلدی . اورخان بکک بوتون بکلری ضیافته اشتراک ایتدیلر . عسکرلر ایچین ده صوفرالر واردی . ضیافتلر کونلرجه سوردی . الک نهایت پرئس ته ئودوراباباسی ایمپراطوردن و والدسی ایمپراطوریمچدن مساعده ایسته دی ، ایککیسی ده کوزلری یاشارارق قیزلرینی اوقشادیلر ، (ویتینیا) ساحلارینه ، (بروسه) سراینه دوغرو یوله چیقاردیلر . ته ئودورا ، بروسه سراینده غایت مدبرانه حرکت ایتدی . اختیار زوجنک حرمتی و محبتی قازاندی . اورخان بکک زوجه سنی تماماً حربه راقدی . ته ئودورادینی ده دکیشدیرمه دی . تورک علماسی آراسنده اوکامسلمانلغک یوکسکلکینی آکلاتانلر ، اسلامه دعوت ایدنلریوق دکلادی ؛ فقط ته ئودورا بردرلوراضی اولمادی . اورخان بکک یاننده نفوذینی دائماً ایلکک حصر ایتدی . پاراسیله فقیرلره یاردیم ایدر ، اسیرلری قورتایردی (۱) .

اورخان بکک ته اودورا ایله اولندیکی سنه (۷۴۷) ، قان پدرینی زیارت ایتک ایسته دی . قانتاقوزینوس اوسنه (بیرانس) ه کیرمش ، رقیبنه قارشى سلطنت تختنه کچمه یه موفق اولمشدی . عین زمانده قانتاقوزینوسی ده تبریک ایده جکدی . اورخان بکک ،

برقادی رغه ایله (اسکدار) ه کلدی. یاننده ته اودورا ایله برابر،
 شهزاده لرندن سلیمان بك، مراد بك، ابراهیم بك، و خلیل بك ده
 واردی. ایمپراطور، اورخان بکی (اسکدار) ده قارشیلادی. بر
 قاج کون برابر یاشادیلر. اولرده، اکلنجه لرده وقت کچیردیلر.
 یمکده، برصوفرا ده اورخان بکه ایمپراطور، دیگر برصوفرا ده ده
 اورخان بکک دوت اوغلو اوطورمشدی. اورخان بکک معیتی
 خاقلی ده خالیلر اوزرینه اوطورمشلر، یمک ییورلردی.
 اورخان بك بوالفتادن ممنون اولدی. زوجه سنی و اوغوللارینی
 براقدی؛ کندی، مملکتنه دوندی.

ایمپراطور، ته ئودورا ایله برابر اورخان بکک اوغوللارینی
 و معیتی آلدی، ایمپراطور یچی و دیگر قیزلارینی ده اونلره
 کوسترک ایچین بیزانسه کوتوردی. بیزانسه ته ئودورا ایله
 برابر اورخان بکک اوغوللاری اوچ کون قالدیلر، ایمپراطوردن
 قیمتدار هدیه لر آلار (بروسه) یه دوندیلر.

خلیل بك (ایزمید) خاصنه متصرفدی. ا کثریا اوراده
 اوطورر؛ قیرلرده، دکز کنارلارنده کزردی. بر یاز
 کونی، هوا آلمق ایچین بویو کجه بر بالقجی قایغنه بپندی.
 (دیل) ده کز مک ایسته دی. ساحل کاملاً آغا جلقدی.
 آغا جلرک آراسنه بر قورصان کیسی کیزلنمشدی. بوکمی، آرا صیرا
 ساحله تجاوز ایدر، آینه کچیردیکی آداملردن پارا آلوب

صالیویرردی . کمیده کیلر خلیل بکک بئندیکی قایغی کوروخجه
 بردنبره هجوم ایتدیلر ، بر قاق کیشینی یارالادیلر ، خلیل بکی
 اسیر ایتدیلر ؛ دوس دوغرو (فوچه) یه کلدیلر . اودورده
 (فوچه) حاکمیری بیزانس ایمپراطورلری طرفندن انتخاب
 اولونوردی .

اورخان بك ، خلیل بکک فلاکتی دویخجه ، چوق منار
 اولدی . نهایت قورصانلرک فوچهلی اولدقلرینی و خلیل بکی
 ملکترلرینه کوتوردکلرینی خبر آلدی . فوچهدن انتقام آلماسنه
 جغرافی وضعیتی مساعد دکلدی . اورخان بك ، اوغلو خلیلک
 کندیسنه تسلیمنی باجاناغی ایمپراطور یوآنیس پاله اولوغوسدن
 ایسته دی . اورخان بککه ایمپراطور بئنده اوزون بر مخابره
 قاپیسی آچیلدی . ایکی طرفدن ایلیچیلر کیدوب کلهیه باشلادی
 فوچه لیلره قارشی ایمپراطورک کمیلر کوندرمه سی لازمدی .
 بیزانس خزینه سنده ایسه پارا یوقدی . اورخان بك بو پارایی
 تأمین ایله دیکی کبی ، روم اسیرلرندن بر چوغنی ده عفو ایتدی .
 حتی ایمپراطورک رقیبی ماته اوس قانتاقوزینوسی ، یعنی قاینی ده
 تأذیب ایده جکنی وعد ایتمکدن کری دورمادی .

ایمپراطور اولافوچه حاکمی (قالوته) ، بر هیئت کوندردی .
 قالوته ، هیئت غایت متعظمانه جوابلرده بولوندی . لیاقتنک
 قوقنده عنوانلر و پارالر ایسته دی ، ایمپراطور بر قاق دفعه

مراجعت ایتدی؛ هیچ بر نتیجه حاصل اولمادی. (بوزجه آطه)،
(لیمنی) و مدیالی دن طوپلادینی کمیلری (فوجه) یه یوللادی. او
صیراده قیش کلهشدی.

ایلاک بهارده (۷۵۸) فعالیتله حاضر لایمیه باشلادی. فقط
یالکیز دکندن هجوم کافی کلدی. صاروخان بکنی ده فوجه -
لیلرک اتفاقندن آیرمق لازمدی. بونک ایچین صاروخان بکیله ده
اتفاق ایتدی. (فوجه) پی هم دکندن، هم قره دن قوشا تمایه
باشلادی. فوجه لیلر شدتله مدافعه ایدیورلردی. هوالرک
بوزوقلغی، دها برچوق عارضه لر، شهرک آلینماسنه مانع
اولیوردی. محاصره خطنده ایمپراطورده واردی. بعضاً صاروخان
بکنه مسافر اولور، برابر یمک ییر، برابر آوه چیقار، قلعه
تسایم اولمادجه محاصره خطنی قالدیرمیه جغنی سوبلردی.

صاروخان اوغلو ایمپراطوری اسیر ایتدی و فضاچه پارا
قوپارمایی قوردی. فقط حیله سی پک چابوق میدان چیقدی.
بر صباح، ایمپراطوره بر معتاد آت کوندردی. ایمپراطور
بو ترتیباته قارشى تجادل کوستردی. صاروخان اوغلونه کیزی
برشی سوبلیه جکنی بیان ایدهرک کمیسنه دعوت ایتدی،
صاروخان اوغلو بوتکلیفی قبول ایله دی. ایمپراطورک سفینه سنه
کلدی، کمینک خلاطلری چوزیلهرک آچیلمایه باشلادی.
صاروخان اوغلو، کمیده، بر چوق کیشینک قارشینده

مقصدینی اعتراف ایتدی. نهایت ایمپراطوره، زوجه سنک مراجعتی اوزرینه، چوجو قلینی رهن برافارق قورتولمایه موفق اولدی. یاز کلدی. یوآنیس پاله اولوغوسک رقیبی ماته اوس قانتا. قوزینوس (ماکه دونیا) ده حر کته باشلادی؛ فقط صربلر اینه اسیر دوشدی. ایمپراطور صربلرله اویوشدی، رقیبنی الده ایتیه موفق اولارق (زوجه آطه) یه یوللادی. کندی ده بیزانسه کلدی. اورخان بك متأردی. پاله اولوغوسی بطائنتدن دولایی تهدید ایدیوردی. اوسنه قیش پک سرت اولدی. ایمپراطور (زوجه آطه) یه کلدی. خلیل بکی قورتارمق ایچین (فوجه) یه متوجهاً یوله چیقدی؛ فقط برشیئه موفق اولامادی. تکرار بیزانسه دوندی. موسم بهاردی (۷۵۹). اورخان بك (خالکه دوآن، قاضی کوی) نه کلدی، دکنر کنارینه چادیرلرینی قوردی. بورادن ایمپراطوری دعوت ایتدی. ایمپراطور اورخان بكک یاننه قادار کلهمدی. اوزاقدن مخبره ایله قناعت ایتدی. کندی، (آرقلا، قیزقوله سی) نده ایدی. مخبرات اوچ کون سوردی. اورخان بکله یوآنیس پاله اولوغوس آراسنده بعض شرطلر قرار لاشدیرلدی :

۱. خلیل بك اسارتدن قورتاریلنجه، یوآنیس پاله اولوغوسه داماد اولاجق، هنوزاون یاشنه کلن قیزی ایرینی ایله اوله نه جکدر.
۲. آراالرنده کی صلح هیچ بر زمان نقض ایدلمیه جکدر.

اورخان بك بوشرطلری قبول ایتدی . ایمپراطوره کلیتیجه پارا ویردی . بوپارانك بر قسمی خلیل بکی قورتارمايه صرف ایديله جکدی . ایمپراطور (فوجه) یه کلدی . قالوته تله مخابره یه کیریشدی . نهایت کندیسنه (پانی پرسه واسطوس) رتبه سیله یوزبیک آلتونه یاقین پارا ویرهرك خلیل بکی قورتارمايه موفق اولدی . ایکسی ده اوج صیرا کوره کالی بر کمی یه بئسیدیلر ، (بیزانس) ه دوغرو یوله چیقیدیلر .

موسم یازدی . چفتجیلر اُکینلرینی طوپلایورلردی . زراع ، صلاح وسکون ایچنده ، چالیشمايه باشلامشلردی . آرتق اورخان بك طرفندن هیچ بر تجاوز قورقوسی یوقدی . ایمپراطورله خلیل بکک کیلریله برابر ، داها بر چوق کیلر واردی . بونلرک هپسندن آلقیش صدالری یوکسه لیوردی .

خلیل بك بیزانسه کلدی . قره یه چیقدی . خلیل بکی کورمک ایچین هر طرفدن خلق کلش ، شهر یابانجیلرله دولمشدی . خلیل بك بوتون بو غلبه لق اورتاسنده ، ایمپراطورله برابر ، یان یانه ، آت اوزرنده کیدیوردی . سرایه آتله یالکیز ایمپراطورله اوغوللری وقاردشلی کیره بیلیرلردی . بو ، بیزانسهک تشریفات مراسمننددی . خلیل بك سرای قاپیسینه کلنجه ، آتندن اینمک ایسته دی . ایمپراطور ، اینمه مه سنی رجایتدی . حتی آتنک دیز کینلرندن طوتوب ایلری چکدی ، خلیل بك يك محجوب

اولدی . ایمپراطور آتک دیزکینلرینی براقیوردی . خلیل بك محجوبیتندن چوق رجا ایتدی . سرای میدانك اورتاسنه قادار بوصورتله کیتدیله ، اوراده خلیل بك آتندن ایندی ، ایمپراطورك اوکینه دوغرو قوشدی ، آتنگ دیزکینندن طوتمق ایسته دی . ایمپراطور چوق بالواردی . بوسفرده خلیل بك نزاكت وظیفه سنی ایفادن کری دورمادی . نهایت ایکیسی برلکده سرایه کیردیله . سرایده ایمپراطور یچه آله نی واردی . آله نی خلیل بکی کورونجه ، باشیله سلاملادی . خلیل بك شو سوزلری سویله دی :

— اللهم بیلدیکنی کیمسه بیلمز . آنسزین اسیر اولدم ، عاآلدمك قوجاغندن ومملکتتمزدن اوزاقلرده قالدم . نه بلالر کوردم . یازه قیشه باقما یارق قره دن ود کزدن غیرتله کوسترن ایمپراطور حضرترلرینك همترلرله قورتولا بیلدم . بولطفه مقابل بندن البته مکافات بکه مزله ؛ ذاتاً بویله برشی قدرتمك فوقنده در . مع مافیه قدرتم یتدیکی وعمرم اولدوغی مدتجه کندیلرینه قارشی هر درلو فداکارلغی اختیار ایده جکم .

ایمپراطور یچه آله نی ده نازکانه جوابلر ویردی . خلیل بکه سرایده ، ایمپراطورك دائره سی یاننده ، بر کوشك تخصیص ایداشدی . خلیل بك دائره سنه چکیلدی . آراده صیراده مزین اثوابلر کیر ، خلقه کورونوردی . ایمپراطور ، خلیل بکه حمام اکلنجه لری ، ضیافتلر ترتیب ایدردی . ایمپراطورك اوصیراده

ایکی یاشنده بر چوجوغی اولمادی. فقط او، کنج مسافرینی
 صیقاماق ایچین یالکیز بر کون ماتم طوتدیرمش، ایرتهسی
 کون اکلنجه لره وضیافتلره دوام ایداشای. جنازه آلایندن
 ایکی کون صو کرا ایدی که، خلیل بک نشانلیسی ایرینی کوردی.
 اوصیراده اورخان بک (ایزنیق) دن (ایزمید) ه کاشدی.
 مقصدی، اوغلونی قارشیلانمادی. نهایت ایمپراطورده خلیل بکه
 برابر کی به بیدی. ایکی کونده (ایزمید) ه کادی، سوکیلی
 اوغلونی اورخان بکه تسلیم ایتدی. آرتق خلیل بک کندیسنک
 دامادیدی. ایمپراطور، اورخان بکه کوروشدی. خلیل بکی
 ولی عهد یاماسنی رجا ایتدی :

— هم دوغروسی ده بودر :

دیدی. فی الحقیقه اورخان بک، اوغلو خلیلی چوق سوردی.
 خلیل بک، جسور، بنیه سی صاغلام، عاقل، فعال بر کنجیدی.
 اورخان بک ده بوکا تمایلی واردی. بو سبیدن ایمپراطوره
 نارکانه جوابلر ویردی. ایلریده بونک ده برچاره سنه باقیلابیله -
 جکینی سویله دی. ایمپراطورله برابر روم عسکری ده واردی.
 او کون (ایزمید) ده پارلاق شناسکلر اولدی. تورک و روم
 عسکرلریله بیزانس رجالی بر آلائی ترتیب ایتدیلر، طاووللار،
 کوسلر، نقاره لر چالارق خلیل بکی (ایزنیق) ه کوتوردیلر.
 (ایزنیق) اوصیراده غایت غلبه لکدی. تورک رجالانک ال

مهملى اوراده اوطورورلردى . توركلار ك خدەتندە برچوقدە روم واردى . بونلر اورخان بكه اوغلو خليل بكي قارشىلاديلر ، قويونلر ، صيغيرلر ، قوماشلر تقدیم ايتديلر . خليل بكه برابر كلن بيزانسليلرى كنديلرينه مسافر ايتديلر ، نهايت برچوق هديه لرله ممالك تيرينه كوندرديلر (۷۵۹) (۱) .

خليل بكه پرنسس ايرىنىك دوكونلرى ايدىلوب ايدلمەدىكى معلوم دكلدر . معلوم اولان برشى واردر . اوده شودر كه ، خليل بك كوندوز بك نامندە بر اوغلو دنيايه كلدى . خليل بك بروسەدە عمر كچيردى . عيسى بك محله سنده اوى ، موسى بابا تكيه سى اوستندەدە باغلرى واردى . بورايه (خليل بك باغلرى) ديرلردى . اورخان بك اوغوللارندن سليمان بك دە سيد حسين چالينك قىزى ساچوق خاتونى آلمش ، عمر چاچى دنيايه كلشدى .

اورخان بك ، جوارده كى تورك بكلريله دە ابي كچينيردى . مثلاً قرەسى بكنك اوغلو طورسون بك بروسە سرايندە اوطورورلردى . بر قاردشى دە ، قرەسى دە ، باباسى عجلان بك يانندە ايدى . عجلان بك اولديكى زمان اهالى طورسون بكي ايستەديلر . بو خبرى بروسەيه باباسنك وزيرى حاجى ايل بك كتيردى . طورسون بك (باليكسر) ايله (برغمه) يى اورخان بكه ويرمكه راضى اولدى ، (قيزيلجه ، طوزله) ايله (بيغاديچ) ي

گندینه ایسته‌دی .

اورخان بك بورالری فتح ایتیه قرار ویردی : (بالیکسر)
اوزرینه یورودی . عجلان زاده برغمیه قاچدی ، اورخان بك
مذا کره ایچین قاردشی طورسون بکی کوندردی . قلعه‌ده کیلر
طورسون بکه جواب ویرمک شوپله دورسون ، اونى اوقله
اولدوردیلر . اورخان بكك بو حرکت کوچنه کیتدی . قره‌سی‌ی
درحال کندی ملکنه الحاق ایتدی . طورسون بكك قاردشی ،
اورخان بکه التجا ایلهدی . اورخان بك ، عجلان زاده‌ی بروسه‌یه
کوندردی . اوغلو سایان بکه قره‌سیدن تیمارلر ویردی . کندی
دوندی ، بروسه‌یه کلدی (۷۳۵) .

اورخان بك علم و معرفت اربابیلله دوشر قالقار ، اونلره
اکراملرده بولونوردی .
نشری دیورکه :

«اهل علمی و حفاظی سوردی . حفاظه و اهل وظایفه علوفه‌تعیین
ایتدی . حتی قضایه دخی علوفه‌تعیین ایتدی ، تا کیم کسنه‌دن نسنه
آلمیه‌لر . القصه اورخان زمانده عتقا و فقرا صرفه‌الحال‌لر . حتی زکوة ویره
جك کشی بولنمز اولدی . انوك زمانده مولانا سنان عتبه اورخانه
کلوب اورخان اکا شولقدر نسنه ویردی که سنان پاشا دیکله معروف
اولدی » (ص ۱۰۴) .

بودورك الك مشهور علماسی : طورسون فتمیه ، داود قیصری ،
تاج‌الدین کردی ایدی .

طورسون فقيه فضل و كماليله تمیز ايتمشدى . امام عالينك
غزالرينه دائر اثرى معروفدى .

طورسون فتيھك اثرندن شو پارچە ، نظمده كى اقتسارينك
درجەسنە بر نمونەدر :

مسجدە كىردى رسول قىلدى نماز
شكر ايدو بن حضرتە ايتدى نیاز
بو غزوات بونده اولدى تمام
مصطفانك روحنه ويرەم سلام
نېجە بونك كې ايلهدى غزا
دين يولى آندىن كلىش اولدى بزا
ياالھى مصطفانك حرمتى
رحمتوكلە يارلغا بو امتى
صوچومىز چون آنى شفيع قىلەرىز
مرحمتوك داخى چوقدر بىلەرىز
رحمتك اومار سنك طورسون فقى
مصطفانك معجزاتلارك اوقى
مصطفايى قبول ايتدك يارلغا
ياالھى بىزى داخى يارلغا

داود قىصرى مصرده تحصيل ايتمشدى . صدرالدين قونوى
خلفاسندن كمال الدين قاشانينك ارشادينه نائل اولان داود قىصرى ،
مصردن دونوشنده ممالكستنه كلىدى ، اوراده علم ومعرفت نشرينه
باشلادى .

(ایزنیق) ك فتحنده ، اورخان بك داودك فضل و كمالی
ایشیتدی، اونی (ایزنیق) ه دعوت ایتدی . ایلك یاپدیردیغی
مدرسه یه مدرس تعیین ایلهدی .

داود قیصری اورخان بك زمانده (ایزنیق) ده بك
چوق طلبه یتیشدیردی . اورخان بكك صوك سنه لرده (۷۵۱)
وفات ایتدی . (چیناردی) نه دفن ایدلدی . اك مهم اثرلری
شونلردی : شرح فصوص الحکم ، مراتب التوحید ، تحقیق
ماءالحیات و كشف اسرار ظلمات ، شرح عروض اندلسی ،
شرح منازل السائرین ، رساله فی بیان احوال حضر . داود
قیصریدن صوگرا ، (ایزنیق) مدرسی تاج الدین کردی اولمشدی که،
اوده سراج الدین ارموینك شا کردیدی .

کذا ، شیخ طاپدوق امره ، یونس امره ، عاشق پاشا ،
وکلشهری ده اورخان بكك یاشادینغی دورده مهم تأثیرلر اجرا
ایدن متصوفلر و شاعرلردی .

طاپدوق امره ، (ساقاریا) حوالیسنده منزویانه یاشاردی . اصل
اسمی امره ایدی . حاجی بککاش ولینك دعوتنه بوتون شیخلر
اجابت ایتدکلری حالده ، او ایتمه مشدی . نهایت حاجی بککاش
اونی ده قاراجه احمد و صاری اسماعیلله چاغیرتدی . نیچین کله دیکنی
صوردی . اوده ، کندیسنه نصیب ویرن برال بولوندوغنی ،
أرنلر بزمنده حاجی بککاشی طانیادیغنی سویله دی . حاجی بککاش

او الدە بر علامت اولوب اولمادىغىنى :
 — آياسىندە بر بن واردى .

دیدی . حاجى بىكتاش آلینی اوزاتدی . امرە ، یشیل بنى
 كورور كورمن :

— طايدوق پادشاهم .

دیدی ، واو كوندن اعتباراً آدى (طايدوق امرە) قالدی .
 يونس امرە يى طايدوق امرە نىك درگاهە كونده رن : حاجى بىكتاش
 ولى ایدی .

يونس امرە (بولى) ملحق تاندن (ساقاريا) صويى جوارنده كى
 قريه لردن برنده دوغدى . اولاً طايدوق امرە يە مرید اولدى .
 بر مدت كويلرده منزويانە ياشادى . (ساقاريا) اورمانلردن درگاهە
 متصل اودون طاشيردى . بر كون طايدوق امرە يونسك كتىردىكى
 اودونلرە باقدى . هېسنك دە دوز و قورو اولدوغنى كوردى :

— طاغده هيچ اكرى اودون يوقىدى ؟

دیهه صوردی . يونس امرە دە شو جوابى ويردى :

— طاغده اكرى اودون چوق . لكن سنك قاپىكده

اودونك بيله اكرىسى ياقىشمار .

يونس امرە ، شىخى طايدوق امرە يە قرق سە خدمت ايتدى .
 دهاصو كرا ، الھىلرینی يازمايه باشلادی . ديواننده كى شو پارچه
 يونس امرە نىك نصل بر عشقه مجلوب اولدوغنى كوسته رير :

بر ساقیدن ایچدم شراب عرشدن یوجه میخانه سی
 اول ساقینک مستلری یوز جانلر آنک پیمانه سی
 بونده دائم یانانلرک کلی وجودی نور اولور
 اول اود بر اوده بکزه من هیچ بلور منانه سی
 بو مجلسک مستلرینک انا الحق دملری اولور
 یوز حلاج منصور کبی اک کدرر دیوانه سی
 اول مجلس کیم بزده اولور آنده جگر کباب اولور
 اول شمع کیم بزده یانار آی و کونش پروانه سی
 اول مجلسک بکریلری ابراهیم ادهم کبیر
 باغ شهرنجه یوز بیگ اولر هر گوشه ده بر دانه سی
 عشق شرابی ایچنلره کل بر نظر ایله یی کور
 بوتجه ییلدیر نیجه دوزر اول مجلسک پیاله سی
 یونس بو جذبه سوزلرک جاهلاره سویله مه کل
 بیلمز میدک جاهلارک نیجه کچر زمانه سی

یونس امره نهایت شیخ طاپدوق امره نک درکاهندن آیریلدی .
 شیخنک وفاتندن صو کرا ، مریدلری اونک اطرافنه طوپلان دیلر .
 یونس امره نک الیهیلری بوتون تکیه لره یاییلدی . وفاتنده (۷۰۷)
 زهیه کومولدیکی معلوم دکدر . مع مافیه (بروسه) ده ، (فوله)
 ایله (حائل) آراسنده ، ارضرومده (دوتجی) قریه سنده ،
 (کیچی بورلی) قصبه سی جوارنده ، (پورصاق) صوینک
 (ساقاریا) یه قاریشدینی محله ، یونس امره یه عائد مقاملر
 واردرکه ، بوده آنا طولو خلقنک او عصرده یونس امره نک
 قدسیته نه درجه اهمیت ویردکلرینه دلالت ایدر .

عاشق پاشا ، بابا الیاس خوراسانیاتک حنفیدیدی . اوغوز
تورکلر ندیدی . اورخان بک دورنده (۷۳۰) قیرشهر ندی نفیس
بر اثر یازمشدی : غریب نامه . یوزبیک بیتی تجاوز ایدنی بوکزیده
اثر ، اخلاقی و تصوفی ، تورکجه برمشویدی :

الله آدین ایتدم اول ابتدا
آندن اولدی ابتدا و انتها
اولک اول ارایدر بی کمان
آخرک هم آخریدر جاودان
جهله عالم یوغیکن اول وار ایدی
شویله اکیکسوز غنی جبار ایدی
اولزمانده کیم هنوز یوغدی زمان
بی زمان اول بی مکان واردی همان
هر دو عالم اول عدمده غرق ایدی
هم عدم اول اصل دمدی غرق ایدی
وار ایدی اول پادشاه بی نیاز
قنده نه ناز وار ایدی نه خود نیاز

عاشق پاشا ، اورخان بک زماننده (۸۳۳) ، قیرشهرده وفات
ایتدی . مخاص باشانک بویوک اوغلو ایدی . (۶۷۰) ده دنیا به کلمشدی .
عین عصرده یتیشهن کلشهری ده (۷۱۷) ده اون بیک بیتلی
بر اثر وجوده کتیرمشدی . بو اثرلر ، اورخان بکک یاشادیغی
دورده تورک ادبیاتنک نه درجه لرده بولوندوغنه پارلاق شاهدلر در .
مثلا کلشهری ، اثرینک بریرنده ، حضرت محمدی :

امس ونهی عالمک پیرانه-ی
قول و فعلی آدمک سرمایه-ی

دیه تصویر ایدیوردی . بو اثرلرک قسم اعظمی (مشوی)
دن ماهم اولارق یازیلشیدی . کاشهری نک (منطق الطیر)
ترجمه نسی ده ، بو دورک مهم اثرلرندیدی .

بو دورک لسان و ادبیاتی اوزرندده بومتصوف شاعرلر
طرفندن یازیلان اثرلرک بویوک تاثیرلری اولدی . خصوصیه بو
اثرلری یازانلر ، بابائیلر ، آخیلر ، آبدالره منسوب بویوک شخصیتلر
اولدقلری ایچین ، اثرلری ده بودینی و سیاسی زمیره لرک انتشارینه
چوق یاردیم ایتدی .

فی الحقیقه ، بودورده آنا طولوده بویوک برقوتله انتشارایدن
بکتاشیلکک اساسلرینی بابائیلک ، آخیلک و آبداللق تشکیل
ایتدی .

بابائیلر نامی جنکیزاستیلاسی اوکنده (خوراسان) دن کلن بابا
الیاسک مریدلرینه ویریلردی . بابا الیاس ده سیدابوالوفامریدیدی .
بونلر ساجوقیلر زماننده بابا اسحاقک تشویقیله بر عصیان چیقاردیلر .
سلطان غیاث الدین ، عصیانی باعدیردقدن صوکر ، شیخی عفو
ایتدی . بابائیلرک بوقیامی دینی و سیاسییدی . دورک متصوف
شاعرلریله « صاحب کرامت » عزیزلرندن چوغی بابائیلر
منسوبدی . بونلرک خلق اوزرندده بویوک نفوذلری واردی .

آبدالق، عادتا بابائیکلک بر شعبه سیدی. آبدالردن قایغوسز
 آبدال (آبدالنامه) نامیله بر اثر یازدی. آبدالرك اك مشهورلری:
 آبدال موسی، آبدال مراددر. قایغوسزك شعرلری بکتابیلک
 اوزرینه بویوک بر تاثیر اجرا ایتدی. شو پارچه، قایغوسزك
 ذهینتنی تمامیله کویستر:

یوجه لردن یوجه کوردم
 اربابك سن قوجه تا کری
 عالم اوقور کلام ایله
 سن اوقورسك هجه تا کری
 عاصی قوللر یار آتمشك
 وار سین شویله دورسون دیو
 انلری قویمش اوراده
 سن چیقمشك اوجه تا کری
 قیلدن کوپری یار آتمشك
 کلسون قوللر کچسون دیو
 هاله بز شویله دورالم
 یکیتمهك کیچ آتاتا کری

قایغوسزك آبدال موسایه پک زیاده مربوطیتی واردی.
 آشاغیده کی منظومه بوکا پارلاق بر مثالدر:

هنددن بازار کانلر کلور یایینور
 عاشق اولان بو میدانده صویونور
 پیشر لقمه لری آجلر طویونور
 طوقلار کلور پیرم آبدال موسایه

اقرار بدير قوچ يگيتك بولارى
 فقيه لرى چكسم گلز ايلرى
 آق پيكازك يшил كالى صولرى
 چاغلر كلور پيرم آبدال موسايه

آبدال موسى ايله آبدال مراد، اورخان بلكه برابره، (بروسه)
 فتحنده بولونمشلردى .

عاشق پاشا زاده دييوركه : « آبدال موسى اورخان زماننده غزايه
 كلدى وبو يكيچرينك آرامنده بيله يورودى » (ص ۲۰۵) .

آبدال مراد حقنده ده (توارىخ آل عثمان) ايله (لطفى پاشا)
 آتیده کی معلوماتی ويريورلر :

« اول يلاق اوواسنه (يالوه) جمع اولانان كافرلر برى برى
 ايله لاف و كذاف اوروب تركى شويله ايدلم تركى بويله ايدلم
 ديوب طورر كن ناه كاه بر كون بر عريان اشق جقه كلدى . كافرى
 اسلامه دعوت ايدوب والنده بر آغاچدن قلع وار ايدى . كافرلر آنى
 كوروب كولشديلر . درويشى مسخره ليه آلديلر . مكر كيرو بر كون
 درويش كلوب بوللرى اسلامه دعوت ايدوب كافرلر جمله سى سرخوش
 اولوب درويشك دولابنه جمع اولديلر . درويشى مسخره ليه آلوب
 ايتديلر : اكر سن ديدوكاك بز ديمزسك بزمله نيچه ايدرسن .
 يالكوزسن، وهم يراغك يوق . درويش ايتدى : نيچون يراغم يوق .
 اوشته قلع المده ديدى . اسلامه گلزسكز بو قلع ايله سزى قرارين .
 كافرلرينه كولوشديلر، و ايجلرنده بر سرخوش كافر كلوب درويشك
 اوكنه طوردى، ايتدى كل ايتدى اول قلع چال، كورلم كسرى ؟
 درويش دخى الله تعالى حضرتلرينه صغوب تكبير كتورب كافرى ارقرولين
 چالدى . حق تعالىك عنايتندن اول آغج قلع كافرى ايكي بولدى .

والا کافر دخی یرنده اورو طوررکن جانن جهنمه اصمارلدی . قالن
کافرلر کینه کولشدیلر ایتدیله قلیجک قانی کسیکون ایش . بزماه بویله می
جنک ایدرسن دیدیلر . درویش ایدر آرقداش کیزی کورک . یرندن
دیرهرک دیدی . قاتنه کلوب کورورلرکه کافر کف کچمش . دبره دهلم
صاندیلر کافر ایکی پاره اولوب دوشدی . اول جمع اولان کافرلر اول
حالی کوروب نیجه سی درویشه اینانوب اسلامه کلدیلر و نیجه سی قاقوب
پراکنده اولدیله حصل کلام درویش اورانی فتح ایتدی . عاقبت
آنده وفات ایدوب زیارتگاه اولدی . شمدیکی حالده اول حمام یاننده
اولور . مزار شریفی مشهوردر . اول حمامه وارنلر اول مزاری زیارت
ایدرلر .

اورخان بك، كرك آبدال موسی و كرك آبدال مراد ایچین
برر تکیه بنا ایتدیرمشدی . اولیا چلبی (۱) ، آبدال مراد
تکیه سنی شو صورتله تصویر ایدیور :

« بروسه یه حواله برتفرجگاه چنزاریرده واقع آستانه آل عبادر .
پاو ، مرهنه ، عشق الهی ایله جگری پریان ، سینه سی عرین جانلر وار-
درکه تفرجه واران کسه یه ازدل وجان خدمت ایدرلر . بوتکیه یی
اورخان غازی بنا ایتش ، بیکی متجاوز صحن ، نجره ، قازان کبی
باقیر بر چوق اوانی وقف ایلشدر . اهل زیارت آنده محبت ایدوب
عبادت ایدرلر . »

قانونی سلطان سایمان ، آبدال مرادک قلیججنک اوچده برینی
کس دیرهرک تبرکاً خزینه هایونه قویدورمش .
آبدال زر مره سندن آبدال موسی و آبدال مراد درجه سنده

دوغلو بابا ایله کییکلی باباده مشهوردی. دوغ، یوغورت دیمکدی.
(بروسه) محاصره سنده ، غازیله متصل ایران یتیشدیردیکی
ایچین کندیسنه (دوغلو بابا) دنیلشدی .

کییکلی بابا ایسه ، اولیا چایینک روایتنه کوره ، « فقرای
یسویدن آذربایجان شهرندن جری حسن سلاله سندنذر . عظیم
طاغلرده وحشی صیغیرلره سوار اولوب اورخان غازی ایله سفره
کیتهدر . بارخانه سنی بیله وحشی غزالره یوکلدرمش » (۱) .
(شقایق) « نظراً ، کییکلی بابا (خوی) دندی . سید ابوالوفا
طرفندن وبابا الیاس مریدلرندندی . کییکلی باباده ، بابا ثیلره منسو-
بدی . اورخان بك کندیسنه صوك درجه حرمت ایدردی .
کییکلی بابانك (این اوکی) نده باغ و باغچه سی واردی . باغچه
حقنده فاتح سلطان محمد دورینه عائد بروقف دفترنده شوسطرلر
مندرجدر :

« این اوکنده شرابدار بیر دیمکله مشهور بیرکه ایکیوز الی دوغ
ییردر ، قیش طوغانی اوغلو عیسیدن چاوش باشی مراد بك یوز الی
فیرنکی فیلوریه صاتون آلمش ملکدر . مولا مجدالدین بتسیله مقرر
و کییکلی بابا باغ و باغچه بیله . یعقوب فقه باغچه سیدر .
رسم علی و حمزه و قندر . مراد خونکار نشانیه » .

کییکلی بابا آغاجلر آلتنده دولاشیر ، کییکلرله دوشر
قالقاردی . طورغود آلب کندیسنی پك سوردی . برکون

درویشی اورخان بکہ مدح ایدر . اورخان بک کیمک مریدی
اولدوغنی صور دورر . بابا الیاس مریدلرندن اولدوغنی آکلار .
— درویشی کتیرک .

دییہ امر ایدر . کییکلی بابا کلز . حتی :
— اوده بکا کلمه سین .

دیر . اورخان بک بو جوابه شاشیریر :
— نیچون کلز ، ویا بنی نیچون قوماز آندہ وارمغه .

دیر . کییکلی بابا شو جوابی ویرر :

— درویشلر کوز اہلی اولور ، کوزہ درلر . وحتی وقتندہ

واررلرکم دعا لری مقبول اولور .

کونلر کچر . برکون کییکلی بابا برقاواق آغا جنی اوموزلار .
بروسہ حصارینہ کلیر . ایچری کیر ، قاواغی دیکمہ یہ باشلار .
اورخان بکہ خبر ویررلر . طیشاری یہ چیقار ، کییکلی بابا اورخان
بکی کورر کورمز دعا ایدر ، وچکیلیر کیدر .

اورخان بک ، برکون کییکلی بابای زیارت ایدر . کندیسنه
(اینہ کول) حوالیسنی ویرمک ایستر . کییکلی بابا قبول ایتمز :

— ملک و مال حق کدر . اہلنہ ویرر . بز آنک اہلی

دکلز . دیر .

اورخان بک صورار :

— اہلی کیمدر ؟

کیکلی بابا شو جوابی ویرر :

— حق تعالی دنیا ملکینی سنک کبی خانلره ایصهارلادی،
قوللری بربریه مصاحت کورسون دیو .

اورخان بک دهها زیاده اصرار ایدر . او زمان کیکلی بابا
شو سوزلری سویلر :

— شول قارشوکی تپه جکدن بری درویشارک حولیجکی
اولسون .

ایشته بو سبیدن ، اورخان بک « کیکلی بابا اوزرنده جمعه
مسجدی یاپدیردی ، وزاویه دخی یاپدیردی : شمدیکی حالده
اوزرنده احیا اولنوب بش وقتده اورخان بک روحنه دعا ایدرلر .
اول زاویه کیکلی بابا تکیه سی دیرلر » (۱) .

کیکلی بابا حقنده خزینه اوراقده کی وثائق تصنیف اشناسنده
بولدوغمز شو وثیقه موجوددر :

« قطب العارفین شیخ کیکلو بابا خونی دن کلشدر . اولو کیکا بنوب
کلشدر . کیکلر کندویه مسخر ایمش . کالب اینه گولده مکان دوئمش .
مرحوم سلطان اورخان پادشاه حضرتلرینک فتحنده مرحوم اورخان
پادشاه اول قیالری فتح ایدرکن قطب العارفین شیخ کیکلی بابا دخی اول
جانبده اوچیوز آلتش قیولی بر کلیسا وارش . قزل کلیسادمکله مشهور
ایمش . اول کلیسائی کندولر فتح ایتمش . جنک ایدرکن برکستان
آغاجی وارمش . جنکی ادر ادرمش . اول کستانیه واردقده اول کستانه

یارلوب بابایی صاقلر ایش . کافرلر آرار بوله حیلر ایش . صباح کنه
 چیقوب کافرلرله جنک ادردی . ارنرله بونوعله آلمشدر . او زمانلر
 حضرت اورخان پادشاه شیه خبر ویرمشلرکه : « خویدن بر ار کالب
 اولو کایکا بنب قزل کلیدایی آلدی » دیو جواب ویرمشلر وددکارند
 مرحوم اورخان پادشاه : « بابایی خورددر » دیو اکی یوک عرق واکي
 یوک شرابی کندروب بابا دخی یاننده کی بلم سلطان جواب وروب
 « پادشاه بنه اکی یوک بال واکي یوک یاغ کندرمشلر » دیو برقران کاتردب
 آتش یاقدرب قینتدروب ایچنه پرنج قویب اعلا زرده اولب کاتورن
 آدم نظرند وهم انکی برز ذردیدن پادشاه کندروب وهم آلتنده یانق
 آتشدن برز قور بر پنبوق ایچنه قویب پادشاه کوندروش ، پادشاهانی
 کورروب بی اختیار نظرلرله واروب انلر دخی غایبدن طعام کاتورروب
 ضیافت آتمشلر . مصاحبته بابایه پادشاه حضرت بزم دخی بر اثر موز
 اولسون . نه دلرساک ، وریم . کوزک بقدوغی یری وریم دمش . انلر
 دخی : « بنم کوزم چوق یره بقدو . الا بنم فتح اتدو حکم یری ویرک »
 دیوب پادشاه حضرت دخی اکی باره کندونک فتح اتدوکی کویی آنلره
 وقف آتش . اول وقف اولان کویلر محصولندن بابانک اوزرنده اوماج
 شوربایی بشوب اینده وروند وقرایه بزل اولنور . بابا سیله جواب
 ایدوب هرکیم بابا شوربایسن ایستر ، بند ساکن اولسون وهرکیم پلاو
 ذرده ونفایس ایسترسه تختای کویه کتدسون ، اول زماند بورسیه
 تختای کویی درلر ایش . ودخی شکاری هایوننگ زده بویوردوغو کوز
 کییکلی بابانک و بلم سلطانک اورتویی تجدید اولب قرق قزغان کشک
 اوچ دانه صغیر و اوچ موت اون یفقه واون قزغان پلاو واون قویزو
 دخی قربان احیا اولمشدر ، کندر دو کوکوز او (ر) تیله .

کاغذک آرقه سنه شو مصر اعلم یازیشدر :

بر دم اولر آل چیچکلی یاز اولور
 بر دم اولر خزان اولر کوز اولور
 بر دم اولر آی آیدن کوندوز اولر
 بر دم اولر قرا کی کجا شو کوکل

بر دم اولر جان فقس دن بوشه نور
 بر دم اولر نی کورسه اوشه نور
 بر دم اولر آچقلره دوشه نور
 بر دم طغدن یجا اولر شو کوکل

بر دم اولر شو دنیا دن اوصنور
 بر دم اولر کوردوکلین اوصنور
 بر دم اولر سیرچه کبی یاصنور
 بر دم اولر بو کوکل

*
* *

ایرلز یاره بی یار اولینجه
 جهانک خلقی اغیار اولینجه
 حقیقت عالمینه یول وارلز
 بو ملکدن کلی بیزار اولینجه

بو دورک ارلرندن قاراجه احمد سلطانده مشهوردی .
 کندی، حاجی بکتاش ولی مریدلرندی ؛ باباسی ده عجم دیاری
 ملو کئنددی . (آق حصار) ه کلتش ، واوراده وفات ایتشدی .
 عالی دیورکه :

« اول تاریخده روم ارلرینک قطب نامداری قرهجه احمد

سلطان ایدی . سیوری حصارده ساکن سید نورالدین نام
عمده واصلین تربیه سیله سجاده نشین اولمشیدی . عصرنده
الای یدی بیک مرید هدایت نوید قرهجه احمد سلطانک تحت
حکمنده بدید ایدی» (۱) .

بابائیلرله آبدالار آراسنده یتیشن بو سیالر ، التهربری ایله
تکیه لرده خلق اوزرنده بویوک بر نفوذ اجرا ایدرلردی .
بونلردن باشقه ، برده آخیلر واردی که ، سالک اولدقلری
مسلمکه (فتوت) درلردی . بومسلك حضرت علی یه ودولایسیله
حضرت پیغمبره قدار چیقاردی . آخیلكك نوشیروان زمانندن
قالما ۷۴۰ آدابی واردی . شیخلر بو آدابك كافه سنی بیلمکله
مکلفلردی . بوتون آخیلر ایسه بو آادادن ۱۲۴ دینی بیلمکه
مجبور دیلر . فتوت اصحابی دوقوز کشیدی . آلتیسی ارکان طریقت ،
اوچی اصحاب طریقتدی هراوچنك ایکی یول قارده شی؛ برده ،
یول آتامی واردی . آخیلر شالوار کییرلردی . ایچلرنده بر
چوق مقتدر ذاتلر یتیشمشدی . آخیلك واسع بر طریقتدی .
ابن بطوطه ، اورخان بك زماننده آناتولوده سیاحت ایتدیکی
زمان ، بك چوق اخی زاویه لرنده مسافر اولمشدی . آخیلر
حقنده ویردیکی معلومات غایت مهمدر :

« آخیلر بلاد زومده ساکن تورکن اقوامنك هر ولایت وبلده

وقریه سنده موجوددر . اجانبه ابراز رأفت وفتوت ، اطعامنه وایفای
 حوائجنه مسارعت ، جبابره یی تنکیل و امحا و اغوان ظلم و تعدی ایله بونلره
 التحاق ایدن اشرایی قتل و افنا خصوصنده بونلرک دنیا ده امثلی یوقدر .
 اوراجه غیر متأهل و مجرد کنج لردن اهل صناعت و سائر دنک بالاجتماع
 کندیلرینه رئیس انتخاب ایتدکاری آده اطلاق و بو جمعیه دخی فتوت
 تسمیه ایدیلر . رئیس بر زاویه انشا ایله قالبچه و سائر محتاج اولدینی
 اشیا ایله تفریش و قنادیل تعلیق ایدر . رفقاسی کوندوز استحصا
 اسباب معیشته چالیشوب بعد العصر مکسوباتی رئیس کتیریر . بونکله
 میوه و طعام و زاویه ده صرف اولونان دیگر مواد صا تون آلیرلر .
 اوکون بلده یه بر مسافر کلیر ایه زاویه لرینه مهمان ایدرلر و بو آلنان
 شیلرله اکا ضیافت چکرلر ، اوکیسه عودتنه قدر اونلرک مسافری اولور .
 برکیسه کله دیکی حالده ، اکل طعام ایچون طوپلانوب یملک یرلر ، تغنی
 و رقص ایدرلر ، و صباحلین اجرای صنعت کیده رک بعد العصرینه
 کافه سی قازاندیلرینی رئیس کتیریرلر . بونلره فتیان وریشلرینه ده اخی
 دیرلر . دنیا ده آنلردن زیاده افعال جیله صاحبی کورمدم « (ابن بطوطه ،
 شریف پاشا ترجمه سی ، ص ۳۱۲ : ۳۱۳) .

آناتولونک برچوق یرلرنده آخیلرک زاویه لری واردی .
 اک مهم زاویه لرک بولوندوغی یرلر شونلردی :

آنطالیه ، ارضروم ، ارزنجان ، سیواس ، قیصریه ، قونیه ،
 نیکده ، آقسرائ ، کول حصار ، بوردور ، بالیکسری ، بروسه ،
 کیوه ، مدونی ، بولی ، یکیکجه ، قسطموننی ، سینوب ، آزاق ،
 لاذقیه ، آنقره .

ابن بطوطه ، (آنطالیه) ده کی زاویه یی شو صورتله
 تصویر ایدیور :

« زاویه نفیس روم قالیچه لريله مفروش و عراق جامنیدن بر
 چوق آویزه لر ايله مزین ایدی . مسافر اوطه سنده بش عدد بیسوس
 واردی . بیسوس ، باقردن معمول چراغ پاییه تسمیه اولونور که اوچ
 آیاغی اولوب باشنده بولنان یینه باقردن بر نوع قندیلک اورتیه سنده
 فیل ایچون برانبوب واردر . بوقندیل اریمش ایچ یاغی ايله طولدی ریلیر
 ویانیه یاغ ايله مملو باقیر اوانی وضع اولونور . اوراده فیتیل دوزه لیک
 ایچون مقراض ده موجوددر . اخیلردن بری بوقندیله باقار و کندیسنه
 چراغچی دینور . اوراده شباندن بر گروه تشکیل صفوف ایدر که
 آرقه لرنده قبادن لباس و آیاقلرنده مست بولونور . هر برینک بلنده اولان
 کمره ایکی ذراع طولنده برر ییچاق آصیلیدر . باشلرنده صوفدن بیاض
 قندسوه اولوب هر قندسوه نك تپه سنده بر ذراع طولنده وایکی پارمق
 عرضنده برطیاسان موجوددر . بونلر طویلاندقلری وقت ، هر بری
 قندسوه سنی چیقاروب اوکنه قویار . باشنده زردخانی دن یاخود سائرده دن
 معمول و منظره سی کوزل بشقه بر قندسوه قالیر . اجتماعلری و سطنده
 مسافرینه مخصوص برپیکه واردر . بز مجلسلرینه کیرنجه اطعمه کثیره
 و میوه و طاتلی کتیروب بعده غنا ورقصه باشلادیلر . بونلرک حال جالب
 تعجب فوق العاده و باخصه -وص سماحت و علو جنابلری حقنده کی حیرت
 ده ا زیاده در . کیجه نك صوکنده ، کندولرینی زاویه ده براغهرق ،
 عودت ایلدک . » (ابن بطوطه ، شریف پاشا ترجمه سی ، ص ۳۱۳
 و ۳۱۴) .

آخیلرک زاویه لری شیخلرینک نامیه آکیلردی . پیرلرینک
 اک مشهوری ، اخی اورن ایدی . بو ، اورخان بکک زماننده
 آخیلرک اک زیاده حرمت ایتدکلری برذاتدی . کلشهری ، اخی
 اورنک خلیفه سیدی . اخی اورن عثمان بکک جلوسنده برحیاتدی .

حتی (۷۰۶) تاریخی برده وقفیه سی واردی. کندی، دباغلر کپیری ایدی. حاجی بک تاش ولی ایله آرالر غایت ایدی. قیر شهرنده اکثریا یکدیگر ایله مصاحبت ایدرلردی.

عثمان بکک ایملک زمانلرنده، اخنی احمد، اخنی بایزید، اخنی شمس الدین، اخنی حسن، مشهور سیالردی. مثلاً اخنی شمس الدین، یوقاریدهده ایضاح ایتدیکنز وجه ایله، شیخ اده بالینک، یعنی اورخان بکک بویوک باباسنک قاردشیدی.

اخنی حسن ده، باباسنک عموجه سی اوغلو ایدی.

مشهور آخی زاویه لرندن لازقیهده اخنی سنان و اخنی طومان زاویه لری، قونییه ده ابن حکم شاه زاویه سی، نیکدهده اخنی جارق زاویه سی، قیصریه ده امیر علی زاویه سی، سیواسده بیجاچی اخنی احمد زاویه سی، کتس ده اخنی مجدالدین زاویه سی، ارزنجانده اخنی نظام الدین زاویه سی، ارضرومده اخنی طومان زاویه سی، تیره ده اخنی محمد، بالیکسردده اخنی سنان، بروسه ده اخنی شمس الدین، قسطنطنیه ده اخنی نظام الدین، سینوبده عزالدین اخنی زاویه لری اودوردده بویوک برنفوزه مالکدیلر.

آخیلر، مسافرلرینه زاویه لرنده بوستانلرده ضیافت ویررلردی. بونلر آراسنده قاضیلر، مصرده تحصیل کورمش فقیهار و مدرسلرده واردی. مسافرلرینی دائماً قارشیلارلر، حتی بایلاشما نیجه قرعه چکرلردی. بایراملرده اولافبرلری زیارت ایدرلر، اوراده قوربانلر

کسرلر ، فقرایه داغیتیرلر ، صوکراده جامعہ کلیرلردی . هر صنعت اربابی طاووللاری ، بایراقلری وفقیرلریله برابر چیقاردی . « بر محمد سلطان بولونمادینی تقدیرده حاکمی اخی اولوب آیندگانه آت و لباس اعطا و قدیرینه کوره احسان ایدر . امر و نهی ورکوبی عینیله ملوکه مشابه » (ابن بطوطه ، ص ۳۳۶) اولوردی . خلق شرافته پک زیاده حرمت ایدرلردی . سیواسده آریجه بر (دارالسیاده) ده واردی . ابن بطوطه دیورکه :

« اوراده دارالسیاده نامیه مدرسه یه مشابه بر منزل واردر که شرفادن بشته اورایه ، همان ایدلر . نقیب اشراب منزل مذبورده سا کندر . شریفلر دارالسیاده ده اقامت ایتدجه ، مفروشات ، مأکولات ، شموع و سائر ویرلدیکی کبی ، عزیتلرنده دخی دخی زاد راهلری اعطا اولنور . »

آخیلرک حکمدارلره بیله سوزلری کچردی . ابن بطوطه سیواسه کلدیکی زمان ، کندیسینی بیچاقچی اخی احمددن اول امیر علاءالدین مسافر ایتمک ایسته مش . فقط اخی احمد : — هنوز بنم زاویه نه نازل اولدقلرندن اولا بکا کلسونلر . مائده کی اورایه کوندورسلک .

دیه خبر یوللامش . امیر علاءالدین ده راضی اولمش . آخیلرک ایچنده غایت یاشیلری واردی . مثلاً ارضرومده اخی طومان یوز اوتوز یاشنده ایدی . بوتسکه برابر ، حافظه سی

پرنده اولدوغی کبی ، مسافر لرینه نه کندی خدمت ایدردی .
 قیصریه ده کی اخی امیر علینک زاویه سنده کی مفروشات مکمل
 اولدوغی کبی ، یتکاری نفیس وقندیلاری ده غایت ظریفدی .
 آخیلک آناطولوده بویوک بر قوتدی . عاشق پاشا زاده
 (ص ۲۰۵) دیورکه :

« وهم بورومده درت طائفه واردرم مسافر لر ایچنده اکیلور .
 بری غازیان روم ، بری اخیان روم ، بری آبدالان روم ، بری
 باجیان روم . ایمدی حاجی بکتاش سلطان بونلرک ایچندن باجیان رومی
 اختیار ایتدیکم او خاتون آنادر . آنی قیزایدندی ، کشف و کرامتی
 آکا کوستردی ، تسلیم ایتدی . کندی الله رحمتنه واردی . »

(قیرشم) : نه مدفون شیخ سلیمان ولی وقفیه سندن آ کلاشیلدیغنه
 کوره ، حاجی بکتاش ولینک وفاتی (۶۹۵) - دن ده اولدی . وقفیه ده ،
 « مرحوم حاجی بکتاش ولی » دییه یاد ایدیلیوردی . (علی امیری ،
 تاریخ و ادبیات مجموعه سی ، ص ۴۷۰) .

آناطولوده بابائیلک ، آبدالاق و اخیلک بکتاشیلکه اساس
 تشکیل ایتدیکی کبی ، فکر لرده ده بر سر بستی حصوله کتیردی .
 قادینه ارککک اجتماعی و حیاته کی وظیفه لری آ کلاشیلدی . ابن
 بطوطه اورخان بك زمانده آناطولو قادینلرندن بحث ایدرکن
 دیورکه :

« بوبله لرده بر زاویه یا خود خانه یه ینسه ک ، قوم و لر من اولان ارکک
 وقادینلر احوال می صوریشدیر لر دی . اوراده قادینلر احتجاب ایتزلر .

اثنای مفارقتده ، کویا قوم وتبار من کبی بزه وداع ایدر لر و نسوان اشک ریزان وافتراقزه تأسف خوان اولور لر دی « (ص ۳۱۰)
قیصریده امیر ارتنانک زوجه سنی زیارت ایتدیکنی ده شو
صورتله آکلاتیور :

« یاننه دخول ایتدی کمزده قیام وحسن صورتله سلام وکلام ایتدی . طعام احضارینی امر ایلدی ، بعدالا کل عودتمزده بزه کوله لرندن بری واسطه سیاه اکر و کمی مکمل برآت و خلعت وپاره ارسال ایله اعتذار ایتدی « (ص ۲۲۵) .

بودورده قادینلر یوزلرینی قاپامازلردی . ابن بطوطه دیور که :

« بوراده عجیب بر حال مشهودم اولدی که اوده تورکلر عندنده قادینلرک مظهر تعظیم اولمیدر . بونلرک موقع و مرتبه سی ارککلرک فوقنده در . امرا قادینلرینه کلنجه : برنجیسی (قرم) دن اثنای خروجده کوردم . « صاتیجیلر ایله چارشو اصنافنک قادینلرینه کلنجه : بونلری ده کوردم . بردانه سی بر آراهیه را کب اولوب برآت چکر و اوکنده اوچ ، درت جاریه اُتکلرینی قالدیرر ایدی . باشنده (بغطان) نامیله معروف ومجوهرات ایله مزین اولان وباش طرفنده طاوس تویی بوانان برخطوز وار ایدی . آراهه نک پنجره لری آچیق ایدی . تورک قادینلری احتجاب ایتدیکندن ، خاتونک یوزی کورینور ایدی . دیگر برقادین دخی بو ترتیبه رعایت ایتدیکی ورفاقنده خدمتکارلر بولندیفی حالدده بازاره قویون و سود کتیروب عطریات مقابلنده خلقه صاتار ایدی . علی الا کثر نسوان زوجلری ایله برابر بولوب ارککی قادینک خدامندن بری ظن ایدر « (ابن بطوطه ، ص ۳۶۸ ، ۳۶۹) .

تورکلرده ماتم طوتمق عادتیه واردی . بو عادت محمد

تاشدن صوکرانکی زمانلره قادار دوام ایله مشدی . جنازه ده
اوابلرینی ترس کییه لر ، باشلرینی آچارلردی . علما ایسه
یالکیز اوابلرینی ترس کییرلر ، باشلرینی آچارلر ، فقط اوزرینه
سیاه یو کدن بر مندیله (شمله) صارارلردی .

کذا تورکلرده جسد تحنيط ایتکده واردی . ابن بطوطه
(مغنیسا) نی زیارتنده اوغلو وفات ایدن صاروخان بکندن بحث
ایدرکن ، دیورکه :

« کندوسیله متوفانک والده بی بایرام کیجه سی ایله صباحنی تره ده
امرار ایله یلر . مرحومک جسدی تحنيط ایدیلهرک فلایلی تیمور ایله
اورتولو بر تخته تابوته وضع ایدیلوب رائحه سی خارجه کیتک ایچون
سقفسز بر قبه یه آصیلمش ایدی . بعده قبه نك سقفی یاپیله رق تابوت
وجه زمینده میدانه قونیه جق واثبانی ده اوزرینه وضع ایدیله جک ایدی »
(ص ۳۳۷) .

اورخان بکک کنجک کندن حیاتنک صوکنه قادار آنا طولوده ،
تورک محیطنده ، اجتماعی حیات بو شرطلر آلتنده و بو جریانلره
تابعدی . اورخان بکک ده بو تاثیرلردن آزاده قلامیه جفی
شبهه سزدی : نته کیم اقرباسندن بیله آخیر موجود اولان اورخان
بک ، اونلرک اثرینه اقتفا ایدر ، فقرایه و مسافرلره اکرام
ایلر ، اکثریا عمارتده چوربانی کندی ایلله داغیدیردی .

اورخان بکک شیخلره و طریقتلره ده محبتی واردی . اولیا
چلینک قولنججه (جلد ۴ ، ص ۳۹) کندیسی شیخ احمد کبیر

رفاعی ایله شیخ حسن رفاعی نك معتقدی ایدی .

اورخان بك زمانده (بروسه) جامعلر ، مدرسهلر ،
تکیهلر و تربهلرله مزیندی . (کورتلو) ده علاءالدین
بکک تکیه سی ، وقایلیجه یه کیده جک یرده مسجدی واردی .
علاءالدین بك ا کثریا اوراده اوطورردی . کشیش طاغنگ
یشیل و اورمانلق یاما جلری ، چنلی وادیلرنده سو کودلر
آلتدن آقان دره کنارلری ، عابد درویشلرک ، مزوی شیخلرک
انزوا کاهی اولمشدی . عالملر و شاعرلر بوییشیل طاغلرک و وادیلرک
سکوننده ذوق بولورلردی . اطرافنده دو کولن شلاله لردن :
پیکار باشی ، آق چاغلایان ، کولک دره غایت مشهوردی . کوك
دره اوزرنده اك مشهور کوپرو ، ایرغاندی کوپروسیدی .
اولیا چلبی ایرغاندی کوپروسی حقنده شو حکایه یی آکلاتیور :

« سنه ۷۲۶ تاریخنده اورخان بك بروسه یی فتح ایتشد .
او اشاده بر مجاهد فی سبیل الله ، عاشق جان حمامه کیدرکن بوجسر
مخلنده « چیقایمی ؟ واره یمی ؟ » کبی بر صدا ایشیدیر ، غازی همان
دال قلیج اولوب « چیتی بقالم . نه یاپاییلیرسک ؟ » دیهرک صدا کان
محل بر صاطور اورونجه اوردینی یردن کورلیهرک بر کنز عظیم میدانه
چیقارق زمین ایرغالانوب صالانیر ، صارصیلیر . غازی ایسه حیرته
قالارق شاشیریر . ایکی یانه باقارق نه کورورسه ایی ؟ دره نك ایچی
قیدافه سکه لی آلتونرله مالامال . همان قوشارق اورخان بکه سرگذشتنی
بربر تقریر ایدر . اوده : « یانه خیر ایتدک ، الله سکا میسر ایتمش
وار ، بروسه ده خیرات و حسناته صرف ایت « دیو امر ایدر . مجاهد

جمله مالی خانه سینه طاشیه رقی عشرینی بیت مال مسامینه تأدیه ایدوب
بقیه سیله بوجسر عظیمی بنا ایدر . ایشته ایرغاندی بجمری دینه سینه
سبب بودر » (جلد ۲ ، ص ۲۷) .

کذا (پیکار باشی) نك بش ساعت یوقاریسندده (غازی
یا ییلاسی) واردی . تورکلر (بروسه) یی محاصره ایتدکلری زمان عازیلر
بوراده او طور دقلری ایچین بورایه (غازی یا ییلاسی) دیرلردی . کستانه
آغا جلریله مزین بر یردی . اوزرنده آلا بالقلرله دولو برکول
واردی . زمینندن بروسه شهری بوتون لطافتیه کورونوردی .
بودورده فرمانلره (بتی) ، براتلره (نشان) دیرلردی .
(۷۵۹) سنه سنده ، اورخان بکک صوگ سنه لرنده یازیلان بر بتی نك
نمونه سی بروجه آتیدر :

« بو بتی حکمی اولدرکم بتی کوتورن شیخ محمد جهی و موسی
(موسی) جهی داود جهی شیخ طردی خضرى شیخ مراد کوسه
ابراهیم حاجی محمود ایلرد (ایلریدن) وقف ایتشلر . بزدخی مقرر
دق (طوتدق) هیچ آفریده کائامن کان اول وقفلره مدخل ایتسون
قشلاسنه و یا ییلاسنه مانع اولسونلر بنی کورنلر بتی اوزره اعتماد قلسونلر
بو بتی حقیقت بلسونلر . کتب فی اواخر شهر و ربیع الآخر سنه
تسع و خمین و سبعمائنه »

بو دورده عدالت تمامیه جاریدی . بکلر بیله علمانک
نصیحتیه عامل اولورلردی .

تواریخ آل عثمان دیورکه :

« عثمان ، اورخان و مراد خان زماننده شراب ایچمزلردی .

ہم اول زماندہ علمالر وار ایدی کہ سولرین کچوررلری . و اول پادشاہلر علمادن اوتانوب علما نہ درلرسہ سوزلرین دن چیقمازلردی و آل عثمان دن برکناہ صادر اولسہ علما آنی منع ایدرلردی . اکر منع اولسہ اول زمانک علمالری آنلردن چقرلردی . و علما اول زماندہ مفسد دکلرلردی . شیمدیکی علما کبی منصوبدن قورقوب تک او طور مضلرلردی . اولکہ شرعہ مخالف ، منع ایدرلردی . سوزین کچوررلردی . و اول زماندہ بردانشمند مدرسلردن طاب ایدرلردی کہ قاضی ایدلر ، بردانشمند قبول ایتزدی » (ص ۲۵)

تورکلر بیزانسه قارشی بوتون غلبہ لرینی ، تشکیلاتلرینک مکملیتی سایہ سندہ قازاندیلر . بو تشکیلات پارایہ ، عسکرہ ، قیافتہ متعلقدی .

اوزمانلر ، تجارتدہ تداول ایدن پارا ، آچہ ایدی . ایلاک آچہ یی باصدیران ، اورخان بکدی . اورخان بکک سکہ لری متعدد رسم و طرزده ایدی . ایلاک آچہ یی (۷۲۷) سنہ سنده ، داہا دوغروسى ، جلوسنک ایلاک سنہ سنده باصدیردی . آچہ نک وزنی بش قیراط ، قطری ۱۸ میلیمترہ ایدی . یوزینہ بر مربع چیزیلشدی . مربعک اورتاسندہ :

لااله الاالله محمد رسول الله

دورت ضلعنک طیشنہ : ابو بکر ، عمر ، عثمان ، علی ، یازیلیدی . آرقہ یوزندہ دہ ، دورت کوشہ لی ، ییلدیز بیچمندہ بر چیزکی واردی . اورتاسنہ شوپلہ یازیلشدی :

فی

ضرب

ارخانجی عثمان

برسا

ییلدیزک دورت ضلعنک طیشنه تاریخ قونولشدی : سنه
سبع عشرین وسعمائه .

اورخان بکک سکه لری اوزرنده، اسمی منتظم یازیلی دکادی .
اکثریا (لق خان) طرزنده ایدی . (بروسه) ده دائما (برسا)
شکلنده یازیلردی . آچقه لک اکثری ۶ قیراط وزننده ، داها
دوغروسی بر مثقالک ربعی قاداردی .

اورخان بک، سکه باصیرمازدن اول، قارده شی (علاءالدین)
علی بکه مشورت ایتدی ، بر مجلس عقد ایتدیردی ، بومجلسده
سایمان بکه مراد بک ده حاضر بولوندی (خیرالله افندی ،
جلد ۳ ، ص ۶۶) . باصیلاجق سکه لک ربع مثقال وزننده ،
و رغبت قازانمق ایچین ده ، یوزده دو قسان عیارنده بولونماسته
قرار ویرلدی . (آچقه) نامی عثمانلی تورکلردن اولده واردی .
بونى اوندن آیرد ایتک ایچین یکی آچقه یه (آچقه عثمانی)
دنیه جکدی . اساساً آچقه نك اساسی ده ، روجه (آسپرو ،
آق) کله سیدی .

اورخان بک زماننده ، کندیسنه (سلطان) دینلمزدی . فقط

اورخان بك سكه لرینك اوزرینه سیاسی بر مقصدله (السلطان الاعظم) ، (السلطان الاعدل) دییه ده یازدیرردی . اورخان بكك « بو عنوانی یازدیرمسی افتخار و عظمت ایچین دكل ، حكومت منقرضه ساچوقیه یی احیا ایده جكنی اعلان و اشاعه ایچین اولوب بوصورتله یكی فتح ایتدیكى قره سی بلادی اهالیسیله مغول تحكمنده قالمش اهالی معصومه اراكك قلوبنی جلب ایله اغنیا و جنكاورانی ملككته دعوت ایتك مقصدیله در . نته كیم عین مقصدله اسفندیار ممالکی حكمداری عادل بك ده ۷۴۷ سنه سی سكه لرینه مذکور عنوانی یازدیرمشدر » (۱)

اکثر آچه لرنده شو یازیلر واردی .

یوزنده : لااله الاالله محمد رسول الله

اطرافنده : ابو بكر ، عمر ، عثمان ، علی

آرقه سنده : اورخان

خلدالله

ملكه

اورخان بك بو آچه لری موغول تحكمندن هنوز قورتولما دیغی زمانلر باصدیرمشدی . (۷۳۶) ده ابو سعید بهادر خان زهرلنهرك وفات ایتدیكى زمان ، موغول قورقوسی قالمامشدی ؛ شهزاده لری تاج و تخت غوغاسیله مشغوللردی . او تاریخه قادار باصیلان

[۱] علی بك ، عثمانلی ایمراطور افغنگ ایلک سكه سی

سکه لرده اورخان بکک اسمی ده ، مقری ده هر کس طرفندن
 اوقونامیه جق درجه ده یازیلشدی . اورخان بکک بوسکه سی
 غایت مهمدی . سکه نك اوزرنده کی (السلطان الاعظم) ده
 قالدیرلمشدی .

بعضاً، خصوصی سکه لرده باصدیریلیدی . مثلاً اورخان بکی
 تجیل ایچین باصدیریلان بعض سکه لر واردی که ، بونلرک یوزنده :

الامام

المستنصر

(امیر المؤمنین)

دیگر یوزنده ده کله توحید یازیلیدی (۱) . بوکی خصوصی
 سکه لردن بری ده ، اورخان بکک اوغلو سایمان بکک (ایپصالا) ده
 باصدیردینی آچقایدی که ، اولیاچلی بوسکه حتمنده شو معلوماتی
 ویریور :

« اورخان غازینک مخدومی اولوب روم ایانده ایپصالا نام
 محله ابتدا صلا ویردیرن جمعه نمازی قیلن سایمان پاشا غازی
 تبرکاً اوراده پدری اورخان غازی نامنه سکه ضرب ایتشد .
 حقیر بوسکه بی کوردمکه اوزرنده (ضرب ایپصالا سنه ۷۲۰)
 یازار » (جلد ۱ ، ص ۵۶۶)

بناءً علیه اورخان بکک سکه لری یالکیز (بروسه) ده باصیلماز ،
 مخالف شهر لرده ده باصیلیدی .

(۱) علی بک ، عثمانلی ایمپراطورلغناک ایلک سکه سی

بودورده امتعه آزدی. خصوصیه صیرمالی قوماش او قادار
چوق یاپیلمازدی. اثوابلری (طوگوزلی، دکزلی) نك
آق علمی بزلرندن دیکرلردی. بو قوماش یالکز دکزلیده
دوقونوردی؛ پاموقدن و صیرما ایشله مهلی ایدی که، امشالنه
نادراً تصادف اولونوردی. پاموغی غایت نفیسه دی، قوتلی
اگیریلشدی. بوسبدن چوق دایانیردی، واک زیاده (دکزلی
قوماشی) دییه آکیلیردی. کذا، (آلاشهر) ك قیزیل
افلادیسی ده مشهوردی. اثواب، خلعت، بایراق، هپ بو
قوماشدن یاپیلیردی.

(بیله جك) ك قوماش دستکاهلری مشهوردی. (بیله جك)
معمولاتی اك زیاده (اسکی شهر) ده ساتیایردی.
بودورده الك مهم مسئله، عسکرلکدی. اورخان بك، باباسنك
یرینه کچنجیه قادار، محاربه لره کیدن عسکر منتظم دکلدی.
بونلر آقینجیلردن عبارتدی. عثمان بك نه زمان سفره کیده جك
اولسه، بونلری صورت مخصوصه ده چاغیریردی. مملکت بویودکجه،
بو عسکرلری سریع بر صورتده طوپلامق ده زورلاشمشدی.
بونلر اك اکثریسی، زراعتله مشغول انسانلردی.

عاشق پاشا زاده دییورکه :

« اورخان غازی به علاءالدین پاشا ایدر. الحمدلله خانم که سنی
پادشاه کوردم. ایعدی سنك لشكرک یوماً فیوماً زیاده اولسه کر کدی.

ایمدی سنکله اشکرینه برنشان قویهلم، غیری لشکرده اولماسون دیدی. اورخان غازی ایدر. قرداش هر نه کم ایدرسن بن آنی قبول ایدرین دیدی. اول ایتدی: ایمدی اطرافده کی بکرك بورکی قیزلر، سنک آق اولسون. اورخان غازی امر ایتدی. بیله جکده بورك ایشلایلر. غازیلر و جیع توابعی آق بورك کیدیلر. آندن اورخان غازی اشکرینی زیاده ایتک دیلدیکم اول ولایتده اوله. قاردهشی ایدر. آنی غازیله دانش ویر، اول زمانده جندره لی قره جه خلیل بیله جکده قاضی اولمشدی. وهم اده بالینک قومی ایدی. آکا دخی دانشیلر. ایلدن یایا چیقسون دیدیلر. چوق کشیلر قاضییه رشوت ویردیلر، بی یایا یازدر دیو. وهم آنلر آق بورك کیرلردی» (ص ۴۰).

بورمه دلبندده اورخان بك زماننده ایحاد ایدلدی. بکله: «قانی بورمه دلبندک؟» دیرلردی.

فی الحقیقه اورخان بك هر ایشنی بویوک برادری علاءالدینی بکله مشاوره ایدرک یاپاردی. قاردهشنه صوک درجه حرمتی واردی. حتی بابایی عثمان بك وفات ایتدیکی زمان، میراشی آیرمق ایچین علاءالدین بك، بویوک بابایی اده بالینک قاردهشی اوغلو أخی حسن ودها بر چوق کیمسه لر موجوددی. او زمان علاءالدین بك، قاردهشی اورخان بکله شوسوزلری سویله مشدی: — کل قاردهش. آتامزك دعاسی وهمتی سنکله در. آنکچو.

نکم کندی زمانده عسکری سکا قوشمش ایدی. ایمدی چوبانلق دخی سنکدر. مجلسده بولونان عزیزلرده بونی قبول ایتشلردی. بو سببدن، اورخان بك بویوک برادرینه صوک درجه اتمادی

واردی . (تواریح آل عثمان) ك دیدیکی کبی « اول زمانده
قردهش قرده شه حرمت ایدردی ، و بر برین آغرلردی ، (ص ۱۴) ،
قاردهش لر بینه سلطنت حرصی حکم سورمزدی .

عثمانلی توركلار ایلک اوردولرینك تمنای بو صورتله قوردیلر . بو
یکی اوردونك ، حاجی بک تاشی ولی ایله هیچ مناسبتی یوقدی . حاجی
بک تاش ولی اوتاریخده (۷۲۷) دنیاده بیله دکلدی . مثلاً یکی چریلر ك
کیدکری آق بورك اساساً بیله جکده یاپیلمشدی . بو بورکی یکی چریلر
بک تاشیلردن دکل ، بک تاشیلر یکی چریلردن آلمشردی .
عاشق پاشا زاده دیورکه :

« آبدال موسی اورخان زماندن غزایه کلدی و یکی چرینك آرا-
سنده بیله یوردی و ر یکی چریدن بر اسکی بورك دیله دی ، یکی چری
اوسکوفینی چیقاردی ، بونك باشینه کیدیردی . آبدال موسی ولایتنه
کلدی ، اول بورك بیله باشنده ، صوردیلر کم « بو باشنده کی نه در ؟ »
اول ایتدی « بوکا الفی دیرلر » دیدی . والله بونلر ك تاجلرینك حقیقتی
بودر . داها صوکراده ، شوسطرلری علاوه ایدیور : « بئلكی وزنقی
طوبلق و ظبلق و شیطانی عادتلر بونلرده چوقدر . و بو خالق بیامزلر ،
آنی شیطانی بیدر ویا رحانی بیدر . هر کیمسه کم حاجی بک تاش آل عثماندن
کیمسه ایله مصاحبت ایتدی دیرسه یالاندر . شوبله بیله سز » (ص ۲۰۶)
بو مطالعه ، هیچ شه سز ، یکی چریلر آراسنده بک تاشیلک
حسنك فائق بولونماسندن ایلری کلیوردی . فقط بو وحشی تمیه
ایدنلر ، بابائیلر و آبداللردی ؛ بک تاشیلک ، اساساً بونلردن يك
چوق استعاره لرده بولونمشدی .

یکچیریلر ، علاءالدین بکک توصیه سی اوزرینه ، آق بورک
 کیمشلردی . بونک آلتنه ده ، اوکی قیسه و آرقاسی اوزون بر
 شبکلاه قویارلردی . بونلرک قسم اعظمی اوزون صاقالی بکیتلردی .
 « قاچان پادشاه برکشی یه خشم ایلسه صقالی کسوب اشکه بیندیر-
 ردی » . صاقال کسمک ، برنوع حقارتدی (عاشق پاشازاده ،
 ص ۴۰) . اهاالینک سرپوشی قیزیلدی .

یکی چری ، یکی عسکر دیمکدر . اورخان بک ، بوصورتله ،
 ایلمک دفعه اولمق اوزره ، موظف اوردونک اساسنی قورو یوردی .
 آوروپانک هیچ بر حکومتندموظف اوردو یوقدی . عثمانلی تورکلر
 عسکری تشکیلاتده بوتون دولترلر تقدیم ایتشلردی (۷۲۷) .
 اورخان بک اوردوی منتظم برشکه صوقایه مجبور دی . اوزمانه
 قادار حرب ایدنلر ، هپ تورکلردی . فتح ایدیلن یرلر اهاالیسی
 ایسه اکثریتله خریستیاندی . تورک نفوسنی حربله امحا ایتک ،
 خریستیان نفوسنک چوغالماسنه بادی اولاجقدی . بناءً علیه
 تورکلرک مساعیسنه اونلری ده تشریک لازمدی . اوردویه خریستیان
 اولارق آلیمالری ، انضباط نقطه نظرندن مضردی . کندیلرینه
 اعتماد ایدیله میه جکی کی ، اکثریا اهانترلر ده معروض قالمق تهلیکه سی
 واردی . بونک ایچین (دیوشیرمه قانونی) تأسیس ایدیلدی .
 یوقانون موجبجه : هر سنه خریستیان چوجوقلرندن اون بش
 ایله یکر می یاش آراسنده اولانلری سیچبله جک ، (بروسه)

سرایندە تربیە اولونا جقدی . کندیلرینه کونده بر آچقه وظیفه ولزومی قادارده تعینات ویریلە جکدی . (دیوشیرمه قانونی) وضع ایدلیدی سە بیک چوجوق آلیندی ، داها صوکارا کی سەلر بومقدار کیتەجکە آرتدیرلدی . مملکت بویودجکە بوعسکرلرکده مقداری آرتیوردی .

یکچیچری اوردوسندە رتبهلرک سلسلهسی آیری آیری آدلرله یاد ایدیلدی : چورباچی باشی ، ساقا باشی کی . اوردونک الک مقدس شیئی ، (قازان) دی . اوردو قازان اطرافندە طوپلانیردی . بوتون اوردو افرادی اوزر ، یوزر و بیکر کشیلک قطعەلرە آیرلمشدی . هر قطعەیه بر ضابط قوماندایدردی . یکچیچری اوردوسنە (اوجاق) ، قطعەلرینە (اورتە) ، قیشلەلرینەدە (اوطە) نامی ویریلیدی .

بودورده تورکلرک حرب بایراقلری قیرمزیدی . بوردنک داها عثمان بک زمانندە قبول ایدلمشدی . بایراقلری (آلاشهر) ک قیزیل آفلادیسندن یاپارلردی . حتی عثمان بکک مخلصاتی آراسندەدە بو قیزیل بایراقلر چیقمشدی .

دولتک حکمدارلق نشانەسی اولمق اوزرە برده بایراغی واردی که بو ، ساجوقی حکمداری طرفندن عثمان بکە ویریلن (۶۸۸) آق سانجاقدی .

حرب بایراغنک اورتاسندە بیضی ویشیل رنکده بر کوبک ،

اورتاسنده ده آغزلی صاغه دوغرو وین یانه اوچ هلال واردی .
 بو هلالار ، احتمالکه ، عثمان بکک رؤیاسنده کوردیکی هلالک
 خاطره سنی تأیید ایچین قونولمشدی . یشیل رنگ ایسه ، طبیعی ،
 تورکلرجه مقدس بررنکدی .

بوتون اراضی ایکی صنفه آیرلمشدی : تیمار ، خاص . درت
 یوزقریه لی برکویک یوزویا ایکی یوز کوی ایکیشر اوچر کویدن
 مرکب اولق اوزره الی آلتش (تیمار) تقسیم اولونور ، قصورینه
 (خاص) نامی ویریلردی . حاصلربکک اوغوللاری ایله ایلری کلن
 امراه آیریلیر ، قصوری دولت خزینه سنه قالیردی .

تیمار و حاصلر ، کویلولرک تارلالرندن عبارتدی . تارلا
 صاحبلی بورالری اکرلر ، بیچرلر ، حاصلاتنک شرعی عشری
 ایله فراغ وانتقال خرجلرینی تیمار و خاص صاحبارینه ویرلردی .
 بوکی تیمار و خاص اربانه (صاحب ارض) دیرلردی . اکثریا
 صاحب ارضاق حقوقی اورالری فتح ایدنلره ویریلردی .
 اونلرده بورالرک حاصلاتی خیراته تخصیص ایدرلردی .

تیمار صاحبلی تیمارلنده اوطورورلر ، بورالرک اکیلوب
 بیچلمه سنه ، کلیرینک آرتماسنه چالیشیرلر ، سفر وقوعنده تیمارلری
 داخلنده کی افرادی آتی و سلاحیله حاضر لایارق سفره اشتراک
 ایدرلردی .

اورخان بک زماننده ملکی تشکیلاتده یوانه قونولمشدی .

کندی اوغولاریله آخچه قوجه، قو کور آلپ کبی بکلر برسنجاقدە
میرلوالق ایدرلردی . هرسنجاقدە برمیرلوا ، هر قصادە بر قاضی
بولونوردی .

وزارت رتبه سنی حائر اولانلره پاشا دنیلدیکی تاریخلرده مقیددر .
خال بو کداورخان بکک قارده شی علاءالدین بکک اوغلو سلیمان بکک،
بوتون وقفیه لرده بک دییه ذکر اولونمشدر . بونلره پاشا تعبیرینک
بالا آخره مؤرخلر طرفندن ویرلدیکی آکلاشیلیور . علاءالدین بکک
۷۳۳ تاریخلی وقفیه سندە (علاءالدین بیک) دییه مسطور اولدوغی
کبی، سلیمان بکک وقفیه سندەده نامی : «سید الغزاة والجاهدین
معین الاسلام والمسلمین سلیمان بن اورخان خلدلله ملکک» طرزنده
ذکر ایدلمکدهدر .

بودورده دولتک ثروتی کیتدکجه آرتمشدی؛ بوکلده سبب،
اراضینک کوندن کونه بویومه سیدی . خصوصیه واردات چوق،
مصارفات آزدی . دولتک وارداتی جزیه، خریستیان دولتلردن
آلان ویرکیلر، حاصلرک عشری، کومروک و مملحه حاصلاتی
وجوده کتیریردی . بونکله هم عسکرک علوفه سی ویریلیر ،
هم ده جامع و مدرسه کبی مؤسسeler بنا ایدیلیردی . تورکلرک
(ایزمید) فتحندن ترا کیاده یرلشنجیه قادار کچیردکلری زمان (۷۳۸:
۷۵۸) هپ شهرلر اعمارینه، زراعت و تجارتک ترقیسنه، عسکرک
تشکیلاته حصر ایدلمشدی . بوتون بوفعالیتلرک مرکز لرینی ده :

(بيله جك) ، (يکشهر) ، (ايزنيق) و (ايزميد) بلده لری
تشكيل ايدردی .

خصوصيله (ايزنيق) بويوك براهيتي حائزدي . (ايزنيق)
اورخان بكك بك خوشنه كيدردی . باغچه لری طاتلی واكشي
نار آغاچلريله دولو ایدی . ابن بطوطه نك روايته كوره جويز
وكستانه آغاچلرينك لطافتي ، باغلر نده يتيشن (عذارى اوزومى)
بك مشهوردی . باغچه لر نده بولونماق ميوه يوقدی . كولنك
منظره سي جاذبدي . ساحلار ينك (نيلوفر) لرله دولو دورغون
صولر نده يوكسه ان سازلر ، باغلر ، باغچه لر و بوستانلر شهره
باشقه بر كوزلك ويريوردی . قلعه سي درت ديوارله چوريلیدی .
هر ايكي ديوار آراسنده صوايله دولو بر خندك ، شهرك
طيشنده اصما كوپرولر واردی . كوپريلر ، ايسته نيلديكي زمان
قالدير يلا بيليردی . شهرك ايچنده بيله باغ و بوستان واردی .
بلديه ، كوپرى يه مشابه اولان و يالكز بر سوارى كچه جك
وسعتده بولنان بر طريقدن ماعدا . مدخل يوقدی . بوده ،
(ايزنيق) مدافعه سنى قولايلاشدير مق ايچيندى . شهرك روملردن
قالما خرابه سي الان دور يوردی .

اورخان بك ، زوجه سيله برابر (ايزنيق) ده اوطورردی .
بوراسى ، بيزانسه داها ياقين ، بيزانسه قارشى حركتلى اداره يه
داها مساعددی .

اورخان بکک زماننده (۷۳۲) ایزنیق زیارت ایدن ابن بطوطه (ص ۳۴۱ ، ۳۴۳) دیورکه : « اورخان بک ترکان ملوکنک اعظمی و کثرت اموال و بلاد و عساکرجه جمله سنک اکبریدر . یوزه قریب قلاعی وارددر . اکثر اوقاتی دور و طواف حصون ایله اصرار ایدهرک هر قلعه ده ، اصلاح و تفتیش مقصدیله ، بر مدت اقامت ایدر . بر بلده تام بر آی ساکن اولمدینی سرویدر . بو بلده ده فقیه امام حاج عیاض علاءالدین سلطان یوکی بزی مهمان ایلدی . مومی الیه فضلا و کرماندن اولوب نه زمان زیارتنه کیتسم ، مطلقاً طعام احضار ایدر ایدی . صورتی و سیرتی دایم کوزل ایدی . بنمله برابر سالف البیان بیلون خاتونک اقامتگاهنه کیتدی ، مشارالیه اکرام و ضیافت ایلدی . بزم دخولزدن بر قاچ کون صوکر ، آنفاً ذکر اولنان اورخان بک بو بلده یه مواصلت ایتدی . »

ابن بطوطه نك بحث ایتدیکی بیلون خاتون ، یا نیلوفر خاتون ویا آسپورچه خاتوندی .

اورخان بک (ایزنیق) ی اعمار ایتشدی . بونکله برابر بوتون بلده لرك اَك معمور واک شیرینی ، (بشیل بروسه) ایدی . صوك زمانلرده اورخان بک اختیارلامشدی . سفرلره دائماً اوغلو سایمان بک کیدیور ، اوردویه اوسردارلق ایدیوردی .

یاشی سکسانه یا قلاشمشدی (۷۵۹) . عمرینک صوك کونلرنده اورخان بکک ایشیتدیکی ، هپ متوالی ظفر خبرلیدی . بیزانس آرتق کاملاً تورک قوتنه و سیاستنه رام اولمشدی . اوغوللاری سایمان و مراد بکلر معیتنده کی اوردولر ، تراکیاده ظفر دن ظفره قوشیورلردی .

عثمان اوغوللارينك حدودى (ساقاريا) دن (طونجه) قىلرينه
 قادار ايلريله مشدى. عثمانلى توركلار غلبه ايدم بيله جك، قوم مشو-
 لرى آراسنده، هيچ بر قوت يوقدى. حياتنك بو اك مسعود
 زمانده ايدى كه، اورخان بك بويوك بر ماتم حوادثى آلدى :
 سايمان بك، تراكياده، آلدىغى يرلى كزر كن، آتندن دوشمش،
 وفات ايتمشدى (۷۵۹) .

بوفلاكت اورخان بكى صارسدى . « چوق كدر قىلوب
 خىلى ملول اولدى . اول خبردن اورخان بك دىخى خسته اولدى »
 (لطفى پاشا ص ۲۵) ، بر مدت ألم واضطراب ايچنده ياشادى .
 اوغوللرينه صوك درجه دوشكوندى. خليل بكى قورتارمق ايچين
 نه قادار اوغراشمش، بر قاچ سنه حضورىنى و راحتنى فدا
 ايله مشدى ! شمدى بو آجى، روحنك اك حساس نقطه سنى
 زده لهدى .

نهايت اورخان بكى، اولاد آجيسى اولدوردى (۷۶۱) .
 تاج التواريخ (جلد ۱، ص ۶۴) اورخان بكك اوغلو مراد
 بكه اوزون بروصيته بولوندوغنى بيان ايدر. اك اسكى تاريخلرده
 ايسه بويولده بويولده بر قيد يوقدر .

اورخان بك باباسنك بيزانسه قارشى تعقيب ايله ديكى سياستى
 عمرى اولدجه ترك ايتمهدى . كنيج آندرونىقوسى كنديسنه
 دشمن بيليردى ؛ بو سببدن بوتون سياستنى بيزانسى ضعيف

دوشورمهیه ، اونك آناطولوده الك مهم استنادلرینی تشکیل ایدن
بلدهلرینی آلمایه حصر ایتدی .

آندرونیقوس ده ، اورخان بكك بوغایه لرینی آكلادیغی ایچین
رقیبلرینی علینه تحريك ایتیه یی ، اونلرله برلشمه یی یكانه سیاست
اتخاذ ایتدی . عثمانلی توركلرك آناطولوده الك مهم رقیبلری ،
قارامان اوغوللریله آیدین و صاروخان اوغوللریدی . كنج
آندرونیقوسك قارامان اوغوللریله مناسبت پیدا ایتمه سنه جغرافی
وضعیت مانعدی ؛ فقط آیدین و صاروخان اوغوللریله دكزدن
هر زمان مناسبت پیدا ایده بیلیردی . نته کیم او یله یایدی :
اورخان بك (ایزنیک) ی صقیشدیردیغی زمانلر (۷۳۰) ،
هرایکیسنی ده اورخان بك علینه تحريك ایتمكدن خالی قالمادی .
لوبو (كتاب ۱۰۹ ، ص ۴۱۱) دیوركه :

«آندرونیقوس كرك شرقده کی مالكانه سنك احوالی تدقیق ایتك
و كرك اورخان بكك سطوته قیصقانیچ نظرلرله بافدقلىچون كندیسیله
اتفاق ایتیه حاضر بولونان تورك بكاریله اتفاق ایله مك ایچون ساقزدن
شرق ممالكنه كچدی . اورخان بكدن اندیشه ای ان بكار آراسنده ،
(ایونی) یی اداره ایدن صاروخان بك واردی . صاروخان بك
ایمپراطورله بولوشدی . کویا كندی حکمداری ایش کی اوکا حرمت
ایتدی . ایکیسی برمعاهده عقد ایده رك اورخان بكك تشبثلرینه قارشى
كندیلرینی متقابلاً مدافعه ایتیه یی تعهد ایتدیله . (قاریا) بکی آیدین بك
اوصیراده خسته اولدیغی ایچون ایمپراطوری بالذات كورمهیه كلمه دی .
فقط قیمتدار هدیه لر كوندره رك اتفاقنی قبول ایتدی . آندرونیقوس ،

آیدین بکک ایلیچیلرینی نازکانه قبول ایتدی . بکارینک تکلیفی قبوله
درحال مسارعت کوستردی . »

بونکله برابر، نه بیزانس ایمپراطوری، نه ده آیدین و صاروخان
اوغوللاری عثمانلی تورکلرک منتظم برآوردویه، مکمل تشکیلاته،
فداکار و عزیملی غازیلرک فعالیت و ذکالرینه استناد ایدن قوتی
بر دورلو یکمهیه موفق اولامامشیلردر . اورخان بک اصوله
موافق صورتده سیاستنی تعقیب ایتش ، و دائماً موفق اولمشدر .
روم مؤرخنی خالقوندیلیس دیورکه :

« غایت نازک و بالخاصه غازیلره، صنعتکارلره و فقیرلره قارشنی غایت
جوهرددی . او درجه ده که ، هیچ کیمسه دن صدقه اسیرکه مزدی
دیرلر . دیندار ، عدالته مجلوب ، مجاهدلرینه حرمتکاردی . بونلره
أولر یاپدیرر، اعاشه لرینی تأمین ایدردی . بروسه ده بر مکتب یاپدیردی،
بوتون کنجلی بوراده یتیشدیردی . عالمیره رغبت ایدردی . فکری
غایت اینجه ، بالخاصه حربه دائر ایشلرده ایجاد فکرینه ده مالکدی .
خریستیانلره کندیسنی سودیرمک ایچون اونلره قارشنی دائماً خیرخواه،
جوهرد و نازک دائر انیر، مقصدینه ده دائماً نائل اولوردی » (جلد ۱، ص ۹).
اورخان بک ، (یشیل بروسه) ده، وقتیه باباسی عثمان بکک
کندیسنه ظفر غایه سی اولارق کوستردیکی (کوموشلی کبند) ک
یانی باشنه کومولدی .

۴ . بروسه دن گوزله حصاره

اورخان بكك وفاتی توركلرك بيزانسه قارشى تعقيب ايتدكلرى سياستى اصلا دكيشديرمه دی . توركلر آناطولوده قوتلندجكه ، روم بيزانسه ده كوندن كونه ضعفه دوچار اوليوردی . ايمپراطور يوانيس پاله اولوغوس ، حالا صاغدى . ايمپراطورك يكي پادشاه ، مراد بكه قارشى اتخاذايده چكى سياست ده آشكاردی : توركلرك حمايه سى بيزانسى آنجق ياقين دشمنلرينه ، اوده ونديكليلرله جنويزلره قارشى قورويا بيليردى ؛ بونكه برابر بيزانسى تورك تفوذى آلتنده انقراضه محكوم اولمقدن قورتارامازدی .

مراد بك ده ، باباسى كبي ، دوراندیش ومدبردى . اونكه بويوك قارده شى سايمان بك آراسنده طبعه چوق فرق واردی : سايمان بكك مزاجنده شدت وجواليت موجوددی . مراد بك ايسه ، غايت حلیم ، سويملی و نازكدى ؛ تواضعى ، اعتدالى ، مغلوبلره بيله مرحمتى غالبدى .

مراد بكك درت شهزاده سى واردی : بايزيد بك ، ساوجى

بك ، يعقوب بك ، ابراهيم بك . برده قیزی دنيایه ككشدی :
نقیسه خاتون .

مراد بك ده ، اورخان بك كبی ، دینداردی . علمایه
ودرویشلره حرمت ایدردی . « آتاسی كبی اول دخی عمارتلیر
یاپدی و زیاده محبت ایتدیكى درویشلره زاویه لر یاپیوردی .
وهر شهرده كم اولوردی جمعه كونی ، جمعه دن صوكره فقرایه
آچیلر صدقه ایدردی » (۱).

مراد بكك مزیتنی بیزانس مؤرخلری ده تصدیق ایدیورلر:

« قارده شی طرفندن ضبط ایدیلن روم بلده لرینك سككنه سی ، اونك
عالیجنابانه عزمنك تأثیرینی بك چاقق حس ایتدیله . مراد بك ، اهالییه
سایمان بكك یاپدیغی صبقی بی اوقادار كبوشلندیكه ، هپسی ده بیزانس
حكمدارلرینی اوزله مكدن واز كچدیله . مراد بك حادثات تأثیریه كندی
اطاعتنه كیرن روملك حرمت و محبتندن باشقه ، یو آنیس زله اولوغوسك ده ،
بوتون بیزانس سراینك ده حرمت و محبتنی جلبه موفق اولدی » (۲)

مراد بك ، سلطنتنك ایلک سنه لرنده بیزانسه قارشى دائما
امنیت ویریحی برسیاست تعقیب ایتدی . فتوحاتنه آناطولوده دوام
ایتمه یی موافق كوردی ؛ آلدیغی كمهم شهر ، (آنقره) ایدی .
(آنقره) ده آخیلك نفوذى هر شیئه غالبیدی ؛ فقط بو نفوذ
حكومت شككنده دكلدی . ابن بطوطه دیوركه : « بر محمد

(۱) عاشق پاشا زاده ، ص ۱۹۶

(۲) لوبو ، كتاب ۱۱ ، ص ۴۰۵

سلطان بولونمادیفی تقدیرده حاکی اخی اولوب آیندکانه آت
ولباس اعطا و قدرینه کوره احسان ایدر . امر و نهی ورکوبی
عینیه ملوکهمشابه « در (ابن بطوطه، ص ۳۲۶) . (آنقره) ده
آخیلرک نفوذی بورادهده ایدی . آخیلر (آنقره) یی اعمار
ایتمشیلردی . (آخی شرفالدین جامی) مشهوردی . مراد بک
(آنقره) نی صلاحاً آلدی . اساساً آخیلرله محاربه ایتمه سنه لزوم
یوقدی ، جدی آراسندهده آخیلر واردی . (آنقره) نك ائده
بولونماسی لازمدی . آناطولوده کی بکلردن بعضیلری مراد
بکک اداره سنده کی اولکه لره تجاوز ایدیورلردی . بونلرک تأذیب لریله
برابر (آنقره) نك ده آناطولوده کی رقیب لره قارشی مستحکم
بر موقع اولارق محافظه ایدلمه سنه لزوم حاصل اولمشدی (۷۶۲) .
مراد بکک ، باباسی یرینه کچد کدن صو کرا ، ایلک موفقیتی
بو اولدی . فقط اونک ده بوتون سیاستی بیزانسه قارشیدی . بر سنه
صو کرا ، بوسیاستنک ایلک علامت لری کورولدی . اساساً بیزانس
ساحل لری آناطولونک دیگر تورک بکلری طرفندن ده ازعاج
ایدیلیورلردی . بونلره قارشی حرکت ایدن ، یالکیز و ندیکلی بر
قاپوداندی . یو آنیس پاله اولوغوس ، مراد بکک سیاستنده حاصل اولان
دکیشمه یی آکلامشدی . (دیمتوقه) و (فره جک) تورکلر الینه
کچمشدی . تورکلر (تراکیا) ده کیتدکجه ایلریلیورلردی .
(ادرنه) اساساً شهزاده سلیمان بک طرفندن آلمشدی . مراد

بك ، (بروسه) ده او طور مقدنسه ، (ادرنه) ده او طور مایي موافق کوردی . چونکه فتوحاتك قسم اعظمی آوروپاده، روم ایلنده اولاجقدی . بناءً علیه بو صورتله (ههله سپون) ی بوغازینی متمادیا کلوب کچمه لره ده لزوم قالمایه جقدی . مراد بك (بروسه) یی اعمار ایتمشدی . مثلاً: بروسه ده ، قاپلیجه لرده بر بویوك جامع ، اسکی قاپلیجه نی، عمارت، خان ، مسجد، مدرسه ، (كوك دره) محله سنده بر مسجد انشا ایتدیرمشدی . شیمدی، عین اعماراتی ادرنه ده ده یایمق ایسته یوردی . بوكا ایلک اول سرای انشاسیله باشلادی . سرای بر سنه ده ختامه ایردی (۱۶۹) . داها صو کرا معیتی ارکانی ده کندیلرینه اولر و سرایلر انشا ایتدیردیلر .

توركلرك (ادرنه) یه یرلشمه لری یو آنیس پاله اولوغوسی اندیشه یه دوشوردی . یو آنیس ، واقعا تورك تهلكه سنه قارشی وندیکلیرله اتفاق ایتمشدی؛ فقط توركلرك حاضر لقلری وندیکلیرك ده هیچ برشی یاپامیه جقلری درجه ده اساسلیدی . یو آنیس بو تهلكه لره قارشی قویمق ایچین صربلرله اتفاق ایتیه یی دوشوندی . صرب قرالنه بر هیئت کوندردی ؛ هیئتک رئیس استانبول پاتریقیدی . هیئت، قرالیچه ألیزابت طرفندن حسن صورتله قبول ایدلای . صربلر اتفاقه راضی اولدیلر . فقط مدهش برخسته لق هیئت اعضاسنی کاملاً افنا ایتدی .

یو آنیس ، بو اتفاق اوزرینه ، بولغارلره بر صدمه وورمق

ایستەدی ؛ فقط اونك اك زياده قورقدوغى ، توركلردى .
 توركلرك اوردولرىنى تنسيق ايتمەسى ، بیزانس سرايى دەشت اچىندە
 براقىوردى . خصوصيله اوردونك باشندە اك دكرلى غازيلر واردى .
 بر چوقلرى اورخان بك زمانندە يتشمشـلردى : چاندارلى ،
 اورەنوس ، لالا شاهين ، حاجى ايل بكي ، قوتلو بك ، اينە بك ،
 اينجه بك ، طوغجه بالابان ، قرە دمير طاش ، الياس بك ،
 مستجاب صو باشى ، صاروجه پاشا ، احمد چاوش ، قرەمقبيل ،
 پاشا يكيك ، بازارلو طوغان ، فيروز بك ، قوتلو بوغا ، احمد بك ،
 دولتى دە ، اوردويى دە ذكاليه اداره ايدن سيمالردى . بونلردن ،
 چاندارلى قرە خليل افندى اول قاضىعسكر (۷۶۳) ، بعدە
 وزير اولمش ، (خيرالدين) نامنى آلمشدى (۷۶۵) . لالا شاهين
 پاشا ، سر عسكر دى . قارامانلى قرە رستم فضل و كاليه تميز
 ايدىوردى . غنائمدن (خمس) آلماي قبول ايتدين ، او ايدى .
 « هر اسيره يوز بش عثمانى ها تقدير وهر برى ايجون خمس
 اولق اوزره يكرمى بشر عثمانى اخذ » اولونا جقدى (صحائف
 الاخبار ، ۳ ، ص ۲۹۳) . بوتون بوتشكيلات ، بیزانس سرايى
 حقيقى بر اندیشه يه دوشوره جك ماهيته ايدى .
 عثمانلى توركلر روم ايلندە صربلر و بولغارلردن يرلر آلمق
 ايستەديلر ، آناطولوده كى بكلرك عصيانلرىنى دويار دويماز او طرفه
 قوشديلر . فقط مراد بك ، آناطولويه كچمزدن اول ، يوآنيس

پاله اولوغوسله گوروشیدی . غیوبتی ائناسنده ، آلدینی یرلره
دوقونماسنی توصیه ایتدی . مراد بکک آناطولو سفری چوق
سورمه دی ، آزمانده هپسینی ده اطاعتی آلتنه آلمایه موفق اولدی .
بوسفرده اودرجه مدبرانه طاوراندی که ، بکک برداها عصیان
ایتمه لری احتمالی ده سلب ایتدی . مقصدی ، بیزانسیک (تراکیا) ده
قالان یرلرینی ده فتح ایتمکدی ؛ بوفتوحات ائناسنده آناطولوده
چیقاجق بر عصیانک ویا اوفاق بر تجاوزک ، اک اساسلی تشبثلرینی
عقیم بر اقدیرماسنی ایسته مزدی .

مراد بک بوموفیت اوزرینه ، تکرار (ادرنه) یه ، یکی
پایتخته کلدی . معیتنده ، مظفر بر اوردو واردی . بو اوردو ،
حربدن باشقه بر شیئه تشنه دکلدی . مقداری آلتش بیک
قاداردی . بوتون اوردوی آناطولودن (تراکیا) یه کچیرمک بر
مسئله ایدی . تورکلرک کیلری واردی ؛ فقط بوقادار بر قوتی
آز زمانده تراکیا یه کچیره بیله جک مقدارده دکلدی . مراد بک
بونک ده چاره سنی بولدی : جنویزلره آلتش بیک آلتون ویردی ،
کندیسنه لزومی قادار کمی تدارک ایتدی . بو فعالیتنده بویوک
بر استعجال کوستریوردی . تورک پایتختنک (ادرنه) یه ،
(تراکیا) یه نقلی یالکیز بیزانس ایچین دکل ، بالقان حکومتلری
وحتی خریستیان عالی ایچین ده بر مسئله اولمشدی . آله رصوره لاک
دیدیکی دوغرو ایدی : « نه زمان که تورک آوروپا یه کچدی ،

شرق مسئله سی ده باشلادی .

صربلر ، بولغارلر ، اولاخلر ، ماجارلرله برلشمشدر ،
(فلبه) و (ادرنه) اوزرینه یورویه جکلردی . (فلبه) تورکلرک
ألنده ایدی . مراد بك اورایي تحکیم ایتشدی . بوراسی ، بولغارلر
ایچین نه درجه مهمسه ، تورکلر ایچین ده اودرجه اهمیتلیدی .
تورکلر تراکیایه کچر کچمز متفقاره قارشی یورودیملر .
دوستانی او درجه بر سرعتله مغلوب ایتدیملر که ، فلاکت
خبری پایا بشنجی اوربهنی ده متأثر ایتدی . اصل غریبی ،
یوآنيس پاله اولوغوسك ، مراد بکه سوز ویردیکی حطده ،
تورکلرک مشغولیتندن بالاستفاده تورکلر ألنده بولونان ساحلمره
تجاوز ایتمه سیدی . مع مافیه بو تجاوزی ده مغلوبیتله نتیجه لندی .
تورکلرک بیزانس کیملرندن آلدقلى اسیرلر آراسنده برچوق
مهندس و صنعتکار موجوددی . هپسنى (ادرنه) یه یوللادیملر .
ایچلرنده مشهور برده معمار واردی . مراد بك معماری
سربست براقدی . بروسه ده ، ادرنه ده ، یاپدیردیغی بنالره نظارت
وظیفه سنى اوکا تودیع ایتدی .

عثمانلی تورکلر (پهلونونه زوس ، موره) ده ده برچوق بلده لر
آلمشلردی . پاپایی اصل تلاشه دوشورن ، بونقطه ایدی . تورک
سطوتی یالکیز روملق عالنده دکل ، لائین عاداتنک حکم
سوردیکی بلده لرده ده نفوذینی کوسترییوردی . پاپا اوربهن ، تورک

تهلكه سنی قالدیرمق ایچین، بوتون خریستیان دولتر آراسنده بر
 اتفاق تأمیننی دوشوندی. خریستیان دولتر ك كافه سنی اهل صلیب
 تشکیلنه دعوت ایتدی؛ بو دولتر آراسنده بیزانس یوقدی.
 یو آنیس پاله اولوغوسی بویوك بر تلاش آلدی. پاپیه بر هیئت
 کوندردی. پاپا، یو آنیس پاله اولوغوسه التفاتکارانه مکتوبلر
 یازدی، ایمپراطورده اهل صلیب اوردوسنه یاردیم ایچین هر
 دورلو فداکارلغی اختیار ایده جکینی بیلدیردی. وندیکیلر
 کندیسندن (ته نه دوس) آطه سنی ایسته یورلردی. ایمپراطور
 بوکاراضی اولمادی. او، بوتون خلاصنی پایادن و پاپانك
 آياقلاندير اجنی قوتلردن بکلیوردی. فقط بو قوتلر هنوز
 طوپلانما مشدی: مثلاً قبریس قرالی، مصر سلطاننه قارشی
 پایدیغی سفرده مغلوب اولمشدی. بومغلوبیت مراد بکی بوسبوتون
 ممنون ایتدی. مراد بك، مصر سلطانلریله صمیمی رابطه لر
 تأسیسنه چالیشیردی. مصر تورکلری، پاپانك تشویقیله اسلامیتی
 قهر ایتك ایسته یین اهل صلیب اوردولرینه قارشی مظفریت
 قازاندقجه، عثمانلی تورکلرده بیزانسی کوندن کونه کوچولتمه یه،
 اساساً روم ایلنده پارچه پارچه یاشامایه چالیشان قسملرینی سورکلی
 بر احتضاردن قورتارمایه اوغراشیورلردی.

یو آنیس پاله اولوغوس، بونی بیلدبکی ایچین، لاندیلره قلیماً
 دوشمان اولدوغی حالده، ینه اونلرک موفقیتسز لکلرندن دلخون

اولويوردى. اونك نظرندە، روملىرى تورك تهاجدن قورتاراجق
يكانە قوت، غەربدە ايدى : غربك خريستيانلق تعصبى، اك منور
زمانلردە بىلە، ظالمانە ايدى. اسلاميت، اهل كتابى وقايە
ايدردى؛ اونلرك نظرندە ايسە، اسلامە قارشى حقك، عدالتك،
قانونك، شفقتك، مروتك، هيچ حكىمى يوقدى. تورك،
بو قهارانە مهاجماتە قارشى سىنە سنى آچان، قىليجنك قوتيلە
هر شىئى قهر ايدەن يكانە قوت اولدى. ھەدفنى هيچ بر زمان
غائب ايتمەدى. بيزانس، اونك قىزل الماسيدى. فقط بو، صوك
بر ظفر غايەسى دكلى؛ ياشامق ومظفر اولق ايچين بر استناد
نقطە سیدی.

يو آنيس پالە اولوغوس، بونى بىلدىكى ايچين، ھەرفرستە
توركلرى ازمەيە چاليشىردى. فقط بوكانە قدرتى، نەدە قوتى
مساعددى. بوسىبدن، لاتىنلرى دوشمان بىلدىكى ھالە،
اونلرك ياردىمنى توركلرك ھەردورلو اتفاقلرىنە ترجىيح ايدردى.
ھال بوکە يو آنيس، مراد بلك اقرباسيدى. غازى خونكارك
اوکی تيزەسى، يو آنيسك زوجە سیدی. فقط نە اورخان بك،
نەدە مراد بك، توركلكلک حيات وبقاسنى تأمين خصوصندە ھىيائە
قاپىلما دىلر. اساساً بيزانس ايمپراطورلىرىلە اولان ھەرىتلرى دە
سیاسیدى. بو ھەرىت، سیاستلىرىنە مغاير و توركلكلک دە سعادتنە
منافى اولدوغى دىققەدن اعتباراً، نظرلرندە لاشى حکمندە ايدى.

مراد بك ، باباسنك سياستنه صادقدى . بيزانس بهمه حال
تورك ائينه كچه جكدى . تورك اوردولرى (زغره) ، (يانبولى) ،
(احتمان) اوكلرنده ايدى . يوآنيس ، بو ظفرلر قارشيسنده ، پاپا
بشنجى اوربهنه بوتون موجوديتيله دخالت ايدىوردى . فقط
پاپاده مشكل وضعيتده ايدى . برطرفدن يوآنيس ، ديكر طرفدن
قبريس قرالى ، اوني اسلام حكمدارلره قارشى اهل صليب
سفرى اعلان ائتمهسى ايچين صيقيشدير يورلردى . يوآنيس مراد
بكدن ، قبريس قرالى ده مصر سلطانندن ضربه يدكجه ، يكانه
خلاص و سلامت چاره سنى پاپاده كور يورلردى . مع مافيه پاپاده
عاجزدى . حتى قبريس قرالنه مصر سلطانيله اويوشماسنى توصيه
ايتمشدى . يالكنز ياپاييله چكى برشى وارسه ، اوده ونديكلىلره
جنويزلىلر ك اسلاملره جبخانه تدارك ايتلرينه مانع اولاييلمكدى .
فى الحقيقه پاپابوكا مانع اولدى ؛ حتى آراغونلىلر ك اسلاملره تجارى
معامله لرده بولونمالرينى ده منع ايتدى . يوآنيسه خبر كوندردى .
روما كليساسنه تابع اولمادجه ، كنديسنه يازديم ايدهميه چكىنى
آكلاتدى . پاپا ، بيزانسى ضعيف كوردكجه ، دائما اونكله كندى مغوى
قوتنى آرتدیرمايه چاليشيردى . بونكله برابر روملر ك ده تعقيب
ايتدكلرى سياست بوايدى . اونلرده ، نه زمان عاجز بر موقعه ده
قاليرلر سه ، لاتينلر ك يارديملرينى الده ايتك ايچين ، غرب كليساسنه
التحاق ايدم چكلرينى وعد ايدرلردى .

توركلره قارشى پاپانك حاضرا لادىنى صليب سفرندن الان
اثر يوقدى . پاپا بوتون موجوديتيله چالشمىدى . واعظلم
طرف طرف طاغيلمىلردى . عفو لربرنى ولى ايتمىدى .
بونىكله برابر ، صدقه نامنه برشى كورولمىوردى . سن پيهره
خزينه سنده كى پارا ، غايت اهميتىزدى .

پاپا ، بوپارايى اوروپايى خراب ايدن (بويوك بولوكلر) عليمده
قوللامق ايستىدى . پاپانك بوحر كتى بويوك بر اعتراضى موجب
اولدى ، اعتراض ايدنلر ك باشنده شاعر (په تراق) واردى .
دلبر (لورا) نك حسنى حزين مصرعلرله ترنم ايدن بويوك شاعر ،
پاپانك عليمده ايدى . او ، روملره يارديمى لزومسىز كورمىوردى .
روملر ك بوتون موجوديتلريله لاتين دشمنى اولدقلىنى بيلمىوردى .
فقط روملرى ، توركلردن ده زياده لاتين دينك دشمنى عد
ايدىوردى . په تراقك فكري ، روملرى يا اطاعت آلتنه
آلق ، يا خود زورله لاتين كليسانه تابع قيلمىدى . اساساً
او دورك سياسى آداملردن بر چوغى بو فكرده ايدى :

« بواشاده اومولماز بر حادته روملر ك جسارتنى آرتدىردى ،
و اونلره پاك طاتلى اميدلر وىردى . صاووا قونتى آمهده توركلردن
كليبولي آلمانك يولنى بولمش ، اورايى آنا طرفندن كنديسنه خصم
اولان يوانيس پاله اولوغوسه وىرمىدى . بوشهرى آله بولوندورمق
توركلر ايچين پاك مهمدى ؛ چونكه آنا طولودن (تراكيا) به كچمه لىنى
قولايلاشديرىوردى . بوندن باشقا ، ليمانى ده مكملىدى . توركلر بوليانى

الڊن چيقارمقله بويوك بر ثروت ده غائب ايتمش اوليورلردى . كاييولى
عادتاً بر آنباردى ، توركلر اورايه خريستيانلردن آلدقلى غنيمتلى
يغيورلردى » (۱) .

ماجار قرالى لوئى ده بولغارستاندن بر چوق برلر آلمشدى .
بو ظرفر ، اونى توركلرك بولغارلردن وروملردن آلدقلى برلره
ياقلاشديرمشدى . توركلرى بويىرلك حدودندن اوزاقلاشديرمق ،
اونك ده منفعتى اقتضاسندى .

پاپا ، درحال بو فرصتدن استفاده ايتدى . ماجار قرالنه توركلره
حرب اعلان ايتمه سنى توصيه ايله دى . حتى تشكىل ايدن اهل صليب
اوردوسنك قوماندانلغى ده اوكا وىردى . ماجار قرالى بو تكيلى
ممنونيتله قبول ايتدى ؛ فقط بيزانس ايمپراطوريله تبعه سى روما
كليسا سنه تابع اولمادقجه ، روملر ايچين اسلاملره قارشى حرب
ايدمه يه جكنى آكلاتدى .

يو آنيس پاله اولوغوس بو حوادثى ايشيدير ايشيتمز ،
ياننه نديملرندن بر قاچ كيشى آلدى ، (بيزانس) دن قالقدى ،
بيك درلو مشكلات ايله (بودين) شهرينه كلدى . بر دقيقه
فوت ايتمه دى ، قرالله كوروشدى ، بوتون عائله سى و تبعه سيلاه
لاتين كليسا سنه تابع اولاجغنى آكلاتدى . يو آنيس پاله اولوغوسك
ملاحظه مى شو ايدى : شايد توركلر روملره غلبه چالاجق

و بیزانس ایمپراطورلغنی دهویره جک اولورلرسه، اولاً بوسنه ایله صربستانه، دهها صوکراده ماجارستانه یوروپه جکاردی. یو آنیس بومطالعہ بی ماجار قرالی (لایوش) لوئی یه ده آکلاتدی. لوئی حق ویردی. پاپا به خبر کوندردی. یو آنیسک وعدلرینی، کندینک قرارلرینی ایضاح ایتدی.

پاپا، (آوینیون) دن قالقدی، (رومایه) کلدی. اوصیراده یو آنیسک کوندردیکی ایاجیلر پاپا ایله مذاکراتده بولونیورلردی. پاپا بونلرک سوزلرینه کاملاً ایناندی. ایمپراطوره، ایمپراطور یچہ الہنی یه صمیمی مکتوبلریازدی. بیزانس واسکندریه پاطریقلرینه خبر کوندردی. پاپا ممنوندی؛ روملری آرتق لاتین کلیساسنه تابع قیلاجقدی. فقط اونلرک نه حیلہ کار اولدقلرینی آکلامامشدی: ضعفلرنده ذلیل، قوت وفرصت زمانلرنده جرأتکار اولدقلرینی بیلمیوردی.

بواثناده آنی بر حادّہ پاپانک نشئه سنی قاجیردی. ماجار قرالی لوئی، بولغار قرالیله باریشدی. (اسطرازتی میر) ی قرالغنه کوندردی، آلدیغی یرلری کری ویردی. آرتق تورکاره قارشى حرب ایتمه سنه لزوم قالمادی. بوندن باشقه، پاپانک تشبّی ده اساس سزدی. آوروپا دولتلری آراسنده موجود اختلافلر، اونلرک بویوک و متحد براهل صلیب اوردوسی تشکیل ایتمه لرینه مانعدی.

توركلارك ، بوتش-بئلك هيج برندن خبرلري يوقدى .
 بوتون خريستيان عالمى عايه لرنده قاينا شيوردى . حتى خبرلري بيله
 اولسه ، قورقورلري يوقدى . اوردولري روم اولكله لرني بربريني
 متعاقب ضبط ايد يوردى . بيزانس ايمپراطورلرينك صيفيه لري
 بيله توركلار آلنده ايدى . (تراكيا) ده ضبط ايتدكلري متين
 قلعه لري كوكندن قازي يوردى .

يوآنيس پاله اولوغوس مكدردى . نهايت ، كدريني قادين
 سينه سنده اونو تمق ايسته دى . كوزل بر متره سي واردى : بر
 پاپس قيزيدى ؛ ايمپراطوري آوجي ايچنه آلمشدى . يوآنيس ،
 برمدت اونكله مشغول اولدى ، نهايت يورولدى . كندينه
 كلديكي زمان ، بر دفعه داها طالعي دهنه مك ايسته دى . پاپانك
 بوتون امرلريني ديكه ميه قرار ويردى . (بيزانس) دن چيقدى ،
 (روما) يه كلدى . پاپا بشنچي اوربهن ايمپراطوري صميميتله قبول
 ايتدى . ايمپراطور ، رومايه آياق باصار باصماز ، لاتين كليسا سنه
 داخل اولدى . قاردينال لر حضورنده محتشم مراسم ياپيلدى
 (۱۳۶۹ م ، ۷۷۱ هـ) . پاپا ، يوآنيس پاله اولوغوسه آلىنى ،
 آياغنى ، ياناغنى اوپدوردى ، كنديسني تقديس ايتدى ، صوكراده
 باشقه اوزاق اولكله لرده توركلره قارشى يارديم ديلنسين ديه
 صاليو بردى .

يوآنيس ، (روما) دن صوكره ، ونديكه كلدى . سه نيور

طرفندن پارلاق بر صورتده قبول ایدلدی. کندیسنه بر قاق چکدیری
ویرلمه سی تصویب اولوندی. نیتی، فرانسه یه ده کچمکدی. فقط فرانسه
قرالی بشنجی شارلک کندیسنه یاردیم ایده بیله جک بر حالدده اولمادیغنی
بیله دیکی ایچین بوسیاحتدن واز کچدی. تکرار وندیکه کلدی.
بوسفر حقارتلرله قارشیلاندی. یوآنیس، وندیک تاجرلرندن
اودونج پارا آلمشدی. پارالک مدھش فاضلری واردی.
یوآنیس، پارایالآن اوده یه مه مشدی. بونک اوزرینه آلا جقلیر،
وندیک سه نیورینه مراجعت ایتدیلر، آلا جقلرینی ایسته دیلر،
پارای ویرنجیه قادار ایمپراطوری شهره حبس ایتدیردیلر.
یوآنیس تلاش ایچنده ایدی. بویوک اوغلو آندرونیقوسه
مکتوبلر یاغدیردی، کندیسنی قورتارماسی ایچین ممکن اولدوغنی
قادار چوق پارا کوندرمه سنی امر ایتدی. شاید خزینه ده ایسته دیکی
قادار پارا یوقسه، کلیسایه عائد اموالی صاتوب تدارک ایتمه سنی ده
توصیه دن کری دورمادی.

آندرونیقوس، باباسنی هیچ سومزدی. کندیسنه مکتوب یازدی،
خزینه ده پارا اولمادیغنی، کلیسانک ایسه بوکارضا کو سترمه دیکنی،
شاید جبری قوته مراجعت ایده جک اولورسه عمومی بر عصیان
چیقا بیله جکنی آکلاتدی. آندرونیقوس، باباسنک محبوس
قالماسندن ممنوندی. فقط کوچوک قارده شی مانوئل بویله یاپمادی:
باباسنه لازم اولان پارای بولدی، حتی وندیکه قادار کندی کوتوردی،

بوسایه ده باباسنك ده كوزینه كیردی . یو آنیس ، بویوك اوغلو
آندرونیقوسك اهاقنی بردرلو اونو تامادی .

وندیكدن چیقدی ، بیزانسه كلدی . پاپا ، یو آنیس پاله اولوغو-
سك لاتین کلیسا سنه کیردیكنی بوتون دولترلره تبلیغ ایتدی ،
توركلره قارشى كندیسنی حمایه ایتهلرینی توصیه ایلادی . پاپانك
بو توصیه سی بهوده ایدی : روملره یارديم ایدم بيله جك هیچ
برقوت یوقدی . ایتسه ایتسه ، قبریس قرالی ایدم بیایردی ؛ چونكه
اسلاملرله ، مصر سلطانلریله اوصیراده او محارب بولونیوردی . فقط
اوده پریشان اولمشدی . یو آنیس ، آرتق قبریس قرالندن ده ، جنویز-
لیردن ده ، وندیکلیردن ده امیدینی كسمشدی . بوفلاكت ،
اوکا پاپایه ویردیكى سوزی ده اونوتدوردی . الكزیده قورقدوغی ،
مراد بك ، غازی خونكار دكلیدی ؟ نهایت اوکا خرجكذار
اولمایه قرار ویردی . ایمپراطورلغك انقاضی اوزرنده راحت
یاشایلمك ایچین بوندن مناسب چاره كوره مه دی .

پاپا ، بوحوادتی دویار دویماز ، صوك درجه متأثر اولدی .
اساساً دیوشیرمه اصولنك علینده ایدی . شیمدی یو آنیسك ده
مراد بكه خراجكذار اولدوغنی ایشیدنجه قای صیزلادی .
روملری قورتارمق ایچین قطعی تشبثلرده بولونمایه قرار ویردی .
فقط اولوم ، اونك بو عزمینی ده آنی ضربه سیله پارچالادی (۱۳۷۰
م ، ۷۷۲ هـ) . خانی اون برنجی غره غواردده عین اثری تعقیب

ایتمک ایسته دی. تورک تهلهکسی آرتمشدی. تورکار (سیجیلیا) یی بیهله تههیدید ایدیورلردی. جنویزلیلر بو تههیدیده مانع اولمق ایسته دیلر، بردرلو موفق اولامادیلر. (ازمیر) الان لاتینلرک آلینده ایدی. بوراسی، بر درجه یه قادار، تورکارک آطه لر دکزنده کی حاکمیتنه مانع اولابیلوریدی.

تورکاردن پایا غره غووارده قورقویوردی. حتی ایمپراطور یوآنیس پاله اولوغوسه، تورکاری دواملی بر مغلوبیت آلتنده بولوندورماسنی توصیه ایتدی. فقط ایمپراطور بوکامقتدرمیدی؟ اساساً کندی، چوقدن تورکارک خراجکذاری اولمشدی. آرتق تورکاردن هیچ قورقوسی یوقدی. یونانستان تورک اداره سنه کیریوردی. تورکار، ماجار قرالندن ده انتقام آلمق ایسته دیلر. تانارلرله اتفاق ایتدیار. تاتار خانی بغدادن یورویه جکدی. ماجار قرالی، بو تههیدیه قارشى نه یاپاجغنی شاشیردی. پایپه مراجعت ایلهدی. پایا، بوتون خریستیان ایمپراطورلری اهل صلیب اوردوسی تشکیله دعوت ایتدی؛ آلمانیا ایمپراطوری دردنجی قارل راضی اولمادی. یوآنیس پاله اولوغوسک اسلاملرله اتفاق ایدهرک آوروپا قاپولرینی تورکلره آچدیغنی ایلری سوردی. ایمپراطور تلاشه ایدی. بیزانسدن برهیئت چیقارمش، آوروپانک بوتون پایتختلرنده یاردیم دیله نیوردی. بو هیئت ایچنده بیزانسک ممتاز برسیاسی واردی. اوده، یوآنیس لاسقاریسدی. مع مافیه

اودە ھېچ برشئە موفق اولامادى . يوآنيس پالە اولوغوسك
اميدى بوسبوتون قيرلدى . يالگىز ، شايد توركلر ماجارلارلە
حرب ايدەجك اولورلرسە ، بلكە ماجارلر توركلرك مغلوب
ايدرلر دىيە اميد ايدىوردى . شىمدى توركلرك سفرى تاخير
ايتەكلرني كورونجە ، نەياپاجغنى شاشيردى . توركلرك بوسبوتون
نفوذى آلتە كىرەمەكن ، « سەئ سەادت » ە باش قويەمەكن باشقە
چارە كورەمەدى . مراد بكى « متبوعى طائىق خصوصەندەكى
تەھداتى پارلاق برصورتدە اعلان ايتدى . اوغوللارندن برىنى
رەن اولارق مراد بكك سراينە كوندردى . ھەنە زمان لزوم
كورولورسە مراد بك مەيتندە خدمت عسكرىە ايفا ايتەسنى
قانۇنلە تايىد ايتدى » (۱) .

مراد بك ايمپراطورك بوتۇللەندى . يوآنيس ايسە ،
پاپايە قارشى كەندىنى معذور كوسترمەيە چالاشدى . يىكى معاھدەنى
حقلى كوسترمك اىچىن كەندىسەنك ياپ يالگىز براقىلدىغنى ،
بناءً عليە توركلرلە اتفائە مجبور قالدىغنى يازدى . پاپانك بوكا
قارشى ويرەجكى جواب معلومدى : اودە روم ملتەنك لاتىن
كلىساسەنە خصومتنى سەبب كوستريوردى .

مع مافىە فلاكت يالگىز بونكە قالمادى : يوآنيس ، اوغلو
مانوئەلى كەندىسەنە سلطنت شريكى اعلان ايتدىردى . بو ، بالطبع

بویوک اوغلو آندرونیقوسک ضررینه ایدی؛ فقط ملت اوپله
 ایسته مشدی. مانوئه‌لک مقری سالانیکدی. بوراده مکمل بر
 سرای هیئت تشکیل ایلهدی. تورکارک (سالانیک) جوارینه
 قادار ایلریله‌ملری مانوئه‌لک غرورینی قیردی. مانوئه‌ل بورالری
 تورکاردن آلق ایسته‌دی. تورکارک صربلردن آلدقلى
 (فهر) شهرینه کوز دیکدی، بوراسی اولجه روملرک آلینده
 ایدی. مانوئه‌ل صربلرله اویوشدی. مرادبک بوفسادى درحال
 خبر آلدی، مانوئه‌له اوقادار قیزدی که، درحال خیرالدین پاشای
 یوللادی، (سالانیک) ی قوشاندی. مانوئه‌له قارشى قویمق ایسته‌دی.
 مانوئه‌ل، اهاالینک تسلیم اولمق ایسته دکلرینی، باباسندن ده یاردیم کلمه -
 جکنى آکلار آکلماز شهردن قاچدی، (بیزانس) هکلمک ایسته‌دی،
 باباسی قبول ایتهدی. (مدالی) یه صیغتمق چاره‌سنه باش ووردی،
 اوراده‌ده قبول ایدلمه‌دی. هپسی ده تورکاردن قورقویورلردی.
 خصوصیه مانوئه‌ل، حرکاتنده قباح‌تلیدی: باباسی مراد بکله اتفاق
 ایتمش، تورکاره خراجکذار اولمشدی. نهایت قباح‌تنی اوده
 آکلادی. مراد بکله التجادن باشقا چاره کورمه‌ده‌دی. « ادرنه‌یه
 کلدی، مراد بکله مستمندانه مراجعت ایتدی. کندیسنى عفو
 ایتمه‌سنی استرحامکار بر طورله دیله‌دی. مراد بک بوندامتدن
 وبالخاصه مرحمتی جلب ایچین کندیسنه قارشى کوستردیکی
 اعتماددن متأز اولدی. مانوئه‌لی قوجاقلادی، بر قاق اوافق تیکد پردن

صوگرا، ياپدقلىرىنى اونوتاجغنه دائر سوز ويردى» (۱).
 مانوئەل، آرتق مراد بىكك سرائنده ياشادى. مراد بىك اونی
 بيزانسه قارشى تعقيب ايدەجكى سياسته آلت اتخاذايتدى.
 (سلانيلك) ى آلدى، بيزانسى دائمى برترصد آلتندە بولوندوردى.
 اوصيراده، آناطولوده تکرار قاريشيقلقلر چيقدى (۱۳۷۴ م، ۷۷۶ هـ). مراد بىك، بيزانس ايمپراطورينه عسكريله برابر معيته
 کلمه سنى امر ايتدى. حتى مانوئەلک ده برابر بولونماسنى ايسته دى.
 يوآنيس، مراد بىكك حدتندن قورقدى. بويوك اوغلو آندرو-
 نيقوسى (بيزانس) ده قائممقام براقدى. کندى، اوغلو مانوئەلله
 برابر مراد بىكك معيته التحاق ايتدى. تورکلر بيزانسلک ايکى
 ايمپراطورينى ده معيتلرنده چاليشدييورلردى.
 آندرونيقوس، باباسندن اساساً متفردى خصوصيله حقوقنى
 پائمال ايدەرك ساطنت شريکلاککنه مانوئەلى انتخاب ايمەسى قابنده
 دهشتلى برکين حاصل ايله مشدى. باباسندن انتقام آلمق ايجين
 فرصتدن استفاده ايتمک ايسته دى. مراد بىك ده، اوغلو ساوجى
 بىكى قائممقام براقمشدى. آندرونيقوس، ساوجى بىكى آلدە ايمەيه
 چاليشدى. اونکله چارچابوق مناسبت پيدا ايتدى. ايکى کنج
 پرنس حکومتى آللارينه آلمق، بابالرينک تختلرينى ده ويرمک ايجين
 اتفاق ايتديلر. مقصدلرينى آلدە ايمە دجکە سلاخلرينى براقمامايە قرار

ویردیلر .

فقط ایکی حیلہ کار اولادک اہاتی چارچاقوق میدانہ چیقدی .
 بونی ایلک اول خبر آلان دہ، مراد بک اولدی . یو آنیس چاغیردی ،
 مسئلہ پی کندیسنه غایت محقرانہ آ کلاتدی : « بویله منفور برتشی
 عقلنہ کتیرہ بیلہ جک برروم اولاماز » دیدی . بونی ساوچی بکک عقلنہ
 کتیرہ ن دہ ، هیچ شہ سز آندرونیقوس اولابیلہ جک پی آ کلاتدی .
 مع مافیہ ، بوندن مقصد صرف کندیسنه تجاوز اولدوغنی ، یو آنیس
 پالہ اولوغوسک ایشہ قاریشدیرماسی دہ ، فساد اورتایہ چیقار چیقماز
 کندیسنک معصومیتی آ کلاشیلمق ایچین اولدوغنی سویلہ دی .
 بناء علیہ ، معصومیتی اثبات ایتک ایسترسہ ، کندی ، اوغلونی
 نہ دورلو برجزایہ کرفتار ایدہ جکسہ ، اونک دہ آندرونیقوسی
 عین جزا ایلہ تأدیب ایتہ سنی امرایتدی . یو آنیس پالہ اولوغوس
 مراد بکہ شو جوابی ویردی :

— شو کتہ اب . حکایہ سی بیلہ تویدیریمی اور پرتن ، سزک ایچین
 اولدوغنی قادر بنم ایچین دہ فلاکت اولان برجنایتدن دولایی نی
 نیچین اتہام ایدیورسکیز ؟ اکر اوغوم آندرونیقوس شورادہ
 اولسہیدی ، اوکا نہ جزا ایدہ جکمی کورور ، حیاتسکیزک بحہ
 نہ قادر قیمتی اولدوغنی وسزہ نہ درجہ صادق اولدوغنی آکلار .
 دیکیز . سز بکا یاردیم ایدیکیز ، آلا جغم انتقامک شدتدن حدتمک
 درجہ سنی در حال آ کلایا جقسکیز .

ایمپراطور یو آنیسک بوسوزلری مراد بکک حدتی یاتیشدیردی .
ذاتاً ایکیسنک ده آنا طولوده بولونمالرینه لزوم قالماشدی . بوغاز
ایچنی کچدیلر ، اوغوللارینی تعقیبه قویولدیلر . بیزانس جوارنده
ایکی پرنسک اوردوگاهنه تصادف ایتدیلر .

اوردوگاهک برطرفی درهیه مستند ، بر طرفی شرانپوللارله
تحکیم ایدلمشدی . ایکی پرنس ده سلاحلرینی تسایم ایتمکدن زیاده
مدافعه ده بولونمایه قرار ویرمشلردی . مراد بک کیجه لین درهیه
یاقلاشدی ، اوراده ساوجی بکک کشف قوللرینه راست کلدی ؛
کندینی طایتدی . سنه لرجه بایراغی آلتده ظفردن ظفره
دولاشدقلری حالد شمدی نهدن فکرلرینی دکیشدیردکلرینی
صوردی :

— ایچکزده بندن شکایتی اولان کیم وارسه ، میدانه
چیقسین . کندیسینی دیکلیه جکم ، شکایتی دوغرو ایسه حق
ویره جکم .

دیدي . اوغلانک نانکورلکینی آکلاتدی . اطاعت ایدنلری
عفوایده جکینی ، فقط عصیانده دوام ایدنلری الکشدتلی جزالره کرفتار
ایلیه جکینی سویله دی . مراد بکک بوسوزلری چوق تأثیر ایتدی .
ایرته سی صباح بونلر آرقاداشلرینه ایشی آکلاتدیلر ، آزمانده بوتون
اوردوگاهه یایدیلر . اوردوده اوילה برتبدل حاصل اولدی که ،
او کیجه ساوجی بکک معیتنده کی عسکرلرک کافه سی مراد بک

طرفه كچديرلر . ساوجى بك ، باباسنك مرحمتنه التجا ايتكدنسە ،
 معيتندە قالان بر مقدار عسكەرلە (ديمتوقە) دە مدافعه يە قرار
 ويردى . مراد بك پيشنى براقمادى ، اوداها (ديمتوقە) نك
 قاپليرنى قاپاتيركن ، مراد بك دە سورلرينە ياناشدى . ساوجى
 بك بر قاچ كون دايندى ، اهاينك ارزاقى توكدى . نهايت
 آجلقدن محو اولاجقارنى آكلاديلر ، شەرك قاپليرنى
 آچديلر ، ايكي عاصى پرنسى مراد بكە تسليم ايتديلر . مراد بك
 ساوجى بكى آلدە ايدر اتمز ، درحال كوزلرينى اويدوردى .
 قلعه نك عاصى مدافعلرينى دە دره يە دوكدوردى . آندرونيقوسى دە ،
 تجزبە ايتمىسايچين ، باباسنە كوندردى . يو آئيس ، يالكىز اوغلنك
 كوزلرينى اويدورمادى ، بش ياشندەكى چوجوغلنك دە كوزلرينى
 اويدوردى . فقط بو وظيفه يى ايفايه مأمور اولانلر قاينارسر كىي
 آندرونيقوسك يالكىز بر كوزينە دوكديلر ، اوغلونك ايسە كوز-
 لرينى خفيفجه سقاطلاديلر . يو آئيس ، اوغلو آندرونيقوسى ،
 زوجەسى وچوجوغيلە برابر ، بيزانس سورلرنده (آنەماس)
 قولە سنە حبس ايتدى . عصيان فاجعه سى دە بو صورتلە نتيجه لندى .
 ديكر طرفدن ، توركلرك فتوحاتى كوندن كونه بويويوردى .
 بوندن (غلطە) دە كى جنويزلرده اور كە يە باشلاديلر . بيزانس توركلرك
 آئينە كچرسە كنديلرينك چوق ضرر كوره جكلرينى ، حتى
 بوتون (غلطە) يى غائب ايدە جكلرينى آكلاديلر . (جنوه) سنا توسنە

فلاکتی خبر ویردیله . سنا تو تورکلرک مهاجمه لرینه قارشى
جنويز مستملکدارینى محافظه ایچین دونانما حاضر لاتدی . پاپا ،
جنويز پستیوسنی تبریک ایتدی ، حتی تجهیزاته یاردیم ایچین یکرمی
بیک آلتون کوندردی . بونکه برابر سفر برک ینه پایلامادی .
سببی واردی : روملر اکثریا وندیکیلری التزام ایدرلردی ؛
جنويزلرده وندیکیلری سومزلردی . بوسیدن روملره یاردیمدن
واز کچمشلردی . او صیراده مراد بک ، ایمپراطور یو آنیسه
امر ایتدی ، اوغلو آندرونیقوسى محبسدن چیقارتدی .
آندرونیقوس مراد بکدن بولطفه اصلا منتظر دکلدی ؛
اوغلو ساوجی بکه برابر کندیسنه ایتش اولدوغی فنانی
بیلوردی . فقط آندرونیقوسک چیقماسی مراد بکک سیاستنه
توافق ایدیوردی . مراد بک اونک مهم برعصیان عاملی اولدوغی ،
بیزانسی ضعیف دوشورمک ایچین کندیسندن استفاده ایدیه
بیله جکنى آکلامشدی . حتی مراد بک بوتشیشده جنويزلردن ده
یاردیم کوردی . آندرونیقوس محبسدن چیقار چیقماز جنويزلر
کندیسنه یاردیم ایتدیله . وندیکیلری التزام ایدن یو آنیس
پاله اولوغوسى مغلوب ایتک ایچین بیزانسه آندرونیقوسک
طرفدارلرینی آرتیردیله . آندرونیقوس ، قوتنک کافی اولدوغی
آکلار اکلماز ، سرایی آنسزین باصدی ؛ باباسنی ده ، ایکی
اوغلو مانوئل ایله تهئودوروسى ده یاقالادی هپسنى ده وقتيله کندیسنک

قاپاتىلدىغى قولەيە حبس ايدەرك ايمپراطورلغى اعلان ايلەدى .
 اھالى درحال آندرونيقوسدن طرفە اولدى . جنويزلر كدە
 آرزولرى يرينە كلدى ، (بيزانس) دە بوتون حاكيت جنويزلر
 آلىنە كچدى . وندىكليلرك نفوذى قيرىلدى . بو حالدن اوقادار
 اوركديلركە ، يوآنيس پالە اولوغوسك لهنە هيچ بر حر كتە
 بولوناماديلر .

يوآنيس ، محبسدن قورتولماك چارەسىن آرايوردى . نہايت
 بولدى . وندىكليلردن قارلو زەنو ايلە رابطە تاسيسنە چاليشدى .
 حبس خانە قايجيسنك قاريسنى الدە ايتدى ، بوقادين كنديسنك
 اسكى كوزدە لرندى . آدى (پترونيل) ايدى . قادين ، ايمپراطورلە
 قارلو زەنو آراسندە مخابره يى اداره ايتدى . قارلو ، يوآنيسك
 ياتدىغى محبسە هجوم ايدەرك كنديسنى چيقارمايە قرار ويردى .
 حبس خانەك دكزە قارشى بر پنجرەسى واردى . كيجه لين بر
 شالوپا ايلە پنجرەك آلتە كلدى ، ايمپراطور آشاغى يە بر ايپ
 اوزاتدى ، قارلو ايپە طوتونارق يوقارى يە چىقدى . ايمپراطورە
 اوزون اوزادى لافە حاجت اولمادىغى ، كنديسيلە برابر اينمەسى
 سوبلەدى ، ايمپراطورايكى اوغلونى براقمايە راضى اولمادى . كنديسى
 قاچاق اولورسە ، آندرونيقوسك ايكي سنى دە اولدورە جكنى
 آكلاتدى . قارلو اصرار ايتدى ، يوآنيس راضى اولمادى .
 نہايت قارلو محبسدن ايندى ، عسكرلرغى باشندن صاودى .

آرادن زمان کچدی : یو آنیس ، صیقیندیسندن نه یاپاجغنی
 شاشیردی . تکرار قارلویه آدام کوندردی . کندیسنی محبسدن
 قورتاردیغنی تقدیرده (تهنه دوس ، بوزجه آطه) یی ویره جگنی
 وعد ایتدی ؛ حتی بو خصوصده برده فرمان ویردی . قارلو
 ایمپراطوره جواب بازدی ، پترونیله ویردی . قادین مکتوبی
 قوندوراسنک ایچنه صاقلادی ، ایمپراطور یو آنیسه ویرمک ایچین
 فرصت قوللادی . فقط مکتوبه ده اوقادار اهمیت ویرمه دی .
 نهایت غائب ایتدی . مکتوب غاردییانلردن برینک آلینه کچدی .
 ایمپراطور آندرونیقوسه قادار تقدیم ایدلدی . قارلو زهنو ،
 عسکرلرینک برینک نزدنده صاقلیدی ، بیزانسدن قاقچق ایچین فرصت
 کوزله یوردی . اوصیراده مارقوژوستینیانی اون قادار چکدیریه
 بیزانسه کلشدی . زهنو ، برکیجه ، بو دونانمایه کلدی .
 ژوستینیانی به مسئله یی آکلا تدی ، (تهنه دوس) آطه سی حقنده
 ایمپراطور یو آنیسک ویردیکی فرمانی کوستردی ، دونانما درحال
 حرکت ایتدی ، (تهنه دوس) اوکنه کلدی . زهنو ایله
 ژوستینیانی قرهیه چیقیدیلر ، آطه نک روم قوماندانه اسکی
 ایمپراطورلرینک فرمانی کوستردیلر ، و آطه یی تسلیم آلدیلر .
 بو خبرجنویرلری دهشته دوشوردی . وندیکلیر (تهنه دوس)
 آطه سنه حاکم اولدجه ، جنویر تجارتنه خلل کله جکنه شهه
 یوقدی : آندرونیقوسه شکایت ایتدیلر . آندرونیقوس ،

بیزانسه نه قادار وندیکلی وارسه هپسینی حبس ایتدیردی .
جنویزلر برده دونانما حاضرلادیلر . (نه نه دوس) آطه سنه کلدیله ،
فقط مغلوبیتدن باشقه برشی کوره مه دیلر .

وندیکلیار عزملرنده دوام ایدیورلردی . نهایت (شیطان
ملك) آدلی برینی بولدیله ، اونك واسطه سیله یو آنیسی ده ،
مانوئیلی و ته ئودوروسی ده محبسدن قاچیردیله . ایمپراطورله
اوغولاری اول (اسکدار) ه کچدیله ، اورادن (بروسه) یه
کلدیله ، مراد بکه التجا ایلدیله ، کندیسینی آندرونیقوسدن
آیرمق ایچین اك ذلیلانه شرطله تنزل ایتدیله . هر سنه مراد
بکه اوتوز بیک آلتون ویرمه یی ، امرینه آماده اولمق اوزره
دائما اون ایکی بیک کیشی بولوندورما یی تعهد ایلدیله . اوزمانه
قادار تورکلره قارشى مقاومت ایدن (فیلا ده لفی ، آلا شهر) ى ده
مراد بکه براقدیله . یو آنیس پاله اولوغوسله ایکنجی اوغلو
و سلطنت شریکی مانوئیل و عدلری مراد بکی اقناع ایتدی .
فقط بومسئله ده بیطرف کورونمك ایسته دی . اساساً آندرو-
نیقوسله ده تعهدی واردی . بو تعهدی حقسنزیره بوزمق
ایسته مه دی . بیزانسه براقچ کیشی کوندردی . اهلیدن
آندرونیقوسیمی ، یوقسه مانوئیلی ایسته دکلرینی صوردی .
اکثریت مانوئیلی ایسته دی . آندرونیقوس دعواسنك غائب
اولاجننی حس ایدرایتمز ، تاجنی تختنی براقدی ، باباسی یو آنیسه

دخالت ایتدی ، یو آنیسك آیاقلرینه قاپاندی ، کندیسینی عفو ایتدیردی . (سیلیوری) ایله جوارنده کی یرلردن بر قسمنی خاص مقامنده آلدی ، حیاتی اورالرده کچیرمه یه قرار ویردی (۱۳۷۹ م ، ۷۸۱ هـ) .

یو آنیسله اوغلو مانوئل ، بیزانس تختنه کچر کچمز ، مراد بك خبر کوندردی ، (آلاشهر) ك تسلیمینی ایسته دی . شهر تسلیم اولیوردی . نهایت یو آنیس ، اوغلو مانوئلله برابر ، اوردوسنك باشنه کچدی ، (آلاشهر) اوکنه کلدی ، تبعه سنی دوشمانلرینه تسلیم اولمایه اجبار ایتدی (۱۳۸۱ م ، ۷۸۳ هـ) . بیزانس مؤرخلرندن فرانچیز ایله خالقوندیایس بو حادثه یی ییلدیرم بایزید زمانه آتیورلر .

« آلاشهر ولایتی اهل اسلام آراسنده قالمشدی . پادشاهی کافر ایدی . آیدین اوغلو ایله مدارا ایدوب دیرلک ایدردی . بایزید خان نیت غزا ایتدی . آلاشهره یوریدی . وحی ولایتنه وارمه دین یوللرده چاغروب یاساقلرله کبتدی . هیچ کیمسه نك بر چوپنی ظلمله آلامادیلر همان کیم بایزید خان واردی . حصارك قاپوسن یاپدیلر . جنکه حاضر اولدیلر . بایزیدخان دخی یغما دیدی . کافرلریغما یی ایشیتدیلر ، امان ایله دیلر (۱) » .

عاشق پاشا (آلاشهر) ك فتحی ۷۹۲ ده ، ییلدیریم بایزید زماننده اولدوغنی یازدیغنی حالده ، مراد بكك وفاتی حقنده : « بو ماجرانك تاریخی هجرتك یدی یوزطقسان یدیسنده واقع اولدی »

(۱) عاشق پاشا زاده ، ص ۶۰

دیور (ص ۶۴) . بوتاریخلرک هپسی ده یا کلسدر : مثلاً مراد بک وفاتی (۷۹۱) ده در . یالکیز ، عاشق پاشا زاده تاریخنندن آکلاشیلان بر نقطه وارسه ، اوده (آلاشهر) ک مراد بک وفاتندن اول آلمش اولماسیدر . (آلاشهر) محاصره سنده بایزید بک باباسیله برابر بولونمشدر ، ویا شهر ی ضبطه او کوندولمشدر . فقط (آلاشهر) ی تورکلره ، تبعه سنی ازهرک تسلیم ایدن ایمپراطور ، یو آنیس پاله اولوغوسدر .

مراد بک بیزانسک بوتون قاریشیققلرندن استفاده ایتدی . مانوئل ، جلوس ایدر ایتمز ، جنویزلردن انتقام آلق ایسته دی . (غاطه) ی قوشاندی ، فقط رجعته مجبور اولدی . وندیکیلرده حربدن بیقمشاردی . نهایت اونلرده خصملریله ، جنویزلرله او یوشدیلر .

بوصیراده مراد بک ، صربلردن ، بولغارلردن ، لاتینلردن اکمهم یرلری آلیوردی . سردارلری یونانستانک مهم برقیسینی فتح ایتشاردی . قدس شوالیه لرندن ژان فرنان ، المرنده اسیردی . تورکلر (پاتراس) ی آلدیلر ، ژان فرنانی ویردیلر .

تورکلرک آلدقلى یرلره ایمپراطور یو آنیسک هیچ بر علاقہ سی یوقدی . فقط تورک اراضیسینک بویومه سی ، تورک سطوتنک آرتماسی یو آنیس ایچین فلا کتک اک بویوکیدى . اوسنه (۱۳۸۲ م) مراد بک پارلاق بر ظفرله تمیز ایتک

ایسته دی. اوردوسنك باشنه كچدی، (آطوس) طاغی جوارنده
(بولینا ، آبولونیا) یی قوشاتدی .

« اینجیکرك اوزرنده بلنیه دیرلردی بر حصاره . ترك اكا تکرری
ییق دینی دیرلر، مراد خان آنك اوزرینه واردی، واول ولایتك خلقی
قاچوب اكا کیرمشلردی . نیجه کون ایوجنك ایتدیله . آخر کوچدیله .
مراد خان بر آغاجه آرقه سنی ویردی . اوطوردی . آدملر کلدی .
بری بری آردنجه کم ، خانم اول حصار ییقیلدی دیو . کوندردیلر ،
واردی ، مباغنه مال کتیردی .

آلتون و کوموش تبسیله کتیردیله . خلقینی کیرو قودیلر . خیلی
آلتون و کوموش طاسلر دخی بولندی . غازیلر باشلرینه کیدیلر .
کوردیلر یاراشیر . اسکوف اول زمانده بنیاد اولدی . هم اول آغاجکم
مراد خان آرقه سنی ویردی ، خان ایتدی : بو دولتلو قبا آغاجدر
دیدى . واول آغاجك وجه تسمیه سی خانك سوزیدر ، واول آغاج شمدی
دخی واردر . کوتوك اولوبدر . یاننده بر قویو دخی واردر » (۱) .

(آبولونیا) نك فتحندن صو کرا ، مراد بك (بیزانس) ایله (ادرنه) ،
(ادرنه) ایله (سالانیک) آراسنده کی ممالکی کاملاً فتح ایتدی .
(صوفیه) یی ده آلمق ایستردی . بونك ایچین متعدد دفعه لر
تشیث ده ایتمش ، موفق اولامامشدی . فقط صوك تشیثی ظفرله
نتیجه لندی . (صوفیه) تورکلر آینه کچدی (۱۳۸۴ م ، ۵۷۸۶) .
بو فتح غایت مهمدی : (صوفیه) آلدی بولونقدن صو کرا ، آدریاتیق
ساحالرینه دوغرو یاپیلاجق سفرلرده قولایلاشابیلیردی .

مراد بك ، بو ظفردن صوكرام ، (ادرنه) يه كلدی .
 خیرالدین پاشایه ودها بر قاق سرداره حرکاته دوام ایتمه لرینی امر
 ایتدی ، پالانلرینی آکلاتدی . تراکیانه درامه ، کومولجنه ،
 مارولیا، قواله، سیروز ، مناستر تورکلر آلینه کچدی . بونلردن
 (قواله) ، (خریستوپولیس) جوارنده ایدی .

تورك اوردولری صربستان طرفلرینه ده یورودیله .
 (قاستوریا) یی ، (صرب باغراد) نی آلدیلر . (اشقودره)
 بيله تورکلر آلینه کچدی . فقط بوتون بویرلره صاحب اولان
 یورکی اسطرازمیر ، مراد بکه اقرباسندن بر قیز کوندردی ،
 (اشقودره) یی کری آلمایه موفق اولدی .

تورکلر یالکیز قره لری فتح ایتیمورلردی ؛ آطه لر دکننده کی
 مهم آطه لری ده فتح ایدییمورلردی . (قورفو) لاتینلر آلنده
 ایدی ؛ آطه یی روملردن آلمشلردی . صوك حکمدارلری
 اولونجه ، قورفو خاقی باشلرینک چاره سنه باقدیلر ، تورک نفوذی
 آتیه کیرمه مک ایچین لاتینلره تسایم اولدیله .

مراد بك آطه نك لاتینلره تسایم اولماسنی خوش کورمه دی .
 آطه یی اساساً لندی آلمق ایستیوردی . فقط تام تدارک کوره جکی
 ائنده ایدی که ، آناطولوده ، دامادی ، نفیسه خاتونک زوجی قارامان
 اوغلو علاءالدین بکک کندی اراضیسنه تجاوز ایتدیکنی خبر آلدی .
 اونک ایچین ، چار چابوق بر اوردو وجوده کتیرمک اهمیتسنر بر

مسئله ایدی : صرب قرالی خراجکذاریدی ؛ بولغار قرالی خراجکذاریدی ؛ بیزانس ایمپراطوری ، بوتون موجودیتیه کنديسنه تابعدی . اساساً کنديسنک ، اوردوسی ده مکملدی . غازي خونکار بوتون خراجکدارلرندن آلدیغی قوتلرله اوردوسی تقویه ایتدی ، آناتولویه یورودی ، دامادینی قطعی برضربه ایله اُزه یه موفق اولدی (۱۳۸۷ م ، ۷۸۹ هـ) .

تورکلرک هیچ برخصمدن پروالری یوقدی . واقعا روم ایللارینی فتح ایتک ایچین (ادرنه) یی پایتخت اتخاذا ایتشلردی ؛ فقط مرادبک اکثرزماتی (بروسه) ده کچیریوردی . دوکونلر ، درنکلر ، شادمانلقلر هپ (بروسه) ده اولیوردی .

مراد بکک سرای حیاتی ده ساده ایدی . زوجہ سی کل چیچک خاتوندی . بیزانس خاندانه منسوبدی ؛ بایزید بک اوندن دنیا یه کلشدی . (بروسه) ده نه دوکونلر اولمشدی ! ایلك دوکون ، بایزید بکله یعقوب چایی وساوجی بکک سنت دوکونلریدی (۷۶۷) . بو دوکونلر ده مراد بک « عظیم ضیافتلر » ایله مشدی . دها صوکراده بایزید بکک اولمه جمعیتیدی . بو جمعیت هپسنه فائقدی . کر میان اوغلو یعقوب بک قیزی مراد بکک اوغلونه ویرمک ایستیوردی . کوتاهییه ، سماو ، اگری کوز ، طوشانلو جهاز اوله رق ویریه جکدی . مراد بک ، راضی اولدی . آق صونغور ، چاوش باشی ، چاوش اوغلو تیمورخان ،

دھا بیک کیشی ، کلین آمایه کیتدیله . بروسه قاضیسی ایله
 آق صونغورک خاتونی ، بایزید بکک دادیسی ده برابر دی . قیزی
 آق صونغورله بایزید بکک دادیسنه تسایم ایتدیله . کلین آت
 اوزرندە ایدی . آتی یدمکه کر میان اوغلنک چاشنکیرباشیسی
 تعین اولونمشدی .

کلین بروسه یه کتیریلدی . بروسه ده پارلاق بردو کون یاپیلدی .
 کلینک آدی ، دولت خاتوندی . دو کونده اورە نوس بکک تقدیم
 ایتدیکی هدیه لر ، او دورک ثروتنه پارلاق بر معیار دی (۷۸۳) .
 آرادن آلتی سنه کچدی . بوسفر مراد بک هم کندی
 اولنک ، هم ده بایزید بککه یعقوب بکی اولندیرمک ایستەدی .
 آلا جقلری قیزلر ، بیزانس ایمپراطوری یو آنیس پاله اولوغوسک
 قیزلری دی . دو کونده ییلدیریمک هم چوجقلری سنت ایدیله جک ،
 هم ده کندی کوکی کیره جکدی . دو کون (یکیشهر) صحراسنده
 یاپیلیوردی . اوصیراده ایدی که ، مدھش برخبر ، مراد بکک
 ذوقنی ده ، نشئەسنی ده قاچیردی .

مراد بک ، هیچ بر دشمندن قورقمازدی . فتح ایتدیکی
 اولکهلری ، اوغوللری و باباسنک امکدار غازیله اداره
 ایدردی . مثلاً بایزید بک (کوتاهیە) یی ، زوجەسی دولت خاتونک
 جهازینی ، یعقوب بک ده (قرەسی) یی شەزادە سایمان بکک وقتیلە
 اداره ایتدیکی یرلری اداره ایدپوردی .

مراد بکک آناطولوده و تراکیاده کی سطوتی بالقان
 حکومتلرینک هیچ بری چکه میوردی. نهایت هپسی ده عایهنده
 اتفاق ایتدیلر. مراد بک بو اتفاقی چارچاق کشف ایتدی.
 اتفاق وجوده کتیرن، صرب قرالیدی.
 صرب قرالی، مراد بکک اساساً دشمنیدی. فقط بوسفر،
 اتفاق وجوده کتیرمه سنک سبی، آناطولو سفرنده مراد بکک
 صرب عسکرلرینه فنا معامله ایتمه سیدی. صربلر، مراد بک
 اوزرینه یوروک ایچین، بون بهانه ایدیورلردی. مراد بک،
 بوکا هیچ اهمیت ویرمه ندی. اوردوسنی تامایله حاضر لادی.
 سفر برلکنی بیتیریر بیتیرمز، صرب قرالنه بر هیئت کوندردی.
 کندیسنه حرب اعلان ایتدی، حربی اعلان ایدرایتمزده، آلتش
 بیک کشیله صربستانه، «لاس ممالکنه» دوغرو یورودی.
 اوردودن خصوصی بر مقصد ایچین یکر می بیک کشی آیراشدی.
 بوقوت ایلریده کیدیورلردی. صربلر آنی بر هجومله بوقوتی
 مغلوب ایتدیلر (۱۳۸۸ م).

مراد بک چوق متأز اولدی. اوسنه تورکلرله صربلر بیننده
 مدهش بر حرب باشلادی. ایکی اوردو (قوصوا) ده قارشیلانیدی.
 صرب قرالی، عسکرلرینک جسارتی آرتدیرمق ایچین، اونلره
 بی نهایت وعدلرده بولوندی. مراد بکی کیم اسیر ایدرسه اوکا
 قیزی ویره جکینی، ممالکندن اون بلده احسان ایدد جکینی

سويله دی . مراد بك ايسه ، عسكرلريني يالكىز وظيفه ايفاسنه دعوت ايتدی . محاربه نك ايلك زمانلرنده تورك اوردوسى نك صول جناحى براز زده له نير كې اولدى ؛ مراد بكك اورتانجه اوغلو بايزيد بك اويله بر جسارت كوستردى كه ، بوجناحى قطعى بربوزغونلقدن قورتاردى . معيتنده كى غازيلرى تشجيع اچين دشمن اوزرينه آتيلدى . آلنده دمير برطوپوز واردى . يالكىز بو طوپوزله اوقادار دوشمان قافاسى ازدى كه ، عسكرلرى بيله حيرتلىر اچينده قالدى . تورك صواتى صرب اوردوسى بربدنبه داغيتدى . هر طرفده رجعت علامتلىرى كوروليوردى . صربلر ك بورجعتى نهايت فجع برهنزيمته منقلب اولدى . صرب قرالى ، مراد بكك اسير ايدلمه سنى ايستيوردى . فقط تميسى كندى عاينه ظهور ايتدى . لازار ، توركلر آينه اسير دوشدى .

توركلر بو ظفردن ممنونديلر . دوشمان ، بيتاب ، پریشان ، قوصوا اوواسنى دولدير يوردى . مراد بك ، ظفرينك نتيجه سنى كورمك ايسته دی . محاربه ميدانى دولاشيوردى . اجنبى تاريخلرينه كوره ، ييغينلرله ياتان انسان نعلشارى آراسندن بر صربلى فيرلادى ، مراد بكه برخنچر صاپلادى . ملتك انتقامنى بو صورتله آلمايه موفق اولدى .

عاشق پاشا زاده بو فاجعه ي شو صورتله آكلاتيور :

« بو طرفدن مراد خاه بلش کوبله کافرك بر آدی میلوش
 قوبله دیرلردی ، برکافرواردی . شایقه سنی اله آلمش ، سکوسنی
 اردینه سوریو ، خانه طوغری یوریدی ، غازیلر قارشولادی .
 ایدر کیدک بن ال اوپمکه کلدیم وهم بشارته کلدیم . لاس اوغلینی
 طوتدیلر ، ایشته کتیریورلردیدی . غازیلر فارغ اولدیلر . همانکم
 ایردی ، کوندی چو بردی ، مراد خانی سانجیدی . تیز خانک
 اوزرینه چادر طوتدیلر . واقعه لاز اوغلینی اوغلیله طوتمشلردی .
 کتیردیلر ، همانکم خانک اوزرینه کلدی . کوردیکم خان اولمش .
 دیدیکم های بزم ایشیمز بیتمش نیده لم دیدی . هماناونی دخی
 اوغلیله ایت کبی تپلدیلر » (ص ۶۳) .

اصل دوغروسی ده بو ایدی . مراد بك ، یارالاندقدن
 صوکر ، آنجق ایکی ساعت قادار یاشایبیلدی . روحنی تسایم
 ایدر ایتمز ، بکلهر طویلاندیلر ، کندینه برخلف انتخاب ایتمه یی
 دوشوندیلر . بایزید بکی مناسب کوریورلردی . حالبوکه اصل
 حق ، آغا بکی یعقوب چلبیده ایدی . بکلهر یعقوب چلبی یه کیتدیلر ،
 « کل باباک سنی ایستر دیدیلر » همانکم کلدی ، انی دخی باباسی
 کبی ایتدیلر (عاشق پاشا زاده ، ص ۶۴) .

مراد بکک ایچینی شهید اولدوغی یره کومدیلر . نعلشی (بروسه) یه
 یوللادیلر . (چکرکه) یه ، آناسی نیلوفرک آدیله آکیلان کوزل
 دردنک صولرینه حاکم بر تپه یه ، یاپدیردیغی جامعک یانی باشته

کومدیلر (۱۹۱۱) .

مراد بکک اولومی بوتون اسلاملری متأثر ایتدی . اودورده ، اسلام عالمنده یکانه مجاهد ، اوایدی . پاپا ، مراد بکک سطوتنه و جلادتنه قارشى عاجزدی . مصر سلطانى ابو سعید برقوق ، مراد بکک پرستشکاریدی . مراد بکک اولومی اونى اوقادار متأثر ایتدی که ، تربیه سنه یالیز لرله مزین اجزاء شریفه وقف ایتمکدن کندینى آلامادی . هر جزؤك نهایتنده آلتون یالیز اوزرینه ، بیاض ایله مراد بکک نامه وقف ایدلیکی یازیلیدی . اون بشنجی جزؤك صوکنده یالیز اوزرینه شو سطرلر یازیلشدی :

« وقف مولانا السلطان الاعظم الملك الظاهر ابو سعید برقوق ملک دیار مصر والشام والحجازیه خلد الله ملکه علی تربة المرحوم الشهد مراد بك ابن اورخان بن عثمان نور الله ضریحه و قدس روحه وقفاً محتسباً مؤید الی ان یرث الله البلاد وهو خیر الوارثین » .
مراد بک ، طغرای ایلك دفعه اولارق ایجاد ایتدی . طغرا یازیسنك منشائی سکه اوزرنده کی :

اورخان

مراد بن

ایدی . اورخان ك (ن) نی ایله (ن) ك (ن) نك قویر و قلیرى یوقاری یه و صاغه دوغرو قیوریلش ، بو صورتله طغرا شكلی حاصل اولمشدی . بوشکل ، زمان کچدکجه ، انتظام کسب ایتدی .

مراد بکک راغوزه لیلرله یاپدیغی معاهده یه پنجه سنی با صدیغی
وطغرانک بوشکلدن ظهور ایتدیکی، یا کلش برادعان عبارتدر.
تورکلرک را کوزه لیلرله مناسبتی بایزید بک زماننده باشلا مشدر.
مراد بکک غازیلره محبتی واردی. حاجی ایلبکک، لالا
شاهینلر، اوره نوسلر، اونک الکیزاده تقدیر ایتدیکی مجاهدلردی.
اوره نوس بکه ویردیکی برات، مراد بکک سخاوتیله برابر ذکاوتی
کوستر بر وثیقه در :

« توقیع رفیع هایون حکمی اولدر که قرن داشم وامرم سلیمان بک
ایله ولایت روم ایلینه کچوب ولایتلر فتح ایدن جناب امارت مآب ایالت
نصاب افتخار الامراء الکرام ملک الغزاة والمجاهدین قاتل الکفرة
والمشرکین حاجی اورنوس بک خدمتلی (حضرتلی) دام اقباله یه کندو
قاجیله فتح یلدوکی قلعه کوملجنه یه ودخی قلعه سیروزه ومناستره و بهشته یه
و خورپشته یه وارنجه برسینجاقق یر اعتباری ایله اون کره یوز بیک ایله
ویردم واول ولایتیه عامه سنی غزاة مجاهدین نصب ایتدم و بیوردوم که
کما کان متصرف اولاسن اما صقن سکا روم ایلی ولایتلرن کندو قاجیله
آچدم و فتح ایلدم دیو غرور کلسون. بلکه بونی تحقیق بلکه اولایر
الله تعالی حضرتلرینک در و آندن صو کره رسولنکدر وحق تعالی امریله
رسواندن صکره خلیفه سیده سکا عنایت ایدوب سیزه اوچ طریقاه تعظیم
و تکریم ایلدک. اول بوکه سکا امیر المؤمنین خطابیه خطاب ایلدک وایکنجی
خلعت فاخره و اوچنجی طبل و علم رسول اکرم صلی الله علیه وسلم و طوغ
بر فروغ کوندردم. هیچ بونلر اوزرینه احسان اولمز. سنده بونعمتلره
شکر ایله. اندن الله تعالی حضرتلرینک و رسولنک بیوردوغندن طاشره
وله. بلکه بر مملکته بک اولق ایکی کفهلو بر ترازو در. بر کفه سی

جنت و برکفه سی جهنمدر. ایله شونلردن اوله کورم پیغمبر حضرتلری
آنک برکونن آلتش ییل عبادتدن صایمدر، و بو پندی بلکه روم
ایلی ولایتلری اوزاق یرلردر، آنلرک تدبیر و تدارکاری و سیاست امرنده
البته سیف و قلم اهلندن نجه کمسنه لره محتاج ارله سن. صاقنه سن هیچ
خلقی مال سومکدن اوزکه آزدی ریجی اولیه دنیا ایچون دین امرندن کوز
یومان الله تعالی قورقوسن اونودر. بو خصوصلردن بر کمسنه یه اعتماد
و اعتقاد ایتیه سن. چوقدر بعض کمسنه لر کوندوز صایم و کیجه قایم
کورنور. اما حد ذاتنده پوته طپر. آنلر کیلردن صاقنه سن. زنه ار و زنه ار
بر کمسنه نک ظاهر حاله آلدانیه سن. نته کیم حضرت عمر بن الخطاب رضی
الله عنه ربیع بن زیادک ظاهر حاله باقوب آلداندی. آنلردن حصه
آلاسن، و هرچن بر کمسنه برجانبه وکیل ایدوب کوندرمک و قولانمق
استدو کده اولدن بلد و کک حاله اعتماد ایله. جائزکه صوکره دن بر
دورلو دخی اول، زیرا که بنی آدمک بدنی برحاله انتقال ایدوب برقرار
اولدیغی کبی اول حالنده دخی برقرار دکلد. البته برحالدن برحاله انتقال
ایتمکده در. پس وکیل ایدوب ایشه قولاندوغک کمسنه نک احواله کوز
قولاغ طوته کور. شمادیکی احوالی اسکی احواله اوبارمی، اکا کوره
سوزنه عمل ایله. کمسنه یه غرض اولسون، و بو پندی بلکه چان اطراف
مملکته قودوغک وکیللرک ایو کمسنه لر اولسه رعایانکده حالی ایواولوب
وبکار وکیللری رعایایه چراغلی کبی در. هر کیمک چراغی دیکنور،
عالم یمان اولور، هر برینه امرایله. الی آلتنده اولان مسلمانلری قرنداشلی
بیلوب و سایر رعایای رفیق ایله طوتسونلر. ظلم و تعدی اوزرینه اولماسونلر.
قیامت کوننده کوکدن قار یغار کبی کتب اعمال یغدوغی کونی آکسونلر،
و خلقک فقراسن کوزلسونلر. آنلر سوکلوریدر. فقیرلق بلاسنه
صبر ایدرلر. النده دنیاسی چوق اولانک دنیا سنه نظر ایتزلر، کیندو
حالانه شا کرلردر، شکر ایدرلر، خصوصاً عموم روم ایله شیخ الاسلام

تعیین اولان مفر الفضلاوان فیه زید علمیه اوکات رعایت ایله و کوزله
 علماء عظامک که ورثه سیدالانامدر کمال لطف و شفقت ایله صری و خفی
 طو توب ابقاء دین مبین و اجراء شرع متین انلرک وجود شریف و انفاس
 لطیف لری برکاتنده بیلوب قال رسول الله صلی الله علیه وسلم لحوم العلماء
 مسمومة مقضاسنجه خاطر عاظرین رنجیده ایتکدن بغایت حذر ایدمسن
 و طایفه سپاهییه و وظیفه واحسان ابوابن کشاده قیلوب افراط و تفریطدن
 احتراز ایدوب نه سپاه اولان کمنه دن مناصبی منع ونه آنلردن مقابلده
 برجه آلدوره سن ، و آغجه جواز کوسترمیه سن ، و اقدام ایله اهتمام ایت .
 یکیدک بهادرک حقک و قیجک کسکین طوت و آتک یوکرکن بسله . نعمتک
 مبذول ایله . دائما صروت و احسان ایلکدن خالی اوله ، و قیجک ایله
 فتح اولان ولایتک محصولی خرجه وفا ایتزدیو بحضور اوله . ضرورت
 واقع اولدقه بوجانبه اعلام ایله . بزده اولان دریغ اولمز . ممکن اولدینی
 قدر کوندریلور . و دخی اقدام ایله . اولاکه سلانیک قلعه سن فتح ایدمسن ،
 ممالک کفاری اولاکه دایما احراق ایدمسن ، بوجانبه کلن مکتوبلر کده
 بعض قرا وقف ایتک مراد ایدوب و اولادکه سندن صوکره رعایت
 اولسی ایچون حکم شریفم طلب ایدمسن . ایدمی فتح ایلدیکک ولایتدن نقدر
 وقف ایدرسک و الله العظیم و تالله الکریم مقبولمدر و اولادکه رعایت خصوصی
 باشم اوزره در . بندن صکره دولت عثمانی بنم اولادمدن هر کیمه میسر
 اولورسه سکاوسنک اولادکه کی رعایت ایتیه ، لعنة الله و الملائکة و الناس
 علیهم اجمعین اوزرلرینه اولسون و یارین قیامت کوننده دیوان محشرده
 دعواچی اولوب خصومت ایدرم . بو خصوص دد خاطر که شبهه کتورمیه سن .
 همان الله تعالی حضر تلی اوغررکی آحق و قیلجک کسکین ایدوب اعدای
 دین اوزرینه دایما غالب و مظفر ایلیه آمین . و دایما حضور قلبه اوغور
 آچماغه عون الهی و معجزات رسالت پناهی نأییدی ایله و حاضر و غایب
 رنلرینک ظاهر و باطن هم تلی و بنم خیر دعایم برله کندو که بدرقه و وفادار

•لاحظه ایلوب ادعوار بکم تفرعاً وخفیةً کلمات طیباتی دوش وکردنگه
 حمایل صاوب حسبی الله وحده ونعم الوکیل وردینی ونعم النصیر ذکرنی تکرار
 قیلمه دن خالی اولیوب بنم دوام دولتم بقاسنه دعا ایتکده مساعی جمیله
 ظهوره کتور زب خدمات لازمه یه قیام کوسترد سن ، تحریراً فی اوئل
 شهر شوال المکرم من سنه ثمان وثمانیه وسبعمائنه

بمقام بروسه

الحمیه

بو برات ، غازی خونسکارک عرفانه بر نمونه ایدی . حامهر
 وسائر اجنبی تاریخلرک یازدقلری کبی ، مراد بک عالم ومعرفت
 دوشمانی دکلدی . بکلری درجه سنده علمایه ده حرمت ایدردی .
 فی الحقیقه ، آرادن ییلار ، عصرلر کچدی . حفیدلرینک
 خواجه سی بیله اونی تصویردن کندینی آلامادی . خواجه
 سعدالدینک ، قوصوا صحرا سنده ، مراد بک لسانندن یازدیغی
 دعا ، نفیس بر شاه اثردی :

آب روی حبیب اکرم ایچون
 کربلا ده روان اولان دم ایچون
 شب فرقتده آغلایان کوز ایچون
 ره عشقکده سورینن یوز ایچون
 اهل دردک دل حزینی ایچون
 جانه تأثیر ایدن انینی ایچون
 ایله یاربی لطفکی همراه
 حفظکی ایله بیزه پشت وپناه
 اهل اسلامه اول معین ونصیر
 دست اعدایی بزدن ایله قصیر

باقمه یارب بزم کناهمزه
 نظر ایت جان و دلدن آهمزه
 ایتمه یارب مجاهدینی تلف
 تیر اعدایه قلمه بیزی هدف
 چشمم صقلا کرد معرکه دن
 جند اسلامی بکله مهلکه دن
 بونجه ییل سمی و اجتهادمنی
 غزوات ایچره ینخی آدمزی
 ایتمه یارب قهرک ایلله تباه
 یوزمی خلق ایچنده ایتمه سیاه
 راه دین ایچره بن فدا اولیم
 سپر عسکر هدی اولیم
 دین یولنده بنی شهید ایلله
 آخرتده بنی سعید ایلله
 ملک اسلامی پایمال ایتمه
 منزل فرقه ضلال ایتمه
 کرمک چوقدر اهل اسلامه
 دیلم کیم ایریشه اتمامه

مراد بکک تربه سی ، بروسه نك الك حاکم نقطه سنده در .

اولیا چایی (جلد ۲ ، ص ۴۰) دیورکه :

«قبر شریفی اوزره صیانی ، اوقی ، زوله سی ، قطیفه ایلله قابلی
 اولدنی حالده آصیلی طورر . شهید اولدنی قانلی خلعتی و سائر
 آلات و بساطلری جه محفوظدر» . «آلات و بساط» ده شونلردی :
 ۱ . بیله جک قلعه سنک کلیدی و آناختاری ، ۲ . غازی

خونکارک زرهی ، ۳ . خرقه‌سی ، ۴ . سرپوشی ، ۵ . جیلان
دریسندن سجاده‌سی .

وفاتی متعاقب مصر سلطانی بوسعید بر قوقک وقف
ایتدیکی کلام قدیم جزواری ، صوقوللو محمد پاشانک ودهاسائر
ذواتک وقف ایتدکاری مذهب کلام قدیملرده هپ بهده حفظ
اولونوردی .

تربه ، جسیم چنارلر آلتندهدر . نیلوفر صوی ، تربه‌نک
حاکم بولوندیغی اوواده ، یشیل سوکودلر آلتندن ، کوموش
برشیریدکی وادینک چیچکلری وچمناری آراسندن اوزانوب کیدر .
نیلوفر کوپریسی اوزاقلردن کورونور . تربه‌نک بولوندوغی تپه ،
بروسه‌نک بوتون کوزللاکلرینه حاکمدر . بهارده کللر وکلینجکلرله
سوسله‌نیر . خزانده نارلرک ، المارک ، کستانه‌لرک ، بوکورتانلرک
رنکارنک میوه‌لری کوزلری شنلندیرر .

مراد بکک وفاتی واقعا تورکلری متأثر ایتدی ؛ فقط بو
فلاکتدن روملرکده متأثر اولدقلرینه شبهه یوقدی . لوبو
(کتاب ۱۱۵ ، ص ۴۷۵) دییورکه :

« بوتون روملر ، وبالخاصه یوآنیس پاله اولوغوس ، کندیلرینه
بر چوق فنالق ایتدیکی حالد ، مرادک وفاتی بویوک بر فلاکت تلقی
ایله‌دیلر : بایزید ، قابلرینه او درجه بر فورقو ویرمشدی » (کتاب
۱۱۵ ، ص ۴۷۵) .

بایزید بك ، جلوس ایدر ایتمز ، صربلردن باباسنك انتقامنی
 آلمق ایسته دی (۷۹۱). صربلره قارشی بویوك موفقیتلر قازاندی.
 فقط طالع او کا بردن بیره یوز چویردی. صربلرك (بغدان) پرنسی استه فایله
 برلشمه لری بایزید بكك حرکاتنه سگسته ایراث ایته دی. (ادرنه) یه
 کلدی، اورادن آنا طولویه کچدی. کچرکن ایمپراطور یو آنیس
 پاله اولوغوسه خبر کوندردی. ویرکی مقامنده مدهش بر پارا
 ایسته دی. نیتی، گرمیان اوغلونه ، قائم پدرینه قارشی حرکت
 ایله مکدی. ایمپراطورك اوغلو و سلطنت شریکی مانوئه لك ،
 معاشی و سائره سی ایمپراطور طرفندن تأمین ایدملك اوزره، یوز
 کیشیله معیتنده بولونماسنی امر ایته دی. بیزانس، تورکلرك بودرجه
 حکمی آلتنه کیرمشدی.

بایزید بك آنا طولو سفرینی موفقیتله بیتیردی. تکرار
 روم ایلینه کچدی. اوزمان « بیزانس تکفوری » نه قارشی داها
 متحکمانه ، داها متعظمانه معامله لرده بولونمايه باشلادی.
 تورکلر ظفردن ظفره قوشیوردی. ایمپراطوری الیم بر تلاش
 آلدی. تورکلرك آنی برضربه ایله بیزانسی آلا جغندن قورقوردی.
 بوکا بر چاره آرادی : بیزانسی تحکیم ایتمکدن باشقه امکان
 کورمه دی. عین زمانده ، بو فکرینی بایزیده ده سز دیرمه مک
 لازمدی. یو آنیس مسئله یی اوکجه دن بایزید بکه خبر ویردی.
 بیزانسه کی خراب کلیسالرك انقاضنی طویل تاجغنی ، بونلرك

حرکت ارضدن خراب اولدوقلريني ، انقاضي يکي بناده قوللا-
ناجغني يازدي . انقاضك بر چوغني (يالديزلي قاپي) يه طاشيتدي .
طاشينان ، انقاض دکلدي ؛ غایت بياض ايري مرمر طاشلردی .
بو طاشلرله (يالديزلي قاپي) نك ايکي طرفنه ايکي قوله
ياپديردي . قوله لري ، وقتيله قانتاقوزينوسدن آلدیغني زمان ،
کندی ييقديرمشدي . قوله لرشهری مدافعه ايجوندي ؛ يو آئيس ،
بوني بلای ائمه مک ايجين ، قوله لري سوسله دي ، انشاسنده الكماهر
اوسته لري چالشدیردی .

بايزيد بك بو قورنازلغه قانمادی . ايکي قوله نك شهری
تزينندن زياده بيزانسی تحکيم ايجين اولدوغني آکلادی . خصوصيله
يو آئيسك انشا ايتديرديکي يالکيز ايکي قوله دکلدي ؛ بوکاداها
برچوق تحکيمات ده علاوه ايتديرمشدی که ، بونلر (يالديزلي
قاپي) دن دکزه قادار اوزانيوردی .

بايزيد بك ايمپراطوره شدتلي برامر کوندردی . استحکاملری
درحال ييقماسنی ، عکس تقدیرده ، اوغلو مانوئيلک کوزلريني
اويدوراجغني خبر ويردی . مانوئيل ، اوصيراده (بروسه) سراينده
ایدی . يو آئيس بو تهديددن صوک درجه اورکدی ، بايزيد
بکک امرينه اطاعتدن باشقه برشی ياپامادی . فقط بو حقارت
ايمپراطوری چوق متأثر ايتدی ، کنديسنده اساساً داملا عاتی ده
واردی . سفاهتک اعصابنه ويرديکي ضعف ده بوکا انضمام ايتمشدی .

بایزید، یزانسک یالکیز سورلرینی ییقدیرمادی؛ ایمپراطورلرینک ده وجودینی ده ویرمه یه موفق اولدی .

یوآنیس ، کوزل نهودوکیانک قولاری آراسنده وفات ایتدی (۱۳۹۱م ، ۷۹۴هـ). نهودوکیا، طربزون ایمپراطوری آلکسیوس قومنه نوسک قیزیدی . ایمپراطور بونی اوغلو مانوئه له آلا جقدی . قیزک کوزلاکینی کورونجه ، دایاناماش ، کندی آلمشدی . اسکی زوجه سی الهنی چوقدن وفات ایتمشدی . الهنی ، اورخان بکک بالیدیزی . طالعسر قادین ، بر زمانلر قوجه سیله باباسی آراسنده کی مجادله لردن خیلی اوزولمشدی . یوآنیس ، قادینلره چوق مجلوبدی . بونسکه برابر الهنی اوکا مربوطیتدن اصلا خالی قالمازدی . یوآنیس دن اوچ ارکک ، اوچ ده قیز اولادی دنیا یه کلمشدی . یوآنیس ، یاقیشیق لیدی . کندیسنه (کوزل یانی ، قالو یانی) دیرلردی .

مانوئه ل ، باباسنک وفاتی خبر آلدیغی زمان ، (بروسه) ده ایدی ؛ بایزید بکک یاننده رهن قونولمشدی . اساساً کندی ، اون سکیز سنه اول ، سلطنت وارثی اعلان ایدلمش ، و ایمپراطورلق تاجی کیمشدی . بوسفر ، باباسنک وفاتی دویونجه ، بایزید بکک خبر ویرمه دی ، (بروسه) دن چیقدی ، یزانسه کلدی .

مانوئه لک هیچ رقیبی یوقدی : بویوک قارده شی آندرونیکوس اولمشدی ؛ ته اودوروس (لا کده مونیا) والیسیدی . بونسکه برابر

اونك بر رقیبی واردی كه ، هپسندن مدهشدی : بایزید بك .
 بایزید بك ، ظفر نشئه لر یله سرمستدی . مانوئه لی بوتون سلفارندن
 زیاده تحکمی آلتنه آلا جغه شبهه یوقدی . بیزانس خاقی ایسه
 یکی ایمپراطوردن بك چوق شیر امید ایدیوردی .
 فی الحقیقه ، بایزید بك ، مانوئه لك کندیسنه خبر ویرمه دن
 کیدیسنه بك زیاده حد تلندی . سرای خلقنی او یله برخاشلادی كه ،
 هر کس نه یاپا جغنی شاشیردی . مانوئه لی ، اولو دیری ، بولوب
 کتیرمه لرینی سویله دی . یو آنیسك او غلونی اله کچیره مینجه ،
 او کاکارشی حرب اعلاننه وسیله لر آرادى . کندیسنه خبر یوللادی :
 بیزانسه بر قاضی بولوندورماسنی تکلیف ایتدی ؛ بوقاضی ،
 مخاصم طرف هانکی ملتن اولورسه اولسون ، هر هانکی بر
 توركك ایشنه باقا جقدی . بایزید بك : « بر مسلم ، کافر لر او کنده
 محاکمه اولونا ماز » دییوردی . کذا ، مانوئه لدن داها باشقه شیرده
 ایسته یوردی : مانوئه ل ویرکی یه دوام ایده جك ، باباسی کبی
 بایزید بكك خراج کذارى اولاجقدی . بوتکلیفلری تبلیغه مأمور
 هیئت ایمپراطور مانوئه له آکلاتا جقلردی كه ، شاید بوشرطلری
 ایفا ایتیه جك اولورسه ، (بیزانس) سورلرندن دیشاری بر آدم
 آتماسین ؛ چونکه سورك خارجی بایزید بكك مالکانه سیدر .
 ایمپراطور مانوئه ل بو محقرانه تکلیفلردن صیقیلدی . فقط
 نه یاپایلیردی ؟ نهایت طاتلی بر جواب ویرمه یه مجبور اولدی .

بایزید بکک هیئت ارکانی ممنون ایتدی ؛ فقط بایزید بک ممنون اولمادی ، مانوئهله قارشی انتقامدن باشقه چاره اولمادیغنه قرار ویردی . اوردوسنی طویلادی ، اوچ قوله آیردی . برینک باشنه کندی کچدی ، دوغرو (تراکیا) یه کیردی . مرمره ساحلنده (پانید ، پاقتیا) شهرندن بیزانس سورینه وارنجیه قادار بوتون کویلری ، قصبه لری پریشان ، اهالیسنک ایلری کلنلرینی اسیر ایتدی . (سلانیک) اطرافنی کاملاً آلدی ، بیزانسه قارشی برشی یاممادی ، یالکیز صیقی بر صورتده قوشاتدی . شهره ارزاق کیرمه بی امکانشز برحاله کتیردی .

ایکینجی قوی طورخان بکک اداره سنه ویردی . طورخان بک بوتون قره دکز ساحلرینی تاراج ایتدی . اوچونجی قوله اوره نوس بکی تعیین ایلهدی . اوره نوسک غازیلری بر سیل کبی (موره) یه دوغرو آقوب کیتدی . (لاکه ده مونیا) ، (آخائی) تورکلرألینه کچدی . اوصیراده بورالری یکی ایمپراطور مانوئه لک قارده شی ته اودوروس اداره ایدیوردی .

مانوئه ل ، بیزانس ایچنده الآن محصوردی . محاصره آلتنده کچیردیکی حیات ، آلمیدی . خلق آجلقدن قیریلیوردی . برچوقلری ، اطرافنده فریاد ایتدکجه ، مانوئه ل نه یاپاچغنی شاشیریوردی . نهایت اوده ، سلفلری کبی ، آوروپا حکمدارلرینه مراجعته قرار ویردی ، بیزانسه وضعیتنی آکلاتدی . شهر تورکلرألنه کچه جک

اولورسه ، تورك استیلاسنه قارشى خریستیانلغك یكانه سدی
اولان بر بلدهك چوکه جگنی ، انقاضندن قویان پارچه لرك
آوروپاده بر چوق تختلر دویره جگنی ایضاح ایتدی . کذا ،
(قدس) یولنك ده کندیلرینه ابدیاً قاپالی قالا جغنی ، خریستیانلقدن
هیچ اثر قالمایا جغنی تصویر ایتدی .

آوروپادن تورکلره قارشى امداد بکله ین ، یالکیز ایمپراطور
مانوئل دکلدی ؛ ماجار قرالی لوئینك خلفی سیکیزمونده
امداد دییه فریاد ایدیوردی . فقط آوروپاده بوسسلره قولاق
آسان اولمادی . سیکیز موند ، یالکیز کندی قوتیه بایزید
بکک اوردوسنه قارشى مقابله ایده میه جگنی بیلوردی . بوسبیدن
بایزید بکله او یوشمقدن باشقه چاره اولمادیغنه قانع اولدی .
(بروسه) سراینه بر ایاجی یوللامایه قرار ویردی . ایاجی ، کندیسنه
عائد اولمایان یرلری ضبطه نه صلاحیتی اولدوغنی بایزید بکک نازکانه
صوراجقدی . فی الحقیقه ، بایزید بک بولغارستاندن خیلی یرلر
آلمشدی ؛ بولغارستان ایسه ماجارلرک حمایه سنده ایدی .

ایاجی ، (بروسه) یه کلدی . بایزید بکک حضورینه چیقدی .
بولغارستان اراضیسنك هانکی حقه مستنداً آ لیندیغنی صورتی .
بایزید بک هیچ طورینی بوزمادی ، ایاجی بی سکونتله دیکله دی .
آلیندن طوتدی ، قیمتدار سلاحلری احتوا ایدن کنیش بر
صالونه کوتوردی ، آلینی سلاحلره دوغرو اوزاتدی ، ایکی کله

سویله‌دی :

— ایشته سبب ، ایشته حق !

آرتق بوکا قارشی سویلنه‌جك جواب یوقدی . سیکیزموند
 بوجوانی آلینجه ، بایزید بکه قارشی مدافعه‌دن باشقه یاپیلاجق
 برشی اولمادیغنی آکلادی . آلماتیادن ، ماجارستان وبوهمیادن
 برچوق عسکر طوپلادی . خریستیان پرنسارک کافه‌سندن
 یاردیم ایسته‌مه‌یه باشلادی . پاپا دوقوزنجی بونیفاسه مراجعت
 ایتدی . ذاتاً ایمپراطور مانوئل ده اوکا مراجعت ایتشدی .

پاپا هر طرفه امرنامه لر کوندردی . اوردو پاده ، حرب هر طرفی
 قاصوب قووریوردی . سیکیز موندك سوزینی دیکلیه‌جك پک آز
 خریستیان حکمدار واردی . بونکله برابر سیکیز موند فرانسه
 قرالنه مراجعتی موافق کوردی . قرال آلتنجی شارله برهیئت
 کوندردی ، تورک تهله‌کسنی مدهش بر صورتده تصویر ایتدی .
 بایزید بک کندیسنه مکتوب یوللادیغنی ، ایمپراطور انک
 کوبکنه قادار ایلریلیه‌رک کندیسیله چارپیشا‌جغنی ، اوراده
 قیلیجی تجربه ایتدکن صوکر ، ایتالیا به‌کجه‌جکنی ، آلمانیا ده
 یق‌دیغنی تاجلری (قاپیتول) ه کتیروب قویا‌جغنی ، (سن پیر)
 محرابنده آتیه یولاف یدیره‌جکنی ، بیزانس ایمپراطورینی وداها
 برچوق حکمدارلری ییشنده سوروکلیه‌رک رومایه کیره‌جکنی
 آکلادی . بونلر ، قرالی تشویق ایچین سویله‌نن مبالغه‌لردی .

مع مافیه فرانسه ده لازم کلن تأثیری یاپدی . برچوق سه نیورلر
تورکاره قارشی حرب ایچین قرالدن مساعده ایسته دیلر .

قرالک عموجه سی ، بورغونیا دوقه سی جسور فیلیپ ،
قرالی تشویق ایتدی ؛ حتی بویوک اوغلو قونت دونه ودرک
سردار تعین اولونماسنی ایسته دی . قرالک سراینده بر هیئت
طوپلاندى ، فرانسز اوردوسنک یالکیزسیکیز موندی دوشمانلرندن
قورتارماسنه دکل ، بولغارستانله (بیزانس) آراسنده کی ممالکی
طاراماسنه ، اوراده تک بر تورک بر اقاماسنه ، پایتختنده محصور
قالان بیزانس ایمپراطوری مانوئل پاله اولوغوسی ده خلاص
ایتدکن صوگرا ، (قدس) ی اسلاملر آلندن قورتارمق
ایچین فلسطین یوللرینی طوتماسنه ده قرار ویرلدى . بو قرار ،
قرال طرفندن ده قبول ایدلدى . عسکر ، پارا ، آذربر زمانده
طوپلاندى ، اوردو فرانسه دن بویوک املارله یوله قویولدى .
بایزید بکک بو حاضر لقلردن هیچ خبری یوقدی . او ، بیزانس
ایمپراطورینک قارشیسنه کچمش ، اونکله اوغراشوب دورویوردی .
محاصره الان دوام ایدیوردی . فقط بیزانسنک آلتماسی اودرجه
قولای اولامیه جتدی . بایزید بک ، اوکی حاللرده ، اوزون
اوزادی صبر ایده مزدی . عزمی و شدتی اوکا هرشیئه آن
واحدده نائلیت احتراصنی ویرمشدی . ذاتاً (آنقره) ده ،
(قوصوا) ده بویله حرکت ایتمه مشدی ؟ ییلدیرم نامی ده اوکا

سرعتندن کنایه اولارق ویرلمشدی .

بایزید بك شهرى آمازدن اول، بوتون پاله اولوغوس خاندانى
حضورینه کتیرتدی. (لا کده مونیا) والیسی ته اودوروسی
چاغیردی . ته اودوروس ییلدیریمك حضورینه کلدی ، اوراده
قاردهشی ایمپراطور مانه ثولی ده کورونجه حیرتله ایچنده قالدی.
ییلدیریم ، عین زمانده بیزانس ایمپراطورینی ده حضورینه
چاغیرمشدی .

ایکی قاردهشی مدهش بر قورقو آلدی . ایکسی ده بایزید
بکی دوشمان ییلدکله حالده ، دعوتنه اجابتلاری غریبیدی . بوده
کوستریوردی که ، بوتون بیزانس ده، ایمپراطورلری ده تورکله
قارشى مطیع برر آلتدن عبارتدی .

بر آز صوکره ، کنج یو آنیس پاله اولوغوس ده کلدی ؛
بو ، وفات ایدن بویوک قاردهشاری آندرونیکوسك اوغلیدی .
بایزید بك ، بوتون بیزانس خاندانك قارشیسنه کچدی . اونلره
شوسوزلری سویلهدی :

— خراجکدارلریمه تجاوزایدلش ، حتی اونلرک مالکانه لرینی
بیله ضبطه قیام اولونمش . بن بویله بر جرأته تحمل ایدمم .
بوکاشدتلی بر جزا لازم .

هپسی ده تتره دیلر . بوتجاوزی یاپان کیمدی ؟ (لا کده
مونیا) والیسی ته اودوروس . تجاوز ایتدیکی یرده : (لاقونیا)

(مونه م بازی) بکلکیدی؛ بوبکلک تورکاره خراجکنداردی.
حاکمی ده پول ماموناسدی .

بایزید بک، بوتهدیدی یاپدقدن صوگرا، ایپراطور مانوئله
یکینی یو آنیسی براقدی، ته اودوروسی صالیویرمه دی. (تراکیا)
بلده لرینی دولاشدی، ته اودوروسی چاغیردی، کندیسندن
(آرغوس) بلده سنی ایسته دی. ته اودوروس راضی اولدی،
آداملرینه امرلر کوندردی. فقط امرلرینک قصداً بطی بر صورتده
اجرا ایدلمه سی اوکا وقت قازاندیردی. نهایت بایزیدک الندن
قاچمايه موفق اولدی. مع مافیه بوکا بایزیدک آداملری ده یاردیم
ایتمشردی .

ته اودوروسک قاچماسی ییلدیریمی بوسبوتون حدتlendirدی.
بونک شدتلی بر انتقامنی آلاجقدی. فقط تام اوصیراده،
ماجارستاندن اوزرینه یوروین انتقام سیلنک سرحدلره قادار
یاقلاشدیغنی خبر آلدی. فرانسرلر (بودین) ه کیشلردی.
ییلدیریم، اوردوسنی (ادرنه) ده طوپلادی. سریع یورویشلرله
(نیکبولی) یه دوغرو ایلریله دی. دشمنک قوتی و انتظامنی
اوکرندی، درحال محاربه نظامی آلدی .

سیکیز موند ایسه، او ائناده، مجلسلر عقد ایدیور،
سردارلق مسئله سنی حل ایله اوغراشیوردی. فرانسرلرک بوشرفلی
موقعی کندیلری آلاجقلرینه شبهه یوقدی. مناقشه اوزون

سوردی ، نهایت ماجارلر راضی اولدیلر .

تورك بکری اوزاقلردن کورونمه یه باشلامشدی . فرانسزلر سیکیزموندک عسکرلرینی تنظیم ایتمه سنی بیله بکله مه دیلر ، ایلر یله ین تورکلره شدتلی بر هجوم ایتدیلر . تورکلر ضعیف بر مقابله ده بولوندیلر . فرانسزلره قارشى ساخته بر رجعت یاپدیلر ، اونلر ایچریلره دوغرو چکدیلر . ییلدیریم ، اوردوسیله برابر ، کریده بکلیوردی ؛ فرانسزلرک بیننه بوتون شدتیه اینمکه حاضر دی . فرانسزلری تام زده لیه جک بر نقطه یه قادار چکدی . یاپدقلى خطالری بر لحظه کوزندن قاچیرمادی . نهایت ، بردنبره ، او یله بر سرعتله اوزرلرینه آتیلدی که ، بیکلرجه فرانسزدن آنجق اوچ یوز کیشی قورتولا بیلدی .

کریده ، بویوک بر قوت واردی . فرانسزلرک رجعتی اونلری ده پریشان ایتدی . تورکلر شدتلی بر تعقیب اجرا ایتدیلر ، بوتعقیبده او یله بر شدت و سرعت کوستردیلر که ، اهل صلیب اوردوسنی احیایه موفق اولدیلر . ظفر غایت پارلاقدی . دوشمانک اوردو کاهی ، اشیاسی ، مالز مه سی ، قونت دونه وهرک آلتون قابلری ، مجوهرلری اشیاسی ، حتی کندی ، بایزید بکک النده ایدی . قونت دونه وهرک چادیرلری ، یشیل قابلیدی . ایچنده قرال سرایلرینه یاقیشاجق زینت اشیاسی و مزینات واردی .

ماجار قرالی سیکیز موند ، آتنک حیزیله ، حیاتی قورتاراییلمشدی . نهایت تصادف ، اوکا طونا قییلرنده بر قایق بولدوردی ، مغلوب قرال قایغه آتلادی . قره دکیز ساحلارینی تعقیب ایدهرک بیزانسه جان آتدی .

ایمپراطور مانوئل ، بایزیدک مغلوبیت خبرینی بکله یوردی . حالبوکه تورکلرک غربدن کلن آلمانلر ، انکلیزلر و فرانسلردن مرکب اک متین قوتلری ده قیلیجی و بازوسیله پریشان ایتدیکنی خبر آلینجه ، بوتون املارینک محو اولدوغنی کوردی .

سیکیز موند ، بیزانسه اپی مدت قالدی . (نیکبولی) فلاکتندن آنجق برسنه صوکر ا مملکتنه دونه بیلدی . ییلایریم ، قونت دونه وهری ده صالیویردی . فقط اوکاشوسوزلری سویله مکدن ده کندینی آلامادی :

— ایشته سنی ، بکا قارشى سلاح قوللانديغك حالدہ ، ینه عفو ایدیورم . مملکتکجه کیت ، ایسترسهک ینه بوتون ملتلری باشکه طوپلا ، کل . بکا ینه بویله پارلاق ظفرلر قازانمق فرصتی ویررسهک ممنون اولورم .

تورکلرک بوپارلاق ظفرنده قارادمیرطاش بک ده حاضردی . حتی ، عاشق پاشا زاده نک روایتنه کوره ، بایزیدی (بیزانس) اوزرینه یورومیه اک زیاده تشویق ایدن ده ، او ایمش . عاشق پاشا زاده ، نیکبولی ظفرینک تفصیلاتنی قارا دمیر طاشک اوغلو

اومور بكدن ايشيدوب يازمش (عاشق پاشا زاده ، ص ۶۶) :
 « قره دمير طاشك اوغلو واردى . اومور بك ديرلردى .
 بواوغراشى فقيره اول خبر ويردى » .

بيزانس مؤرخلى نيكبولى ظفرى ۱۳۹۶ ايلولى نهايتنده يعنى
 ۷۹۹ ده قيد ايدىورلر . تورك مؤرخلى ايسه ۷۹۳ يعنى ۱۳۹۲ ده
 كوستريورلر . غرب مؤرخلرينك فكرنجه ، توركار ۱۳۹۲ ده كوچوك
 نيكبوليده اوافق بر بوزغونلغه اوغرامشلىر ، بوبوزغونلغى اونوتدورمق
 ايچين ۱۳۹۶ ده قازاندىقري ظفرى ۱۳۹۲ تاريخنه آتمشلىر . بواحتمال
 وارد اولابيلير ؛ چونكه تاريخلري مزده پك چوق وقعهلر ا كسيك اولدوغى
 كى تاريخلرده ياكشدر . خصوصيله بوبا كاشلق هجرى تاريخ يوزندن
 بوسبوتون آتمشدر . بناءً عليه عين محاربه يه اشتراك ايدن فرانسىزلك
 نشر ياتيله نيكبولى ده اسير اولان باويه رالى شيلتن بهر كهر ك خاطر اتي
 اك دوغرو بروثيقه عد ايديله بيلير . فرانسىز منابعى نيكبولى ظفرينك
 ۲۵ ايلول ۱۳۹۶ ده وقوعه كاديكنى صراحةً كوستردىكى كى ،
 شيلتن بهر كهر ده (۳۰ ايلول ۱۳۹۶) اولمق اوزره تصريح ايتمشدر كه ،
 دوغروسى ده بودر (كوستاو قيلينغ ، نيكبولى محاربه يى ، ص ۷ -
 شيلتن بهر كهر ، خاطرات ، ص ۲۶) . تاريخلري مزده ايسه بوپارلاق
 ظفر ك نه كونى ، نه ده آيى بلليدر . شو حالده (نيكبولى ظفرى) تاريخلري مزك
 نقلى اوزره ۷۹۳ ده دكل ، ۷۹۹ ده وقوعه كمشدر .

فرانسىزلردن اسير دوشنلر : قونت دو ، قونت دولامارش ،
 قونت دوبار ، سير ده قوسى ، سير دولاتره موى ، ماره شال
 بوسيقو ، وقور قوسىز ژاندى . بونلر (ادرنه) طريقيله (كليبولى) يه ،
 اورادن ده (ميخالييج) ه كوندريلايلر . نيكبولى ظفرى (پارس) ي

هیجانه دوشوردی. سرای محافل فلاحی کتی ییل باشی کونی او کرده نه .
 بیللمشلردی . خبری کتیرن ، ژان دوهیل ایدی . بایزید ،
 بورغونیا دوقنک فدیة نجات حقنده کی فکرینی آکلامق ایچین ،
 اونی فرانسه قرالنه و بورغونیا دوقنه صورت مخصوصه ده یوللامشدی .
 اساساً یکبولی فلاحی شایع اولور او لماز ، بروسه سراینه کوندر ملک
 اوزره فرانسه ده چار چابوق بر هیئت تشکیل ایدلدی . قرال
 طرفندن مابینجیسی و مشاوری شاطو موران ، بورغونیا دوقی
 فیلیپ طرفندن ده بورغونیا والیسی ژان دوورژی ایله ژیلبر
 دولو و درغهم تعیین اولوندی . مرخصلرک معیتند بر چوق کشیلرله
 برابر آتله ، کوپکار و طوغانلرده واردی . یالکز بونلری سوق
 ایچین یکرمی دوت اوشاق ویرلمشدی . سفارت هیئت بایزیده
 قیمتدار هدیه لر ، آوه متعلق شیلرده کوتوریورلردی . بایزیدک آو
 صراقی اونلرجه معلومدی . مثلاً هدیه لر میاننده اون ایکی آق
 طوغان واردی که ، بونلر پارسدن و آلمانیا دن صاتین آلمشدی .
 اشیانک اهمیتلری : اینجی و آلماس ایشله مه لی طوغانجی آدیونلری ،
 اون ایکی آغر قوشوم واکر طاقیدی . بو طاقم ، غایت قیمتدار
 بر قوماشله مزیندی . قوماشی آلتون چیویلر و کلرله قابلامشلردی .
 صاچاقلری و ایشله مه سی کاملاً قبریس صیرماسندندی . بالخاصه
 ایکی آت واردی که ، بورغونیا دوقنک آتلینه مخصوص اورتولرله
 اورتولمشدی . کذا ، اون ایری قوپویله تازیله ، غایت قیمتدار

(ره نس) قوماشلری، نفیس آل چوخه لر، (آراس) خالیلری ده واردی .

بو خالیلره اسکندرک حیاتنه عائد رسمه یاپیلماشدی. بایزیدک اسکندرله محلوبیتنی بیلدکلری ایچین خالیلری صورت مخصوصه ده یاپدیرمشلردی. آلتون و کوموش طاقلری آره سنده، بر آلتون قوپا جالب دقتدی. بوتون بوهدیه لر آلتی بار کیره یوکلهدلمشدی. سفارت هیئتندن وهرژی ماجارستان یولنی تعقیب ایتدی. شاطو مورانله ژیلبه رده (میلان) یولنی اختیار ایتدیله. سببی ده، میلان دوقی ژان غاله آسک بایزید نزدنده توسطنی رجا ایله مکدی. هیئت، میلانه کلیرکن، اولجه بایزیدک فرانسه قرالی نزدینه کوندردیکی ژان دو هیل (بروسه) یه دونمش، سفارت هیئتک تورک طوپراغندن کچه بیلیمه لری ایچین بایزیدک مساعده سنی آلمش، (بودین) ه کلشدی. شاطو موران، میلان دوقه سنک بایزیده توصیه نامه سنی آلیر آماز، (بودین) ه کلدی. قرال سکیزموند، بایزیدک قیلیبجندن قورتولور قورتولماز ماجارستانه قاچمشدی. او ائنده اوده (بودین) ده ایدی. قرال، هیئت پارلاق بر صورتده قارشیلادی؛ بایزید بکه کیدن هدیه لرده هیچ ده ممنون اولمادی. هیئت بالقانلردن سرعتله کچدی، آناطولویه کلدی. بیلدیرم بایزید، اوصیراده، بوتون فرانسز اسیرلریله برابر (بروسه) یه آلتش فرسخ مسافه ده بر قصبه ده ایدی. قصبه نک

آدی (بولی) ، احتمالکه (ویره بولی) ایدی . بایزید بك ، هیئتله مذاکرهیه باشلادی . مذاکره ۱۳۹۷ سنه سی حزراننده ختامه ایردی . اسیر دوشن شوالیهلرک فدیة نجاتی ایکی یوز بیک فلوری آلتونی اولمق اوزره قرارلاشدیریلدی . شوالیهلردن برچوغی ، ترموی ، دوسی ، قونت دو اولمشلردی . قونت دو غاطهده (سن فرانساوا) مناسترینه کومولمشدی . حتی ۱۷۴۷ یه قدار مزاری اوراده ایدی .

ییلدیرم بایزید ، هیئتله پارلاق ضیافتلر ویردی . حتی برده آو ترتیب ایتدی . بایزید بك محشم اولری فرانسرزادکانک کوزلرینی قاماشدیردی .

شاطوموران ، وظیفه سنی ایفا ایتدکن صو کرا (بروسه) دن کچدی ، بو اثناده سفارت هیئتندن ژباہر وفات ایتدی . شاطو مورانه وەرژی آنا لولوسا حلدن ایلك حرکت ایدن کمی یه بیندیلر (مدلی) یه ، اورادن (رودوس) ، داها صو کرا (وندیک) ، کلدیلر ، اسیرلرک قورتولدوغنی شوق و سرورله آکلاتدیلر . ایلولک ایلك کونلرنده ده فرانسه طوپراغنه آیق باصدیلر .

بایزید بك ، فدیة نجاته وندیک دوقنک کفالتیه راضی اولدوغی ایچین ، قورقوسز ژانله دیکر شوالیهلری وندیک دوقی ژان غاله آس فدیة نجات کلنجه یه قانار صالیویرمه دی . فدیة نجاتک کله سی آیلرجه سوردی . نهایت کلدی . شباطده اونلرد

فرانسیه دونه یل دیلر (شلومبه ژره ، شاطوموران) .
 بایزید بك ، بو ظفر دن پارلاق بر صورتده استفاده ایتدی .
 روملر كده ، آوروپا لیلر كده آناتولو ایله رابطه لرینی كسمك
 ایچین بوغاز ایچنه ، تاریخلریمیزك تعیری وجه ایله ، اسکندر
 بوغازینه بر حصار انشا ایتدیردی . حصار ، نیکبولی ظفرینك
 آبدوسی حکمنده ایدی . کذا « كفار کیلرینی مرور و عبور دن
 منع ایچون طویلر و مستحفظلر قودیلر که الان (گوزله حصار)
 دیو تسمیه اولمشدر » (۱) .

تاریخلریمیزده حصارك انشا تاریخنی ۷۹۹ اولماسنه کورده ، نیکبولی
 ظفرینك ده عین تاریخده اولدوغنه هیچ شبهه قالماز (۲) .

بایزید بك ، ایمپراطور مانوئل پاله اولوغوسك ، نیکبولی
 ظفرندن اول ، ماجارلری علینه ناصل تشویق ایتدیکنی
 یلیوردی . عاشق پاشا زاده دییور که : « بو طرفدن استانبولاك
 رجاسوسن طوتدیلر ، النده کاغدی دخی وار . انکروسه واره ،
 خبر ایده کم ، ترك سنك اوزرینه وارییور ، غافل اوله . جاسوسی
 لوتدیلر ، بایزید خانه کتیردیلر ، جاسوس دخی طوغرو خبر
 بردی ، بوندن او کدین خبر کوندرمشلردر دیو » (۳) .

(۲) صحائف الاخبار ، جلد ۳ ، ص ۳۱۰

(۲) تاج التواریخ ، جلد ۱ ، ص ۱۴۱

(۳) عاشق پاشا زاده ، ص ۶۵

شو حالده ییلدیریم بایزیدك ایمپراطور مانوئه لدن انتقام آلاماسی
غیر قابلدی. بایزیدك ایمپراطوره در حال خبر کوندردی. بیزانسی
تسلیم ایتمه سنی ایسته دی. ایمپراطور، شهرک سورلرینه و تورکارک
قلعه محاصره سنده کی تجربه سزاسکارینه کووه ندی. فی الحقیقه
تورکارک قره و دکنز قوتلری شهری هر طرفدن قوشا تاجق
وصیقیشدیراجق درجه ده دکادی. اساساً ایمپراطور فرانسه دن ده
امداد قوتی ایسته مشدی. احتمالکه بوقوت ده کلیر دییه امید
ایدیوردی. مانوئه لك آدمی ته اودوروس قانتاقوزینوس، فرانسه ده
قرال آلتنجی شارل ایله مذاکره یه دوام ایدیوردی. شارل،
ایمپراطور مانوئه له بیک آلتون کوندرمشدی؛ بناءً علیه امداد
قوتی کوندره جکنه ده شهره یوقدی. مانوئه ل، اساساً وزیراعظم
علی پاشایی ده آلدی ایتمشدی. ییلدیریمك شدتی آنجق اونك
سایه سنده ده تسکین ایده ییلیردی. فی الحقیقه، علی پاشا بوکاموفق
اولدی. ییلدیریمی حرب و ضربدن واز کچیردی؛ فقط بایزید
بك سیاسی واسطه لرله مقصدینه واصل اولمقدنینه واز کچه دی.
ایمپراطورک بویوک قارده شی یوآنسی چاغیردی. ساوجی بك
عصیاننده یوآنسیك کوزلری خفیفجه سقط ایدلمشدی.
(سیلیوری) ده، ساکن برحیات کچیریوردی. بایزید بك
یوآنسیه ایمپراطورلق تکلیف ایدنجه، جسارته کلدی.
اطرافنده کی آدامارک تشویق، جرأتی بوسبوتون آرتدیردی.

ييلديریم ، یو آنیسه بیزانس تاجنه طالب اولماسنی تکلیف
ایتدی . مادامکه ایمپراطور مانوئه لك بویوك قارده شی آندرونیکوسك
اوغلیدی ، بوكا بالطبع حتی واردی . یو آنیس ، ييلديریمك
آرزولرینه تماماً تسلیم اولدی ، نه امر ایدرسه یاپاجغنه دائرسوز
ویردی . بايزيد بك ، اول (سیلیوری) ایله مهم قلعه لك کندیسنه
ترکینی ایلری سوردی . بعده مانوئه له یاپدیغی تکلیفلری
تکرار ایتدی : بیزانسه ، روملرله تجارت ایدن توركلره
مخصوص براسلام محله سی ، برجامع ، بر محكمه یاپیلاجق ،
محكمه ده قاضیلر حکم ویره جکدی . یو آنیس دوغرودن دوغرویه
کندیسنی بايزيدك خراجکذاری طانیاجقدی . آراده صیراده
بروسه سراینه کله جك ، برتابع صفتیله اوراده کونلرجه قالاجقدی .
ييلديریم نه زمان آرزوایدرسه ، مقدار کافی عسکرله معیتنه التحاق
ایده جکدی . بايزيدك ، ایمپراطور مانوئه لك یکننی بوشرطله
ایمپراطوره شریك نصب ایلیه جکدی .

یو آنیس بونلرک هپسینه راضی اولدی . فقط بو شرطلر
ایمپراطور مانوئه لی دهشت ایچنده براقدی . معاهده غایت آغیردی ،
مانوئه ل طانیماق ایسته دی . بیزانس خلقنه امنیتی واردی .
اهالی کندیسنه قارشى دائماً بویوك بر توجه کوستوردی .
مانوئه ل ، اول خلقك کندیسنه قارشى محبتنی دهنه مك ، داها
صوکراده توركلره قارشى قویمق ایسته دی .

نه زمان بر نطق ایراد ایتسه ، اهالی وجد و غلیانله کندیسنه
 بوتون صمیمیتلرینی کوسترردی . عجیبا بوصمیمیت حالاباقیمیدی ؟
 مانوئله بونی آکلامق ایسته دی . فقط امیدلرینک کاملاً بوشه
 چیقدیغنی کوردی : اهالی ، مانوئله یکنی یو آنیسله اویوشماسنی
 توصیه ایدیوردی . حتی بیزانس خالق بو قدرلده قالمادی ؛
 مانوئله ده ویرمک ایچین کیزلی اجتماعلر بیلله عقدینه باشلادی .
 مانوئله ، بونی سزر سزمز ، بوسبوتون تاجندن محروم اولمقدانسه ،
 ایمپراطور یاشامق ایسته دی . اساساً بایزیدک ، یو آنیسک معیتنه
 بر تورک اوردوسی ویرمش ، بیزانس اوکلرینه یوللامشدی .
 بوتهدید ایمپراطور مانوئله بوسبوتون قورقوتدی . یکنی یو آنیسله
 آداملرندن برینی یوللادی . یانی باشنده ، کندیسنک ده بیزانس
 تختنه اوطورماسنه راضی اولدی .

بایزیدک ، یو آنیسی تک باشنه ایمپراطور یایمق فکرنده
 ایدی . مانوئله ک یوموشادیغنی کورونجه ، بوتصوردن وازچکدی .
 مع مافیله بایزیدک بو فراغتنده سیاسی مقصدلری واردی :
 عموجه ایله یکنی بر تختده بولوندورمق ، ایکیسنی بربری علیه
 تشویق ایتک ، ایکیسنی ده عین زمانده بیتاب براقمق دیمکدی .
 ایکی ایمپراطور آراسنده چیقاجق منازعلر ییلدیرم ایچین دائماً
 فائده لیدی . بیزانسی ، سورلرینک متاتی طیشاریدن فتحه مانع
 اولیوردی . ییلدیرم ، بومعظم وکهنه بلده یی ایچندن چوروتورک
 فتح ایله یی داها موافق کوریوردی .

۵ . بايزيد بك واوغوللارى

توركلار ، شوكت وسطوتك اك يوكسك نقطه سنده ايدىلر .
آرتق هيچ بر دوشماندن ، هيچ قوتدن پروالرى قالمامشدى .
آوروپاده تورك سلاحنه قارشى دوراجق هيچ بر دولت يوقدى .
پاپاده ، بالقان حكومتلىرى ده ، حتى اونلرك اك قوتلىسى اولان ماجار
قرالى ده ، تورك سلاحنه قارشى طالعلرىنى دهنه مشىردى . توركلار
ايچين بر فلاكت كله بيليرسه ، آنجق آناطولودن ، كندى
عرقداشلىرىندن كله بيليردى . مع مافيه شيمديلك بوتهاكه ده موجود
دكلى .

بروسه سرايى ، جهان سياستنىك هدفيدى . پاپانك و آوروپانك
نظر نده اك مدهش فورتنه لر (كشيلىش) تپه لرندن ظهورايدى بيليردى .
بو قارلى وچيچكلى طاغىك اتيك كنده يشىل بر بلده واردى كه ،
اوراسى تورك سطوتنىك مركزى ايدى .

پيكار باشنىك يوكسك آغاجلىرى آلتىندن درملر چاغلايه
چاغلايه آقار ، (آق چغلان) « نام نهر مانند آب پاكك »

لطافتی بروسه خلقنك تشنه قلیلرینی تسکین ایدردی . خلقنك
اك سودیکي یر ، (غازی خونکار) مسیره سیدی . بومسیره نك
جوارنده ، فیضلی طوپراقلردن فیشقیران صیجاق صولر ، یاما جالرنده
یوکسه لن میوه لی آغاجلر ، سایه لرنده اوطورولان چنارلر ،
سرحدلره غازیلر وقهرمانلر کوندرن خلقنك یکانه تفرجکا هیدی .
اولیا چلبی بیله ، عصرلردن صوکر ، بولطیف مسیره نك تصویرینی
آکلاته آکلاته بیتیره میوردی :

« کشیش طاغنك دامننده بر پشته عالی اوزرند . بر وادیدرکه ،
جمله بروسه شهری اورادن نمایاندر . چنار ، فرحفا برزمینی واردرکه ،
کویا صنع پروردکار ایله ارضی یشیل ، رهاوی قطیفه دوشنمشدر .
بو آستانده افلاکه بر چکمش منتها چنارلر ، قره آغاجلر ، عرعر ،
شمشاد ، سرودرختلری واردرکه سایه هاوایه سنده اون بیک آدم
مکس ایتسه کفایت ایدر . بعض آغاجلرنده یابان آصمه سندن ، حبل
قویدن صالنجاقلر واردر . یاران ودابران صالنبوب بربرلرینه صالنجاق
قولانی چکرلر ، برقچ یرنده جمیع ظرفا مصطبه صفه لری ، تماشا گاه
صفه لری واردر . سطحلرنده آب جاری ایله کباب دولابلی واردرکه ،
کرما کرم آتشدن دولابی صو چویروب کباب پیشر . آدم چویرمکه
احتیاج یوقدر . آب وهواسی ، مدبصری یرنده برمسیره آرام فزادر »
(جلد ۲ ، ص ۲۸) .

داها یوقاریده ، کشیش تپه سنده (صوبران منزلی) ده بورادن
آشاغی قالمازدی . کوللرنده آلابالقلر یتیشیردی . چایرلرنده « عثمان
غازینك قرق بیک قویوننك دولندن توره بن نیجه یوز بیک قیون

بیلا نیر» دی (۱). یاما جلری کاملاً «لاله لی ، سنبل وریحانی ، کل و کلسه تانی ، توتیا ازهارلی ، ایدی . اورالردن کچنلرک « زرین وریحان » قوقولرندن دماغلری معطر اولوردی .

بایزید بك ، یالکیز ظفرله مشغول اولمادی . (روسه) نی اولو جامع ، مدرسه ، خان ، حمام ، دارالشفا ، و برزاویه ایله ده تزیین ایتدی (۱۹۸) . دیگر طرفدن (قره فریه) ده بر عمارت ، (ادرنه) ده ده بر جامع و بر عمارت یاپیلیوردی .

زماننده یتیشن علما : المولی شهاب الدین سیواسی ، مولانا قطب الدین ایزنیقی ، المولی سماونه زاده شیخ بدرالدین ، مولانا فخرالدین عجمی ، شیخ عبدالرحیم بن امیر عزیز ، شیخ حضرت پیر الیاس آماسیه ویدی . شیخ شمس الدین محمد بن علی ایله امیر سلطانک نفوذی هپسنه فائقدی .

امیر سلطان ، بخارالیدی . خلق کرامتارینه اعتقاد ایدردی . بایزید بیله قیزی خوندی خاتونی امیر سلطانیه ویرمشدی . ییلدیریم ، امیر سلطانک نصیحتلرینی دیکار ، کندیسنه فوق العاده حرمت ایدردی .

بایزید بك ، روسه ده الك ذوقلی زمانلرینی یاشادی . « حلیه مبارکه لری قرمزی ایله صارویه مائل ، بیاض دکر می چهره لو ، کیرالائف ، قوی الهیکل شجیع و متهور اولوب اول سبیدن ییلدیریم دیو

تلقیب اولنمشدر . عمامه لری پدر لری واجداد لری عمامه لری کبی
ایدی . شمعی امرایه الباس اولنان خلعتلر قماشندن بروسانک
چیچکلی قطیفه سندن قفتان کیرلر ایدی « (۱) » .

ییلدیرم ، برقاج دفعه اولنمشدی : ایلك اول ، باباسی زماننده
کرمیان اوغلو یعقوب بکک قیزی دوات خاتونله اولندی (۷۸۳) .
داها صو کرا ، ینه باباسی زماننده ، بیزانس ایمپراطوری یو آنیس
پاله اولوغوسک اوچ قیزندن برینی آلدی (۷۸۹) . باباسنک یرینه
کچدکن صو کرا ، صربستان قرالنک قیز قارده شی اولیوه را ایله
ازدواج ایتدی (۷۹) . احتمالکه صوک زوجیه سی ده بو اولدی .
دولت خاتوندن محمد چلبی دنیا یه کلدی . کرک دولت
خاتوندن ، کرک دیگر زوجهلرندن دنیا یه کلن اوغوللاری :
ارطوغرول ، سایمان ، عیسی ، موسی ، محمد ، مصطفی وقاسم
چلبیلردی . ایکی ده قیزی واردی : خوندی خاتون ، فاطمه خاتون .
والده سی کل چیچک خاتون ، حالا صاغدی .

بایزید بکک بروسه سراینده کچیردیکی حیات ، ایلك زمانلرده ،
ساده ، وهر دورلو دبدبه دن آزاده ایدی . فقط صرب پرنسیسی
ایله اولندکن صو کرا ، ییلدیریمک حیاتنده بویوک بر دکیشیکلک
حاصل اولدی . بوقیزه تورکلر (لاس قیزی) ، (ولق قیزی)
دیورلردی .

« و هم آناسنك قیز قرداشی واردی ، بر كوچوچك قیز . او ، لاسك دخی قیزییدی . بایزید خانه ویرمكه عهد ایتشلردی . بایزید خان ایلچی کوندردی . قیزی کتیردیلر . قیزكم خانله بولوشدی . مقصود نیه حاصل اولدی . قیز کندو توره سنجه طوره کلدی ، خدمت نیه ایتدی . قیز قرداشم خلايغكه (سمندره) یی صدقه ایله دیدی ، خان دخی قبول ایتدی ، (كوكرجینلك) یی بیله ویردیلر . (نیکبولی) یی ویرمدیلر » (۱) .

بایزید بك ، صرب پرنسسنه مجلوبدی . تاریخلریمیزك روایتنه کوره : « بایزیدخان صحبت اسبابن لاس قیزی الندن او کړندی . علی پاشا معاونتیه شراب و کباب مجلسی قورولدی . »
(تواریح آل عثمان) دیورکه :

« چندرلو قره خلیلك اوغلی وار ایدی . ییلدیرم خان قنده زیاده اعتبار بولوب غایتده اولولردن ایدی . آدنه علی پاشا درلردی و آنی ییلدیرم خان وزیر ایدین مشدی . چونکیم علی پاشا وزیر اولدی ، فسق و فجور زیاده اولدی . محبوب اوغلنلر یانه آلوب ادنه ایچ اوغلی قودی و برنجه سنه ... ایدوب صکره چقروب منصب وړردی . اما آنلردن ایلرو قدیمی کشیلر اهل عیال اولان جمله منصبلری یرلردی . آنلری چیقروب معزول ایدوب برینه دخی ورمزلردی . اکر سپاهی اولسه تیمارین اوغلنه ویررلردی . و اکر اوغلی قالمیوب قیزی و یا خود عورتی قالسه ذلیل اولسون دیو آنلری برقوله ویررلردی و اول اولنك تیمارین بیله ویررلردی . عادت ایله ایدی . علی پاشا ایچ اوغلنلره اولن سپاهیلك تیمارلرین ویرمكه بشلدی . »

قاضیلرك فسادیده بو ذوق و صفا عالملری اثناسنده ظاهر

اولدی . ییلدیرم قاضیلری طوپالاتدی ، (یکیشهر) ده برأوه
دولدورتدی . هپسنگ ده یاقیلماسنی امر ایتدی . ییلدیریمک بر
عرب ماسقاراسی واردی ، هرکسدن زیاده اونک سوزینی
یاپاردی . علی پاشا ، کندیسنگ برایش یاپامیه جغنی آکلادی .
عربی چاغیردی :

— قاضیلری قورتاراجق اولورسهک ، سکا خیلی مال ویرهین .

دیدى . عرب ، ییلدیریمک حضورینه چیقدى :

— خانم ، بنی استانبوله ایاجی کوندر .

دیدى . ییلدیریم ، سبینی آکلایمق ایستهدى :

— آنده نیلرسک ، هی دولتسز ؟

— قاضیلری قیرالم ، کشیشلر قاضی اولسون .

— بره ، ایت عرب . قاضیلغی کشیشلره ویرنجه کندى

قوللایمه ویرسم آ .

— کندى قوللارک او قومش دکلدرد . کشیشلر خود نیجه

ییل زحمت چکمشلردرد .

— یا عرب . حال نیجه اولسه کرکدر ؟

— سلطانم آنی پاشلر بیلیر .

علی پاشایی چاغیردی :

— علی . بو قاضیلر هپ او قومشلر میدرد ؟

— بلی سلطانم .

— یا نیچون خطا ایدرلر ؟

— آندن اوتوری ایدرلر که بونلرک دوشه لکی آذر .
 بونک اوزرینه ییلدیرم قاضیلرک وارداتی آرتدیدی .
 « حجت ایچین یکرمی بش آچه وسجل ایچون یدی آچه ونکاح
 اذنی ایچون اون ایکی آچه و رسم قسمت ایچون بیکده یکرمی
 بش آچه » قبول ایدلدی (۱) .

ییلدیریمک عرب ماسقاراسی مشهوردی . ییلدیریم سپاهییلرک
 بر قسمی دیوان حضورنده سیاست ایده جکدی . وزیرلر تلاشه
 دوشدیلر ، قورقولرندن برشی سویلیه مه دیلر . « ناصل ایده لم ده
 شو زوالیلری قورتارالم » دییه دوشونمه یه باشلادیلر . ایچلرندن
 بری شو مطالعه ده بولوندی :

— اکر بو حالده بونلره بر چاره اولورسه مسخره
 عربدن اولور .

چارچاق عربی چاغیردیلر ، ایشی آکلاتدیلر :

— بو یچاره لره درمان اولورسه سندن اولور ، کوره لم سنی .
 عرب ، ییلدیریمک حضورینه چیقدی . بایزید بکک خوینی
 بیایردی . بردنبره :

— سلطانم . بونلری هپ قیرمق کرک . امان ویرمه
 خائن قالتابانلردر .

دیدى. ييلديریم شاشیردى. داهاباشقه صوچلری وارصاندى.

— بره عرب ، نیچون ؟

— هی سلطانم . بونلره نه لزوم وار ؟ ایشته تیمور خان

لشکر چکوب اوزریمزه کلیورمش دیرلر . بر آلاى سپاهی
طائفه سن قیردقدن صوکره ، سن سنجاق کوتور ، بن قولک
طاوول چالاین ، ایکیمز وارالم ، تیمور خان ایله اوغراشالم ،
همان بز ایکیمز تیمور خانه جواب ویریرز .

ييلديریم بر آز دوشوندى ، ایشک عاقبتنی آکلادی ،
وسپاهییلری عفو ایتدی .

برکون ، بایزید بک صحرا ده چادیر قوردورمشدی . چادیرک
اوکنده یوکسک بر آغاج واردی . بایزید بک بر آز اکلنمک
ایستیوردی . عربی چاغیردی :

— عرب . بنی سه ورسه ک شو آغاجک چاق دوروغنه چیقاسن .
عرب تردد ایتدی . صویوندى ، آغاجک دوروغنه چیقدى .
قارشیده صولاقلر ، الارنده ناجاقلر ، دوریورلردی . بایزید بک
صولاقلره :

— هرکیم بنی سور ، شول آغاجه ناجاق اورا ، ییقا .
دیدى . صولاقلر آغاجه ناجاق اوشورمه یه باشلادیلر . عرب
آک تپه سنده نه یاپاجغنی شاشیردی . ييلديریمک حضورنده کی
وزیرلره باقدی ، یالوارمایه باشلادی :

— کرم ايدك ، كلك بنی پادشاهدن ديلك ، بنی بو بلادن
قورتارك ، آجاش دوشدكده هلاك اولورین .

سس چيقاران اولمادی . هر کس عرب به باقیوردی . « کوردیکم
آجاش دخی آز قالدیکم یقیله . هادم مسکین عرب چیرمندی
واول آجاشك آلتنده اولنلرک اوزرینه خرابلق ایلدی . پس اول ،
آجاشی کسنلر طارطغان اولدیلر ، قاچدیلر . مسخره عرب دخی
اول آراقده فرصت بولوب تیزاول آجاشدن ایندی . « وزیرلر
دوندی ، یاپدینی معرفتی کوستردی ، وشو سوزلری سویله دی :
— یازیق سزک کی وزیرلر ! بونک قادارده سوزیکز کچمیور !
ییلدیریمک سرای حیاتنده بو کی ابتدائی اکلنجه لرده واردی .
فقط اک زیاده یاپیلان ، عشرت ، وذوق وصفا ایدی .

امیرسلطان بوضعفلرک علیهنده ایدی . حتی بایزید . اولو جامعی
یایدیررکن امیرسلطانله جامعی کز مهیه کیتدی . هر طرفنی دولاشدی ،
صوکر امیرسلطانہ صورتی :

— جامعک رسم و طرحی خوشکزه کیتدی ؟

امیرسلطان شو جوانی ویردی :

— غایت کوزل طرح اولونمش . لکن درت گوشه سند
برر میخانه اکسیک .

ییلدیریم شاشیردی :

— جامع شریف ، بیت خدادر . انک جوارنده محرمات

نه مناسبت ؟

امیر سلطان شو جوابده بولوندى :

— حقیقتده بیت خدا مؤمنك قابیدر . نیچون قابکزی

محرمات ایله آلوده ایدرسز ؟

بایزید بك ، او کوندن اعتباراً ، عشرته توبه ایتدی .

ییلدیریمك اولو جامعی بروسهكك اك محشم جامعلرندى .

« بروسهكك مرتفع ، هوادار یرنده برجامع زیبادر . جامع ایچره

چارکوشه پایه ستونلردن هر برینك آشاغیسی آدم قدی قدر مطلا ،

مذهب . منقش ، فوقنده هر پایهك جانب اربعه سنده یاحنان ، یامنان ،

یا سبحان اسماء حسنی کونا کون خطرله مزیندر . بو خطرلك

حروفی ، الفلری اوچر ذراعدرکه ، طرزمستقیمدر . بوستونلر اوزره

اون طقوز قبه طاق کسری درکه ، جمله سی صماکی ایله مستور ،

قبهك علملری شمس وار ضیاویرر . یکرمنجی قبه یری جامعك اورته سنده

واقع اولوب صاری پرنج تلدن ، ماهی شیله سی کی ، برقه اورلشدر .

وخوش و طیور کیرمیوب درون جامعه آفتابك ضیاسی کپروب روشن

ایدر . بوکشاده قبهك آلتنده مذهب حنفی اوزره عشرأ من عشر بر

حوض مدوری واردرکه ، ایچنده کونا کون ماهیلر شناورلك ایدرلر .

وجمله جماعت اول حوضدن تجدد وضوء ایدوب عبادت ایدرلر . بر

جوزلوحندن سیاه منبری اوزره استاد وار مقدورین صرف ایدوب

بر نقش مانی ایله تزین ایلشدرکه ، بونده اولان بروسهوی فخری

ایلمه سی مثال شکوفه ، تورنجی ، اشلمی ، چارکل ، مطبق کل ، قمر

کلملری و کونا مطهل و کتابهلری جهان رسامی جمع اولسه لر نقش ایتمکه

قادر اوله منلر « (۱) .

جامع کیجه کوندوز اهاایله دولاردی. یاننده کی مدرسه لرده بوتون علملر او قودولوردی. خلق جامع لرده عبادت ایدر، بوش زمانلرینی مسیره لرده، اولو چنارلر آلتنده، چاغلایان دره لر کنارنده کچیریدی.

بایزید بك، خلقی رفاه ایچنده یاشاندیغی کی، مملکتی ده مقتدر وزیرلریله اداره ایدردی. قارا دمیر طاش پاشایه صربستانی، پاشا یکیته اوسکوبی، فیروز بکه ماجارستانه قادار دین ایالتی، اوره نوس بکه سیروزی منصب اولارق ویرمشدی.

صاروخانله قره سی بی اوغلو ارطوغرول بك، آیدین ایلی و داها صو کرا سیواسی سایمان چلبی اداره ایدردی.

(بروسه) نك قوته استناد ایدن ثروت و لاقیدیسی قارشیشنده، (بیزانس)، هر دقیقه تجاوزه معروض، اسکیمش و ییپرانمش بر مدنیتهك انقاضی اوزرنده دائما تحکمه محکوم بر بلده ایدی.

بیزانسی الك زیاده تحکم آلتنده یاشاتان، تورکلردی. بوتحکم، داها اوزخان بك زماننده باشلامشدی. اورخان بکدن اول تورکلرک (تراکیا) یه یرلشدکلری، (بیزانس) کلیسالرنده کی خزینه لرك تورکلر منفعتنه صرف ایدیلدیکی کورولمه مشدی (۱).

غریغوراس دیورکه: «ایمپراطورک سراینده دوست صفیه قبول ایدیلن تورکلر اوراده هر درلو سربستی به نائل اولورلردی.

دینی مراسم یاپیلیرکن، خریستیانلرک عزت نفسلرینی دوشونمهدن کولرلر و اوینارلردی. دیمک ایسته رزکه، تورکلر کندیلرینی بیزانسه صاحب بیلیرلر، پاختک داخلی حربلرندن اولراستفاده ایدرلردی.»

تورکلرک کوروشلری دوغرو ایدی. بیزانسک ضعفه اولردن زیاده واقف اولان یوقدی. فرانسزلر الا آن بیزانسی قورتاراجغز دیه اوغراشیورلردی.

نهایت بیزانسه تکرار یاردیم ایتیه چالیشدیله، دکزدن بر قوت کوندردیله. بو حوادی، تورک نفوذی آلتنده نه یاپاجقلرینی شاشیران بیزانس روملرینی براز جسامتله دیور کی اولدی. کندیلرینی تورکلره قارشى دورابيله جک صاندىله. فرانسزلرک کوندردکلری دونانما، ماره شال بوسیقونک امری آلتنده ایدی (۱۳۹۹ م، ۲، ۵۸). ماره شال بوسیقو، (نیکبولی) انهرامنک انتقامنی آلاجقدی.

بوسیقو، تورکلرکده، روملرکده احواله واققدی. ایکی سنه اول بیزانسه بولوندوغی کی، بایزیدک باباسی مرادبک زماننده ده، بالذات مراجعت ایتدی، تورک اوردوسنده خدمت ایسته دی. مرادبک، بوسیقوی قوللانمايه لزوم کورمه دی. (نیکبولی) محاربه سنده تورکلر الینه اسیر دوشدیکی زمان، بایزید بکله غایت صمیمی مناسبات تأسیس ایله دی. نیکبولیدن صوکر قونت

دونه وورى ، يعنى فرانسىزلىك قورقوسىز ژانى ، وداھا برچوق
فرانسىز پرنسلىرىنى قورتارمىق ايچىن بايزيد بك نزدندە تشبثاتدە
بولونان دە ، او ايدى .

بوسىقو ، (ھەللەسپون) دن كچر كن برقاچ تورك كىيىنە
راست كەلدى . اونلارە قارشى مقاومت كوستردى . نھايت بىزانسە
كەلدى ، غلطە او كەندە دىمىر آتدى . روملار ئىنئوندى . بوسىقوئى
خلاصكار عد ايدىيورلردى . فى الحتمىقە بوسىقو روملارە خىلى
خدمتلردە بولوندى . اندەكى قوتلى دونانما ايله تورك شەرلرىنە
قارشى تخرىبات اجرا ايتدى . بىزانسەدە عموجە ايله يكنك دە
آرالرىنى بولدى . بىزانس اىمپراطورى مانوئەلى فرانسە قرالى
آلتىنجى شارلاك حمایەسى آلتە كىرمەيە تشويق ايتدى . وندىكىلەرە ،
جنويزلرە ، رودوسلىلرەدە عىن توصىەلردە بولوندى .

برسنە قادار (يونانىستان) طرفلرىنە تىجاوز ايتدى ، اىمپراطور
مانوئەلى فرانسەيە بالذات كىدوب قراللا كوروشمەيە تشويق
ايله دى ، بوكادە موفق اولدى .

مانوئەل ، حكومتى يكنى وسلطنت شرىكى كىنج يو آنىسە
تودىع ايتدى . بوسىقو ايله برابر كىلەر بىندى ، اول (مورە) دە
قاردمەشە اوغرادى ، يو آنىسى كوزەتمەسنى توصىە ايتدى .
وندىكە قادار بوسىقو ايله برابر دى . بوسىقو وندىكە اىمپراطوردن
آيرلدى ، پارسە دوغرو حركت ايتدى .

ونديك سه نيوري ايمپراطور مانوئېلى حرمتله قبول ايتدى .
اورادن (فلورانسه) يه ، (فهررار) ه ، (جنوه) يه كلدى . فرانسه
قرالى ، مانوئېلك حدودلرينه يناشديغنى خبر آلنجه ، كنديسنى
استقبال ايچين پارلاق برهيئت كوندردى . مانوئېل (۳ حزينان
۱۴۰۰ م ، ۸۰۳ ه) ده پارسه كيردى .

شارل ديبل ، ايكنجى مانوئېلك توركاره قارشى امداد ايسته ملك
ايچين آوروپاده ياپديغنى سياحتى شو صورتله خلاصه ايدىيور :

« تموز ۱۴۰۰ ده ، ايمپراطور (شارانطون) كوپروس سندن
كچيوردى . پارسلى ايكي بيك بورژووا ، آت اوزرنده ، اوكا رفاقت
ايچين بكليوردى . برآزدها اوتنده ، باش وكيل ، پارلمنتو رئيسلى ،
واوچ قاردينال ايمپراطورى قرال نامه سلاملاديلر . نهايت بالذات آلتنجى
شارل ، بوتون سراى خليفه ، بورى و موزيقيقه صدارلى آراسنده ،
روم حكمدارينك قارشيسنه كلدى ، صفا كلديكز مراسمنى ايفا ايتدى .
ايمپراطور آتده ايدى ، آرقه سنده بياض ايكدن قيمتدار بر لباس
واردى ؛ هر كس اوزرنده اى برتأثير ياپيوردى .

مانوئېل ، سيماسنك نجاتى ، اوزون صاقالى ، بياض صاچلى ،
بوتون شخصنك وقاريله عمومك محبتى قازاندى . كچه جكي يره طويلانان
خلقك آلفيشلىرى آراسنده پارسه پارلاق بر صورتده كيردى . سرايده
مكلف بر ضيافت ويرلدكن صوكر ، (لوور) ه كوتورولدى ، واورايه
يرلشديرلدى . قرال ايمپراطوره هديه لر و يردى . كنديسنه ايسته ديكي
هر درلو يارديمده بولونا جغنى وعد ايتدى . مانوئېل بو وعد اوزرينه
دوستلرينه شو طرزده يازمقده حقيدى : « شانلى قرالك بزه لطف
ايتديكي شيلر پك چوق . اقرباسندن ، سرايى اركانندن وهر كسندن

گوردیكمز لطفلرده بك چوق . ايمپراطور ، دها صوكرآ ، انكآتره يه
 كچدى ، اوراده ده عين صورتله قبول ايدلدى .
 فقط بوتون بو كوزل وعدلردن هيچ بر فائده ، هيچ بر نتيجه
 چيقمادى . غربده ايكي سنه اقالديغى حاليه ، مانوئل آنجق فائده سز
 بر طاقم منفعت علامتلرندن باشقه بر شى كورمه مەدى . دها صوكرآ تعقيب
 ايله ديكي استمداد پوليقيقه سى ده هيچ بر نتيجه حاصل اينمەدى . چونكه
 روم ايمپراطورلغىك سلامتندن باشقه اوروپانك مشغول اولدوغى شيلر
 واردى (۱) .

ايمپراطور مانوئل پارسده وقت كچيريركن ، قارده شى
 ته اودورس (موره) يي كاملاً غائب ايتدى؛ سببى ده استعجاليدى:
 ته اودوروس ، قارده شندن هيچ بر امداد مأمول اولماديغنى
 آكلادى ، بركون اولوب ده بايزيد بكك (موره) يي آلاجنى
 دوشوندى . بوتون ممالكنى رودوس شوواليه لرينه صاتمق
 ايسته دى . شوواليه لرله بازارلغە كيريشدى . پارانك بر قسمنى پشين
 ويردى ، قالانى ايچين ده كفيل آلدى .

بايزيد بك بوپازارلغى ايشيتدى ، فنا حالده جاني صيقيلدى .
 (موره) يي كاملاً آلق ، اونك ده نيتنده واردى . فقط بورالرك
 ينه روملر النده بولوندوغنى ايستردى؛ جنكاور وعزمكار بر ملت
 النده بولوندوغنى ايسته مزدى . اساساً روم ايمپراطورلرينه و پرنس لرينه
 او درجه اهميت ويرمزدى كه ، اونلرى حضـورينه بيله قبول
 ايتمزدى . بوسفر ، سياستنى ترويج ايچين ، ته اودوروسى چاغيرتدى ،

رودوس شوالیه‌لریله یاپدیغی مقاوله‌ی بوزدوغی تقدیرده کندیسنه
هیچ بر زمان تجاوز ایتیه‌جک‌نی آکلاندی. حتی اونلری (موره) دن
قوغغتی ایچین لازم کان قوتی ده ویره‌جک‌نی سویله‌دی. ته‌اودوروسه
بو شرطلر پک فائده‌لی کوروندی. ته‌اودوروسک بو حرکتی
حتلی کوسترمه‌یه احوال ده یاردیم ایتدی: (موره) ده‌کی تبعه‌سی ده
اساساً کندیسنک بو حرکتی تصویب ایتیور، و بریابانجی اداره‌سنه
کچمک ایسته‌میوردی.

نهایت، خلق استقلالنی اعلان ایتدی. اهالی‌ی تشویق ایدن،
پس‌قوپوسدی. خلق، روما کلیساسنه تابع انسانلر اداره‌سنده
قالقدنسه، تورک اداره‌سنده بولونمای ترجیح ایدیوردی.
سببی ده: تورکلر آلدق‌لری مملکتلر اهالی‌سی دینلرنده حر
براقیورلردی. بوندن باشقه، رودوس شوالیه‌لری بورالرده
یرلشه‌جک اولورلرسه، کندیس‌ی پس‌قوپوساغنی ده‌الدن قاچیراجقدی.
ته‌اودوروس مشکل موقعده ایدی. نهایت اهالی‌یه مقصدینی
آکلاندی. پس‌قوپوس، لاتین اداره‌سندن قورتولوناغنه قانع
اولونجه، موقعندن ده، نفوذندن ده، هرشیدن واز کچدی. خاقی
یاتیشدی، و بوضورتله ته‌اودوروس (لا که ده مونیایا) اداره‌سنی
آلینه آلدی.

بوصیراده تورکلر بیزانسی صیقیشدیریورلر، شهره ارزاق
صوقدورمیورلردی. حتی ماره‌شال بوسیقونک براقدینی شاطو

مورانك قوتلری اولماسیدی، توركلرك بیزانسی آلماسی، گنج
ایمپراطوری شهردن قوغماسی ایشدن بیله دکلدی. بوكا بیزانس
خاقدی ده خواهشکردی. ایچلرندن برچوغی پایتختلرینی آلماسی
ایچین توركلری کندیلری چاغیریورلردی (۱).

بونکله برابر، شاطو مورانك توركلره قارشى اوزون مدت
قارشى دورماسی ده امکان خارجنده ایدی. بیزانس، داها ۱۴۰۲ ده
توركلر الینه کچه جکدی. بوفتیجی الی برسنه صوکرایه آتدیرمایه
سبب، تیمورك استیلاسی وبایزید بكك غروری اولدی.

بایزید بكك آناطولوده مملکتلرینی اللرندن آلدیغی بککر
کامللا تیموره صیغینمیشلردی. روملرده بایزید بکدن متوالی
شکایتلرده بولوندیله. تیمور ایله بایزید بك آراسنده کی مخابره
ایکی طرفی ده حدتlendirدی. بایزید بك، تیمورلنک قارشى اول
متحکمانه و محقرانه مکتوبلریازدی. فقط بالا آخره صاحبپوران
حرکت ایتدی. بوسفر تیمورلنك دیکله مه دی. تیمورك اعتدالیله
برابر قوته اعتمادی، بایزیدك عزت نفسیله برابر جسورانه
حرکتی (آنقره) فلاکتی وجوده کتیردی. بونکله برابر
بایزید بكك (آنقره) ظفرینی ده قازانماسی ممکندی. بایزیدی
محو ایدن، اهانت اولدی.

بایزید بكك معیتنده، کندیسندن قاجارق تیموره التجا

ایدن بکارکده عسکرلری واردی . بایزید بك بونلری اوبكارك
ایالتلرندن طوپلامشدی . (آنقره) ده تیمورله قارشى قارشى به
کلدیكى زمان ، « تانار لشكرى خاين اولوب ییلدرم خاندن یوز
چویردیلر ، ارزنجان بكی طهرتن بك اوغلی یاننه واردیلر .
اندن کر میان لشكرى کر میان اوغلنه دوندى ومنتشه لشكرى
منتشه اوغلونه دوندى وصرخان لشكرى صرخان اوغلونه دوندى
هر بر لشكر كندوبكزاده لرینه دوندىلر . ییلدرم دن یوز چویردیلر .
اما افلاق اوغلو كیم كافر لشكریدر ، انلر محكم جنك ایتدیلر . »
تواریخ آل عثمان دیورکه :

« ییلدیریم خانك اوغلی مصطفی چلبی اول کون آناسندن
آرو دوشدی ، بلورسز اولدی . چونكه ییلدیریم خانك وزیرلری
اول حالى کوردیلر ، هاندم یلدرم خانك اوغلی امیر ساطانی
آرادن آلوب قجدیلر . ودخی اوغلی سلطان محمد روم چریسیله
آماسیه طرفنه کیتدی ، اوغراش یرنده یلدرم خان یالکوز
قپو چریسیله قلدی . اول وقت یلدرم خانك اون بیک یکی چریسی
واردی . انده اول زماندن قالان یکی چریلر ایدرلر : یلدرم
خان بزم اورتامزده دوررکن کلدیلر ، ایتدیلر : ای پادشاه
نه دوررسین ، جمله لشكر خاين اولدی قجدی ددی . هانكم
یلدرم خان بو خبری ایشیتدی ، غایت قاقیوب ال چوماغه واردی
وحتى آلایدن چیقوب اول قاقاق لشكر اوردنه دوشمك

استدیدیكم واروب اول قاقاق لشکری دوکه دوکه ینه دوندره
 بز دخی ای شاه ، ایسم اولوب آلایدن چقمه دیو کوردك ،
 چاره اولوب ییلدرم خانى یکه مدك . صانکه بزم ارامزدن چیقدی ،
 لشکردن خردکسه قالمامشدى ، کیمی وارسون ، دوندرسون .
 اندن بر زماندنصکره کوردك کیم تیمورك لشکری ییلدرم خانى
 اله کتورمشلر وقرشمزه کتوررلر . ودخی تیمور خانه ایلتدیله .
 چون بز دخی کوردك کیم پادشاهمز دوتلوب بوواقعیه اوغره دی ،
 ناچار اولوب بز دخی تیمور خانه مطیع اولدق . اما اکر کیم
 یلدرم خان بزم سوزمز دوتوب ارامزدن چیقمسسه ، امید
 واردیکم اله کر میا ایدی . آقشام اولدوغنلین بز ییلدرم خانى
 آلوب بر یکا قجرددق . معلوم دکلیدیکم تیمورك لشکری بزى
 طاغده بلیدی . والا اول که تقدیرده اولاجقدر ، ناچار اولور
 ا کا کیمسه مانع اولمز » (۱) .

بایزید بك تیموردن چوق حرمت کوردی ؛ فقط اسارت
 عزت نفسنه دوقوندی . تیمورله برابر (آق شهر) ه کلدی ،
 تیمور کندیسنى (سمرقند) ه کتوره جکنى سویله دی . بایزید
 بك اساساً متأردی . اهانتلر یوزندن اوغرادینى آجی یوره کنه
 چوکمشدی . تیمورك اسیری صفتیله (سمرقند) ه کیتمکدنسه
 حیاته خاتمه چکمه یی موافق کوردی (۱۴۰۳ م ۸۰۵ ه) .

تیمورلنکک رجالندن حافظ ابرو، تیموره دائر یازدینی
(زبدة التواریخ) ده، ییلدیریم بایزیدك خسته لاندیغنی وهرنه قادار
تداوی ایدلمشسه ده شفا بولامادیغنی و ۱۶۶ شعبان ۸۰۵ چهارشنبه
کیجه سی (آق شهر) ده وفات ایتدیکنی و موقتاً شیخ محمود
حیرانی تربه سنه کومولدوکنی یازیور.

عاشق پاشا زاده دییور که: «بایزید خان ایشیتدیکم سمر
قنده کیده جکن، همان کندو مصاحبتن کوردی» (ص ۸۰)
لطفی پاشا: «برکون تیمور ییلدیرمه ایدر: ای خان
سنی بن سمرقنده ایلتورم. اندن سنی مملکتنه کوندرورم.
چون ییلدیرم خان بوجوابی اشدی، غایت ملول اولدی، وهم
غیرت ایلدی، تیمورك ایلنه وارمسنه. هاندم کندو قیدین
کوروب الله رحمتنه واصل اولدی» دییور (لطفی پاشا تازیخی، یازما
ص ۴۰)

خواجه سعدالدین افندی ده: «آفات دور پر مخافاتدن
خلاص ایچون راغب وفات اولمشلر ایدی. و چراغ حیاتلرینک
انطفاسنی چراغ اینله ارایوب، بودروازه مختدن پروازه، های
همت بی همتلری بسط جناح و آهنگ هوای عالم ارواح ایتمشیدی»
دید کدن صو کرا، بایزیدك خسته لق تأثیر یله وفات ایتدیکنی
یازمقده ایسه ده، «جامع الریاستین» ک انتخابی شرعاً مذموم
کورمسنه نظراً، بومقدمه بی بسط ایتمکدن کندیسنی آلامادیغنه

باقیلیرسه ، بایزید بكك اتخار ایتدیكنه هیچ شبهه ایدیه منر .
 كذا ، صولا قزاده ده (ص ۹۰) دیوركه :

« بولدیغین یازان وضبط تواریخ طریقه سندن آزان بعض اوزانلر كه
 تواریخ یازمغه اولچوملنوب نیجه اقوال مختلفه ایراد ایتشلردر ، نه شان
 سلطنته لایق تعبیر دلپذیره عارفلر و تاریخ جالوسلرینه ومدت خلافتلرینه
 واقفلردر وسبب موتلری بیاننده دخی نیجه اقوال ناشتایسته یازوب شرعاً
 تجویز اولنمیان قضیه یی اول شاه دینداره نسبت ایدوب تناول زهر
 ایتدی ویاخود حکماء تیمور شربتلدیلر دیو بهتان وافترا ایتشلردر . »

صولا قزاده نك یكانه مأخذی ، تاج التواریخدر . تاج التواریخك
 مأخذلری ایسه صولا قزاده نك دیدیكى « ضبط تواریخ طریقه سندن
 آزان بعض اوزانلر » در . بناء علیه صولا قزاده همدمینك بو
 حقیقتدن بحث ایتمه ییشی ، اونی « شان سلطنته لایق » کورمه ییشی ،
 « شرعاً تجویز اولنمیان قضیه » لردن عد ایدیشیدر .

(آنقره) فاجعه سی اولدوغی زمان ، بیزانس ایمپراطوری
 مانوئل (فرانسه) دن دونیوردی . فلاكت خبرینی یولده
 ایشیتدی ، چارچابوق بیزانسه قوشدی . اك برنجی ایشی ، سلطنت
 شریکی یو آنیسی درحال (لمنی) آطه سنه دفع ایتك اولدی .
 آرتق توركلردن نه یو آنیسیك امیددی ، نه ده مانوئللك قورقوسی
 قالمشدی . مانوئل بونكله ده قالمادی ؛ توركلرك یاپدیردیغی
 محكمه نی ده ، جامعی ده ییقیدردی . توركلری كندیلری ایچین
 تأسیس ایدیلن محله ده اوطورتمادی . باباسی یو آنیسی پاله اولوغوسك

تورکارله عقد ایتدیکی و کندیسنك ده قبول ایله دیکی معاهده
 موجبنجه بیزانسه اوطوران تورکارك حائز اولدقلری امتیازلری
 کاملاً لغو ایتدی. بایزید بلك فلا کتشدن و وفاتندن مانوئهله ده،
 بوتون روملرده ممنوندى؛ بونی آرتق طالعسزلککرینك صوکی
 عد ایدیورلردی. فقط بو سوینج چوق سورمه دی. مانوئهله
 تیموره ایاجیلر یوللامش، بایزید بکه ویردیکی ویرکی عیناً
 کندیسنه ویره جگنی و عد ایتشدی. تیمور، بو سفر مانوئهله
 خبر کوندردی. عسکرینی یونانستانه، اورادن ده آوروپاه
 کچیره جکی ایچین کیلرینی حاضر ایتمه سنی امر ایتدی. برکت
 ویرسین که، بوفکرندن پک چابوق وازچدی؛ مملکتنه دوغرو
 چکیلوب کیتدی.

حالبوکه، بیزانسدن بابالرینك انتقامنی آلاجق تورک بکلری
 یوق دکلدی. بایزیدك اوغلوارطوغرول سیواسده وفات ایتشدی.
 حتی بو آجینك تأثیریه ایدی که، بایزید بك یولده راحت راحت
 قوال چالان بر چوبانه راست کلش:

— چال، چوبان، چال. سیواس کی قلعه می، ارطوغرول
 کی اوغولی غائب ایتدك؟ سندن مسعود کیم وار؟
 دییه فریاد ایتشدی.

مصطفی چلبی (آنقره) فلاکتی ائناسنده نیکده یه کیتشدی.
 دیگر اوغوللاری: سلیمان چلبی، عیسی چلبی، موسی چلبی،

محمد چایی ، قاسم چایییدی . قیزلرندن خوندی خاتونله قاطمه خاتونده صاغدی .

موسی چایی ، باباسیله برابر ، تیموره اسیر دوشمشیدی . فقط بالاخره باباسنك جنسازه سنی آلاق (بروسه) یه کتیردی . شمدی اوده ، قارده شلریله برابردی .

سایمان چایی (ادرنه) یه قاچدی . عیسی چایی ، باباسنك وفاتی دوینجه ، (بروسه) یه کلدی ، بایزید بکه خلف اولدی . برقاق ایالت کندیسنه اطاعت ایتدی ؛ فقط باباسی زماننده اداره لری آلتنه کیرن (لیدیا) یی ، (اییونی) یی ، (قاریا) یی ، (لیکیا) یی آلامادی : تیمور ، بورالری هپ اسکی بکلرینه ویرمشدی . روم ایلانده ایسه هیچ بریر کندیسنه تابع اولمادی .

سایمان بك قارده شنك بوحر کتینه قیزدی . بیزانسه کلدی ، ایمپراطور مانوئل ایله بر معاهده عقد ایتدی . بیزانس مؤرخلرینه نظراً معاهده نك اساسی شونلردی : سایمان بك سلاویکا (اوستروما) صوبی جوارنده کی کویلردن ، (زیتون) ه قادار اولان اراضیدن ، مورهدن ، و بیزانس اطرافنده کی بلده لرك کافه سندن وازکجه جکدی . سایمان بك ، بو تعهدینی اثبات ایچین ، کوچولك قارده شلرندن قاسم چایی ایله قیزقارده شی فاطمه خاتوننی ایمپراطوره رهن برافدی . بو حادثه یی تاریخلریمزده تصدیق ایدیورلر . از جمله (تواریخ آل عثمان) ده شوقید واردر : « امپر سایمان قرنداشی قاسم چایی

و قز قرنداشی فاطمه استانبول تکورنده رهن قودی که هیچ
 یاغلیق ایتییه . بو طریق اوزره تکورله صالح ایتدیلر « (۱) .
 قاسم چلبی، بو فلاکتدن صو کرا، بیزانسه اون اوچ سنه
 یاشادی، صو کرا و بادن اولدی (۱۴۱۷م) . شارل دیل دییور که:
 « بیزانسه رهن مقامنده کوندریلن بو پرنس ایمپراطور ایکنجی
 مانوئلک اوغلو یو آنیسله برابر بویودولدی . یونان ادبیات
 و مدنیتندن او درجه ذوق آلدی که، هر نه صورتله اولورسه
 اولسون، اورتودوقس اولمایه قرار ویردی. ایمپراطور مانوئل
 برقاریش قیقاغه میدان ویرمه مک ایچین بو کنجک ارزولرینه قارشی
 دوردی . فقط خسته لانبوده اوله جکنی آ کلار آ کلماز،
 بومسلمان تکرار وافتیز اولق ایچین اصرار ایتدی، ایمپراطورک
 کندیسنی ابدی برضالته سوق ایدن بوممانعتدن مسئول اولاجغنی
 سویله دی، ایمپراطورده بودینسزک آرزوسنه قارشی دورامادی .
 حتی بالذات وافتیز باباسی اولق ایسته دی، آینک ایرته سی کونی
 یکی مهتدی وفات ایدنجه، اونی اختفالات ایله (آیایانی ستودیون)
 کلیسانه کومدوردی . »

قاسم بکک خریستیاناغه خواهش کوسترمه سی قبول ایدیله من .
 یالکنز شوراسی آ کلاشیلورکه، قاسم بک (آیایانی ستودیون)
 کلیسانه کومواشدو . تورکلر بیزانسه کیردکن صو کرا،

اوراده کی خاچی هلاله تبدیل ایتمشلر ، آدینه (امیر آخور
جامعی) دیمشلردر .

مانوتل ، امیر سلیمانندن وعد آلیر آماز ، تورك اشغالنده
بولونان شهرلره قومیسر لر کوندردی . کافه سندن توركلرك
بوشادلماسنی امر ایتدی . تختندن قوغارق (لینی) یه آتدیغی
سلطنت شریکی یو آنیسی ده (ما که دونیا) یه کوندردی . کندیسنه
(سلا نیک پر نسی) عنوانی ویردی .

امیر سایمان ، بیزانسه ایدی . قارده شلرندن محمد چلبی
(آماسیه) ده ، موسی چلبی ایله عیسی چلبی ده (قره سی) ده
ایدیلر . محمد چلبی ، تواریخ آل عثمانک روایتنه کوره « قطعا
بکله که مقید اولمادی » . موسی چلبی ایله عیسی چلبی (قره سی) ده
بر برینی قووالیورلردی . نهایت موسی چلبی ، عیسی چلبی پی
مغلوب ایتدی . « اله کتوروب آرادن کتوردی » . بیزانس
مؤرخلرینه کوره ده امیر سایمان ، بیزانس ایمپراطورندن آلدیغی
قوتلرله آناتولویه کچدی ، عیسی چلبی پی او اتلاف ایتدی (۱) .
بو روایت صحته داها قریبدر . تیمور فلاکتی متعاقب امیر
سایمان بیزانس ایمپراطورینک کیلریله بیزانسه قاچمش ، ایمپراطورله
ویوشمش ، (ادرنه) ده بایزید بکک یرینه بکلهکنی اعلان
ایتمشدی . (تواریخ آل عثمان) دیورکه : « امیر سایمان

ايشتيديکه سلطان موسی بروسه يه يورودی دیو ، پس امیرسایان
دخی بورسهدن قالقوب سلطان موسی اوزرینه يورودی . چونکه
سلطان موسی ايشتيديکه امیرسایان کندونک اوزرینه يورودی .
پس سلطان موسی قرنداشی امیرسایانه قرشو دوره میوب قاچدی .
قرده مانه کتدی « (ص ۴۳) . بوده کوستریپور که ، امیرسایان ،
(ادرنه) ده جلوس ایتد کدن صو کرا ، تیمور فلا کتی صاووشور
صاووشماز ، تکرار آنا طولویه کچمشدر .

مع مافیه موسی چلیپنک ادعاسی ، کندنجبه ، حقلیدی .
تیمور ، بازید بکک ممالکنی اوکا ویرمشدی . خصوصیه موسی
چای ، ذوق و سفاهتدن مجتنب ، عز مکار بر بکدی . امیر
سایان ایسه اواناده (ادرنه) ده جلوس ایتمشدی (۸۰۶ هـ) .
سکده باصدیریپور ، براتلر ویریپور ، پاشاالینه (جی) سیله
اراضیلر تملیک ایدیوردی . امیرسایانک یاننده وزیر علی پاشا
ایله اینه بک و صوباشی حسن آغا واردی . امیرسایان ایمپراطورله
دائما خوش کچنیوردی . معیتنده روملردن بیله عسکر واردی .
محمد چای (آماسیه) ده ایدی . امیرسایانک (ادرنه) ده
جلوسنی خبر آلدی . قارده شنه خبر یوللادی : « امیرم و اولو
قرنداشم . اکر کیم آتامز اولدیسه کندولر صاغ اولسون .
پادشاهلق مبارک اولسون » دیدی . امیرسایانه قیمتدار هدیه لر
یوللادی . امیرسایان ، قارده شنک بوتواضعندن چوق ممنون اولدی .

أوده، كوزل اوغلانلار و هر جنس دن قوماشلار كوندردی. (ادرنه) ده
 اسكى جامعك انشاسنه باشلادی. قارامان بكنه مراجعت ایتدی:
 « قرنداشم موساي قویو ویرمیه سن. اكر كه بزمه دوستلق
 ایدرسهك، بزدهخی دوستكه دوست دوشمنكه دشمنوز » دیدی.
 قارامان بکیله باریشدی. موسی چلبی، قاردهشی امیر سایمانك
 قارامان اوغلیله باریشدیغنی کورونجه، اسفندیار اوغلونه کیتدی.
 امیر سایمان اسفندیار اوزرینه یورودی، (کوینوگ) ه قادار
 کلدی، بر صو کنارینه قوندی، کیجه سنی کوندوزینی ذوق
 وصفایله کچیردی. اوراده برقاواق آغاجی واردی؛ بك قاواغی
 دیرلردی. امیر سایمان، هپ بو قاواغك آلتده اکلندی.
 نهایت اسفندیار اوغلیله ده اوزلاشدی. (ایزنیق) ه کلدی،
 اوراده ده عیش و صفایه دالیدی. متادیاً شراب ایچردی؛ وزیرلری
 بیله بو حالندن دلگیر اولمشلاردی. بو اثناده موسی بك (سینوب) دن
 کمی یه بینمش، (افلاق) ه کیتمشدی. مقصدی، اوراده عسکر
 طوپلایوب (ادرنه) اوزرینه یورو مکدی.

موسی بك صربلردن و بولغارلردن خیلی عسکر طوپلادی.
 امیر سایمان بو خبری ایشیدنجه، روم مؤرخارینك قولنجه،
 بیزانسه قوشدی. ایمپراطوردن امداد قوتلری ایسته دی. مانوئل
 سایمان بکه داها زیاده صمیمیت کوسترمك ایچین اونکله صهریت
 پیدا ایتك ایسته دی. قاردهشی (لا که ده مونیا) ده سپو طی یو آنیس

ته اودوروسك قیزی ویردی . بیزانسه پارلاق و مطمئن دوگونلر
اجرا ایدلدی . تام بودوگونلر اثناسنده ایدی که ، موسی بکک
بیزانس سورلرینه یافلاشدیغی خبر آلیندی . سایان بک، کندی
عسکريله برابر، بیزانس عسکرینک باشنه کچدی . ایمپراطورده
برابر دی . موسی بک اوزرینه یورودی . ایمپراطور ، موسی
بک معیتده کی بواغار و صرب قوماندانلريله اویوشدی . ایکی
طرف محاربه یه باشلاخجه ، بونلر سایان بک طرفنه کچدیله ،
موسى بکک مغلوبیتنه سببیت ویردیله .

تورك مؤرخلرینه کوره : موسی بک افلاقه کچدیکی زمان،
امیرسایان آناطولوده ایدی . موسی بک افلاقه کلدی . افلاقه بکی
میرچه ایدی . « قتی بهادر کافر دی . » موسی بک اونسکه اویوشدی ،
عمومک محبتنی قازاندى . برچوق عسکر تدارک ایتدی . امیرسایانک
اداره سندن دلکیر اولانلرله مکتوبلاشدی . اونلرده بیزاردیلر ،
هپسی ده موسی بکه التحاق ایتدیله . موسی بک (ادرنه) اوزرینه
یورویه جک بر قوت طوپلار طوپلاماز حرکت ایتدی . « بو طرفدن
امیر سایانه خبر کاردیکم اوشده قرنداشک سلطان موسی افلاق
ایلندن روم ایلنه کچدی ، وروم ایلینک بره زین الدی ددیله . پس
امیر سایان اول خیری اشیدیجک بروسه دن جان آتوب ادرنیه
کلدی » (تواریخ آل عثمان ، ص ۴۵) .

بونسکه برارینه عیش و صفادن خالی قالمادی . موسی بکک

اوردوسى ادرنه يە كىردى . اميرسليمان حمامده ايچكىله مشغولدى .
 ناصلسه قاردهشنىڭ ئالدىن صيرىلدى ، بىزانسه قاچىق ايستەدى .
 يولده بر كويه اوغرلادى ، كويده دوكون واردى . يول صورمىق
 ايچىن دوكون اوينه كىتدى . خلق اميرسليمانى طائىدىلر ، درحال
 تلف ايتدىلر ، باشى موسى بكة كوندردىلر (۱۴۱۰ م ، ۸۱۳ هـ) .
 موسى بك قاردهشنىڭ ضياعىدىن متأثر اولدى . اميرسليمانك
 اولدورولدىكى كويى ده ، دوكون خلقى ده پریشان ايتدى . امير
 سليمان ، (تواريخ آل عثمان) . كوره : « ىدى يىل روم تخته پادشاه
 اولدى » (ص ۴۵) .

اوسنه لرده اميرسليمانك قان پدىرى (لا كده مونيا) دوسپوطى
 و ايمپراطورك قاردهشى يوآنيس ته اودوروس پاله اولوغوس ده
 اولمش ؛ ايمپراطور ، اونك يرينه ، اوغلو ته اودوروسى تعيين
 ايتمشدى .

موسى بك ، (ادرنه) ده عسكرلىرىنى طويلادى . بىزانس
 ايمپراطورنىڭ انتقام آلىق ايستەدى . عسكرلىرىنه برنطق ايراد
 ايتدى . بونطقده از جمله شوسوزلر واردى :

« تيمورك آسيانى ناصل تتره تديكىنى ، بابامك ضعيف بر قوش كې
 بوظالمك آينه ناصل دوشدىكىنى بيليرسكىز . ايسته بوفلا كتره سبب ،
 روملردر . ايرانيلىرى ، تاتارلىرى ، برسورويانچىلىرى يوردلر يمزە صوقان
 اونلردر . صرف اونلرك سايه سنده ، اولكه لرىمىزى تاراج ايتدى .
 قاردهشم ايسه فلاكتى بوسپوتون آرتدىردى . وطنه اهانت ايتدى ،

بایزیدک واسلافنک روملردن آلدقلری یرلری تورکک، ازی دوشمانلری اولان روملره تسلیم ایتدی .

بز، بیزانس تکفورینک حاکمیتی بویودیکنه تحمل ایدمه یز . تکفوردن بوتون ماکه دونیا شهرلری ، بالخاصه سالانیک ، بهمه حال آلیمالیدر « (۱) .

بونطق، عسکرلر اوزرنده ایی برتأثیر اجرا ایتدی . موسی چلینک جلوس مراسمی غایت پارلاق اولدی (۸۱۳ هـ) . تورک مؤرخلرینه نظراً موسی چلی (ادرنه) ده، بیزانس مؤرخلرینه کوره (بروسه) ده جلوس ایتدی . صربلردن انتقام آلمق ایچین اوزرلرینه یورودی . هر طرفده غلبه چالیدی . عین زمانده (ادرنه) ده (اسکی جامع) ک تمللرینی قوردورمقدن ده خالی قالمادی .

بعده (سالانیک) ه هجوم ایتدی . قاردهشی امیرسایمانک اوغلو اورخان بک ایله قیزی بوراده ایدی . شهر، اپی مدت قارششی دوردی . نهایت تسلیمه مجبور اولدی . اورخان بک ایله قیز قاردهشی قاجدیله ، بیزانسه التجا ایتدیله . موسی بکک اصل هدفی ، بیزانسدی . سالانیکدن دوزر دوزمز اوردوسیله بیزانس سورلری اوکنده کوروندی . مقصدی ، بیزانسی آجلق تأثیریه دوشورمکدی . فقط بو آرزوسنک ، ایسته دیکی درجه ده برسرعتله حاصل اولامیه جغنی آکلاینجه ، منتظماً قوشاتمایه قرار ویردی . یکی قطعه لر وطوپلر کتیرتدی ، شهری صیقی بر صورتده محاصره یه باشلادی .

روملر بو محاصره ده بويوك برجسارت كوسترديلر ، برقاچ دفعه لر
خروج حركتلى ياپديلر . بو خروجلر ، محاصره آلتنده قالان
روملر ايچين تهلكه ليدى . هر خروجه برچوق انسان غائب
ايدى يورلردى . مانوئل ، بو تعرضلردن قورتولوش اولمادىغنى
آكلادى ، موسى بكة تسليم اولمايه قرار وىردى . تام اوصيراده
قاردهشى محمد چليينك آناطولوده باش قالديرماسى بيزانسى بوسفرده
توركلر ايلنه كچمكدن قورتاردى . محمد چليينك سلطنت حرصى
بيزانسك جان چكيشمه سنى دها قرق برسنه اوزاتدى (۱۴۱۲ م) .
محمد چلبى (آماسيه) ده ايدى . امير سايمانك سلطنته سس
چيقارما مشدى . موسى چلبى (ادرنه) ده بك اولونجه ، اوده
سلطنت حرصنه دوشدى . موسى چلبىدن ممنون اولمايانلر محمد
چليينك اطرافنه قوشديلر . محمد چلبى (بروسه) يه كلدى . خلق
كنديسنى حرمتله قارشىلادى . (بروسه) ده بلكلىكى اعلان
ايتدى (۸۱۵ هـ ، ۱۴۴۱ م) .

ايمپراطور ، الكز ياده موسى چلبىدن يلىوردى . بناءً عليه موسى
چلبى ي مغلوب ايتك ايچين محمد چلبى ي الده ايتدى . هر نه زمان
آرزوايدرسه ، بيزانسك كنديسنى استقبال ايدى جكنى وعدايله دى .
ايمپراطور مانوئل ، محمد چلبى يه اولاد معامله سى ايدى يوردى .
محمد چلبى ، ايمپراطورك بوتون تكيلىلر نى قبول ايتدى .
آناطولودن روم ايلنه كچدى . ايمپراطورله (اسكدار) ده بالذات

کوروشه جکدی . ایمپراطور ، محمد چلبی بی (اسکار) دن ، اعزاز واکرام ایله ، بیزانسه کچیردی . پک چوق وعدلرده بولوندی . محمد چلبی بیزانسه بر مدت قالدی ؛ ایمپراطوردن براز قوت آلدی . بیزانس جوارینی تخریب ایدن قاردهشی موسی بک اوزرینه یورودی . محاربه بی ینه موسی بک قازاندی . محمد چلبی جسارتی بوزمادی . اوردوسنک انقاضی طوپلادی ، موسی بک اوزرینه تکرار یورودی . ایمپراطور مانوئل کندیسنه عسکر ویریور ، خسته لغی بهانه ایدهرک ، محاربه اشتراک ایتوردی . محمد چلبی ایکنجی مصادمه دهده موفق اولامادی . ایمپراطور مانوئل ، بوموفقیته سز لکلردن دولای ، محمد چلبی بی تسلیه ایتدی . برقاج کون ذوق و صفا ایله ، عیش و نوش ایله وقت کچیریلدی . تام او صیراده ، وقتیه موسی چلبیدن فنا معامله کورهن صربستان قرالی استه فانک یوللادیغی عسکرلر میدان چیقدی . محمد چلبی ، اوردوسنی بوعسکرلرله تقویه ایتدی .

عاشق پاشا زاده ، محمد چلبینک استانبول تکفوری مانوئلله اولان مناسباتی شویله روایت ایدیور :

« سلطان محمد وزیر یبایزید پاشایه ایدر : « روم ایلنه کچمکه تدارک ایدک دیر . کور شاه ملک کم موسادن قاچوب بیزانسه کیردیکی وقتن آندن سلطان محمد کلدی . بایزید پاشا ایدر : « سلطاتم شاه ملک بکی اوقویه لم ، کوره لم ، اول نه دیر . اوقودیلر ، کلدی : « روم ایلینه کچمک ایسترز ، تدبیر نه در ؟ » دیدیلر . شاه ملک ایدر : « بیزانس

تكفورينه ايلچى كوندركم آندن غىرى يردن كچمكه چاره يوقدر .
 ديدى . زير اكم كايولى موسانك آلنده ايدى . ككبوزه قاضيسى فضل اللهى
 ايلچى كوندردىلر . آنكچونكم استانبول تكفورى آكا اعتماد ايدردى .
 زيرا قوشويدى . فضل واردى ، تكفوره نيسه سويلدى . عهد
 و پيمان ايلدى ، كلدى خبر و يردى . سلطان محمد دخی كوچدى ،
 چيقدى ، فقير كوره قالد . اورخان امامى اوغلى ينجى فقيرك اونده
 خسته اولدم . كيودهده مناقب آل عثمانى تا ييلديرم خانه كانجه امام
 اوغليندن نقل ايدرين ، (ص ۸۳ و ۸۴) .

محمد چلبى ، اوردوسىنى ايكي يه آيىردى : برينى (ادرنه)
 اوزرينه كوندردى . الكوتليسك ياشنه كندى كچدى ، قره دكز
 ساحلى تعقيب ايتدى . موسى بك ، قوتيرينى پارچالامق
 ايسته مديكى اچين ، (ادرنه) ايله هيچ مشغول اولمادى ،
 ذاتاً شهر ك مستحكم اولدوغنى بيلوردى . يالكز قره دكز
 ساحلارنى تعقيب ايتدى . موسى بك موفق اولاجق كييدى .
 فقط عسكرينك محبتنى كاملاً غائب ايتمشدى . اوردوسنده ،
 اوتهدن برى ، علمينده بر جريان واردى . محاربه باشلار باشلاماز
 اوردودهده فرارلر باشلادى . موسى بك ده رجعت مجبور اولدى .
 يولده بر باطاغه سايلاندى . سلطان موسى بك بر قولى
 واردى . آدى صروجه ايدى . اول صروجه كلدى . سلطان
 موسى بك آتن سكرلدى . سلطان موسى آتندن يره دوشدى .
 صروجه دخی كلوب سلطان موسى دوتدى . آلوب سلطان

محمد کوئوردی . پس سلطان محمد دخی اول کیجه چادرده
سلطان موسی نك مصالحتن کوردی « (تواریخ آل عثمان ،
ص ۴۸) . بیزانس مؤرخلرندن دوقاسه نظراً ، موسی چای
سیلان دمدن اولمش ، خالقوندیلپسه نظرآده محمد چای طرفندن
بوغدورولمشدر .

محمد چای آرتق بوتون رقیلرندن قورتولدی . (بروسه) به
کلی ، سلطانلغنی اعلان ایتدی (۱۴۱۳ م ، ۸۱۶ هـ) .
او زمانه قادار پادشاهلره تعظیماً (سلطان) دیدکلری حالده ،
دیوان دفترلرنده (بك) دیرلردی . اولیا چای نك : « تا ابوالفتح
سلطان محمد کلیجه آل عثمان بك ، اورخان بك ، مراد
بك دیرلردی » (جلد ۲ ، ص ۳۷) دیمه سی بوحقیقته مبیدر .
مع مافیه ، چای سلطان محمدك اوغلو ایکنجی مرادك بلغراد
و آچه حصار تیمار دفترلرینك باشنده :

« سلطان مراد بن محمد خان » یازیلی اولدوغی کی ،
دروننده پدری چای سلطان محمد زماننده ویریلن تیمارلر ایچینده
دائماً « مرحوم سلطان زماننده » تعبیرلری موجوددر .

چای سلطان محمد زماننده (بروسه) اسکی سکونتی
قازابیلدی . امیر سایمان و موسی بکلر زماننده حرب ، استیلا ،
داخلی مجادلر ، بروسه نك ساکن حیاتی سکتهدارایله مشدی .
شیمدی ، چای سلطان محمد ، (بروسه) نك برقاج سنه دن

بری ضایع ایتدیکی رفاهی اعادهیه چالیشیوردی .

سلطان محمدك زوجہ سی ، ذوالقدر اوغلو سولی بكك قیزی
امینه خاتوندی . تیمور فلا کتنی متعاقب (۸۰۵) اولنمش ،
مراد بك دنیاہ کلمشدی (۸۰۶) .

امیر سلیمانك اوغلو اورخان بكك قیزی ده (بروسه) یه
کلمشیلردی . بیزانس مؤرخلرینه نظراً موسی چلبی ، تورك
مؤرخلرینه نظرآده محمد چلبی موسی چلبیله محاربه ایدرکن ،
بیزانس ایمپراطوری مانوئل ، محمد بكك یارانمق ایچین اورخان
بكك قیز قاردهشنی صالیویرمش ، کویاقبول ایتیمورکی کورونمشدی .
اورخان بك افلاقه کیتمك اوزره یوله چیقدی ، یولده لالاسی
طرفدن یاقالادی ، سلطان محمدہ تسلیم ایدلدی . « سلطان
محمد دخی کوزلرینی چیقارتدیروب (بروسه) یه کلدی . امیرسلیمانك
برقیزی واردی ، برسینجاق بکنه ویردی . اوغلانہ دخی
ایوتیمار ایتدی . آقحصاردیرلردی ، آنك نواحیسنده (چارطاق
کوی) دیرلر برکافر کوی واردی ، آنی تیمار ویرمشدی .
هرکز بروسه یه امیرسلیمانك اوغلین کتیرردی ، عطارل ایدردی ،
قرداشم اوغلیدردیردی . وقیز قرداشینه دخی خیلی نسنه ویرردی ،
(عاشق پاشا زاده ، ص ۸۷) .

چلبی سلطان محمدك مراد بکدن ماعدا، دوت اوغلو داها
واردی : مصطفی ، محمود ، یوسف ، احمد .

یدی ده قیزی دنیا یه گلشدی: برینک آدی سلچوق خاتون دی.
 چلی سلطان محمد، گاه (بروسه) ده، گاه (ادرنه) ده اوطوروردی.
 الکیزیده اوطوردوغی ی، (بروسه) ایدی. : «ادرنه ده اسکی جامع
 امیر سلیمان بشلیوب تا یر یوزینه چیقنجه یایدیرمشدی. اما عمری
 وفا یتیموب شو یله قالمشدی. صو کرا سلطان موسی پادشاه اولیجق
 اولدخی اول بنایه ال اوروب یایدیردی. تاقبه لری یرینه وارنجه.
 آخر الامر اکادخی عمری وفا یتیموب دنیا دن نقل ایدوب کیتدی.
 صو کرا سلطان محمد تمام ایدوب آکا نصیب اولدی» (تواریخ
 آل عثمان، ص ۵۲).

چلی سلطان محمد، بروسه نك اعمارینه چالیشدی. کندی
 مستقلاً سلطنت سورمه یه باشلادیغی تاریخدن اعتباراً (بروسه)
 ایچین هیچ بر ته لکه قالمامشدی. وزیر لری: بایزید پاشا،
 ابراهیم پاشا، حاجی عوض پاشا. اسکی تربیه ایله یتیشمش،
 مقتدر ذاتلردی.

روم ایلینک برچوق یرلری، تیمور فلاکتی صیراسنده،
 آلدن چیقممشدی. مع مافیه برچوق یرلرنده تورکلر یاشایوردی.
 مثلاً، مراد بک زماننده، «آنا طولودن صاروخان طرفنده کوچر
 اولولر وار ایدی. شقیلر اولدوغی چون سیروز طرفنه سوردیلر»
 (لطفی پاشا، ص ۲۸). دیوان دفترلرندن آکلا شیلدیغنه کوره،
 بو (صرحانلو) لر یالکیز سیروز طرفلرنده دکلریدی. بلغراد،

آچقه حصار و جوارنده ده واردی . تیمار دفترلرنده کی قیدلرده ،
حتی چلبی سلطان محمد زماننده بیله ، (صرحانلودره سورگون
گکشدور) دییه یازیلدر .

اورخان بکدر ، مراد بکدر ، بایزید بکدر زماننده کی تورکلک
خاصه سی ، چلبی سلطان محمد زماننده ده اسکی ماهیتنی ضایع
ایتمه دی . سلیمان بکک یدی ، موسی بکک اوچ بچق سنه
سوره ن بکککاری ، کورولتولو اولمقله برابر ، اسکی عنعنه ده
هیچ بر دکیشکلک حاصل ایتمه دی . ملتک طاشیدینی آدلر
بیله تورکلکه یاقیشاجق بر ماهیتده ایدی : آق طوغان ، شاهین ،
دلو طوغان ، آق سونغور ، بهادر ، قوتلو ، بالی ، حمزه ، رستم ،
صاروخان ، آده ، ساوجی ، آتمجه ، بك پارس الخ ... کی .
چلبی سلطان محمد ، بیزانس ایمپراطوری مانوئله مناسبتنی
محافظه ایتدی . ایمپراطور ، چلبی به جلوس تبریکی ایتمکله برابر ،
بیزانسه بولوندوغی صیراده کندیسنه ایتمش اولدوغی وعدلری ده
خاطر لاتدی . چلبی وعدلرینی طوتدی ، ایمپراطورک طیشی
دوست ایچی دشمن اولدوغی حالده ، ینه اوکا قره دکز ساحلنده ،
تسالیاده ، مرمره قییلرنده بر چوق یرلر ویردی . ایاجیلره
منوئیت کوستردی . چلبی سلطان محمد قادار روملرله خوش کچین
برتورک پادشاهی کورولمه دی .

مانوئل بوفرصتن استفاده ایتدی ، (موره) به کیتدی .

تورکلرک محتمل هجوملرینہ قارشى اورالرى تقویه ایتدی ،
 استحکاملرینی آرتدیردی . چلبی سلطان محمد ، مانوئله ائتمادی
 اولدوغی ایچین ، بوحرکتلردن هیچ قوشقولانمادی .
 کنذا ، لاتینلره قارشیده مساعد داوراندى ، اونلره :
 « خریستیانلر هانکی اولسکده اوطورورلرسه ، اوطورسونلر .
 بن اونلرک باباسی وحایبسی اولمق ایستهرم » دیردی . وقتیلہ
 جدلرینک ییقدقلری قلعه لری اونلره تکرار یاپدیرتدی . حال بوکه ،
 چلبی سلطان محمدک انشاسنه مساعده ایتدیکی قلعه لری لاتینلر
 ینہ تورکلر علیهنده قوللانیرلردی .

مؤرخ دو قاس دیورکه : « بوقلعه لره کوپکلر قورلر ، کیجه لری
 صالیویرلردی . بونلر او درجه قوقو آلیرلردی که ، تورکله
 خریستیانی آیردایدرلردی . تورکلری پارچالارلر ، خریستیانلری ده
 محافظه ایدهرک قلعه نلک قاپیسنه قادار کتیرلردی . »

چلبی سلطان محمد ، عین زمانده ، بروسه نلک اعماریلده
 مشغول اولدی . بروسه ده بر جامع ، بر مدرسه ، بر عمارت ،
 کندى ایچین ده بر تربه انشاسنه باشلاتدی . بونلره اوقاف تعینی
 لازم کلدی . امراسنی طوپلادی ، مذاکره ایتدی ، وزراسی
 شو مطالعه ده بولوندیلر :

— استانبول نواحیسندن بعض قصبات و قرا مقدا اورخان
 بک زمانده فتح اولمش ایکن تیمور فترتنده تکرار دشمن آینه

کیرمشدر. حالا استانبول تکفورینک تصرفندهدر. آنلر تکرار فتح اولونوب اوقاف تعیین اولونسه معقول اولور .

چلبی سلطان محمد بو تدبیری موافق کوردی . دمیرطاش اوغلو علی بکی کوندردی . (هرکه) ، (اسکی ککبوزه) ، (طاروجی ، طاریجه) ، (قارتال) ، (پندک) فتح ایدلدی ، « جمله سی اوقاف عمارات سلطانیه اولمشدر . اول اطرافک دشمنی استانبوله قریب اولمغله کاه اول جانبه وگاه بو جانبه متابعت ایدرلر ایدی » (صولاقزاده ، ص ۱۳۳) .

نهایت جامع ، عمارت وتربه انشا ایدی (۱۴۱۹م ، ۸۲۲هـ) . اولیا چلبی بو جامعدن بحث ایدرکن دیورکه : « یشیل عمارت نیمه مشهور بر جامع پر نوردر . بروسه نك جانب شرقیسنده مرتفع بر محله مصنع بر جامع دلکشادر . قبه لری بیاض مرمر خادر . ایکی قبه لیدر . طولاً ۱۰۸ ، عرضاً ۸۰ آیقدر . ایچنده اصل استونلری یوقدر . محراب و منبرین تعریفدن عاجزم » .

اولیا چایینک حقی واردی : یشیل جامع ، بروسه نك الك نفیس اثریدی . قبه لرنده و دیوارلرنده یشیل رنگلرک بوتون درجاتی ، تصویر ایدیلر درجه ده بر برینه مزج ایدلمشدی . تربه ده عین لطافتی حائزدی . قاپیلرینی یاپان تبریزلی حاجی علیدی . ایکی آخشاب قانادنده کوفی ونسخ یازیلر واردی .

چلبی سلطان محمد بوکی نفیس اثرلرله مشغول اولدوغی کی ، تیمور فلا کتنده غائب ایدیلن یرلری ده آلمایه چالیشدی . فقط

اونك اك بويوك ضعفي بیزانس ایمپراطوری مانوئهله قارشیدی
وندیکلیرلر ايسه بعضاً خصومت ایدردی . بونك ده سببی واردی
سلطان محمد (ناقسوس) آطهسی حاکمیه چارپیشیرکن
وندیکلیرلر بوکایاردیم ایتیشلر، تورک دونانماسی (کلیولی) اوکنده
بوزمشلردی .

حتی، لو بونك افاده سنه کوره : « مظفریتلرندن ظالمانه استفاد
ایتدیله . تورک قیودانی و دونانماسی ضابطانندن بر چوغنی پارچه
پارچه ایتدیله . بونی قادینلرینک و چوجقارینک کوزلری اوکنده
یایدیلر ؛ چونکه اونلر بو مدهش منظره بی کلیولی سورلرند
کوره بیلیرلردی . وندیکلیرلر ضبط ایتدیکلری چکدیریلر
(تهنه دوس) لیمانه کوتوردیلر ، تورکلری ایچندن چیقاردیلر
هپسینی ده کسیدیلر » (۱) .

چلبی سلطان محمد بونك بالطبع انتقامنی آلدی ، اوده
آغریبوز آطهسی تاراج ایتدی . وندیکلیرلر حربک کسیدیلر
ایچین مضر اولدوغنی آکلادیلر . چلبی سلطان محمد نزدند
توسط ایتمهسی ایچین ایمپراطور مانوئهله یالواردیلر . سلطان
محمد راضی اولدی، وندیکلیرلر بر معاهده عقد ایتدی (۱۴۱۶ م)
سلطان محمد، اوصیراده ، (کلیولی) ده ایدی . ایمپراطور
مانوئهل (موره) دن دونوشنده (کلیولی) ده سلطان راست کلدی

وزون اوزادی کوروشدیلر، بربرینه صمیمیتلرینی و حرمتلرینی
 کلاتدیلر. بواثناده ایدیکه، بایزید بکله (آنقره) محاربه سنده غائب
 ولان اوغلو شهزاده مصطفی (نیکده) دن میدان چیقدی. ایمپراطور
 انوئه لك تشویقیله قارده شی چلی سلطان محمد رقابت ایتیه
 شلادی. شهزاده مصطفی ایله آیدین بکی جنید بك آراسنده
 رین بر صمیمیت واردی. شهزاده مصطفی (تراکیا) یه، افلاقه
 کیتدی، هر طرفدن اطرافنه آداملر طوپلاندی، بوصورتله
 وتلی بر اوردو وجوده کتیردیلر. سلطان محمد، بوحوادث
 وزرینه، یونانستانه کیردی. شهزاده مصطفایه قارشی یورودی،
 سالیاده قارشیلانیدی. شهزاده مصطفی ایله جنید بك،
 کندیلرینی او درجه قوتلی کورمه دکاری ایچین، محاربه یه
 کیریشمک ایسته میورلردی. سلطان محمد مجبور ایتدی: شهزاده
 مصطفی مغلوب اولدی، جنید بکله برابر (سلانیک) ه قاچدی.
 بوراده پارلاق بر قبول کوردیلر. سلطان محمد بوندن چوق
 تئأر اولدی. سلانیک والیسی دیمتریوس لاسقاریسدن، ایکیسینی ده
 ایسته دی. دیمتریوس سلطان محمد جواباً: شهزاده مصطفانک
 عادی بر آدام اولمادیغنی، کندی برادری اولدوغنی، بناء علیه
 کندیسنه التجا ایدن بر شهزاده بی تسلیم ایده میه جکنی، یزانسدن
 کله جک جوابه انتظار لازم کله جکنی سویله دی. سلطان محمد
 هم اصرار ایتدی، همده بویله عادی بر شی ایچین آرالرینک

بوزولمامسنى ايمپراطورمانوئهله يازدى. ايمپراطوردن كلن جوابده،
ازجمله ، شو سطرلر واردى :

« سز بنم يرمده اوليک-زده حکم ويریک-ز : اکر قارده-شلمدن
برى سزك قوجاغک-زه آتيلسه ایدی ، و بنده کندیسنى اولدورمك
ايچين سزدن ايستسه ايدم ، بکا تسایم ایدرمیدیک-ز ؟ شبهه-سز
خير . عالمه قارشى بویله برجنایتی ارتکاب بویورماییک-ز . مساعده
بویوریک-ز شوکتلی ، سزك یاپاجغک-زى بن یاپایم . مع مافیه سزه
قارشى دائما پدرانه حسله متحسس اولدوغم ايچين راحتک-زى ایستر
و سزى راحتسز ایده جک هرشیشی دفع ایدرم . مادامکه ، مصطفى
برقورددر دیورسک-ز ، سزدن قاچق ايچين بنم آغیلمه کیرمشدر ،
سزهیچ قورقاییک-ز . بوقوردك برونى بن اويله بر باغلايایم که . نه سزك
سورولریک-زه ، نه ده بنم سورولریه ضرر ویرسین . جناب حقه قسم
ایدرمکه ، سز بر حیات اولدجه ، مصطفى ده ، جنیدده حریتلرینه مالک
اولامازلر » (۱) .

مانوئهله ، سلطان محمد بومکتوبی یازدیغی کبی ، دیمتریوس
لاسقاریسدن ده شهزاده مصطفى ایله جنید بکک کندیسنه
کوندرلمه سنى امر ایتدی . شهزاده مصطفى (لمنی) آطه سنه
کوندردی . جنید بکی ده (پاماقاریست) مناسترینه کوندردی .
راهبلك نظارتی آلتنه قویدی .

چلبی سلطان محمد ، مانوئهله بوتوصیه سی اوزرینه اصرار
ایتمه دی . حتی اسیرلك محافظه سی ايچين ايمپراطوره هر سنه

اوچ يوز بيك آچقه ده ويرمكه راضى اولدى . بو حادته ،
 چلبى سلطان محمدله ايمپراطور مانوئل بيتنده كى صميميتى برقات
 داها آرتدردى . هيچ براختلاف بوصميميتى اخلال ايده مه دى .
 ايمپراطور ، بومسالت دوره سندن بالاسـتفاده ، اوغلو
 يو آنيس پاله اولوغوسى اولنديردى . ايلك زوجه سى موسقوف
 آنا ، طاعوندن اولمشدى . شيمدى (مون فـهـررا) مار كيسى
 ايكنجى ژاقل قىزى پرنسس صوفى يى آلدى . دوكونده اوغلنى
 سلطنت شريكى اعلان ايتدى ، باشنه ايمپراطورلق تاجى كيدردى .
 فقط صوفى چير كيندى . ايكنجى اوغلو مانوئله ده ، ايتالياده
 ريچى قوتى مالاته ستانك قىزى قله ثوپاسى آلدى .
 او سنه چلبى سلطان محمد ، آنا طولوده آياقلانان بكلىرى
 تاديب ايچين ، بيزانسسـدن كچمه يه لزوم كوردى . ايمپراطوره
 مراجعت ايتدى . حال بو كه ايمپراطورك بوتون مجلس اعضاسى ،
 سرايك بوتون نديملىرى ، سلطان محمد بيزانسه كلير كلز كنديسنى
 توقيف ائمه سنى توصيه ايدى يورلردى . بونلر ، چلبى سلطان محمدك
 بيزانسى آلق نيتنده اولدوغنى ، آنا طولودن دونوشـنده بونيتى
 قوه دن فعله كتيره جـكـنى سويليورلردى . ايمپراطور مانوئل
 بونلرك هيچ برينك سوزينه قولاق آصمادى . چلبى سلطان
 محمد بيزانسه آياق باصار باصار كنديسـنه حرمت ايدلمه سى ايچين
 امرلر ويردى . سرايك اك ممتاز رجـالـدن مركب بر هيئت

سلطانی قارش-یلامایه کیتدی . ایمپراطور نامنه قیمتدار هدیه لر
 تقدیم ایدلدی . چلبی سلطان محمد پارلاق بر معیتله لیمانه کوتورولدی .
 اوراده ایمپراطور مانوئل اوچ صره کوره کالی بر کمی اوزرنده
 کندیسنی بکلیوردی . ایمپراطورک کمیسی یاننده ده غایت مزین
 برکمی واردی . چلبی سلطان محمدده اوکا بئندی . ایکی حکمدار
 کمیده سلاملاشیر سلاملاشماز، کمیلر حرکته باشلادی . اوقادار
 یان یانه کیدیورلردی که، ایکیمی ده بر برلیله قونوشابیلیورلردی .
 (اسکدار) اوکنه کلیندیکی زمان، سلطان محمد قره یه چیقدی .
 ایمپراطورک کندیسنی ایچین حاضر لاتدیفی غایت مزین بر چادرده
 استراحت ایتدی . سلطان محمدده بوراده پارلاق بر ضیافت
 ویریه جکدی . عین زمانده مانوئله اوغوللری کمیدن چیقمادن
 صوفرایه او طور دیلر . سلطان محمدده چادیرده ضیافت ویریلیوردی .
 ایکی حکمدار بیتنده اوقادار صمیمیت واردی که، صوفرالرنده
 بر برینه یمک کوندریورلردی .

چلبی سلطان محمد، ضیافتدن صوکر آتیه بئندی . (ایزمید) ه
 دوغرو یوله چیقدی . ایمپراطورله اوغوللری سرایه دوندیلر .
 حکمدارلر آراسنده بودرجه صمیمیت اولدوغی حالده بیزانس
 سرایی ارکانی حالاسکی فکرلرنده اصرار ایدیورلر، آناطولودن
 دونوشنده سلطان محمدک یاقالانماسنی توصیه ایله یورلردی . ایمپراطور
 بوسفرده تکلیفلرینی ردایتدی . فقط ، عین زمانده ، مملکتک

سلامتی اھمال ایدیور کورونمه مك ایچین، دیمتریوس لاسقاریسه امر
ویردی : لاسقاریس ، (کلیولی) ده سلطان محمدی بکلیه جک
روم ایلنه کچر کچمز ، آناطولو سفرندن دولای کندیسنی
تبریک ایدم جک ، (ادرنه) یه قادار برابر کیده جک ، ایمپراطورک
مرخصی صفتیله (ادرنه) ده قالا جقدی . سلطان محمدک یاننده ،
کورونوشده ، ایمپراطورله آرالرنده کی مناسباتی ادامه وظیفه سیله
قالدیغنی کوستره جک ، فقط حد ذاتنده پادشاهک بوتون
حرکاتی تعقیب ایدم جک و ایمپراطوره خبر ویره جکدی .
دیمتریوس بو وظیفه یی تمامیله ایفا ایتدی . سلمان محمدده دیمتریوسه
قارشى نازکانه معامله ده بولوندى (۱۴۲۰ م ، ۸۲۳ هـ) .
سلطان محمد ، (ادرنه) یه دوند کدن صوکر ، آوه چیقدی ،
بر یابان طوموزینک پیشنی تعقیب ایتدی ؛ فقط اوصیراده قلبنه
نوبت کلدی . پادشاهی ، بی روح برحالده ، سراینه کتیردیله .
طیبدیلر تداویسیله اوغراشدیلر . چلبی سلطان محمد ، حیاتنک
صوک دقیقه لرینی یاشادیغنی آکلادی . بایزید پاشایی چاغیردی ، بویوک
اوغلو مراد بکی خلف تعیین ایتدیکنی سویله دی . کندیسنه
قارشى کوستردیکی صداقتی اوغلونده کوسترمه سنی رجا ایتدی .
مراد بکه ایمپراطوری دائماً مدافعه ایله مه سنی توصیه ایتدی ده
اونو تمادی . بری سکیز ، اوبری یدی یاشنده ایکی اوغلونی ،
محمدله یوسفی ، بیزانس ایمپراطورینک وصایتنه براقدیغنی سویله دی ؛

بیزانس ایمپراطورینه اعتمادی بو درجه لرده ایدی .

سلطان محمد بووصیتلری متعاقب چوق یاشامادی؛ اولوم ،

صوك ضربه سیله ، حیاته خاتمه چکدی .

او اثناده مراد بك (آماسیه) ده ایدی ؛ او زمانلر

(آماسیه) ، جوارینه (رومیه صغری) دیرلردی . صدراعظم ،

سلطان محمدك وفاتی خبر ویرمك ایچین چاشنیکیر باشی الوان

بکی کوندردی . سلطان محمدك وفاتی کیمسه یه سز دیرمه دی .

« حکیملر کیرلر ، چیقارلر ، پاشالره حکیملر هربری دوا

ایچون بردرلو اوت استرلرکه خنکاره علاج ایدلم دیرلردی »

(عاشق پاشا زاده ، ص ۹۵) . همان هر زمان آطه لره ،

استانبولده ، الکای علاج بولونمقله مشهوریرلره آداملر کونده ریرلر ،

علاج آراتیرلردی . نهایت طبیبلر ، سلطان محمدك جسدینی اویله

برحاله کتیردیلرکه ، جسد تحنیط ایدلدکن هوکرا ، دیریمی ،

ألومی ، فرق ایتمک قابل اولمادی . هرکس پادشاهی صاغ ظن

ایدیوردی . کویا هیچ برشی یوقش کبی ، سرایده ، پادشاهك

اطرافنده ، عسکری واداری وظیفه لراسکیسی کبی ایفا اولونیوردی .

دعوالر کورولیور ، امرلر ویریلیور ، سرای اسکی فعالیتنی تمامیه

محافظه ایدیوردی .

بایزید پاشانك بو تدبیرلرده بولونماسنك سببلری واردی :

سلطان محمد ، اولمزدن اول ، وزیرلرینی طوپلامش :

— تیز اولو اوغلم مرادی کتیردك . بن خود بودوشكدن قورتمازین ، مراد کلمدین بن اولورین ، مملکت بری برینه طوقوشور . تدارك ایدك ، بنم وفاتم طویولیه .

دیمشدی . بایزید پاشا ایسه ، روملرك ، بولغارلرك ، صربلرك ، ماجارلرك ، وندیكليلرك ، بو فرصتن استفاده ایدهرك ، تورك ممالکنه تجاوز ایده جکلرندن قورقیوردی .

بایزید پاشا ، پادشاهك اولومنی اوقادار برمههارتله صاقلادی که ، سرایده بیزانس ایمپراطورینك مرخصی دیمتریوس لاسقاریس بیله فرقنه وارانمادی . دیمتریوس بیزانسه پوسته یوللامق ایسته دی ، بوتون یولارك قاپالی اولدوغنی کوردی . بو وقعه بیزانسه ده شایعه لره سببیت ویردی . هرکس ایمپراطور مانوئه له هجوم ایتدی ، تورکلره فضله اعتماد کوستردیکی ایچین سرای خاقی ایمپراطورك عایهنده بولونویوردی .

مراد بك ، باباسنك وفاتی اولاقلردن خبر آلیر آماز ، (بروسه) یه کلدی ، بایزید پاشا طرفندن قارشیلاندى . « بروسه ده تخته اوطوردی . خطبه پادشاهی اوقوندی . سلطان محمدك میتنی بروسه یه کتیردیله ، همین که میت ظاهر اولدی . عالمده شر و شور ، فتنه لر بلیرمکه باشلادی » (عاشق پاشازاده ، ص ۹۶) (۱۴۲۱ م ، ۸۳۴ هـ) .

۶. بيزانسك صوك سنه لرى

يكي پادشاه ، ايكنجى مراد ، باباسى كېى حليم دكلدى .
چاى سلطان محمد ، سلطنت اوغورنده ، قاردهشى موسى بكك
عزمنى قيرمشدى ؛ عثمان بك زماندن برى توركلرك تعقيب
ايتدكلرى سياستى ، منفعتى اوغورنده ، توقفه محكوم ايله مشدى .
موسى بك وظيفه سنى تماماً ايفا ايدىوردى . موسى بكك ساطتى ،
محمد چلبينك قناعت وتواضعى ، امير سايمان زمانده اولدوغى كېى
دوام ايتسه يدى ، اورخان ، مراد و بايزيد بكلرك قان دوكلرك
فتح ايتدكلرى بلده لرى ، تيمور فلاكتندن استفاده ايدهرك
ضبط ايدنلرك اللارندن آلق قطعياً ممكندى . موسى بك عزمكار ،
متشبت ، عاقل ، وفطيندى . اجدادينك بيزنسه قارشى تعقيب
ايتدكلرى سياستدن وازكچميور ، روملرك ازلى برتورك دوشمانى
اولدقلىرىنى بيلىوردى . ايمپراطور مانوئلك چاى سلطان محمدى
اداره ايتمه سى ، حتى يوزينه كولمه سى منفعتى اچوندى . برطرفدن
اونى طاتلى سوزلرله اغفال ايدىيور ، ديكر طرفدن توركلرك فتح

ایتسکری بلده لری اله کچیریور، (موره) نك تحکیمیله اوغرا -
شیوردی .

بیزانسیك آلیماسی ایسه ، تورکلرک روم ایلی و آناطولوده
بقاسی ایچین الزمدی . تراکیا ، قره دکن و صرمه ساحلنده کی
یرلرک بیزانسه ویرلمه سی ، بیزانسیك حیاتی قوتی آرتدیراییلردی .
تورکلرک مساکلری ، بیزانسی قره دن قوشا تمق ، بیزانس
اطرافنده کی قلعه لرله ، مهم موقعلری آلمق ، اونی تورک طوپراغی
اورتاسینده مجرد برحاله براققدی . واقعا بورالری ، تیمور
فلاکتی اثناسینده ، تکرار روملرک آلینه کچمشدی ؛ فقط
بونلری تکرار آله ایتک زور برشی دکلدی . موسی چلی بو
وظیفه یی بحق یاپیوردی .

نته کیم امیرسایمانک بیزانسه براقدین ییرلری برر برر آلمشدی .
فقط تام بیزانس اوکنده ، شهره صوک ضربه یی ووراجنی صیراده
چلی سلطان محمدک آناطولوده باش قلدرماسی ، تورکلرک
برعصردن بری تعقیب ایتسکری سیاستی ده ، چکدکری امکلری ده
محو و هبا ایتمشدی .

ایکنجی مراد بو حقیقتلره واقفدی . مع مافیه بو حسنی
بیزانسه قارشى داها ایلك کونلرده بللی ایتک ایسته مه دی .
جلوس ایدرایتمز ایمپراطور مانوئله برهیئت کونلردی . باباسی
زماننده یاپیلان اتفاقلرک یکیلنمه سنی طلب ایتدی . ایمپراطور ،

پادشاهك اياچيلرينه جواب ويرمزدن اول، سراي مجلسنى طوپلادی . هر کس مختلف فکرلره بولوندى . ايمپراطور مانوئل ايکنجى مراده دوستانه جواب ويرمك ايستيوردي . اوغلو سکزنجى يوآنيس پاله اولوغوس ايسه بو فکدره دکلدی . او ، اوتهدن برى توركلره اعتماد ايدلمهك طرفداریدی : توركلرك شرق ايمپراطورلغنى محوايتمك غايهسنى تعقيب ايتدکلرينى بيليوردي . اونك فکرنجه ، مادامکه توركلره قوتله هجوم ايتمك قابل دکلدی ، هيچ اولمازسه توركلر آراسنه فسادتخمى أکهرک ، اونلرى بربرينه دوشورهرک ، بوتون تورک قوتلرينک برباش ايله اداره اولونماسنه مانع اولارق تورک قوتنى ضعيف دوشورمك لازمدی . شهزاده لر آراسنه تفرقه صومق ، برپادشاه روم ايلنده ، برپادشاه آناطولى لوده اولمق داها موفقدی . چونکه امير سلیمانله چلبى سلطان محمدزماننده بونک منفعتى کورولمشدى . کذا ، برينه يارديم ايدهرک اوبرينى أزمک ، يارديم ايتدکلرينى حمايه سى آلتنه آلمق ويا کنديلرينه ضرر ويره ميه جک برحاله اويالامق ، ضعيف ومتفسخ بيزانسكر صوگ سياستیدی . خصوصيله شيمدى ، بيزانس سرايى بوکا هر زماندن داها زياده موفق اولابيليردى . ايکنجى مرادک عموجه سى شهزاده مصطفى اللرنده ایدی . اونى هر زمان ايکنجى مراده قارشى تهديد آلتى اولارق قوللانا بيليرلردى . ايمپراطور مانوئل ، کنديسنک توركلره صلحچورانه

یاشامق ایسته دیکنی سویله دی . سوزینی کچیره مینجه ، اوغلو
وسلطنت شریکی یو آنیس پاله اولوغوسی ایسته دیکنی کی حرکت
ایتمکده سربست براقدی .

سکزنجی یو آنیس هیچ وقت غائب ایتمه دی . (ادرنه)
سراینه ایلاچیلر کوندردی ، بونلر ایکنجی مرادی هم باباسنك
وفاتندن دولای تعزیه ایده جکدر ، همده مرحومک وصیتی
موجبجه کوزه تمه لری لازم کلن ایکی شهزاده پی ، شهزاده محمودله
یوسفی ، ایسته جکدر دی . چابینك دیگر شهزاده لرندن احمد ،
داها باباسنك صاغلغنده ، وبادن اولمشدی (۱) .

شهزاده مصطفی ، حمیدایلی والیسیدی . ایکنجی مراد ، محمودله
یوسفی (توقات) ده حبس ایتمشدی . فقط بالاخره کتیرتمش ،
آنالریله برابر (بروسه) یه یرلشدیرمشدی . عاشق پاشازاده دییورکه :
« اول ایکی قارده شلرن توقاتده حبس ایتمشدی . کتیردی . ایردی ،
کوزلرین آچدی ، بروسه ده علوفه تعیین ایتدی ، اوطوردیلر ، آنالری
بیله » . شوخالده بو ایکی شهزاده نك آنالری ده سلطان مرادله
آیریدی . صحائف الاخبار (جلد ۳ ، ص ۴۲۷) شهزاده محمودله
یوسف و احمدک وبادن اولدیکنی یازیورسه ده ، بالطبع دوغره
دکلدر .

سکزنجی یو آنیسك ایکنجی مراددن شهزاده لری ایسته مه سی

بر بهانه ایدی . حتی پادشاه ردایده جک اولورسه ، قوت فلان ده
سوق ایده جکری یوقدی . شهزاده مصطفای صالیویره جکر
دیه سلطان مرادی قورقوتاجقلردی . اونلرک فکر نجه ، شهزاده
مصطفی اورتایه چیقاجق اولورسه ، ما که دونیاده ، جنوبی
ترا کیاده ، آنا طولوده در حال پادشاه طانیلاجقدی .

ایمپراطور مانوئل یو آنیسک ایاجیلرینه ، ایکنجی مراد نامه
بایزید پاشا جواب ویردی : اسلاملرک کندی دین دوشمانلرینه
چو جو قلرینک تربیه سنی تودیغ ایتملری شرعاً جائز اولمادیغنی ،
ایکنجی مرادک روملره قطعاً تجاوز نیتنده بولونمادیغنی ، اگر
ایمپراطور مانوئل تورکلرله دوست یاشامق ایسترسه ، اوده
کندی النده اولدوغنی ، کذا دوستی چلبی سلطان محمدک ایکی
شهزاده سنه قارشى پدرانہ حسیات بسلامک ایسترسه ، حسیاتنه
ینه حاکم اوللا بیاه جکنی ، فقط اونلره وصی اولماسنه اصلا امکان
اولمادیغنی سویله دی . ذاتاً بیزانس سراینک تورکلردن بکله دیکی
جواب ده ، بوایدی . سرای مجلسی ترتیباتی حاضر لامشیدی .
دیمتریوس لاسقاریس در حال اون چکدیریدن مرکب بردونانما
ایله (انی) آطه سنه کوندرلدی . وظیفه سی ، شهزاده سلطان
مصطفای محبسدن چیقارمق ، (کلیبولی) طرفلرینه کوندرمک
واوراده پادشاهلغنی اعلان ایله مکدی .

فی الحقیقه ، بر قاچ کون صو کرا ، بایزیدک اوغلو ، (آنقره)

محاربه سنده غائب اولان شهزاده مصطفانك پادشاهانی اعلان ایدلدی . هر كس بايزيد بكك اوغلونی مشروع پادشاه اولارق طانییدی ، بو صفتله ایکنجی مراده تابع یرلرك بر چوغنی آلمایه موفق اولدی . سلطان مصطفانك قازانديغی موفقیتلر امیدینك ده فوقنده ایدی . دیمتریوس لاسقاریس ، بو ظفرك نشئه لرندن استفاده ایتك ، سلطان مصطفای بیزانسه بوسبوتون باغلامق ایستهدی . سلطان مصطفی غالبیتله سرمستدی . بو سرمستی اثناسنده دیمتریوس لاسقاریس کندیسندن هر نه ایسته دیسه ، راضی اولدی . سلطان مصطفی (کلیولی) بی ایکنجی مراددن آلیر آلماز ایمپراطور مانوئه له ویره جکدی . بوندن باشقه ، قره دکز ساحلنك افلاقه قادار اولان قسملریله ، تسالیانك اك كوزل یرلرینی ده تسلیم ایده جکدی ؛ سلطان مصطفانك بو وعدلری ، موفقیتنی قولایلاشدیرمق ایچوندی . امیر سلیمانله چلی سلطان محمدن ماعداء ، هانکی تورك بکی بیزانس دسیسه لرینه اویونجاق اولمشدی ؟

سلطان مصطفی ، اول (کلیولی) بی قوشاتدی ، ایکنجی مراده قارشى خصومت بورادن باشلادی . شهرى چارچابوق آلدی . (کلیولی) محاربه سنده ایکنجی مرادك وزیرى بايزيد پاشا شهید اولمشدی . ایچ قلعه ده کیلر بو خبری ایشیدنجه ، تسلیم اولدیلر . برچوق قلعه لرده سلطان مصطفایه تابع اولمایه باشلادیلر .

تورك ، روم ، بوتون خلق (كليبولی) يه كليورلر ، سلطان مصطفىاه اطاعت ایدیورلردی .

دیتریوس سوینجندن چیلدیریوردی . (كليبولی) آلینر آلماز ، هان سلطان مصطفىاه قوشدی . شهرک ایمپراطوره تسلیمنی ایستهدی . جنید بك ده اوراده ایدی ؛ جنید بك ایکنجی مراد یوزندن واقعا بوتون بکلیکنی ونفوذنی ضایع ایتمش ، کذا اوسبیدن دولایی سلطان مصطفى ایله برابر اولمشدی ؛ فقط روم پاپاسلری النده کچیردیکی محبس حیاتی اونی صوك درجه بزار ایتمشدی . جنید بك ، دیتریوسك (كليبولی) یی ایستهدیکنی کورونجه ، بو جرأته حیرت ایتدی ، وشوسوزلری سویلهدی :

— بزم غیرتمزدن ، محاربه لریمزدن ، وقانمزدن عجباً ملتک استفاده ایده بیلیر صانیورمیسك ؟ قازانديغمز مظفریت ، حقك بزه بر عطیه سیدر . بزه اونی قازانديران ، جناب حقدور . بز آنجق اوکا حمد ایدرز . واقعا سزده بزمه برابر حربك یورغونلقلرینه و تصادفلرینه قاتلاندیکز : فقط بزه بوکافارشی سزه مکافات ویرر ، وخیراخواهانه معامله ایدرز . سزك ایچین بوجیهله کافی اولمالیدر . شهر وقلعه فدا ایده جکمزی هیچ عقلکنزه کتیرمه ییک . هله بیزانسه دونمه کزه مساعده ایدرسهك ، بزه اوزون مدت کچیرتدیککزم محبس حیاتی ، غاردیان کبی ویردیککزم

پاپاسلرىككە اذيتلرني اونوتورسەق ، بوكا ممنون اولماليسك .
 قوردك لىلكە ويردىكى جوابى بىلىرمىسك ؟ بىن دە بو جوابى
 ويريورم . قافاكك سلامتى سكا مكافات دىمكدى . بىنى دىكلە ،
 هوالرەن استفادە ايت . هوالرە فنا دكل ، يلىكنلرى آچ ،
 كىت ، ايمپراطورىكى بول ، بزدن سلام سويلە ، موفقىتلىرىمىزى دە
 خبر وير . مانوئەلى بزمە دوست كچىندىرمەيە باق . كذا اوده
 بزم دوستلغىمىزە اعتمادايتسين ، فقط كليولى يى عقلندىن چىقارسىن (۱) .
 دىمترىيوس لاسقارىس بويلە بر جوابى هيچ بىكلە ميوردى .
 جنيد بىكك سوزلرئىنە شاشىردى . فقط اوكا اهميت ويرمەدى .
 برده سلطان مصطافى ايله كوروشمك ايستەدى . يانە كلىدى ،
 (كليولى) دن بحث ايتدى . اوندىن دە شو جوابى آلىدى :

— بىن مانوئەلە قارشى بويلە بروعدە بولوندى و غمى انكارايتيورم .
 فقط بوسوزى طوتمامە ، دىنمىز مساعىد كىلدى . اسلامە مسكون بىر بلە يى
 خرىستىيانلرە تسايىم ايتمك جىنايتدىر . حتى دىنمىز ، اونلردىن داها بر چوق
 بلە لر آلمىقلىغىمى آصردىر . بىن صوك درجە دىندارم . دىنمك احكامنە
 صادقانە رعایت ، وظیفەمدىر . كذا اونى نشر ايتمك و خرىستىيانلىق
 انقازى اوزرندە ترقىسنە چالیشمىق دە بىم ايچىن بر بورجىدىر .
 باشقە درلو حرىكت ايدىرسەم ، الله بىكا لعنت ايدىر ، هم بوتون
 اسلاملر ك دە لعنتە دوچار اولورم .

دیمتریوس لاسقاریس آرتق سلطان مصطفی به قارشی حرمت و احترامی براقدی ، اك آغیر لافلر سهویله مهیه باشلادی .
لاقیردیلری آراسنده شو جمله لر دفته شایاندی :

— یوز اللی سنه وار ، اجدادیکزدن عثمان ، اُلیمزدن (ویتینیا) پی ، (پافلاغونیا) پی ، (فیریکیا) پی آلدی .
اوغلو اورخان ایمپراطور لرله یاپدینی معاهده لرله دائماً اکلندی ، ایتدیکی عهدلر اوروپاده کی مالکانه مزه تجاوزدن اونی منع ایدمه دی . طورونی و بابا کز بایزید ، اونك ساطتنه وارث اولور اولماز ، بزه قارشی خصومتنه ده وارث اولدی . روملر قارشی ظالمانه حرکت ایتدی . فقط کوردیکز یا نتیجه ناصل اولدی ؟
اونی ناصل بر عاقبتیه سوق ایتدی ؟ عیسی ، سایمان ، موسی ، اونك اوغوللری وقار دشلری کز هپ بربری آرقاسنه تاجلر ندن ده ، جانلر ندن ده محروم اولدیلر . قار دشلر کز محمد ، ایشته بزمه دوست یاشایان ایلك سلطان او اولدی ، و حیاتی ده سکونتله کچیردی . طالعك نواز شلرینه اینا نایکز ؛ سعادتك دائمی اولاجغنی صانما یکز (لوبو ، کتاب ۱۱۶ ، ص ۹۵) .

دیمتریوس لاسقاریسك بوسوزلری اهمیته شایاندی . بو آجی سوزلر بك آشکار بر صورتده کوستریوردی که ، سلطان مصطفی مؤرخلریمزك ریا و تبصص اثری اولارق یازدقلری کبی ، دوزمه مصطفی دکلدی ؛ بایزید بلك حقیقی اوغلیدی . دوزمه مصطفی

اولسه یدی ، جنید بکه اهمیت ویرمه یی دیمتریوس لاسقاریس
اوکاده اهمیت ویرمز ، و بو آجی سوزلری آراسنده سلطان
مصطفانک اجدادینی و افعالی ذکر ایده جکسه ، دوزمه لکنی
یوزینه ووروردی .

سلطان مصطفانک جوابی دیمتریوسک بوتون امللرینی قیردی .
ایمپراطور مانوئل ایله اوغلو یوآنیس پاله اولوغوس تمامیه قانع
اولدیلرکه ، سلطان مصطفی پادشاهلقده باقی قالا جق اولورسه ،
روملرک بی آمان بردشمنی کسیه جک . ایمپراطور مانوئل
بوتصور قارشیسنده تتره دی . کندی پلانی کندی بوزدی .
ایکینجی مراده آدم کوندردی ، کندیسیه برلشمه یی ، بوتون
قوتلریله ساطان مصطفی اوزرینه یورومه یی تکلیف ایتدی ،
بونک ایچین ینه اسکی شرطی ، چاپی سلطان محمدک شهزاده لرینی
ایلری سوردی ؛ (کلیولی) نکده کندیسنه براقیلماسنی ایسته دی .
ایکینجی مراد ، رقیبی سلطان مصطفای اورتادن قالدیرمق ایچین
ایمپراطورله مذاکره کیریشدی . بیزانسه برهیئت کوندردی .
بوهیئت میانده ابراهیم پاشاده واردی . عاشق پاشا زاده یه
کوره (ص ۱۰۱) : « استانبول تکفورینی ککبوزه قاضیسی
کیم ، اول فضل اللہدر ، آنی ایلاچی کوندردیلر ، آنکچونکم
اول تکفوره قونشو ایدی . تکفور ایدر : « مولانا قاضی ،
ولق اوغلینه بونجه یر ویردکیز ، دخی بکاویزه دن بریسن ویرک ،

سزکله باریشهیم » دیدی. قاضی ایدر: « چورلودن حداولسون »
اینجکزی بیله ویردیله ، تکفور دخی قبول ایتدی .

بیزانس مؤرخلرینه نظراً تکفور راضی اولمادی ، ابراهیم
پاشا ایله کوروشدی. ایمپراطور مانوئل متصل (کلیولی) ایله
شهراده لری ایستیوردی. ابراهیم پاشاده بوکاراضی اولیوردی.
نهایت مذاکره کسیددی .

ایکنجی مراد ایمپراطور مانوئلدن ده ، عموجه سی سلطان
مصطفادن ده انتقام آلمایه حاضرلاندی . ایلک اوچک سـلطان
مصطفی اوزرینه یورودی . فقط قوته کووه نه مدیکی ایچین
(یکی فوچه) ده کی جنویر قوماندانی یاقو آدورنودن امداد
ایسته دی .

آدورنو ، ایکنجی مرادک آرزولرینه تابع اولدی . اوردوسنی
آناطولودن روم ایله کچیرمک ایچین بر قاج کمی ویردی .
سلطان مصطفی (ادرنه) ده ایدی . بوراده ذوق و صفا ایله
وقت کچیریوردی . ایکنجی مرادک حاضرلقلرینی خبر آلدی ،
آدورنونک کمیلری حاضرلانمادن ، آناطولییه کچدی . بر قاج
کونده (لایسکی) یه گلدی . معیتنده بویوک بر اوردو واردی .
ایکنجی مراد ، عموجه سنک بو مدعش حاضرلقلرینه قارشى
شاشیردی . (بروسه) ده حاضرلقلر کورمه یه باشلادی .
« ایشیتدیله ، دوزمه اوزرلرینه کلیرمش . پاشا بش اولدی :

ابراهيم پاشا ، حاجی عوض پاشا ، تیمور تاش اوغلو ، ایکی دخی ،
بری اوروج و بری علی ، اتفاق ایتدیله . میخال اوغلینی
توقات حبسندن چیقاردیلر ، سلطان مراده کتیرمه و هم آنک
کی ایتدیله . حبسندن کم چیقاردیلر ، بزم الوان چاپی تکیه سنه
اوغرا نی ، فقیری آلدی ، بیه کیتدی « (۱) .

ایکنجی مراد (اولوباد ، لوبانیون) کوپریسنی کسمشدی .
اوردو کاھی اوراده ایدی . سلطان مصطفایک قوتلری فائق
اولدوغنی کوردی . حیلله مراجعت ایتدی . جنید بکی
قاندیردی ، کندی طرفه کچیردی . سلطان مصطفی بونک اوزرینه
چکیلیمه باشلادی . (از میر) کیتدی . اوراده ده طوتونامادی .
اوغرا دینی بوزغونلق جسارتی قیردی . بر قایغه بیندی ،
(کلیولی) یه چکیلدی . بوراسی ، مدافعه یه اک زیاده صالحدی .
ایکنجی مراد آنا طولوده ایدی ، قارشیی کچه میوردی .
نهایت آدورنویه مراجعت ایتدی ، آدورنو ایکنجی مرادک
آرزولرینه موافقت کوستردی . کیملری حاضرلادی ، ایکنجی
مراد ، بر صباح ، فجرله برابر ، (لاپسکی) ایله (کلیولی)
آراسنه کلدی . یدی کمی حاضرلادی . کمیده فرانق ، لاتین
و ایتالیا نلرده واردی . نهایت بوغاز کچیلدی . سلطان مصطفی
کیملری طوپه طوتدی . عسکر باشقه بر نقطه یه چیقاریلدی .

هجوم باشلادی ، (کلیولی) اوزون مدت دایانامادی . سلطان
مصطفی ، قلعه نك دوشه حكنى حس ايدر ایتمز ، (ادرنه) ده کی
خزپنه سنی ده برابر آلدی . ایکنجی مراد آرقه سندن برسواری
مفرزه سی کوندردی . سلطان مصطفی بوسفر یاقای اله ویردی ،
« قیزیل آغاج یککیجه سنده طوئدیله ، ینه ادرنه یه کتیردیله ،
حصار برچندن آشاغی آصا قودیلر ، جمیع خلق تفرج ایتدیله
(۱۴۲۳ م ، ۸۲۷ هـ) (۲) .

ایکنجی مراد ، حقیقی رقیبندن قورتولمادی . (ادرنه) یه
کلدی . اهلینک آلقیشلری آراسنده پاتختنه کیردی . ایکنجی
مراد آدورنودن ایملک کورمشدی . بواییلکی اونوتمادی ،
کندیسنه (پیری نه اوریون) قلعه سنی ویردیکی کیبی ، (یکی
فوجه) ده کی شاب امتیازینی ده بخش ایتدی . مؤرخ دو قاسک روایتنه
کوره (یکی فوجه) ده شاب غایت بولدی . بوتون فرانسز ،
ایتالیان ، اسپانیول ، آلمان ، انگلیز ، سوریه ، مصر و عرب
کملری بورایه کلیرلر ، شاب تجارتی یاپارلردی . اوزمان شاب ،
بویا و سائر ده قوللانیلمق ایچین پک زیاده آرانیردی .

ایکنجی مراد ، عموجه سی سلطان مصطفانک اورتادن قالدی .
لماسی ایچین کندیسنه یاردیم ایدنلری تلطف ایتدی . عین زمانده ،
سلطان مصطفایه یاردیم ایدنلری ده جزالاندرمای دوشوندی ،

اطان مصطفی طرفدار لرینک باشنده بالطبع بیزانس ایمپراطوری اوردی .

ایکنجی مراد، جدی بایزید بکک، عمو جه سی موسی چالینک انسه قارشی قوللاندقلری سیاستی داها عز مکارانه تطبیق نهیه قرار ویردی . ذاتاً بیزانسیک هر طرفی تورک عسکر یله شاتیلیمشدی . یاپیلاجق برشی وارسه، اوده هجوم حاضر لقلرینی ورمکدی .

ایمپراطور مانوئل آرتق بو دائمی مجادله لردن بیقمش ، بهری له پت) مناسترینه چکیلمشدی . اوراده اینجیل او قویور، نی اثر لر یازمقله مشغول اولیوردی . بونکله برابر سلطنتدن اغت ایتمش دکاردی . حکومتی بنه اوغلو سکزنجی یو آنیسله ابر اداره ایدیوردی ؛ فقط کندی نی خلقه پک نادر کویستر- وردی . اصل اداره، یو آنیسک آنده ایدی . یو آنیس، ازلی بر رک دوشمانیدی . باباسنک تورک لره قارشی تعقیب ایتدیکی صالح سلامت سیاستنک علیهنده ایدی . شیمدی اداره وقوت ده آنده ی . توری ازمک ایچین ایسته دیکی کبی حرکت ایده بیلیردی . آنیس، ایکنجی مرادک بیزانس اوزرینه یورودیکنی ایشیدیر متمز ، دهشت ایچنده قالدی . شهر ی مدافعه ایچین هیچ بر بیر اتخاذایدله مشدی . ایکنجی مراده بر هیئت کوندردی ، ردوسی چکمه سنی رجا ایتدی ، ایمپراطورک فکر نجه واقعا

روملر سلطان مصطفایه یاردیم ایتیشلردی؛ فقط بونک یکانه سببی،
 بایزید پاشا ایدی. بایزید پاشا، باباسی مانوئهله محقرانه معامله لرده
 بولونمشدی. خصوصیه چلبی سلطان محمدک ایکی اوغلونی،
 مرحومک وصیتی موجبینجه، کندیلرینه تودیع ایتیمشدی.
 سلطان مراد، بوماصلاری دیکلهمدی. روم هیئتنی توقیف
 ایتدیردی. بیزانسیک محاصره سی ایچین یاپیلان حاضر لقلر بیتنجیه
 قادار صالیویرمه دی. حاضر لقلر بیتدی، ایاجیلری ده براقدی:
 — امپراطوره سویله ییک. یاقینده کندیسنی زیارت ایده جکم.
 دیدی، بیزانسه متوجهاً حرکت ایتدی. مانوئهله ایله اوغلو
 یوآنیس، ایکنجی مرادی عزمندن دوندورمک ایچین چوق
 اوغراشدیلر، هر درلو واسطه لره باش ووردیلر، نهایت الیمتاز
 آداملرندن قوراقسی کوندردیلر.
 قوراقس، تورکجه بی غایت کوزل سویلردی. تورکلرک
 عادتلرینه ده، دهالرینه ده واقفدی. بیزانس سرایی اونی پک
 چوق دفعه لر تورکلرله یاپیلان مذاکره لره مأمور ایتمش، و ناموسیله
 ایشه نتیجه ویرمشدی. فقط بوسفر موفق اولامادی. قوراقسی
 چکمه ینلر در حال عاینه دوندیلر. مملکتنه اهانت ایتدیکنی
 ایلری سوردیلر. قوراقسیک تورکلرله اویوشدوغنی، ایکنجی مراد
 بیزانسی آلاچق اولورسه، قوراقسیک اورایه والی اولاجغنی
 سویله دیلر. قوراقسیک دوشمانلری آراسنده بر چوق کریدیلر

واردی که، بونلرایمپراطورک خاصه عسکری نی تشکیل ایدیورلردی.
 مانوئل، قوراقسک بویله بر اهانتده بولونا جغنی اومیوردی.
 حتی قوراقسی برازمدافعه ایدرکی اولدی؛ فقط موفق اولامادی.
 قوراقسی یا قالدیلر، اشکنجه لر و اذیتلرله بعض سوزلر سویله تدیلر.
 اوینی باصدیلر، کوموش طاقلر، قیمتدار خالیار میدان چیقاردیلر.
 قوراقس، ایکنجی مراده تقدیم ایدمک اوزره، ایمپراطورک
 یوللادیغی اشیایی آشیرمشدی. نهایت کوزلرینی اویدیلر، بریسی
 اویارکن او قادار زورله چکدیلر که، قوراقسک یوزی طانماز بر
 حله کلاسی، اوچ کون صوکراده وفات ایتدی.

ایکنجی مراد بو معامله یی دویدی، فنا حله حدتاندی.
 قوراقسی خبروین، میشل پیلیس اولدوغنی خبر آلدی. پیلیس
 آياثلو غلیدی. اوصیراده تورک اوردو کاهنده بولونیوردی. ایکنجی
 مراد پیلیسی توقیف ایتدیردی. اوده عین اذیتلرله تلف ایدلدی.
 بیزانس محاصره سی اولانجه شدتیه باشلادی (۱۴۲۳ م،
 ۸۲۷ هـ). ایکنجی مراد شهری آلمایه عزم ایتدی. مدافعه
 غایت شدتلیدی. روملرک خروج حرکتلری محاصره اوردوسنی
 یورووردی. امیر سلطان ده اوردوده ایدی. دده لر، درویشلر،
 یکچریلر، سپاهیلر، همان مادی و معنوی بوتون قوتلر، بیزانسیک
 فتحی ایچین حصر ایدلمشدی. قطعی هجوم ۲۴ آغستوسده پایلاجقدی.
 بیزانسه قادینلر بیله مدافعه یه اشتراک ایدیورلردی. معافیله

ايكنجى مرادك عزمى موفقيته منجر اولامادى. اوردو چكيلهيه مجبور اولدى. توركلار بو محاصرهده طوپ قوللانديلر. فقط اونلردن ده قطعى بر فائده حاصل اولامادى. اوج آي سورهن محاصره قطعى بر موفقيتله نتيجه له نه مەدى. غريبدركه، توركلرده، روملرده بو حادثه يي عيني تظاهرله تفسير ايتديلر: توركلار، بيزانس سورلري اوزرنده يشيل اثوابلى بر قادين دولاشير. كن كوردكلرينى سويلهديلر. روملرده امداد لرينه حضرت مريمك يتيشديكنى ادعا ايتديلر. حال بوكه بيزانسى تورك نچه سندن قورتاران، هر زمان اولدوغى كېي، بوسفرده نه يشيل اثوابلى قادين، نه ده حضرت مريمدي: عثمان اوغوللارينك كندى نسل، كندى عرقى، كندى شهزاده سيدى: «سلطان مرادك بر قاردشى كم او كوچوچك قاردشيدى. آكا مصطفى ديرلردى، آتاسى آكا حميد ايلي سنجاغين ويرمشدى، هم كرمان اوغلى دخى آنى اوغل ايدنمشدى» (عاشق پاشا زاده ۳ ص ۱۰۱). ايشته او، شمى ده، تام توركلار جدينك وخاندانك الكيله كار دوشمانه قارشى حرب ايتديكى، توركك يكانه هدفنى عزمى ومتايتيه آلمايه وقرون وسطا تاريخنى بر آن اول قاپاتمايه چاليشديغى بر زمانده، سلطنت سوداسيله اهانته جرأت ايدنيوردى.

شهزاده مصطفى بواهاتى كندى كندينه باشه چيقاراجق بر ياشده دكلدى. كنديسنه يارديم ايدنلر واردى؛ فقط بويارديم

ایدنلر ، شهزاده مصطفانك ظاهری دوستی ، خاندانك حقیقی
دوستانلریدی . شهزاده مصطفای صرف کندی قوتلرینی آرتدیرمق
ایچین اغفال ایدنلر ، کر میان اوغلو ایله قارامان اوغلو ایدی .
فی الحقیقه شهزاده مصطفی ، قوتی عثمان اوغوللارینك دوستانلرندن
آلدی . لالاسی شرابدار الیاسله برابر (بروسه) اوزرینه یورودی .
(بروسه) نك آخیلری اوزمان ده بویوك بر نفوذی حائز ایدیلر .
« بروسه نك عزیزلری ایشیتدیلر کم مصطفی کلیرمش ؛ تیز
شهر دن خیلی آچه ، ویوز پاره دخی قماش آلدیلر ، شهر ك
اخیلرندن اخی یعقوبله اخی قدمی کوندردیلر . مصطفی دخی
کلدی ، (فدییه) یه قوندی ، بو اخیلر ، بلك لالاسینه کم شرابدار
الیاس در ، آکا واردیلر ، ایتدیلر : « بودخی پادشاهمنز اوغلیدر ،
والا قاردشی کلدی ، حصاری بر کیتدی ، ایمدی کرم ایدك ،
آتاسینك مملکتی بویك لشکره ییقدردك » دیدیلر . « وهم
شهره کتیرمك » دیدیلر ، « وهم شهره کتیریمك شایدكه
ییقهرلر ، ویاخود اوردرلر ، زیرا بیلرسز قره مان بونلرله مدعیدر »
دیدیلر (۱) .

شرابدار الیاس بوسوزلری قبول ایتدی ، هدیه لری آلدی ،
شهزاده ایله برابر (ایزنیک) ه کلدی . ایزنیکده ابراهیم پاشا
سرائنه قوندیلر ، اطرافدن تیمار ایسته ینلره تیمار ویردیلر .

حکومتی اللرینه آلدیلر ، سلطنت سورمهیه باشلادیلر .
ایکنجی مراد هپسندن خبرداردی . بیلوردی که ، شهزاده
مصطفی بوتون بو ایشلری یاباقق اقتدارده دکلدی . هرشی
شرابدار الیاسک النده ایدی . ایکنجی مراد ، پاشالرینه شرابدار
الیاسی الده ایتمه لرینی امر ایتدی . بونلر الیاسه خبر کوندردیلر :
« خونکار سکا آناطولو بکلر بکیملکن ویردی » دیدیلر ،
براتی ده کوندردیلر . صوکراده ، شونی آرزو ایتدیلر :
« جهد ایله ، اوغلانی اُکله ، بز آنده وارنجه » .

شرابدار راضی اولدی . ایکنجی مراد (ادرنه) دن چیقدی ،
دوقوز کونده (ایزنیک) ه کلدی . شهزاده مصطفی حمامده
ایدی . میخال اوغلو (ایزنیک) ی قوشاتدی ، اهالی خروج
حرکتی ایچین قاپوی آچدیلر ، میخال اوغلو ایچری کیردی .
قارشیدسنه تاج الدین اوغلو چیقدی ، میخال اوغلونی کوندریله
آتندن ییقدی ، یوره کندن ووردی . کندی ده میخال اوغلونک
عسکرلری طرفندن پارچالاندی . شهزاده مصطفی دیشاریده
ایدی . شرابدار الیاس اهانت رولنی تمامیه ایفا ایدیوردی .
عاشق پاشازاده دییورکه : « بونلر بونده جنکده یکن شرابدار
الیاس مصطفای طوتدی ، قوجاغنه آلدی ، مصطفی ایدر :
« هی لالا بنی نیچون طوتارسن ؟ » خائن الیاس ایدر : « قرداشکه
ایلتین » دیر . مصطفی ایدر : « بنی قرداشمه ایلمه کم ، بکا

قرداشم قییار» دیر . شرابدار الیاس سا کن اولدی . آلدی ، کیتدی . خداونکاره قارشی ایلندی . قرداشی دخی بیوردی جلاده . جلاد دخی بیوروغی یرینه کتیردی . بروسه یه آتاسی یاننه کوندردیلر . بروسه قومی دخی قانون شرعه دفن ایتدیلر» (۱) . شرابدارك اهاتی آشکاردی . بو اهاتی نه یوزله ارتکاب ایتدیکنی کندیسنه صور دیلر . شرابدار شو جوابی ویردی : — صورتا بن کناهکار اولدم . الا بو ایکسی ولایتده اولسه ضرر عامدر . وهم بردخی بوکم ، بن افندم اوغلینه یاراماز ایش ایتدم . بودنیانك مردارینه بولاشمدن شهید ایتدردم ، و جمیع عالم راحت اولدی . وهم بزدن او کدین کلانلر بوقانونی قومشله . شرابدار الیاسك بوسوزلری سفسطه دن عبارتدی .

« مانوئل ، شهزاده مصطفای بالطبع هیچ کوزندن اوزاق بولو . ندور مادینی جهتله اونی هیچ اولمازسه پادشاهی تعجیز ایچین قورقواق کبی قوللانق ایسته دی . مصطفای عثمانلی تختنه اجلاس ایچین هر نه ممکنسه یایمایه الیاسی مأمور ایتدی . بیزانس مالیه می قور و ضرورتك صوک درک سنده بولوندوغی حالده ، الیاسه کلیتی پارا ویردی . بو پارا (ویتنیا) ده مرادك قوماندانلرینی آلدی ایتك ایچوندی » (۲) .

ایکنجی مراد ، شهزاده مصطفای اعدام ایتدکن صوکرا ، ایمپراطور مانوئل قورقمایه باشلادی . ذاتاً بوتون اهانتلر اونك

(۱) عاشق پاشا زاده ، ص ۱۰۳

(۲) فرانچیز ، فصل ۴۰ - دوقاس ، فصل ۲۸

باشی آلتندن چیقوردی . ایکنجی مرادك عموجه سی شهزاده
مصطفی ایله قاردهشی شهزاده مصطفای علینه تشویق ایدن ،
تورکی ضعیفلا تمق ایچین شهزاده لری بربرینه دوشورهن ، ایمپراطور
مانوئل دکلیدی ؟ مانوئل ، ایکنجی مرادك حدتی ، بینه ییلدیریم
کی اینه جکنی بیلوردی . بونکله برابر سلطان مراد برشی
یایمادی . ایمپراطور طرفندن کوستریلن صلح آرزولرینی یرینه
کتیردی . (ادرنه) سرایله (بیزانس) سرایی آراسنده
مذاکره لرباشلادی . مؤرخ فرانچه زده ، بیزانس سرایی طرفندن ،
مذاکره یه مأمور هیئت میاننده ایدی . فرانچه زه ، ایکنجی مرادك
پاشالریله عقد ایدیلن معاهده یی بیزانسه تبلیغ ایده جك ، معاهده
صورتی آلارق مانوئل ك سلطنت ستریکی و اوغلو ایمپراطور
یوآنیس پاله اولوغوسه تصدیق ایتدیره جکدی . یوآنیس پاله -
اولوغوس ، اوصیراده ماجارستانده ایدی . برطرفدن تورکلرله
مصالحه یایمايه چالیشیور ، دیگر طرفدن تورکلری مغلوب ایتك
ایچین حالا آوروپادن امداد اومیوردی . لاتین استیلاسی بیزانس
ایمپراطورلرینی الان اوصلا ندیرماه شدی . لاتین کلیسایی شرق
کلیساسنك خادم لرینی صیانت ایده مزدی . خریستیان غربك
خریستیان شرقه یاردیمی آنجق اونى یوق ایتك ، کندینه رام
ایله مك ایچین اولابیلردی . تاریخ ، بوکا ناطق برشاهددی .
نه دورلر کلمشدی که ، خریستیان غربی یاردیم لرینه چاغیران شرق

خریستیانلری تورک اداره سنی متحسرانه آرا مشلردی .
 یو آنیس پاله اولوغوس ماجارستاندن نه امداد آلابیایردی ؟
 دکل ماجارستاندن ، حتی غربک بوتون خریستیانلق عالمدن ،
 باویه رادن ، فرانسه دن ، انکلتزهدن کلن قهرمان شوالیه لر
 (نیکبولی) میدانلرنده تورکلرک ییلدیریم کبی چاقان قیلیج
 پاریلتیلری قارشیسنده ، تورکک اوق یاغمورلری آلتنده یرلره
 سریلمه مشلرمیدی ؟ بو پارلاق ظفری تعقیب ایدن کونلرده اسیر
 بارونلر ، قونتلر وشوالیه لر ، بروسه تپه لرینک حاکم اولدوغی
 اووالردن ، نیلوفر کوپروسندن کچیریلهرک بروسه یه کتیریله -
 مشمیدی ؟ پاپانک تشویقیله متفقلرینی بیله تشریکه موفق اولامایان
 بو دولتلردن بیزانس هیچ بر فائده کوره مزیدی . (بیزانس) ،
 تورک طوپراقلری آراسنده محصوردی . اورایه قارادن یاردیم
 ایده بیلیمک ایچین طونا سر حدلرینی کچمک لازمدی . غربک
 اوزمانکی عسکری تشکیلاتنه ، سیاسی احتراصلرینه کوره ، بوده
 امکان خارجنده ایدی .

فی الحقیقه ، یو آنیس پاله اولوغوس ، ماجارستانده برشی یاپامادی .
 بیزانسه دونه جکنه دائر مکتوب یوللادی . بو مکتوبی اختیار
 مانوئل ایله ایمپراطور یچیه مؤرخ فرانچزه تقدیم ایتدی . یو آنیسک
 زوجیه سی ماریقا ، بو حوادثی دویار دویماز ممنون اولدی ، یو آنیسک
 کندیسنی سومه دیکنی بیلدیکی حالده ، اونک سلامتی ایشتمکله سویندی .

فراچیه زه قیمتدار هدیله ویردی. ایمپراطور مانوئل ایکی ییلدر مضطربدی. جسماً خسته اولدوغی کبی، فکر آده راحتسزدی. واقعا مناسیره چکیلمشدی؛ فقط سراینده دویدوغی تأثرلراونی مناسیرک ساکن کوشه لر ندرده راحت بر اقیوردی. مانوئل بو حاله قویان، تورک قورقوسیدی. او، تورکلرله خوش کچینه رک، آلتدن آلتله اونلره دوشمانلق ایدهرک، او زمانه قادار بیزانسی قورتار ایلمشدی. شیمدی اوغلونک، یوآنیس پاله اولوغوسک سلطان مراده میدان او قوماسی، عانی و جراثکارانه خصومتلرده بولونماسی، اوئی بوسبوتون قورقوتیوردی. بیزانسیک تورک نیچه سندن قورتولمق ایچین بر تحصنکاهی واردی: لاتین کلیساسنه التحاق ایتک. مانوئل، بوتون سلطنتی مدتیجه بوحسله کندینی اویالامش، و بیزانسی قورتارمشدی. فقط بونی پاپاده آکلا-مشدی: روملر، تورکلر طرفندن صیقیشدیرلدیجه بو آرزوی اورتایه آتیورلر، صوکر اواز کچیورلردی. اوصیراده پاپا، بشنجی مارتهدی. اوده شرق و غرب کلیساسنی بر اشدیرمک ایسته ینلر-دندی. مارتهدن هر درلو فدا کارلغی یایمیشدی. هر ایکی مذهبه منسوب اولانلرک اولمه لرینه مساعده ایتمشدی. روملرک یاردیمه کیده جک اولانلره، روملرک تورکلره قارشى یاپاجقلى حربده اعانه ویره نلره عفورلر اعلان ایلشدی. تورکلره جیخانه ساتانلری آفورز ایتمشدی.

پاپانك بوقادار فدا كارلغنه قارشى مانوئەل يەنە تردد ايتدى:
 چونكه سلطان مرادله معاھدە ياپلامشدى؛ پايتخت ايجين تورك
 قورقوسى يوقدى. بوندن باشقە ، كنديسنك دە بر آياغى چوقور دە
 ايدى . بويلە بر زماندە مذهب دكيشديرمك ، جدلرينك
 خاطرە سنى ييقمق ، جنايتدى . نہايت مانوئللە اوغلو يو آنيس ، پاپايە
 جواب ويرديلر . تورك قوتى بيزانس سورلرينە داينديغى صيرالردە
 پاپانك آستانە قوشدوقلرينى اونوتديلر ، كنديلرينك لاتين كليساسنە
 التحاقى مذاكرە ايجين پاپايە كوندر دكلى مرخصلرك تعاليمات
 خارجندە حركت ايتمش اولدقلرينى سويلەديلر . غرب كليساسيلە
 شرق كليساسنك برلشمەسى ايجين بر عمومى مجلس روحانى يە احتياج
 اولدوغنى ، بومجلسدە بوتون مرخصلرك بولونماسنى ، يوللارك
 آچيق اولابيلمەسى ايجين دە بوتون آوروپا دولتلرينك توركلارلە
 صاح اتمەلرينى ، بيزانس خزينەسندە اون پارا قالماديغنى ، مجلسك
 مصارفنى پاپانك ويرمەسنى تەكليف ايتديلر . پاپا حيرتدە قالدى .
 مع مافىە مانوئەل چوق ياشامادى . يتمش يدى ياشندە اولدى
 (۲۱ تەموز ۱۴۲۵ ، ۵۸۲۹) . زوجەسى ، قسطنطين داراغازەزك
 قيزيدى . ايمپراطور يچەن بش اوغلو دنيايە كلشدى : يو آنيس ،
 تە اودوروس ، آندرونيقوس ، قسطنطين ، ديمتريوس . مانوئەل
 غايت حلیم طبيعتليدى . كنجلكنى بروسە سرايندە ، غازى
 خونكارك يانندە كچيرمشدى . سرايدە هر كسك محبتنى قازانمشدى .

برنجی مراد، مانوئلی کندی اوغلو کی سوردی. مانوئله بایزید بککده محبتی قازانمشدی. حتی، داها صوکرالر، ایمپراطور اولوبده بایزید بکله آراسی آچیلدیغی زمان، بایزید بکک حدتنه و مزاجنه کوره داورانارق بیزانسی قورتارمشدی. مع مافیه بایزید بکک صولتنه و عزمنه قارشى بیزانسیک قورتولماسی امکانسزدی. مانوئله بو امکانی بخش ایدن، تیمور فلاکتی اولمشدی. موسی چلبی، باباسنک عزمنه حقیقی بر وارثدی. فقط بوسفرده محمد چایینک سلطنت حرصی مانوئلی بویوک بر فلاکتدن قورتارمشدی. بناءً علیه دوشمان استیلاسی، قاردهش احتراصی تورکلرک پارلاق غایه لرینی ییللرجه کريله تمشدی. آرتق یوآنیس پاله اولوغوس کاملاً حردی. کندیسنک نه بر سلطنت شریکی، نه محترص بررقیبی واردی. تورک قوتنه قارشى ارتکاب ایتدیکی کناهی اوده آکلامشدی: یوآنیس، بیزانس تختنه تک باشنه صاحب اولور اولماز، سلطان مراده بر هیئت کوندردی. سلطنتی خبر ویردیکی کی، باباسیله یاپیلان مصالحه نك دوامنی ده تمنی ایتدی. سلطان مراده قره دکز ساحلنده برچوق یرلر براقدی. هر سنه ویرکی مقامنده اوچ یوزیک آچه ویرمه یه راضی اولدی. واقعا بو، بویوک بر پارادکس؛ فقط بوتذل، یوآنیسک بر قاچ سنه اول کوستردیکی قهرمانانغه یاقیشامازدی. یوآنیس بونی ده کندی ایچین آغیر کورمه دی. جدی

برنجی یو آنیس ، عموجه سی آندرونیقوس ، باباسی مانوئل ،
 هپسی ده ، بایزید بکک سراینه ویرکیلر تقدیم ایتمه مشر میدی ؟
 یو آنیس ، صاحی بو صورتله تأمین ایتدکن صوگرا ،
 آله کسی قومنه نوسک قیزی ماریقای طربزوندن کیترتدی .
 اسکی قاریسی ، (مون فەررا) مارکیسی ایکنجی ژانک قیزی
 صوفی قاچمشدی . بدبخت قادین ، قوجه سنک تحقیرلرینه بو قادار
 تحمل ایده بیللمشدی . صوفی بی قاچیرانلر ، غاطه ده کی جنویزلردی .
 یو آنیس ، جنویزلره قیزاجغنه ، ممنون اولدی .

یکی ایمپراطور یچه ، ماریقا ، غایت کوزل ، فکری ، بر
 ارکی ممنون ایده بیله جک بر قیزدی . یو آنیس ، ماریقای او
 قادار سودی که ، بوسوکی تدریجاً عشق حالی آلدی . ماریقا
 ایمپراطور یچه اعلان ایدلدی .

یو آنیس ینه راحت دورمادی . (موره) یه کیتدی . قارده شی ،
 موره ده سپوطی ته اودوروس راهب اولمشدی . (موره) ده سپوطلغنی
 دیگر قارده شی قسطنطینه ویردی . قسطنطین (موره) ده استیلا
 املارینه قایلیدی . (پاتراس) ی اشغال ایتدی ؛ حال بو که
 (پاتراس) سلطان مراده ویرکی ویریوردی . سلطان مراد
 در حال بیزانسه آدام کوندردی . (پاتراس) ک تخلیه سنی امر
 ایتدی . قسطنطین شاشیردی : (پاتراس) ی ضبط ایتمه دیکنی ،
 تورکلر کده ، روملر کده دوشمانی اولان قاطالانلره قارشى محافظه

ایتدیکنی ، مع مافیہ « قاردهشی بویوک امیرک » سوزندن قطعاً
چیقامیه جغنی آکلاتدی . (پاتراس) دن اوردوسنی قالدیردی ،
وصاووشوب کیتدی .

قسطنطینک کوزی ینه (پاتراس) ده ایدی . حتی سلطان
مراده یوللادینی خبردده حقلیدی . (پاتراس) ی پاپا آلمق
ایستیوردی . بورای تورکلرک هجومندن وقایه ایچین قاطالانلرله
دولو کیلر یوللامشدی .

سلطان مرادک بوکی قلعه لره اهمیت ویردیکی یوقدی . اونک
بوتون کوزی سالانیکده ایدی . بوراسی برنجی مراد زمانندن
بری قاچ دفعه تورکلر آینه کچمش ، ینه روملره ویرلمشدی ؟
آرتق بوسفر قطعی صورتده آلینا جقدی . (سالانیک) اطرافنده کی
تورک غازیلری شهری تماماً صیقیشدیریورلردی .

سالانیک قوماندانی ، ایپراطور مانوئلک اوچونجی اوغلو
آندرونیقوسیدی . سالانیک اهالیسی بو ضعیف اداره دن
بیزاردی . بیرانس برنسلرینک بی مجال اللرنده گاه تورکلرک ،
گاه وندیکیلرک نفوذلری آلتنده اویونجاق اولویورلردی . نهایت
وندیکیلری موافق کورمشلر ، شهری اونلره تسلیم ایتشلردی .
وندیکیلر سالانیکدن بوتون روملری بوشالتیورلر ، اورایه
کندی دینداشلرینی یرلشدیریورلردی . سلطان مراد
بو کوزل بلده نک وندیکیلر آلتنده قالماسنه راضی اولمایا جقدی .

ۋىندىكىلەر - سىلتان مىرادى آرزوسىندىن دوندىورمىك ايجىن ھىردىلو
فدا كارلىنى ياپدىلەر. ايمپراطورىو آنىس پالە اولوغوسىك بىلە توسىتى
رجا ايتدىلەر .

يوا آنىس سىلتان مىرادە مىراجەت ايتدى ، دوست بر شىرە
تعرض ايتەمسىنى رجا ايتدى . سىلتان مىرادە : « اكر سىلتانىك
ايمپراطورك قاردهشى آندرونىقوسىك الەنە ايسە ، واز كچەرم ؛
فقط مادامكە ۋىندىكىلەر ، او اك ظالم دوشمانلارك الەنەدر ،
يوا آنىس پالە اولوغوسىك بوشىرى آلامە مانع اولماسىنى آ كلايامام .
دېدى . ۋىندىكىلەر ، سىلتان مىرادەك واز كچەدىكىنى خبر آلەنجە ،
شىرى در حال مدافعه حالە قويدىلەر .

(كلىۋلى) دەكى تورك دونانماسىنى ياقىق ايجىن بر دونانما
حاضر لادىلەر . دونانمايە آندەرە موچە نىغوى قاپودان تەيىن
ايتدىلەر . ۋىندىك دونانماسى (كلىۋلى) سولرىنە كەلدى ، تورك
ۋىندىك دونانمارىنىك چارپىشماى غايت شىدتلى اولدى . موچە
نىغو بود كىز محاربە سىندە بويوك بر جىسارت كوستردى ؛ فقط
ضابطلرى محاربە نك اك آتشلى بر زمانىندە قاچدىلەر . تورك
سولتى ھېسنى بىلدىردى . اوزمانلردە ، تورك كاركەك عجمى اولدوقلرى ،
د كىز محاربە لرىدى . فقط بو محاربە دە اويلە برە ھارت كوستردىلەر كە ،
موچە نىغو رجەتە مجبور اولدى . كىسەنك دىرەكى بر طوپ
كوللە سىلە پارچالاندى . كىسى ايكى يە بولوندى . ۋىندىكك بوتون

قوتی د کزده ایدی. وندیکیلر د کزده ده مغلوب اولونجه، سالانیك مدافعه سنه آرتق لزوم یوقدی. فی الحقیقه کلیبولی ظفرینی ایشیدن تورکلر، سالانیك سورلرینه آرسالانلر کی آتیلدیله وندیکیلر د کزدن قاچمايه مجبور ایتدیله. روملرک آلدن ا ک قیمتلی بلده لرینی آلان وندیکیلر، تورک تهاسک سنی کورور کورمز، روملری ده فلاکت ایچنده براقدیله، کیلرینه بینه رک صاووشوب کیتدیله (۱۴۳۹ م، ۸۳۵ هـ).

مؤرخلریمزه نظراً، سالانیك فتیحی ۸۳۲ ده در برده، ایکنجی مراد سیاستده، جغرافیایه ده واقفدی. حال بوکه تاریخلریمزک نقله باقیلاجق اولورسه، کندیسند سیاستدن و معلوماتدن هیچ اثر کورولمز. عاشق پاشا زاده نك سالانیك فتح ایدله دن اول سلطان مراد سولتدیکی شوسوزلر جداً غریبدر :

« برکون مراد خان غازی وزیرلرینه ایدر : « شول سالانیك دنیلن یر ایر قیدر ؟ » دیو سوردی . وزیرلر ایدر : « سلطانم ، سیروزدن خنکار کوچینه درت کوچدر » دیرلر . خنکار ایدر : « یا نیچون طوررسز ؟ تیز سفر یراغن کورک » . و آندن طوپلر و منجنقلر کوردیلر ؛ و کلیبولیدن کیلر کتیردیله ؛ نیت غزاچاغیردیله (ص ۱۱۸) . کرک عاشق پاشا زاده ده و کرک سائر مؤرخلریمزده تورک دوناماسنك وندیك قاپودانی موچه نیغویه قارشى قازاندینی دکز محاربه سندن بحث بيله یوقدر (صحائف الاخبار، جلد ۳ ، ص ۳۴۸ - صولاقزاده ، ص ۱۶۳) . یالکز (تاج التواریخ ؛ جلد ۱ ؛ ص ۲۴۴) ده : « کلیبولی معبرندن آقوب کلن کشتیلر اول کشتیلر منظرنده نمایان اولیجق من جمیع الجوانب محصور و خایب اولدوقلرندن شاشدیله »

دییە بر قید واردر . فقط سعدالدین افندیك (کلیبولی) دە بولونان دونامامز یوزندن ایمپراطورك (سلانیك) ە یاردیم ایدەمەمش اولدوغنی یازماسی دوغرو دكلدر . ایمپراطور او ائنادە (سلانیك) ە یاردیم دكل ؛ بیزانسی بیله قورتاراجق حالده دکلدی . دونامامز کلیبولیده بولوندوغنی جهتله ونديك دوناماسنك (کلیبولی) یه تجاوزی ده ، هم بوغازك کلید نقطه سنی ضبط ایتك ؛ همده تورك دوناماسنك سلانیكە دكزدن هجوم ایتەسنە مانع اولمق ایچوندی .

توركلر ، (سلانیك) ی آلدن صوكر ، (آقارنانی) ، (أپیر) ، (آخائی) و (ئەطولی) دە روملردن ولایتینلردن داها برچوق یرلر آلدیلر . فقط بو ظفر چوق سورمەدی . برسەنە صوكر (۱۴۳۲ م) آرناوودلقدە یاپدقلری آقیندە موفق اولامادقلری کبی ، بیزانسه قارشى دكزدن یاپدقلری تجاوزلردن دە برشی قازانامادیلر . توركلرك بیزانسی دكزدن قوشاتان قوتلری ، قرق کمیدی .

(بیزانس) بالقجیلری کندیلرینە قلاغوزلق ایدەجکلر ، اونلری لیماه صوقاجقلردی . تورك کمیلری ایمپراطورك پایتختنه قارشى موفق اولامانجه ، قارادکنر ساحلارینی یاقدیلر ، طربزون اوکلرینە قادار ایلریله دیلر . فقط آرناوودلق بوزغونلغی سلطان مرادی پک متأثر ایتدی . سلطان مراد بو بوزغونلغی هضم ایدەمەدی . آرناوودلغە یکیدن بویوک قوتلرله تجاوز ایتدی . هر طرفده موفقیت قازاندی . (قاسطوریا) بکی و آرناوودلق

قرالی یانی قاسترییوی کندیسنه ویرکی ویرمهیه مجبور ایتدی .
قاستریو ، دورت اوغلونی (ادرنه) سراینه رهن کوندردی .
اسکندر بک ، بودورت چوجوقدن بریدی .

سلطان مراد ، آرناوودلق سفرندن صو کرا ، تکرار حاضرلق
کورمهیه باشلادی . بیزانس تلاشه دوشدی . فقط پادشاهک مقصدی
باشقه ایدی : قارامان اوغلو اوزرینه یورویه جکدی . قارامان اوغلو
تورکلک الک خان دوشمانلریله برلشمشدی . سلطان مراد آناطولویه
کچدی ، قارامان اوغلو ابراهیم بکه قارشى پارلاق برظفر قازاندی .
ابراهیم بک ایکنجی مراده کلیتلی پارا ویرمهیه ، برچوق مهم قلعه لری
ترک ایتمهیه ، الکزنکین باقیر معدنلرینی بیراقمایه ، رهن اولار قده
اوغلونی سلطان مرادک یاننده بولوندورمایه راضی اولدی . بو
معاهده ، سلطان مرادک آناطولوده کی نفوذینی برقات داها آرتدیردی
(۱۴۳۵ م ، ۸۳۹ هـ) (عاشق پاشازاده ، ص ۱۲۱) . سلطان
مراد ، قارامان اوغلونک دائماتورک دوشمانلریله ، بالخاصه بیزانس
ایمپراطوریه ، برابر اولدوغنی بیلیردی . بوسفر ، قارامان اوغلونی
لایقیله تأدیپ ایدنجه ، آناطولودن اندیشه سی قالمادی ، بیزانسه
صوکه ضربیه ی وورمق ایچین حاضرلقلر کورمهیه باشلادی . فقط
بومقصدی تأمین ایچین ، اول امرده ، بیزانسه دیشاریدن کله جک
قوتلری ازمک لازمدی . بو قوتلرده : بولغارلر ، صربلر و
ماجارلردی .

ایکینجی مرادك بالقان سیاستی، بالقان حکومتلرینی پارچالامق، موافق زمان کلیر کلز، برر برر محو ایله مکدی. کندیسنك غربه دوغرو یاپاجنی سفرلرده یکانه مانع، بونلردی.

ایکینجی مراد اولاً صربستانه یورو مک ایسته دی. صرب قرالی لازارك اوغلو سته فان اولمشدی. آناجهتندن یکنی ژورژ برانقوویچ کندیسنه وارث اولمشدی. ایکینجی مراد بووراشته اعتراض ایدیوردی. وقتیه جدی بایزید بك، لازارك قیزی میلیه وایله اولمشدی. بناءً علیه بووراشته کندیسنك ده حق واردی. برانقوویچ، بو ادعا اوزرینه، ایشك فنا لاشاجنی آکلادی. ایکینجی مرادله اوزلاشماي داها مناسب کوردی. کندیسنه قارشى دوروبده بوتون مملکتلرینی الدن چیقارمقدنسه، صربستاندن بر قاق پارچا اراضی ویرمهیه راضی اولدی. حق قیزقاردهشی ماری بی ده تکلیف ایتدی. قرال، ویره جکی یرلری جهاز اولارق تسلیم ایده جکدی. عاشق پاشا زاده دیورکه: «فی الحال ایاجی کوندردی، ایتدی: «دولتو سلطانم، قیزیمنی دخی جاریه لکه قبول ایتکم بایزیددهك دخی بزدن قیز آلمشدر» دیدی، وهم مبالغه مال کوندردی» (ص ۱۱۷).

سلطان مراد ژورژ برانقوویچك (ولق اوغلونك) قیز قاردهشیاه اولندی. ماری، مستثنی بر کوزه لکه مالکدی. ایکینجی مرادك بك خوشنه کیتدی. صربلرده، تورکلرده دلبر پرنسس

سهرنین ایچین پارلاق دو کونلر یایدیلر .

عاشق پاشا زاده ، صرب قرالنک ، همشیره سنی تکلیف ایتمه سنی
(۷۳۱) ده ، دو کونی ده (۸۳۹) ده قید ایدییور :

« مراد غازی لشکر جمع ایلدی کیم ، لاس ولایتی ضبط ایده .
ولق اوغلو طویدی ، تکرار ایلچیلر کوندردی ، مبالغه ارمغانلر بیله
کوندردی . وهم ایتدیکم : « قیزیك جهازی تمام اولدی ، آدم کوندرك
جاریه کزی آلك » دیدی . پاشالر خنکاره ایتدیلر : « آلمق كرك سلطانم »
دیدیلر . خنکار دخی : « تدارك نیشه ایدك » دیدی . اوسکوبدن اسحق
بكك خاتونینی کوندردیلر ، بوندن خیل آدم اسکوبه واردیلر ، طوغرو
سمندرعه کیتدیلر . برقاق کونلك یول قالنجه ، ولق اوغلو کافر بکارینک
خاتونلرین قارشو کوندردی ، عجائب قونوقلار ایلدی ، غایت ایو تعظیمله
سمندرعه کتیردیلر ، آنده دخی نهایتسز قونوقلار ایتدی . جهازینک
حسابن یازمشلر ، دفترین اوزبك آغابه ویردیلر . ولق اوغلو دیشکه :
« بن جهازی قیزیه ویرمدم ، خنکاره ویردم . دیلر سه بوجاریه سینیه
ویرسون ، دیلر سه غیری جاریه سینیه ویرسون » والحاصل بوفیزی ادرنه یه
کتیردیلر . خنکار کندویه دو کون ایتدی ، ایتدی : « بر سپاهی
کافرك قیزی نه دو کون كرك » دیدی ، وهر نه کم ولق اوغلو دیدی ،
آنی خنکاره دیدیلر . خنکار ایدر : « بنم جاریه لریمه ویره جکم یوقیدر که
آنك قیزینک جهازینی ویره یی » دیدی ، هیچ نسنه قبول ایتدی ،
کیرو جهازی اول قیزه ویردی ، بر سهل زمان طوردی ، بروسه یه
کوندردی » (ص ۱۲۲) .

صرب قرالیه ایکنجی مراد بیننده کی صمیمیت چوق سورمه دی .
ایکنجی مراد ، اولجه صرب قرالنه (سمندرعه) قاهه سنی ویره شدی ؛
بوسفر قلعه یی تکرار آلدی .

(سمندرە) فتحنده عاشق پاشا زاده ده حاضر مش . وقعه یی شو
صورتله آ کلاتیور :

« فقیر دخی اول زمانده اسکوبه اسحق بکه کلشدم ، کعبه دن .
گاه گاه بوماجرالرده بیله بولنوردم ، وبردغه دخی اسحق بکک اوغلو
پاشابکه وقلیج طوغانله حرامیلکه بیله کیتمشدم . وبرکون لشکراچینده
برغاوغا اولدی ، اسحق بک آته بیندی ، وجمیع بکار دخی بیله بیندیلر .
گاه گاه قارشودن کوردک برایی کافر چیقدی ، وبرنجه دخی آنلرک
آردنجه چیقدی ، یایاسین آردینه طومش ، آتلو-ین آردینه ، قاب
قارا، پوس اولوب کلیر . بکار دخی تکبیر کتیروب قارشو یورودیلر . یایانک
اوزرینه آت صالدیلر . ییادخی اوق سپیدی ، اوقه باقادیلر ؛ هجوم ایستیلر .
اوزرینه دوشدیلر . آتلوسی قاچدی . یایاسن آت آیغی آلتنده قیردیلر .
شویله قیرغین اولدیکم ، بکارک آتی کافرک اولوسی آراسنده بورییه من
اولدی . اسحق بک چاغیردی : « هی بکار ! ایو قیردیکمز . اسیرایدک »
فقیر قیردیغمن غیری بشین باغلام . اسکوبه کتیردم بشین اوسکوبده
طقوز آچیه ویردم . الحاصل اول ییلده سمندر دفتح اولدی » (ص ۱۲۷) .

قلعه یی مدافعه ایدن ، ایکنجی مرادک زوجہ سی سهرننک
برادر زاده سی ژورژدی . ایکنجی مراد ، ژورژی اسیرایتدی ؛
(ادرنه) یه کتیردی . ذاتا دیگر قارده شی ده ادرنه سراینده رهن
دورو یوردی . « ایکی سنک ده کوزلرینه دمیرلی سورمه چکدیلر »
(عاشق پاشا زاده ، ص ۱۳۱) .

ایکنجی مراد ، صربستان جهتنی تأمین ایتدکن صو کرا ،
ماجارستانه یورودی . بوسفره سیبیت ویرن ، افلاق بکی دراقولا
ایدی . دراقولا ، ایکنجی مراده ماجارستان سفرنده یاردیم

ایده جگنی، کچیدلری آکلاتاجغنی، حتی بوسایه ده سلطان مرادك
جرمانیایه ورومایه بیله کچه بیله جگنی سویله مشدی. ایکنجی مراد
بوجاذب خیاله دایانامادی. دراقولایه ایناندی، اوردوسنی حرکت
ایتدیردی، حال بوکه دراقولا اونی اوپله صدارپ کچیدلردن
وچوراق یرلردن کچیردی که، اوردو آجلقدن تلفات ویرمه یه
باشلادی. ایکنجی مرادماجارلرله چارپیشدی، موفق اولامادی.
دراقولا، رولنی اوقادارماهرانه اوینادی که، سلطان مرادك حشمندن
بیله قورتولمایه موفق اولدی (۱۳۷ م، ۸۶۱ هـ).

روملر، ایکنجی مرادك بوتون بوحرکتلرینی کوزدن قاچیر-
میورلردی. پادشاهك بیزانسدن اوزاق بولونماسی اونلرا یچین بویوک
بر نعمتدی. ایمپراطور یوآنیس، قاردهشی قسطنطینی چوق
سوردی. حتی کندیسندن صوگرا بیزنس تخته اونی کچیره جگنی
آچیقدن آچیغه سویلردی. بوسبیدن قسطنطینی، بلکه بر حادته
اولور دییه، دائما یاننده بولوندورمق ایستردی. یوآنیسك بو
حرکتی، دیگر قاردهشی ته اودوروسك ضررینه ایدی. ته اودوروس
اوندن بویوکدی، بویوکلك حقنی قسطنطینه ویرمه یه ده راضی دکلدی.
بونك ایچین اوده بیزانسه کلدی، ایکی قاردهش آراسنده
رقابت باشلادی. قسطنطین (موره) یه، قاردهشك اداره سنده
بولونان یرلره کیتدی. آرقاسندن ته اودوروس ده یتیشدی،
مجادله کیتدکجه شدتلندی. نهایت ایمپراطورك توسطی هرشیئی

یاتیشدیردی . ته اودوروس ایله دیکر قارده شی طوماسك (موره)
 ده قالماسنه ، قسطنطینك بیزانسه و سرایده بولونماسنه قرار ویریلدی .
 بیزانس پرنس لری تاج و سلطنت اندیشه لریله چارپیشیرلرکن ،
 شمالده ، قره دکنر ساحلارنده تاتارلر جنویزلرک الارنده کی یرلری
 آلدیلر . بو ، جنویزلر ایچین مهم برضیاعدی . فقط اونلر بو
 ضیاعی روملره تلافی ایتدیرمک ایسته دیلر . (جنوه) دن دونانما
 کتیرتدیلر . بیزانس جنرالی له ئوته رک جسارتنه قارشى هیچ
 بر شیئه موفق اولامادیلر . اوسته لك ، محاربه اثناسنده ، شهرده
 وقوعه کتیردکلری خسارلری ده تضمینه مجبور اولدیلر . (ایمپراطور
 قوله سی) ده بو خسارات میاننده ایدی . جنویزلر یالکنر بوقوله نك
 انشاسی ایچین بیزانس خزینه سنه بیک آلتون ویره جکلردی .
 یو آنیس ، بو اومولماز ظفردن صو کرا ، بوسبتون جسارته
 کلدی . بوتون دوشوندوکی ، بیزانس وتورکلردی . تورکلری
 مغلوب ایتمک ، هیچ اولمازسه بیزانسی تورک تجاوزندن مصون
 بولوندورمق ایچین ، لاتینلرک یار دیملرینه نائل اولمق لازمدی .
 بوده آنجق شرق کلیساسیله غرب کلیساسنك برلشمه سنه متوقفدی .
 ذاتاً پاپا بشنجی مارتته نك خانی دردنجی اوژهنده خریستیانلر
 بیتنده کی بو آیریلغی قالدیرمایه طرفداردی .

یو آنیس ، بومقصدی تأمین ایچین ، اول (وندیک) ه ،
 صو کرا (فهررا) ه کلدی . بیزانس پاتربقی ده کندیسینی تعقیب

ایتدی . پاپا طرفندن قارشیلاندى . مذاکره لر ، مناقشه لر توالی
 ایتدی ، نهایت (فلورانسه) ده ایکی کلیسانک برلشدیکی اعلان
 اولوندی . یوآنیس پاله اولوغوس بیزانسه دوندی . خلق ممنون
 دکلدی . هیچ برروم لاتین کلیساسیله برلشمه یی آرزو ایتموردی .
 بیزانس ، برمدت ، عصیان قافله لریه چالقالاندی (۱۴۳۹ م) .
 شارل دیل دیورکه : « دین نقطه نظرندن روملرک ویردکلی
 مساعدات و قتيله میخائل پاله اولوغوسک ویرمش اولدوغی
 مساعداتدن داها مبهم و داها محدوددی . سیاست نقطه نظرندن ایسه ،
 بو برلشمه دن هیچ بر فائده مأمول ایدیله مزدی . چونکه پاپالق ،
 غربک لاقیدیسنی قیملد اتمایه غیر مقتدردی ؛ بناءً علیه بیزانسه
 هیچ بر منفعت تأمین ایده مزدی . »

مع مافیه ، بیزانسه ده بونی آکلایانلر چوقدی ؛ حتی
 ایمپراطور یوآنیس سیله ممنون دکلدی . ایمپراطور ییچه ماری اولمشدی .
 سرایده الیم بر ماتم واردی . ایمپراطورک کدری یالکز بوندن
 عبارت قالمادی . بوسفر کوچوک قارده شی دیمتریوس ، خلقلک
 ذهنیتندن استفاده ایتدی . ایکی کلیسانک برلشمه سی علیمنده
 بولوندی . بیزانس ایمپراطورلری ، تورک بکزاده لرینی ناصل
 تشویق ایدیورلرسه ، ایکنجی مرادده دیمتریوس تشویق ایتدی .
 دیمتریوس ، قارده شی یوآنیه قارشى عصیان بایراغنی قالدیردی .
 کلیسانک برلشمه سی علیمنده بولونانلرله کندیسنه تابع یرلرده کی

اھالىنى توپلادى، كىندىسە مەراددە ياردەم ايتدى. دىمىترىيوس،
 اكزىيادە توركلارك جىسارتىنە كوودنەرك، بىزانس اوزرىنە يورودى.
 شەرك قاپلىرى قاپاندى. دىمىترىيوس بىزانس جوارىنى يىغما ايتىكلە
 ا كىتفا ايتدى.

اىككىنچى مەرادك سىياسىتى، بىزانس دە حاكم هېچ بىر قە بر اقامىدى.
 حتى دىمىترىيوسك دە حاكم اولدوغىنى ايتىمە يوردى. خاندان
 اركانىك بىر بىلە چارپىشارق ضەيفلەمەنى اولىك اىچىن كافىدى.
 بىنا ئۇلىە دىمىترىيوسە فضلە ياردەم ايتىمەدى.

اىككىنچى مەراد، بىزانسنى ضەيف دوشورمە يە چالشىر كى،
 بالقانلار دە ازلى دوشمانلىرى آراسىندە اتفاقلىر حاضر لانيوردى.
 صرب پرىنسى ژورژ. اتقو وچ، اىككىنچى مەرادك دوشمانلىرىە بر لشمىشدى.
 پادشاهك بوتون مەلكىتلىرىنى آلدن آلماسىنى بر درلو هضم
 ايدەمە يوردى.

ژورژ، اىككىنچى مەراددە انتقام آلىق اىچىن، فرصت بىكلەدى.
 پولونىا و ماجارستان قىرالى لادىسلاوسك حمایەسى آلتە كىردى.
 اونی توركلەر قارشى محاربە يە تشويقتن خالى قالمادى. صربستان
 دەكى مەدنلىرى ايشلەتەرك آلدىغى كىتلى پارالىرى لادىسلاوسە
 وىردى. مع مافىە لادىسلاوس دە توركلردىن قورقو يوردى.
 بو سببەن، ژورژك وىردىكى پارالەلە يكرمى بش بىك كىشلىك
 بر اوردو توپلادى. اوردونىك قوتى، تورك اوردوسىنىك

قوتنه نظراً ، بویوک بر شی دکلدی ؛ فقط قوماندانلری قور-
وینوس یانوش عسکرلکده پک مقتدردی . یانوش ، (اردل ،
ترانسیلوانیا) وویووده سیدی ؛ کندیسنه (هونیادی) لقبی
ویرلشدی .

ایکینجی مراد ، بدایتده ، هونیادی یانوشه قارشى برقاچده
عسکر سوق ایتیش ، فقط موفق اولامامشدی . بو اوردولرک
کافه سی ده بربری آرقه سینه مغلوب اولمشلردی . آرتق بو ،
خریستیانلق عالمی ایچین بویوک بر موفقیتدی . پاپا ، روملرک
منفعتلریله علاقه داردی . اوسنه (۱۴۴۳ م) بوتون خریستیان
حکمدارلرله برابر پولونیا و ماجارستان قرالی لادیسلاوسه ده
برمکتوب یازدی . روملرک حالى تصویر ایتدی . اونلری تورکلر
النده بر قوربان تاقی ایتمکدن چکینمهدی .

تورکلرک ، یالکز بیزانسی دکل ، قبریسی و رودوسی ده
تهدید ایتدکلرینی آکلاتدی . انسانیت و دیانت نامنه مرحمت
ایتمه لرینی رجا ایتدی . پاپانک اونلردن ایسته دیکی شی ، یالکز
معاونتدی . اوردو طوپلامق ، دونانما تجهیزایتمک ، پاراویرمکدی .
مع مافیه بومسئله ایچین پاپای صیقیشدیران ، یالکز بیزانس
ایمپراطوری یو آنیس پاله اولوغوس دکلدی ؛ ایمپراطورک قارده شی
(لاکه ده مونیا) ده سپوطی ته اودوروس ده پاپایه مرخص کوندر-
مشدی : (موره) ده کی خریستیانلرک قور تولماسنی رجا ایدیوردی .

هونیادی یانوشك موفقیتلری اوزرینه ، پاپانك تشویقلری
 بوتون حکمدارلره تاثیر ایتدی . یانوشك تورکلری (صوفیه)
 جوارنده بوزماسی ، خریستیانلرک جسارتی بوسبوتون آرتدیردی .
 اسکندر بك تورکلره اهانت ایتشدی . بوتون بو حادثه لر ،
 تورکلره قارشى جسارت آرتدیراجق ماهیتده ایدی . پاپامنوندى .
 ییللردن برى بکله دیكى امللرک آرتق کاملاً حاصل اولاجغنه
 قناعت ایدیوردی . نهایت ، تورکلره قارشى یكى براهل صلیب
 اوردوسی تشکیلنه قرار ویردی . اوردونك قوماندانلغنی پولونیا
 و ماجارستان قرالی لادیسلاوسه تکلیف ایتدی .

پاپا ، تورکلری ازمک اندیشه سیله مشغول اولدوغی صیراده
 ایدی که ، ایکنجی مراد (ادرنه) ده ایدی . ییللردن برى سوردهن
 مجادله لردن اوصانمشدی . ساطتدن چکیلمک ، یرینه اوغوللارندن
 شهزاده محمدی کچیرمک ایسته دی . خلیل پاشا ایله کوروشدی :
 — اوغلومی تخته کچیردن ، پادشاه ایده ین ، بن خیلی سفرلر
 ایتدم ، غزالر ایتدم ، ایمدی بنم اوغلوم دخی بنم حیساتمده
 کورده ییم نه صورتله پادشاه اولور . دیدی .

شهزاده محمد (مغنيسا) ده ایدی . دعوت ایتدی ، اوغلونی
 تخته کچیردی . کندی (مغنيسا) یه کیتدی . محمد بکک یاننده ،
 وزیرلردن خلیل پاشا ایله شهاب الدین پاشا و صاروجه پاشا قلدی .
 منلا خسرو ، زوم ایلی و آنا طولوقاضی عسکرلکنی ایفا ایدیوردی . «اول

زمانده قاضی عسکر بر ایدی . روم ایلی و آناتولی ممالکنی
معاً تصرف ایلر ایدی » (۸۴۸ هـ ، ۱۴۴۴ م)
ایکینجی مرادک فراغت تورکلرک ازی دوشمانلرینی آیاقلا-
ندیردی . « قارامان اوغلوانکروسه ایلاچی کوندردیکم : » نه طور رسون
اشبوعثمان اوغلو دلی اولدی . تختی بر اوغلانه ویردی ؛ کندی
چالغیچی عورتلرله بانجه لرده سیوب ایچوب یورور ، ولایتدن آل
چکدی . ایمدی فرصت سنرک و هم بزمدور ، یوریمک کرک «
دیدي . پاپا ذاتاً حاضر دی .

« عثمانلیرک طبیعی دوشمانی اولان قارامان اوغلو ، سلطانک نفوذندن
قورتولمايه چالیشیردی . بناءً علیه آناتولوده پادشاهه تابع نه قادار بک
وارسه هپسینی آیاقلانیرمای تعهد ایتشدی . اوده ، خریستیانلرله برابر ،
مناسب وقتده سلاحه صاریلاجق ؛ مرادک آناتولوده کی مالکانه سنه
تجاوز ایده جکدی . شرقده اویاندریلاجق بوعموی غلیان اوزرینه ،
سلطان بالطبع عاصیلری تأدیپ ایچین آناتولویه کچه جک ؛ اوردوسنک
اک مهم قسمی اورایه کوتوره بکدی . اوزمان ، روم ایلنده بولونان
بوتون قلعه لر مدافعه نر قالاجقدی . پاپا ایله متفق دولتلردن بعضی لری
طرفندن تجهیز اولوناجق یتش کمیدن هرکب بر دونانما ، مرادک
غیبوبتندن بالاستفاده ، (کاییرلی) یی آلاجق ، بوغازی کاملاً
قاپاتاجقدی . سلطان ، آناتولوده قارامان اوغولاری و متفقلریله اوغر-
شیرکن آوروپاده کی متفقلر اوردوسی (تراکیا) یه یورویه جک ، تورکلرک
روملردن ضبط ایتدکاری یرلرک کافه سنی آلاجقلردی . بو پروژه نرک
بوپوک بر تأثیر یاپاجغنه شبهه یوقدی . تصور ایدلیدی کی اجرا اولوندوغی

تقدیرده ، عثمانلیلری الیم بر وضعیتده صوقاجنی شبهه سزدی « (۱) .
 حال بو که سلطان مراد پولونیا و ماجارستان قرالی لایسلاوسله
 متار که عقد ایتمشدی . متار که مدتی اون سنه ایدی . شرطلری ده
 شو ایدی : سلطان مراد طونادن اوتوده حرب ایتیه جک ،
 صربستانی پرنس ژورژه براقاجق ، ژورژک ایکی اوغلونی یوللایاجق ،
 اسکندر بکه اوغراشمیاجق ، بولغارستانک بر قسمنی محافظه
 ایده جکدی .

نه پایا ، نه ده لادیسلاوس ، ایدیلن بویمنی دوشونمه دیلر .
 متادیا حاضر لقلرده بولوندیلر . بوتدارکلر ائناسنده ایدی که ،
 فلورانسه قاردینالی فرانسوا قوندولیه ری لادیسلاوسه بر مکتوب
 یوللادی . بو مکتوبده ایکنجی مرادک آناطولوده بولوندوغنی ،
 کندیسنک الیوم آطه لر دکنزنده اولدوغنی ، معیتنده کی دونانما
 ایله (کلیولی) یی طوتاجغنی ، سلطان مراد ایچین روم ایلینه
 کچمک غیر قابل اولاجغنی ، آرتق ماجارلرک روم ایلینه یورویه -
 جکلرینی ، دنیایی تورکلر دن قورتارماک تام زمانی اولدوغنی یازدی .
 لادیسلاوس ، سراینده بو مکتوبی او قودوغنی زمان هر کس شاشیردی .
 تورکلر له متار که امضالانماسنی توصیه ایتمش اولانلر چوق متاثر اولدیلر .
 او صیراده ده ، بیزانس ایمپراطوری یوآنیس پاله اولوغوسک ده
 مکتوبی کلدی . یوآنیس ده بو مکتوبنده : پاپیلاجق سفرده
 کندیسنک مشترکاً حرکت ایده بیلمه سی ایچین ، سفر پلاننک

کونده ریله سنی رجا ایدیور، تورکلرله ماجارقرالی لادیسلاوس
 آراسنده بر متارکه یاپلیدیغنه دائر بر طاقم سوزلر ایشتدیکنی،
 فقط بونلره اینانمادیغنی، شاید بو دوغرو ایسه، نتیجه سی وخیم
 اولاجغنی سویلیوردی. بوندن باشقه، اگر لادیسلاوس اگر بویله
 بر متارکه عقد ایتش ایسه، کندیسنگ دنیا وانسانیت نظرنده
 مسئول قالاجغنی، وبومعظم سفراچین شمدی یه قادار یاپیلان
 مصر فلرک بوشه کیده جکنی، تورک قوتی برضربه ده ازمک ایچین حقک
 بو عنایتندن استفاده ایتمه مک کنه اولاجغنی ذکر ایله دکن
 صوگرا، یوقدن یره کندیسنگ دوشمان طوزاغنه آتیلما ماسی ایچین
 صوک فکری نه ایسه بیان ایتمه سنی قرالدن صورو یوردی.
 ایمپراطورک بومکتوبی قراله چوق تأثیر ایتدی. عین زمانده،
 قاردینال ژولیه ن چه زارینی ده، تورکلرله امضالامش اولدوغی
 معاهده یی بوزماسی ایچین لادیسلاوسی صیقیشدیردی.
 لادیسلاوس نه یاپاجغنی شاشیردی. مجلسی طوپالادی، بومشکل
 وضعیتده نه یایماق لازم کله جکنی مذاکره ایتدی. مجلسده،
 پاپانک ممثلی اولان قاردینال ده حاضردی. اوده سوز آلدی، بوتون
 بلاغیتله بر نطق ایراد ایتدی، اسلام لرله یاپیلان یمینک حکمی
 اولمادیغنی، حتی بویمنی طوتمق کنه اولدوغنی اثباته چالیشدی.
 قاردینالک نطقی مهم بر تأثیر یاپدی. هر طرفده حرب صدالری
 عکس انداز اولمایه باشلادی. لادیسلاوس، اوسنه ایچنده تورکلری

آوروپا طوپراغندىن كاملا قوغمايه يمين ايتدى . قاردينال ،
مجلسده سلطان مرادك متاركه احكامنى ايفا ايتمه مش اولدوغنى ايلرى
سوردى ؛ حالبوكه تام اوصيراده ، متاركه احكامنك ايفا اولوندوغنه
داثر (ادرنه) دن خبر كلدى . قاردينالك مدعىاتى چورودى .
فقط لاديسلاوس ينه عزمندىن دونمەدى . طونايي كچدى ، راست
كلدىكى يرلى آلارق (وارنه) يه قادار ايلريلهدى : متفقلر
بوراده طوپلانمايه قرار ويرمشلردى . لاديسلاوس (وارنه) يي
آلدى ، بيزانسه دوغرو يورومك ايستهدى . تام او صيراده
اسكندر بكدن ده خبر كلدى : اسكندربك حربە اشتراك ايده -
ميه جكدى . چونكه صرب قرالى عسكرىنى طوپراغندىن كچيرميوردى .
دوشمانك بومذا كره لرى اثناسنده ايدى كه ، لاديسلاوسك
(وارنه) اوكلرينه كلدىكى خبر آلىندى . ايكنجى محمد وزيرلريله
مذا كره ايتدى . باباسى سلطان مرادى دعوت ايتمه يه قرار ويرىلدى .
سلطان مراد « اعتذار ايدوب اجابت بيورمديلر . تكرار اكر
سزلىر پادشاه ايسه كز هجوم كفارى دفعه ايچين كلمك واجبدر ،
واكر بز پادشاه ايسك امرىمزه اطاعت ايتمك واجبدر ، ديو
خبر » كوندرديلر (۱) .

سلطان مراد (كليولى) يه كلدى . بوراده ، فلورانسه قار -
دينالك كميلرىنى كوردى . اورادن بوغاز ايچنه ، (اسكندرو

بوغازی) نه، (کوزلجه حصار، آنا طولو حصار) نه کاسی. خلیل پاشا
 قارشی ساحله طوپلری یرلشدیرمش، کچیدی مدافعه ایدیوردی.
 سلطان مراد روم ایلمه بو نقطه دن کچدی. (عاشق پاشا زاده
 (کوزلجه حصار)، (آچمه حصار) یازیورسه ده دوشورد کادر).
 سلطان مراد اورادن (ادرنه) یه کلدی. بوسیراده (کلیولی) ده
 مرادی بکله بن قاردینال، لادیسلاوسه آجیقلی بر مکتوب
 بازمش، سلطان مراد ک کندیسی آلداتدیغنی، کندی (کلیولی) نه
 بکلر کن، اولک باشقا طرفه کچدیکنی خبر ویرمشدی. کرک
 بو مکتوب، کرک اسکندر بکک مکتوبی قرال لادیسلاوسی
 بیتندن ووردی. قرال، قهرندن خسته لاندی. کندیسنه کله.
 بیلک ایچین (وارنه) ده برقاچ کون استراحته مجبور اولدی.
 سلطان مراد (ادرنه) ده اوردوسنی طوپلادی، جبری یور-
 یشلرله (وارنه) اوکنه کلدی. ایکی اوردوده تماس حاصل
 اولور اولماز، مدهش بر محاربه باشلادی. محاربه نک ایلمک
 کونلرنده فائقیت خریستیانلرده ایدی. قرال لادیسلاوس،
 هونیادی یانوشک توصیه سی اوزرینه احتیاطده بولونیوردی.
 تورکلر، لادیسلاوسک نقض ایتدیکی معاهده یی بر مزراغه
 طاقدیرمشلر، خانت قراله کوستریورلردی.
 محاربه نک قیزغین بر زماننده ایدی که، قرال لادیسلاوس
 قاردینال ژولیه نک تشویقیه، احتیاطدن تعرضه کچدی. مراد

بكه دوغرو هجوم ايتدی. قهرمان حضرتك مزراغی، قرالی ده،
آتی ده یره دویردی. توركلر لادیسلاوسك قافاسنی کسیدیلر،
نقض ایتدیکی معاهده ایله برابر مزراغه طاقیدیلر، دوشمانه
دوغرو هجوم ایتدیلر.

بو منظره، عاصیلری و متفقلرینی خشیت ایچنده براقدی.
دوشمان صفارنده عمومی برانهزام باشلادی. توركلر بوانهزامی
اویله فجیع برحاله قویدیلر که، دوشماندن پك آز کیشی قور-
تولاییلدی. آوروپاده تك برتورك برامامایه یمین ایدن قرال،
کندی پریشان اولدوغی کبی، توركلره قارشى حربی آله ولندیرن
قاردینال ژولیه نه، (استرغون) و (ارات) پسقوپوسلری ده
محاربه ده تلف اولدیلر (۱۰ تشرین ثانی ۱۴۴۴، ۹ رجب
۸۴۸ هـ).

مراد بك، قرال لادیسلاوسك باشنی (بروسه) یه کوندردی.
متفقلر (وارنه) مغلوبیتنك قباحتنی هپ بری برینك اوزرینه
آتیورلردی. هونیادی یانوش اهانتله اتهام ایدیلیور، اوده
بوتون قباحتی قاردینال ژولیه نه پسقوپوسلره آتیور، حرکانه
اونلرك مانع اولدقلرینی سویلیوردی.

توركلرك بو ظفری پارلاقدی. آرتق بو سفر بیزانس
ایمپراطوری یوآنیس پاله اولوغوسك تمامیه یوره کسه ایندی.
بوتون امیدلری محو اولدی. ایمپراطور، توركك ضعفنده خائن،

سطوتنده ریا کاردی . در حال ، تورکارک مروتنه صیغینمقدن باشقه چاره اولمادیغنی کوردی . حال بوکه حربک مسیدارندن بری ده ، کندیس ایدی . حرکاته اشتراک ایچین پلان ایستئوردی . هانکی اداره ایله ، هانکی قوتله بو پلانی تعقیب ایده بیله جکدی ؟ یو آنیسک یالکیز اسلامردکل ، خر- یستیانلرده وفاسی یوقدی . بوتون اندیشه سی ، بیزانس خلقنک سعادت بیله سینه ، ذوق وصف ایچنده قورولان تختی محافظه ایلمکدی .

سلطان مراد، ایمپراطوری بوسفرده عفو ایتدی . کندیسینه برشی یامایاجغنی سویله دی . ایمپراطور ممنون اولدی . سلطان مرادک کوزینه کیرمک ایچین خریستیان دولترلدن هیچ بریله مناسبده بولونمامایه قرار ویردی . بالطبع بوندن صو کرا ، شرق و غرب کلیسالرینک ده برلشمه لری موضوع بحث اولامیه جقدی . ایکنجی مراد ، (وارنه) ظفرنندن صو کرا ، سلطنتی تکرار اوغلو ایکنجی محمد براقدی ، سلطان محمد ایکنجی دفعه جلوس ایتدی ، (مغنيسا) یه چکیلدی . کندی نامه پارا باصدیردی . (ادرنه) یانغینی ، یکپچریلرک عصیانی ، (بوچوق تپه) حادثه سی ایکنجی مرادک تکرار دعوت ایدلمه سینه احتیاج حاصل ایتدی (۸۴۹ هـ) .

ایکنجی مراد (مغنيسا) ده ایکن بیزانس ایمپراطورینک

قاردهشی و (موره) ده سپوطی قسطنطین فرصتدن استفاده ایتمش، سلطان مراده عائد برچوق یرلری آلمشدی. از جمله (تب) دن تورک عسکرلرینی چیقاردیغی کبی (به ئوئی) بی، (پندوس) طرفلرینی ده آله کچیرمشدی. (پندوس) اهالیسی قسطنطینک تشویقیله تسالیایه هجوم ایتشاردی.

قسطنطین، بوتشبتارده بولوندوغی کبی، موره نك تحکیمیه ده اوغراشدی. قوره نت برزخنده بر حصار واردی که، آدینه (اکزامیل، گرمه حصار) دیرلردی. قسطنطینک قاردهشی طوماس بو حصارى تعمیر ایتدیردی. دمیر کتلی کسمه طاشلارله یاپدیردی. حصارى بش طابیه مدافعه ایدیوردی. اطرافنده کنیش و درین بر خندک واردی؛ بو خندک، ایجابنده دکز صویله دولدورولا بیلیوردی. خندکک براوجی یونان، براوجی آطه لر دکزنده ایدی. ایکنجی مراد بو حصار حقنده معلومات ایسته دیکی زمان، امراسندن طور خان بك شوه طالعده بولونمشدی: — بو (گرمه حصارى) غربب بر حصاردر. برد کزدن برد کزه چکلمشدر. بو ایکی دکز بو ولایتی طولانمشدر. کانه بو ولایت بر آطه کبی واقع اولدی. و بو گرمه حصارى آکا قورودن بر قاپو کبی اولمشدر، و بوش یرده ایو حصارلر یاپمشلردر. مبالغه یراغن کورمشلردر. اوچ یردن صاواش ویرمک کرک.

ایکنجی مراد بومعلوماتی آلدی ، الكزیاده طوپ مسئله سنی دوشوندی . طوپ دو کماک ایچین آرابه لر دولوسی باقیر کوتوردی . (کرمه حصار) او کنه کلدی . محاصره باشلادی . باقیرلری « سنجاق سنجاق اولش دیر دیلر ، جمیع لشکرده باقیر واردی . طوپلر دو کلدی ، قورولدی ، جنک باشلادی » (۱) .

(کرمه حصار) ک اطرافنده کی خندک دولدورولدی . شدتلی طوپچی آتشی سورلری خراب ایتدی . کدیکلر آچیلدی ، تورکلر حصاره کیردیلر . « کافرین قیردیلر . آقینجیلره سکر دیم ویردیلر ، بی نهایته اسیر کتیردیلر ، شویله اولدیکم بر محبوبه جاریه بی یوز آچیه ویردیلر » .

ایکنجی مراد ، اوردونک ادارد سنی طور خان بکه براقدی ، کندی (ادرنه) یه کلدی . قسطنطین پاله اولوغوس ، ایکنجی مرادک شدتی قارشیسنده نه یاپاچغنی شاشیردی ، دخالتدن باشقه چاره اولمادیغنی کوردی . صلاح رجاسی ایچین مؤرخ خالقون دیلیسی کوندردی . سلطان مراد هیچ جواب ویرمه دی . خالقون دیلیسی حبس ایتدیردی . قسطنطین ، ایکنجی مرادی بوسبتون قیز دیر مامق ایچین هیچ سسنی چیقارمادی . آلدیغی یرلری اعاده ایتدیکی کبی هر سنه معین بر ویرکی ویرمه بی کندیس ایچین بختیارلق

(۱) عاشق پاشا زاده ، ص ۱۲۸ . — لوبو ، کتاب ۱۱۸ ،

صایدی . اك آغیر شرطلره راضی اولدی . (کرمه حصار) ی برداها یاپدیرمق شویله دورسون ، تورک طوپندن قورتولان قسملرینی ده کندی آداملرینه ییقدیردی . قسطنطین ، بو تجربه‌دن صوکرآ ، راحت نفس آلدی . قارده‌شی کبی ، اوده ، آوروپا حکمدارلرندن بوتون امیدینی کسیدی ، برکوشه‌یه چکیلیدی ، اصلاحاتله مشغول اولدی .

ذاتاً یوآنیس پاله اولوغوس ده عقلانمشدی . اوده آرتق ، تورکک زوالندن امیدینی کسمشدی . سیاستی براقش ، تبعه‌سنی اداره‌ایله مشغول اولویور ، منتظم بر حکمدار حیاتی پشایوردی .

*

* *

ایکینجی سلطان مراد زماننده (بروسه) پایتخت حیاتنك صوك شرفلی کونلرینی کچیریوردی .

(بروسه) و (ادرنه) ، تورکیه‌نك اك مهم شهرلرندندی . او دورده (۱۴۳۲) هرایکی شهری ده زیارت ایدن برطراندون دولابروکیه‌ره نظراً ، (بروسه) تورکلرألنده بولونان شهرلرک اك کوزه‌لی و تجارت نقطه‌ نظرندن اك مهمی ایدی . شهر غایت واسعدی . شهرک اوچ درت عمارتنده هرزمان ات ، اکمک ، چوربا داغیدیلیدی . (بروسه) نك بدستانلری ألماس ، اینجی ، پاموقلو و داها سائر امتعه ایله دولو ایدی . بورالرده ارکک وقادین آلیش ویریش ایدرلردی . خریستیان قادینلری

قاپالی کزییورلردی. چارشیده وندیکلیلر، قاتالانلر، جنویزلر کورولیوردی.

(بروسه) قلعه سنک ایچی اولرله دولو ایدی. دولا- بروکیه ردیورکه: «پادشاهک اوی ده اوراده در، وچوق کوزلدر. بکادیدکلرینه کوره، بو اوده پادشاهک الای قادینی اوطوریورمش. اوك ایچی غایت اکلنجه لی ایش. ایچریده بر بانچه ایله اوافق، فقط غایت کوزل بر حوض وارمش. پادشاه قادینلرله قایغه بیز، او حوضده اکلنیرمش. فقط بن بوراسنی طیشاریدن کوردم» (۱).

بروکیه رک افاده سنه کوره: اوتاریخده (۱۴۳۳) تورکلر تماماً (بیزانس) اطرافنده کی یئرلی آلمشاردی. آناطولو طرفنده (اسکدار) ده تورکلر اوطوریورلر، (بیزانس) ه روم قایقچیلر واسطه سیله کچیريله جك اولانلردن کچید آقچه سی آلیورلردی. روم ایلی طرفنده تورکلر (دره کیوم، کوچوک چکمجه)، (آثیرا، بویوک چکمجه) طرفلرینی کاملاً تخریب ایتشلردی. تورک حدودی (چورلو) دن اعتباراً باشلا یوردی. (سیلیوری) بیزانسلیلر آنده ایدی. (برغوس) تورکلرله دولو ایدی. بیزانسلیلر تورک قیافتنده کوردکلری انسانی فوق العاده صاییورلردی. فرنکلره قارشى ایسه، بویوک بر عداوتلری

(۱) دولا بروکیه ر، دکز آشیری سیاحت، ص ۱۳۶

واردی . ایمپراطور بیه ایکنجی مراده صوک درجه مطیعدی .
 دولابروکیهر دیورکه : « ایمپراطور ، تک (بیزانسی)
 کندیسنده قالسین ، کندیسندن فضله یر ایسته نهمه سین ،
 و بوتون ترا کیاده (سیلیوری) ایله بیزانسیک اون ساعت شمالنده
 کائن بر قلعه کندیسنه براقیلسین دییه پادشاهه هر سنه اون بیک
 دوقه آلتونی ویرکی ویریوردی . بیزانسیده ، وندیکیلرک اولدوغی
 کبی ، تورکلرک ده روملرله تجارت معامله سنه نظارت ایتک اوزره
 بر ضابطلری واردی . تورک اولرندن هر هانکی بر خریستیان
 کوله قاچوب ده بیزانسه کلسه ، ایمپراطور ویا آداملری اون
 درحال اعاده ایدرلردی » (۱) .

مع مافیه سلطان مراد هان بوتون حیاتی محاربه میدانلرنده
 کچیردیکی حالد ، بروسه ده ینه اعمار اتدن و انشا آتدن خالی
 قالمامشدی . بروسه نك الك کوزل یرنده یایدیردیغی مرادیه
 جامعی ، مرادیه مدرسه سی ، مراد خان عمارتی ، نفیس تورک
 اثرلرندندی .

اولیا چلی مرادیه جامعندن بحث ایدرکن دیورکه :
 « روحانیتلی برجامعدر . انسان کیجه کوندوز اعتکاف نیتیه ایچنده
 قالسه ، چیقماق ایسته من . ایکی قبه لی ، قبله قاپوسندن محرابه قدار طولی
 ۱۵۰ ، عرضی ۶۰ آیا قدر . محرابی ، منبری ، مؤذن محفل سواده ،
 کوزل ، طرز قدیمدر . بو جامعک تاریخی (زید عمر من عمر) سنه

(۱) دولابروکیهر ، دکزی آشیری سیاحت ، ص ۱۶۵

۸۵۰ . بر طبقه مناره عالییه سی واردی . طشره حرمنده منتهای چنارلرک
هربری افلاکه سرچکمش . سایه لرنده جماعت صفا ایدرلر « (جلد ۲ ،
ص ۱۶) .

ایکنجی مراد بروسه ده نادراً اوطوروردی . اکثر یازمانی
(ادرنه) ده کچیریدی . (ادرنه) آرتق حقیقی بر پایتخت
اولمشدی . سفرلر کاملاً روم ایلنده یاپیلیوردی .

پادشاهک ، هدفنه یاقین بر موقعده بولونماسی لازمدی .
سلطان مراد (ادرنه) یی اعمار ایدیور ، یکی پایتختی سرایلر
جامعلر و مدرسه لرله سوسله یوردی . ایکنجی مراد زمانندن ده
اول ، (ادرنه) ده ییلدیریمک (کوهلی جامع) ی ، چابینک
(اولو جامع) ی واردی . سلطان مراد ، بونلره علاوه ،
(اوچ شرفه لی جامع) ی ا کمال ایتدیردی . جامعک بناسنه
ایلک اول عیسی و موسی چلییلر باشلامشیلر ، اتمامنه موفق
اولامامشاردی . جامعک بش قاپیسی واردی . هر قاپینک اوزرینه
عربی تاریخلر یازیلمشدی . قبه سی بش دانه ایدی . اولیا
چلبینک تصویرینه کوره : « بوقبه نک دروننه استاد نقاش نیجه
بیک الوان لعلی ، لاجورد ، سمایی ، سبز کون ، اصفر کون
بویالر ایله نقش بوقامون عبرتمون ایتمش که ، امعان نظر ایله
تماشا ایدن معارفشناس انکشت بردهن اولوب واله و حیران
دمبسته و سرکردان اولور » (جلد ۳ ، ص ۴۳۲) .

جامع حرمك اوزونلىقى يوز ، كنىشلىكى ايكي يوز قەدى .
 اوچ حرم قايسى واردى . ستونلىرى غايت ظريفدى . حرمك
 اورتاسىدا بىر دە حوض واردى .

جامع دوت منارەلىدى . « جلوس اولندە آناطولودەكى
 ازمير قلەسىنى قداقە نسلەندىر اولان روملر الدن آلوب آندە
 بولدىغى خزان و دفائى بو اوچ شرفەلى جامعە صرف
 ايتىشدۇر » (۱) .

اوليا چلبى جامعك انشاسنە دائىر دە شو معلوماتى ويرىيور :
 « حتى تيمور طاش پاشا زاده الوان بك بنا امينى ايمش . آنلرك
 تحريرى اوزرە بو جامعك مصارفه همان زر خالص قىسمەندى ىدى بىك
 كىسە مال ازمير صرف اولتىشدۇر . سائر سىم خالص رايچ سىكە مصارفى
 خدا بيلور دىتىلر . زىرا احسان ربانى مفتوح اولغە اقاليم سىبەدە نە
 قادار فنون شتايە مالاك نەقادار استاد كاملار وارسە كرم كانى مراد
 خانك كرمىن كورمكە كلوب ھىر بىرى بو جامعەدە بررعبىر تىنما اثر براقىشدۇر .
 اوچ شرفەلى جامعەدن باشقە (غازى مراد بك جامى) دە
 مشھوردى . اىكنىجى مرادك مولانا جلال الدين رومى يە بويوك
 حرمتى واردى . بوسىبىدن ، (ادرنە) دە برمولوئىخانە بنا
 ايتدىر مىشدى . « بىدە اىچىندە بر تقريب ايلە قان اولوب »
 سلطان مرادك جانى صىقىلمش ، سماع خانە تىختەلر نى قالدىر .
 تارق بر منبر ، بىر دە منارە ياپدىر مىشدى . جامعەدە اصلا ستون
 يوقدى . ايكي يانندە مسافر خانە دىلەن تابىخانەلر واردى .

تکیه، جامع اولمازدن اول ایکیوز قادار درویشی واردی .
 بونلر « هر هفته سماع زنگ ایدوب مطربانی آیین قدیملی
 اوزره سگاه ، دوگاه ، چارگاه ، نوا ، حسینی ، بوسهک ،
 عشیران ، کوردی ، حجاز مقاملرین اجرا ایدوب هر بار راست
 مقامنده قرار ایدرلر ، دی . کذا ، علم و معرفت اربابندن مقتدر
 مشوی خوانلری ده واردی .

ایکنجی مراد ، ادرنه ده جامعلر و عمارتلردن ماعدا ، ایکی
 حمام ، برکاروانسرای ، بر چشمه برده بدستان یاپدیردی .
 اسکی بدستان ، برنجی مراد کدی . مرادک بدستانی
 شهرک اورتاسنده ایدی ، بوراده الک قیمتدار اشیا ساتیلیردی .
 دولابلرینک مجموعی اوچ یوز قاداردی .

ایکنجی مراددن اول کان بکلرده (ادرنه) پی جامعلر ،
 عمارتلر ، حماملر و چشمه لرله اعمار ایتیلردی . ایکنجی مراد
 زماننده (ادرنه) محشم بر پایتخت منظره سنی کوستریوردی .
 (سرای) قواق میداننده ایدی . سرای ، ایلک اول ،
 برنجی مراد بنا ایتدیرمشدی .

داها صوکر موسی چایی کنیشهله تمش ، اطرافنه جسیم
 دیوارلر یاپدیرمشدی . سرایک محیطی بش بیک آیدیدی .
 مستطیل شکلنده ایدی . دیوارلرینک یوکسکلکی یکر می ذراعیدی .
 شماله آچیلیر بر دمیر قاپیسی واردی .

ايكنجى مراد اك زياته (خونكار باغچەسى سىرايى) نى اعمار ايتدى . طونجه كنارينه كوشكلر انشا ايتىردى . طونجه بوتون باغچەنى احاطە ايتشىدى . هر طرفى سروى ، چنار ، قاقاق و قرە آغا جلرله مزىنىدى . باغچەك جنوبى واسع برچنزاردى . باب هايون بوچنزاره آچىلىردى .

ايكنجى مراد اكتر زمانى (ادرنه) سىراينده كچىرىدى . جلوسنده (۸۲۴) اون سكز ياشنده بر كنجدى .

« ذات شاهانه طيقناز وجودلو ، قيصه بويلودر . چهرەسى تاتا . رمسىدر . آبلق يوزلو ، اسمر بىكزلى ، بر آز كوچوك كوزلودر . الماجق كىكارى چىقيق ، صاقالى دىكر مىدر . سويلەنلەيكنە كوره مرحمتلى ، مشفق ، عاليجناب بر پادشاهمىش . كلپتلى پارالر ، بويوك مالكانه لر بنخش واحسان ايلرمىش . سنوى ايكي بچق مىليون دوقة وارداتى واردر . بوندن باشقه ، جزيه حاصلاتى يكرمى بش بىكه بالغ اولورمىش . بعضلى خزينه سنده بر مىليون دوقة اولدوغنى ، بعضلى ده بونك نصفى راده . سنده بولوندوغنى سويلرلر . فضله اوله رق كوله وجاريه لر ينك بر مىليون قيمتنده مجوهراتى واردر .

احوال عاديه ده روم ايلي ۳۰۰.۰۰۰ عسكر ويرر . پادشاه بونلرى ايسته ديكي يره سوق ايدر كه ، بومهم بر مسئله در . آناطولودن ۲۰.۰۰۰ عسكر آلير . بونكله برابر ايكنجى مراد حربجو دكلدر ، بنده بو فكرده يم . چونكه او مدهش عسكرى قوتلريله معظم ثروتنى حرب ايچين صرف ايتسه ، كوردىكي اوفاق تفك مقاومتلره قارشى خريستيانلق عالملك بويوك بر قسمنى فتح ايتك اونك ايچين ايشدن بيله دكلدر .

ايكنجى مراد ، جدى بايزيد بك كى ، آوه عراقلىدى .

بیگدن زیاده زاغاری، ایکی یوزدن زیاده آو قوشلری واردی .
 عشرته میلی فضله ایدی . حربدن دوندیکی زمانلر ، اکثریا
 علم و معرفت تحصیلیه مشغول اولور، مشوی پی وجد و حرمتله
 او قوردی .

مولانا به مربوطیتی اولدوغی کبی ، امیر سلطانی ده پک زیاده
 سوردی . جلوسنده، بروسه ده کندیسنه قیلیج قوشادان، امیر
 سلطاندی . او کون ، (ادرنه) ده بولونان دولت ارکانی
 و وزیرلر (کلیولی) دن کچهرک (بروسه) یه قوشمشلر ،
 جلوس مراسمنده حاضر بولونمشلردی .

مراد ثانینک علمایه رغبتی زیاده ایدی . شرف الدین قریمی ،
 خیرالدین قریمی ، احمد کورانی ، منلا فناری ، منلا خسرو ،
 مرادغازینک حرمت و تشویقیله علمه خدمت ایدن عالمردندی .
 فقرادن آق شمس الدین ، عبدالرحیم رومی ، آق بیق سلطان ده
 بو دورده یتیشملردی .

ایکنجی مراد ، آناجهتندن ذوالقدر او غوللرینه منسوبدی .
 آناسی ، ذوالقدر او غلو سولی بکک قیزی امینه خاتوندی .
 یدی قادار قیزقارده شی واردی . او غوللری : محمد ، بویوک احمد ،
 کوچوک احمد ، علاء الدین ، حسن و اورخان بکلردی .

زوجه سی درتدی : اسفندیار او غلونک قیزی خدیجه خاتونله
 (۸۲۸) ده ، تکه او غلونک همشیره سیله (۹۳۰) ده ، صرب

قرالی ژورژ برانقوویچك همشیره سی ماری ایله (۸۴۷) ده اولمشدی . فرانسیزایا چیلرینك روایتنه کوره ، ایکنجی مراد برده فرانسیز پرنسیسی آلمشدی . سلطان مراد ساچوق خاتونی آناطولو بکک بکیسی قرهجه پاشایه ویردی (۸۲۸ هـ) . دیگر آلتی همشیره سندن اوچنی اوچ قارامان اوغلنه ، ابراهیم ، علاءالدین و عیسی بککله ؛ ایکسینی اسفندیار اوغوللارینه ، قاسم بککله ، ابراهیم بککله ؛ بریسنی ده صدراعظم ابراهیم پاشانك اوغلو محمود چلبییه ویردی (عاشق پاشا زاده ، ص ۱۰۷) .
بو اثناده کندی ده اسفندیار بکک اوغلو ابراهیم بکک قیزی خدیجه خاتونله اوله نیوردی .

ساچوق خاتون قرهجه پاشا ایله یکرمی سنه یاشادی ، پاشا (وارنه) غزاسنده شهید اولدی . ساچوق خاتون ، زوجندن صوکر ، قرق ایکی سنه داها معمر اولدی . محمود چلبی زوجه سی خاتون ده مکده وفات ایتدی .

اسفندیار اوغلونك قیزندن سلطان محمد دنیایه کلدی (۸۳۳) . مراد غازی اوغوللارینك تحصیل و تربیه لرینه اعتنا ایتدی . هر برینی کنجلكلر نده مهم وظیفه لرده قوللاندى . اوغوللارندن علاءالدین بك قارامان جنککنده شهید اولدی (۸۴۵) . حسن ایله اورخان (ادرنه) ده وفات ایتدیلر ، (طونجه) ساحلارینه کومولیدیلر . بویوک احمد چلبی (آماسیه) ده وفات ایتمش ،

(بروسه) یه دفن ایدلمشدی . کوچوک احمد چلبی ، پدرندن
صوگرا ، قاردهشی ایکنجی محمد طرفندن اولدورولمشدی .
قارامان اوغوللاریله اسفندیار اوغوللاری ایکنجی مرادک
انشته لریدی . قیز قاردهشی ساجچوق خاتون ، صاغدی . خیرات
ومبرات ایله مشغولدی . (ادرنه) ده برجامع یاپدیردیغی کبی ،
بروسه دهده برجامع انشا ایتدیرمشدی . جامعک اوزرنده شو
کتابه یازیلیدی :

(امرت بعمارته هذا المسجد الشریف ساجچوق خاتون بنت
السلطان بن السلطان محمد بن بایزید غازی خان خلدالله مملکته
ودولته وشوکتته فی حری رمضان المعظم هجریه النبی علیه الصلواة
والسلام من شهر سنة اربع وخمسين وثمانیه)
بونکله برابر ایکنجی مرادده انشا آتدن خالی قالمیوردی .
(ارکنه) اوزرینه برکوپرو یاپدیرمشدی که ، تورکلرک انفس
آثارندن معدوددی . کوپرونک « یری اورمانلقدی ، وچامور
چوقدی . وحرامیلرک طوزاغیدی ، هیچ بروقت یوقدی که حرامی
آدم آلمیهیدی . سلطان مراد خان خزینه لر خرج ایتدی ، اول
اورمانلری قیردردی ، پاک ایتدردی . کوپرینک ایکی باشین
معمور شهر ایدوب ، عمارت ، جمعه مسجدی ایتدی ، حمام
وپازارلر یاپدی ، واول وقتکم عمارتک قاپوسی آچلیدی ، سلطان
مراد علمای و فقرای کندیسی آلدی ، اول عمارته واردی ،

بر نیجه کون عطار ایتدی ، آچقار و فلوریلر اولشیدیردی .
 اول طعام پیشدیکي وقت کندی مبارک الیه اولشیدیردی .
 و چراغن کندی اویاردی ، یاپان معمارلره خلعتلر کیدردی .
 چفتلك یرلری اولان شهرک خلعتینی جمله عوارضدن معاف
 و مسلم ایتدی » (۸۳۱) (۱) .

خلق ایکنجی مرادی سوردی . کنديسنه قوجه مراد بك ،
 قوجه مراد غازی دیرلردی . قوجه لفظی اختیارلغندن کنایه
 دکلدی . سلطنتی اوغلو ایکنجی محمد براق دینی زمان ، ایکنجی
 مراد اوتوز بر یاشنده ایدی . بناءً علیه خلقك بو توجیهی
 ایکنجی مرادك بویوکلکندن دولاییدی .

ایکنجی مراد ، بوتون ایشلرینی وزیرلریله مشورت ایدهرک
 کوردی . (۱۴۳۲) ده (ادرنه) یه کلن دولابروکیهر ، میلان
 دوقه سی سیر به ندیقتونك (ادرنه) ده پادشاهی بولامانجه
 (سیروز) ه کیتدیکنی ، ایکنجی مراده (یکی بازار) د . تصادف
 ایتدیکنی شو صورتله آکلاتیور :

« یکی بازارده پادشاهك کله سنی بکله دك . نهایت کوردك . پادشاه
 نصبه یه کیررکن یاغور یاغوردی . یاننده قرق الی آتلی قادار واردی .
 اشنده قرمنی بورك ، آرقه سنه قرمنی قدیفه اثواب ، اوستنه ده
 اغموردن ایصلا نامق ایچین مملکت اصولنجه بر لباس کینمشدی . اوکنده
 کوله لرندن ۱۲ : ۱۳ تیرانداز یوریور ، برچوق دوه لرله یوک حیوانلری

اشیاسنی طاشیوردی . هان اورایه براوتاغ قورولدی ، پادشاه اوتاغده دیکلندی . اوکله صوکاری اولدی . حمامه کیتمک ایچین چادیرندن چیقدی . آرتق کندیسنی قولایچه سیر ایده بیلوردم . حمام اوزاق دکلدی ؛ فقط ینه آته یینمشدی . آرقه سنده ینه او قرمری اثواب ، باشنده عین سرپوش واردی . رکابنده آلتی کیشی یایا یورویوردی . سمیز وجودلیدی . ۲۸ : ۳۰ یاشلرنده کبیدی . معیتلریله قونوشدیغنی دویوردم ، کور بر سسی واردی .

میلان ایلیچیسى همان آداملرندن برینی کوندردی . هدیه لرینی تقدیم ایدوب ایده میه جگنی ، حضوره قبول اولونوب اولونما یا جغنی صورددوردی . بنده ایلیچینک یاننده ایدم . سلطان مرادده بورالره کزبنتی ایچین کادیکنندن واساساً پاشالری ده یاننده اولمادیغندن ارزولرینی یرینه کتیره میه جگنی ، بناءً علیه پاشالرك بکنمه سنی ویا ادرنه یه کیدوب اوراده منتظر بولونماسنی امر ایتدی .

ایکینجی مراد سرای تشریفاتنه رعایت ایدردی . میلان ایلیچیسى به نه دیقتونک حضوره قبولی ، مراسم داخلنده اجرا ایدلشدی .

برطراندون دولابروکیهر قبول مراسمنی شو صورتله تصویر ایدیور :

« میلان ایلیچیسى بر آته ییندی . بز خدمتجیلرله برلکده یایا ایدک . سرایک اوکنده برچوق آداملر و آتله واردی . برنجی قاپیدن ایچری کیردک . بوقاپی هر زمان آچیقدی ؛ الارنده عصالر ، یکر می اوتوز خدمه طرفندن محافظه اولونیوردی . اذنسز کیرمک ایسته ینلره اولاه اخطار اولونور ، دیکله ضرلرسه طایاقله فاپی دیشاری ایدیلرلردی . یانلرنده برده باشلری واردی . ایلیچی ایچری کیرنجه ، قاپینک یاننده

اوپورتدیلر . بوراده دیوان قورولق ایچین پادشاهك دائرەسەندەن چیقماسنی بکلین بر چوق کیمسەلردە واردی .

اوپ وزیر ایله روم ایلی بکار بکی وسائر بکار کلنجه ، پادشاه دائرەسەندەن چیقادی . مەیتندەکی ایکی اوچ اوغلانی ، بویوک بر دیوانخانە یە ناظر دائرەنك قاپیسەنە قادار کیتدیلر و دوندیلر . بوراده روم ایلی بکار بکی پادشاهك تشریفنی بکلپوردی . پادشاهك یانندە بر جوجە ایله ایکی مسخرەدن باشقە کیمسە قالمادی . آرقەسەنە ، عادتی وجە ایله ، قویو قرمزی ساتندەن بر اثواب ، اوستەندە ایشلەمەلی ساتندەن یشیل رنکلی برجە کیمشدی . پادشاه بویوک دیوانخانەنك کوشەسەندەکی تختە طوغرو یورودی ، واپوردی . پاشالردە کلدیلر ، بر آزاوتەدە واپوردیلر . دیوانە کلەلری لازم اولان ذاتلردە کلدیلر . بولردە ممکن مرتبە اوزاقدە ، دیوارك دینندە دوردیلر .

هەکس یرلی یرینە واپوردق دئەصکرە ، بوسەنە قرالنه منسوب بری تقدیم ایدلیدی . اودە وزیرلرک یانە کتیریلیدی . بوذات بوسەنە قرالغەنك پادشاهە مطاوعتنی عرض ایدیور ، بوسەنە تاجەنك کەندیسەنە عائدیتندەن بختلە حکومتی غصب ایدن قرالە قارشی پادشاهك یاردیمنی رجا ایلپوردی . دها صوکرا یکریمی قادار اولان زادکانی ، یوزلری پادشاهە دونوک اولدوغی حالە ، دیوانخانە اوکەندە دوردیلر . بولر تورک سرائندە اولاح مملکتەنک رهینەلریدی .

دائرەنك اورتاسەندە ، ایچارندە بر آز قویون آتی ایله پرچ بولنان یوزقادار قاب واردی . بولر پادشاه کلزدن اول اورایە قونولمشدی . پادشاه تختە واپوردقن صوکرا ، میلان ایلیچیسى چاغیریلیدی . هدیەلری دە آرقەسەندەن کتیریلپوردی . هدیەلر اولایمك طباقلرینك یانە قوندی ، صوکرا اللری اوزرندە کورولە بیلەجک صورتە یوقاری قالدیریلەرق پادشاهك اوکەندە کچیریلیدی . ایلیچی پادشاهە دوغرو ایلرلیپوردی . سرايم بویوکلرندە بری ایلیچینك اوکەنە دوشدی .

پادشاهك دائره سنه قدار کوتوردی . ایلچی شابقه سنی چیقارمادی .
حرمتله ا کیلدی ، تختك باصامقلرینه یاقلاش-نجه داها فضله برحرمتله
ا کیلدی . پادشاه آياغه قالدی ، تختندن ایکی باصاماق آشاغی ایندی .
ایلچی پادشاهك ألنی اوپك ایسته دی . سلطان مراد نزا که مساعده
ایتمه دی . « قومشوسی و عزیزقارده شی » میلان دوفه س-نك خاطرنی
صوردی ، صحت و عافیتك برکال اولدوغی عرض ایلدی . بومکالمه یی
بنایشیده میوردیم . صوکرادن دویدیم ، خبر آلدیم که ، ترجانلق وظیفه سنی
پادشاهك یاننده پك نفودلی بریهودی یاپیور ، هرایکی طرفك سوزلرینی
حرف بحرف تورکجه و ایتالیانجه هربرینه آ کلاتیورمش .

بعده ایلچی ، مراسمه رعایه ، یوزی پادشاهه متوجه ، کری
کری کیتدی ، بوسنه بکنك یاننده دوردی . پادشاه حالا آیاقده
ایدی . ایلچی اوطورنجه اوده تختنه اوطوردی . ایلچی به به نه دیقئوی
تقدیم ایدن ذات ، بزلرده بوسنه بکنك یاننده یر کوس-تردی .
اواثناده سلطان مرادك اوکنه بر ایپك خاولو وبرپیشکیر سیریلدی .
قپ قیرمزی ، یووارلاق برمشین پارچه سی ده قوندی .

بورالرده سفره یرینه مشین قویق عادتدی . صوکره اُتله دولو
ایکی یالیزلی طباق کتیرلدی . خدمه لر قالایلی قابلرده کی یمکاری ،
هردرب کیشی برر طباق داغیتدیلر . بوقابلرده بر آز قویون اُتیه ،
بر آزده پرچ واردی . سفره ده اکمک و ایچه جک برشی یوقدی .
دائره نك برکوشه سنده یوکسك برراف کوزیمه ایلیدشدی .
اوزرنده کوچوک ، آلت کوزنده ده کوموشدن بویوک برقاب واردی .
بعضیلری قالفوب بورادن برشی ایچورلردی . ایچدکاری صومیدی ،
شرابمیدی ، آ کلایامادم .

بوفه نك یاننده بر موزیقه طاقی واردی . پادشاه ، دائره سندن
چیقنجه چالمایه ، اسکی پادشاهلرک قهرمانلقلرینه دائر تورکولر چاغیرمایه
باشلادیلر . برچوقلری ده خوش لرینه کیدن پارچه لری ، کندیلرینه

خاص گور برس-سلا باغیریورلردی ، اولابو ، بکا غریب کلدی .
 فقط ایچری کیرنجه کورددم که ، الارنده بویوک تملی سارلر واردی . بونلرک
 تورکولری یمک باشلا نجه یه قادار سوردی . آتلیر قالدیرلدی . ایچی ده
 مأموریتنه دائر برکله سویلیه مەدن قالدی ، اقامتگاهنه کیتدی .
 ایلیچینک اسکان مصارفی اولق اوزره ایکی یوز آچه صرف ایدلدی .
 بو آچه بالذات ایلیچی یه ویرلدی . اوچنچی کونی ایلیچی یه خبر کوندردیلر .
 مأموریتنک نه دن عبارت اولدوغنی آ کلاتناسنی سویله دیلر . ایلیچیسى
 سرایه کیتدی . بوسفر پادشاهله کوروشه جک ، مأموریتنی اوچ
 وزیر ایله روم ایلی بکار بکنه آ کلاتاجقدی .

قاپی یه کلدک . بو دوت دوات آدمی دیوانخانه نك طیشنده ،
 تصادفاً بر آغاچ اوزرینه اوطورمش بولق . پاشالر ، ایلیچی یه
 اوکلرینه کله سنی سویله دیلر ، آلتنه بر خالی سردیلر . میلان ایلیچیسى ،
 تورک وزیرلری طرفندن محاکمه یه چاغیریلش کبی ، قارشیلرنده
 اوطوریوردی . اطرافده باشقه آدملرده واردی . ایلیچی ، مقصدینی
 شویله آ کلاتدی :

— قارده شلری میلان درقه سی ، ماجارستان قرالغنک ، افلاقک ،
 صوفیه یه قادار بولغارستانک ، بوسنه قرالغیله استقلالونیا یه تابع
 آرناووداغک یدضبطلرنده بولنان قسمنک روما ایمپراطوری سکیزمونده
 ترک ایدلمه سنی ذات شاهانه لرندن استرحام ایدیور .
 پاشالر ، مسئلہ یی پادشاهه عرض ایده جکارینی سویله دیلر .

اوچ کون کچدی . جواب آلمق ایچین ایلیچی بی سرایه دعوت
 ایتدیلر . سرایه کیردیکمز زمان سلطان تختنه اوطورمش ، دیوان
 قورولشدی . دیوانخانه ده پادشاهدن ، ات کتیره نلردن ، ایجه اوزاقده
 دوران پاشالردن ، اولکی دیوانده کوردکلریمک بر قسمندن باشقه
 کیمسه یوقدی . نه بوفه ، نه چاغیجیلر ، نه ده بوسنه بکی و اولاح

زادگانی واردی. یالکیز کهالونیادوقه سنک قاردهشی مابولی پادشاهک حضورنده بر بندهسی کبی دوریوردی.

پادشاه چیقنجهیه قادار سیر به نه دیق توی سرای قاپیسنده بکاتمشلردی. چیقارکن کوردم: چابوق چابوق کیدیوردی. بوسفر آرقه سنده صیرمالی یشیل بر اثواب واردی که، اودرجه قیمتی برشی دکلدی. پادشاه ایچریده ایکن دیوانخانهک ایچنده قاضیه سکرایله دیگر ذاتلرله خلق محاکمه ایدیور، اجنبی خریستیانلرده شکایتلرینی آکلاتیورلردی. پادشاه کیدنجه اونلرده چیق دیلر، وزیرلر ایلچی یی اولجه ذکری کچن یرده عین مراسمله قبول ایتدیلر.

جوابلری شویله ایدی: ذات شاهانه قاردهشلی میلان دوقه سنه سلام سویله مه کزی ایسته یور، فقط آرزولرینی یاپامیه جغنه تأسف ایدیور. زیرا تکلیفلری عقله و حکمته مغایردر. جهانگیرانه فتوحاتلرینی ماجارستاندن داها ایلرلره کوتورمه دیکی ایچین کندیلرینک ممنون اولملری لازم کلیر. حالبوکه بو، کندیلری ایچین هر زمان ممکندر؛ فقط قیلیجلیلرله آلدقلری یرلری کری ویرمک اصلاً ممکن دکلدی. « برطراندون دولابروکیهر، بورغونیا دوقه سی ایی فیلیپک باش میر آخورییدی. (قدس) ی زیارت ایتمش، دونوشنده تورک ایالتلرندن کچمشدی. سیاحتنه دائر یازدیغی اثرک آدی: (دکیز آشیری سیاحت، ۱۴۳۲ و ۱۴۳۳ سنه لرنده قدسدن فرانسه یه قارادن دونوش) در.

برطراندون، سرای مراسمی حقنده بوقیمتدار معلوماتی ویردیکی کبی، ایکنجی مراد زماننده آناطولو خلقنک اوصافنی ده شو صورتله تصویر ایدیور:

« توركلر چويك آداملر . صباحلری ایركندن قالفيورلر ، قيرلرده آز بر شيله قناعت ايدييورلر . اي پيشمه مش اكك ، پاصديرما ، يوغورت ، بال ، پينير ، اوزوم ، ميوه ، سبزه ييورلر . حتی اوکودولمش بر آووج اون ، بر کونده اونلرك آلتيسنی سكرزینی دويورا بيلير . الارينه بر آت ويا شفاسندن اميد قالمایان برويون کچدیعی ، بوغازلایوب ييورلر . بونی چوق دفعه لر کوردیم . اویومقدهده زحمتلری یوق ، یرده بيله یاتیورلر .

البسه لری ، بربری اوزرینه کیلمش ، ایکی اوچ پاموقلی اثواب . اثوابلری دیزلرینه قادار اینیور . بونلرك اوستنه مانطو مقامنده ، بر کورك کییورلرکه ، بوکا قیامه دییورلر . قیامه واقعا خفیفسهده ، یاغموره دایانیور . بونلرك غایت ظریف واینجه لری ده وار . کیدکاری چیزمه لر دیزلرینه قادار . کذا ، بعضیلری آل قدیفه دن ، بعضلری ده ایپکدن ، پاموقدن ، عادی قوماشدن پوطورلر کییورلر . حربده ویوله راحتسنزاولماق ایچین ، اتکارینی قالدیریيورلر ؛ شالوارلرینه صوقویيورلر ؛ بویله جه راحت راحت یورویيورلر .

آتلی غایت ای . بسلمه لری اوجوز . یولاری اوزون و دواملی . فقط آتلی ضعیف طوتیورلر ؛ آنجق کیجه لین یم ویریيورلر . حرب فیافتلرینه کلنجه ، روملردن بعضیلری مسلمانلانی قبول ایتدکاری زمان یاپیلان مراسمه بن ایکی دفعه بولوندم . بوکی حالرده توركلر پارلاق شنلکار یاپیورلر . اك کوزل سلاحلرینی قوشانیورلر ؛ غلبه لکه شهری آتله دولاشیورلر . ایشته بویله برحاله ؛ توركلرك ؛ طبق بزمکیلر کی ؛ زرهلر کیدکلرینی کوردیم ؛ فقط اونلرك زرهلری دها صیق . قول سپرلری عینی . خلاصه ، بزی ژول سه زار زماننده تصویرایدن رسملره بکزیيورلر . زرهلری یاری قالچه لرینه قادار اینیور ؛ فقط اوجی دائره وی اولارق بر قاشه مربوطکه ، بو قاشده دیز قاپاقلرینه قادار اینیور .

باشلرنده ، قافالری کبی یووارلاق بر مغفر وارکه ؛ اوزونلی یارم
قدم ؛ اوچیده سیوری . مغفرک یانلرنده بش سپر وار : بری اوکده ؛
بری آرقه ده ؛ اوچی یانلرده ، یوزه ؛ بویونه و یاناقلره کله جک
ضربه لردن قورومق ایچین . بونلرده فرانسه ده عسکرلریمیزک کییدکارینه
بکزیور .

بوسر پوشدن ماعدا ، دیگر برسرپوش داها وارکه ؛ بونی مغفرلرینک
اوستنه کیورلر . بوسرپوش پرچ تلدن . بونلرک اوپله زنکین
وظربقلری واردی که ، قرق الی دوقه ایدر ؛ عادیلرینک قیمتی ایسه
آنجق بر ایکی دوقه در . واقعا عادیلری دیگرلردن آز دایانیقلی
ایسه ده قیلیج ضربه لرینه قارشینی دایانابیلیر .

تورکار اکرلرینه قولتوغه اوطوررکبی اوطوررلر ، کومولورلر ،
دیزلرینی یوقاری طوتارلر ، قیصه اوزنکی قوللانیرلر . فقط بووضعیتده
برضرراق ضربه سیله یره دوریله بیلیرلر . اک چوق قوللانقلری
سلاح : یای ، اوق ، قیلیج ، قیصه صاپلی کرزدر . کرزک طوپوزی
برقاچ دیشلی در . صوپا ، زرهمز اوهموزلره وورولدینی زمان تهله لیدر .
شوکا قناعت ایتدم که ، زرهمله باشه وورولاجق ایی برضربه انسانی
سرسم ایدر . برچوققلری تحته قالدان قوللانیورلر ، اوق آتدقیری زمان
آتلینی بونکله محافظه ایتمی بیلورلر . بونی بکا ایی قوللانالیر
آکلاتدینی کبی کوزمله ده کوردم .

پادشاهلرینک اصرلرینه اطاعتلری پایانسزدر . حیاتی بهاسنه بیله
اولسه ، کیسه اونک اصرلردن دیشاری چیقمايه جسارت ایده من .
ذاتاً بوتون یاپدقلری ایشلر ، اونلری فرانسه دن ده جسم طوپراقلره
صاحب قیلان واسع فتوحات ، هپ بودائی اطاعتلری سایه سنده در .
تورکارک علیهنده بولونق ، اونلرک قیمتلرینی دوشورمک ایسته مم ؛
بالعکس ، شونی اعتراف ایدرم که ، حیات ایشلرنده اونلری پک سربست

و پك دوغرو بولدم ، هله جسامته لزوم اولدوغی زمانلرده ، غایتله ای داورانیلر .

توركلر یوزغونلغه وزحمتلی حیاته قاتلانیلر . فقط شن وجوشغون آدملردر . دیلارندن هیچ توركو دوشمز . اونك ایچین توركلارله یاشامق ایسته ییلر ، او یله کدرلی ، خولیالی انسانلر اولمالی ، دایما کولر یوزلو اولمالی در . بوندن باشقه ، تمیز یوره کلی و مرحمتلی آدملردر . چوق دفعه لر کوردم . بز یك یرکن ، یانلرندن بر فقیر کچه ، اونی در حال بزمه برابر یکه چاغیریورلر . بز ایسه بونی اصلا یامایز » (ص ۵۲۷) .

سلطان مراد بوتون ظفرلرینی بوجسور ، مرد ، مشفق و کریم خلفک اطاعتی و بازوسیله قازانیردی .

تورك سطوتی ، سلطان مراد زماننده ، اکیوکسک مرتبه یه واصل اولمشدی . بیزانس ، تورك سیاستنه بوتون موجودیتیه بویون اگمشدی . بولغارستان و صربستان اورتادن قالمش ، یالکیز (باغراد) قالمشدی . ماجارستانده ، هونیادی یانوش (وارنه) بوزغونلغنک آجیسیله دلخون ، تورکلردن انتقام آلمایه چابالا یوردی . ایکنجی محمد (مغنيسا) ده ایدی . ایلک جلوسک ذوقنی و نشئه سنی اونوتامیوردی . وارنه غزاسندن صوکر ، باباسنک تختده قالماسنی ، کندیسنک (مغنيسا) یه اوزاقلاشدیرماسنی وزیر اعظم خلیل پاشادن بیایوردی . قلبنده وزیر اعظمه قارشی سونمز برکین واردی .

سلطان مراد ، اوغلونک بو عداوتلرینه بیکانه ایدی .

(ادرنه) ده ، اونك مروتنی كورمك ایستیوردی . برکون وزیرى خلیل پاشای چاغیردی :

— خلیل ! قیزم جهازلدم ؛ چیقاردیم . ایمدی دیلرینکه اوغلم سلطان محمدی اوهرم . الا دیلرمکه دلقادر اوغلو سایمان بکک قیزین آلام دیرین ، وهم ترکان بزمله طوغسولق ایدر .
خلیل بك شو جوابی ویردی :
— نوله سلطانم ، لایقدر .

ذوالقدر اوغلنه حضر آغانك خاتوتنی یوللادیلر . سایمان بکک بش قیزی واردی . بشنی ده کتیردی . ایچلرندن بککندیکنی سجدی . (ادرنه) یه کلدی ؛ خونکاره خبر ویردی . سلطان مراد راضی اولدی . تکرار حضر بکک خاتونیه آماطولو بکلرینك خاتونلری کوندریلدی . سایمان بك بونلری حرمتله قارشیلادی ؛ قیزی (ادرنه) یه یوللادی . خونکار، کلینك جهازینی کوردی :

— بئم توره مده بو دکلدر .

دیدى . جهازی کندی یاپدی . دوکون درنك باشلادی . اطرافك بوتون بکلری دعوت ایدیلدی . علمایه ، فقرايه صدقه لر ویریلدی . کلینك آدی ، مکرمه خاتوندی (۸۵۰) . (عاشق پاشازاده بودو کونی ۸۵۳ ده قید ایدیورسه ده ، دوغرو دکلدر) .
سلطان مراد ، قرق بش یاشنده ایدی . برسنه صوکر ،

طوروونی بایزید بك دنیایه كمش ، پك مسرور اولمشدی (۸۵۱).
 پادشاهك بوتون نظری ، ماجارستانده ایدی . هونیادی
 یانوش ، عاشق پاشا زاده نك دیدیکی کبی یانقو خوریاد ، طونا
 سرحدنده بویوك برتهلكه ایدی . شمال حدودلری تأمین ایچین
 اولا هونیادی یانوشك امیدلرینی قیرمق لازمدی . ماجارستان
 قوتلی بولوندقجه ، هر زمان صرب ، اولاح و بوسنه بکلرینی
 آرقاسنه طاقارق روم ایللرینی تهید آلتنده براقاسنه قارشى دورمق
 قابل دکلدی .

ماجارستان کاملاً اونك اداره سنده ایدی . یکی قرال دنیایه
 کلدیکی زمان ، باباسی (وارنه) ده قهرمان حضرك ایلله تلف
 ایدلمشدی . بوسیدن کنج قراله ماجارلر لادیسلاوس (لوپوستوم)
 دیورلردی . هونیادی یانوش ، قراله وصی تعیین اولونمشدی .
 قرال ، آوستریا آرشیدوقی آلبه رتك اوغلو ایدی . یا که للون
 خاندانندن لادیسلاوسك (وارنه) ده اتلافی اوزرینه ، ماجارلر
 اولجه کنديسنى ماجار تختندن اوزاقلاشدیردقلری حالده ، ینه دعوت
 ایتمشلر ، ماجار قروناسنى کییدیرمشلردی .

هونیادی یانوش ، وصایتی آله ایتدیکی دقیقه دن اعتباراً ، تورکلره
 قارشى حرکتی دوشونیوردی . صربلردن و چه لردن امیدى
 واردی . نهایت هپسنى اتفاقنه جلب ایتدی ، روم ایلینه یورودی ،
 (بلغراد) دن کچدی . سلطان مراد ، بو یوروییشی خبر آلیر

آماز ، اوردوسنی طویلادی . آناتولودن قارامان اوغلوده
 عسکر کوندردی . قارامان اوغلونک کوندردیکی عسکرلر
 « قالدیغی اکرلی ، قتی کورکلو ، اورمه قوشاقلو ، قالاباق دلبندلو ،
 اوزنکیسی قایشی ایپدن ، و قلیجی باغی ایپدن » دی . سلطان
 مرادک بوانتظامسز عسکره جانی صیقیلدی ، قارامان اوغلونک
 سردارینه شو لطیفه ده بولوندی :

— آقی چابلی اوغلی ! بئم آنک یاردیمه احتیاجم یوقدی ،
 اما بونلری کوندردیکنه ایو وارمش . بئم چریمک مسخره سی
 یوقدی ، بونلری مسخره لق ایچون کوندرمش . وهم آندن
 بئم نسنه یه اوموم یوقدر ، ولی شونی ایسترمکه شیطانلق ایتسون ،
 کندی حالنده طورسون .

سلطان مراد ، (صوفیه) یه کلشیدی . اوغلو سلطان محمدده
 یاننده ایدی . پادشاه (قورشونلو کلیسا) یولیه (قوصوه) یه
 کلدی . ایکی اوردو قارشیلانیدی (۱۸ تشرین اول ۱۴۴۸ ،
 ۸۴۱ هـ) . تورک اوردوسنک قوتی یوز اللی بیگ ،
 ماجارلرک اللی بیگدی . پاپا بشنجی نیقولانک وکیلده
 ماجار اوردوسنده ایدی . پسقوپوس ، ماجار جنرالنه
 مراجعت ایتدی ، عسکرلر جسارتلرینی کوسترمزدن اول دینی
 مراسم یاپیلماسنی تکلیف ایلهدی . عسکرلرک کناهلرینی
 چبقاردی . سلطان مراد ایسه ، قارشیده کی اوردو کاغده ، دعا

ایدیوردی : « یامولا ! امت محمدی سن صاقله . بنم کناهم
چوق . بونلری کافر آئنده زبون ایتمه » دییوردی . محاربه
باشلادی . ایکی طرف شدتلی مهاجمه لرله چارپیشدی . خواجه
سعدالدین ، محاربه یی شویله تصویر ایدیور :

ایکی عسکر بری بیرینه کیردی

صدای ضربه زن عیوقه ایردی

شودکلو ایتدی غازیلر نبردی

که طوتدی کوك یوزین اول عرصه کردی

محاربه جمعه کونی باشلادی . ایرته سی کونه قادار ، قانلی
برصورتده دوام ایتدی . واقعا بر چوق بکلر شهید اولدی ؛
فقط دوشماندن ده بر چوق زادکان اسیر ایدلدی . عاشق پاشازاده
دیورکه : « فقیر دخی بر کافر دپه لدم ، خنکار فقیره بر آت
ویردی . درویش آق بیقه دخی ویردی » (ص ۱۳۵) .
« عسکر لر ، همان بوتون سواری قلیچدن کچیرلدی . زرهللی اولدقلری
حالده ، ینه انسان حیوان هپ محاربه میداننه سر یلدیلر . هونیادی بیله
غالبک و اولومک پنجه سندن کوچ بلا قورتولا بیلدی » (۱) .

اسیر ایدیلن بکلری ساطان مرادک قارشیدسنه کتیر دیلر .
ترجمان واسطه سیله کوروشدی . ایچلرندن چه بکنه صورتی :
— بن خود سزکله یاغلیق ایتدم ، یاسز بنم ولایتمه

نیچون کلدیکز ؟

— کوزمزه شونک کی اسیرلک کورینورمش . و الا

پادشاهه برقاج سوزم واردر ، سویلیه یین . اول سوزم بوکم بش
بیک یارار نوکرله خنکارک قوللغنه کلم ، ودخی اون پاره حصار
ویردین ، هر برینک ولایتندن خیلی مبلغ حاصل اولور ، ودخی
نیم بهاء چون ایکی یوز بیک فلوری کتیرده یین ، ودخی غیری ولایتدن
دخی خراج کلسون ، جمیع مملکتیمده سنک قانونک یوریسون .
ساطان مراد راضی اولمادی :

— الله عنایتنده سنک هیچ بر نسنکه احتیاجم یوقدر .
نه مالکک ونه قلعه که ونه لشکرکه .

چهلربانی شاشیردی :

— سنک کی غنی پادشاهک اوزرینه کلنه هر نه ایتسه لر
لا یقدر ، دیدی .

ساطان مراد اسیرلره رحم ایتهدی . بو پارلاق غالیبتی
متعاقب (ادرنه) یه دوندی . هر طرفه ظفر نامه لر یوللادی .
بالخاصه غالیبتنی بیزانس ایمپراطورینه دویوردی . ایمپراطور
چوق کدرلندی ، صحتی بیله خللدار اولدی . ذاتاً ایتالیادن
دونوشندن بری خسته ایدی . تشرین اولک صوکارینه دوغرو
کندیسنه داملا کلدی ، اوتوز برنده ده تاجنه و تختنه وداع
ایتدی . وفاتنده الی سکز یاشنده ایدی .

پو آنپس پاله اولوغوسک پرینه کچه جک اوغلو یوقدی .

اوج قارده شی واردی : قسطنطین دراغازه س ، دیمتریوس ،
 طوماس . ته اودوروس کندیسندن بر آزاو اولمشدی . سلطنت
 حق ا ک بویوکه ، قسطنطینه عائددی . کوچوک قارده شی
 دیمتریوس ، کندیسنک (بورفیرونی نه طوس) یعنی (باباسی
 ایمپراطور کن دنیا به کلش بر پرنس) اولدوغنی ادعا ایدیور ،
 سلطنت حقنی کندیسنه لایق کورویوردی . فقط اهالی قسطنطینی
 ایسته دیلر ، بو صورتله قاریشیقلغک ده اوکنی آلدیلر . حتی
 قسطنطینک سلطنته داها زیاده قوت ویرمک ایچین ، سلطان
 مرادک ده موافقتنی قازانمایه چالیشدیلر . مؤرخ فرانچیزی (ادرنه) به
 یوللادیلر . فرانچیزه ، قسطنطینک بیزانس ایمپراطورلغنی تصویب
 بویورماسنی « قوجه مراد غازیدن » رجا ایتدی . سلطان مراد بو
 نزا کتدن ممنون اولدی ، فرانچیزی غایت نازکانه قبول ایتدی ،
 هدیه لرله اعزاز ایده رک بیزانسه کوندردی .

فقط اهالی دن بر چوقلری بو حر کتدن ممنون اولمادیلر ، ملتک
 آلداتیلدیغنی ایلری سوردیلر . حال بوکه (بیزانس) اوتهدن بری
 تورکلره تابعدی . قسطنطینک بو حر کتی زمانه غایت موافقدی .
 اساساً بیزانس تورکلرک خراجکذاریدی ، ایمپراطوری
 تورکلرک امرینه تابعدی . یو آنیس پاله اولوغوس ، سلطان مرادک
 ماجارستان سفرنده ، تورکلردن امر آلیر آلاماز ، عسکرلریله برابر
 تورک اوردوسنه التحاق ایتمه مشمیدی ؟ بو وظیفه به صادق قالمق ،

بیزانس ایمپراطورلری ایچین اوتهدن بری یکانه خلاص چاره سیدی .
 فرانچه ز، استانبوله کلیر کلز ، قسطنطینه خبر یوللادیلر .
 قسطنطین اوصیراده، (لا کده مونیایا) ده ایدی . مارتده بیزانسه
 کلدی (۱۴۴۰ م ، ۸۵۴ هـ) . پارلاق بر صورتده قارشیلانیدی .
 اویونلر ، آت قوشولری یاپیلدی . قسطنطین ، پاپا بشنجی نیقولایه
 مکتوب یوللادی ، روما کلیساسنه صداقت کوستردی ؛ فقط خاق
 برلشمه نك عایهنده ایدی . فلورانسه مجلس روحانیسنده هر کس
 روملردن او قادار نفرت ایدیوردی که ، قسطنطین نهایت برشی یاپامادی
 قسطنطینک جلوسندن صو کرا ، سلطان مرادده چوق یاشامادی .
 یو آنیس پاله اولوغوسک وفاتندن تقریباً اون آلتی آی صو کرا
 اوده ادرنه ده وفات ایتدی (شباط ۱۴۵۱ ، ۸۵۵ هـ) .
 قرق یدی یاشنده ایدی . قلبدن وفات ایتشدی .
 لوبو (کتاب ۱۱۸ ، ص ۲۱۳) دیورکه :

« مراد ، عسکری مزیتلرینه ملی و اخلاقی فضیلتلرده ضم
 ایتشدی . مرحمتلی ، خیر خواه و مشفقدی . سوزینه دائماً صادق
 اولمقله مشهوردی . غایت دینداردی ؛ بونکله برابر خریستیانلره
 دوشمان دکلدی . »

روملر دیرلردی که : « جناب حق جنتده مکافاتلاندیرامیه جنی
 ایچین ، اونی دینی یوزندن جنتدن چیقارمش . فقط ای افعالندن
 دولایی ده دنیاده هر درلوسعادتلره نائل ایتشدو . » سلطان مرادک

وفاتىدىن روملار پك متاۋردى . ايكنجى مراد خلك رفاھى و سعادتى اچىن چالشيردى . غايت فعالدى . حربدن هيچ يورولمازدى . عسكرلرى كې اوده حربك زورلقلرىنه ، صوغوغه ، صيجاغه ، محروميتلره قاتلانمقدن كرى دورمازدى . ايكنجى مراد، اجدادى طرفندن فتح ايدىان، بالاخره امير سايمانلار چلبى سلطان محمد طرفندن بيزانس ايمپراطورىنه بخش ايدىلن يرلرى ، جنيدبكدن ازميرله آياثلوغى ، عموجه سى سلطان مصطفىدان (ايزنيق) ى آلمشدى .

آناطولوده (آيدىن) ، (منتشا) ، (صاروخان) ، (قاريا) ، (حميد ايلي) كاملاً سلطان مرادك زماننده توركلار كېرمشدى . توركيانك آناطولو حدودىنى تثبيت ايتمش ، اوطرفده مهم هيچ برتهلكه براقماش ، قارامان اوغلونى اطاعتى آلتنه آلمشدى . ايكنجى مراد روم ايلنده سلطان مصطفىانك ضبط ايتدىكى يرلرى ، كليبولىي ، ادرنه يى ده اله كچيردى . بوتون (موره) ، حاكميتى آلتنه كيردى . (موره) پرئسى ، ايمپراطور يوآنيسك قارده شى قسطنطين كنديسنه خراجكذارى اولدى . تيمورلسك استيلاسى اوزرىنه آلدىن چيقان يرلرى ، توركتختنه تابع قىلدى . روملاردن آلدىغى ك مهم بلده ، سلانيكىدى . سلانيك ، ايكنجى مراد زماننده ايشلك برلىماندى . عربستاندن ، بحر احمر دن بوتون كمىلر سلانيكه كلىردى . تجارتى يوكسكىدى . فقط اوزمانلر بوراسى روملر آلتنه دكل ، ونديكىلر ك ضبطى آلتنده ايدى .

سلطان مراد اولدیکی زمان ، اوغلو سلطان محمد یکرمی
ایکی یاشلارنده ایدی . (مغنيسا) ده اوطوریوردی . سلطنت
ذوقی دماغندن چیقمامشدی . باپاسنک وفاتی خبر آلیر آماز ،
آتیه بیندی :

— بنی سودن آرقه مدن کلسین !

دیدى . ایکی کونده یوز یکرمی فرسخ مسافه یی آشدی ،
(کلیولی) یه کلدی ؛ (ادرنه) یه دوغرو یوله چیقدی .



۷ . پیزائسده تورکار

ایکنجی محمد (بروسه) ایله علاقه‌سنی کسمش کیدی .
(ادرنه) دن آیرلیوردی . باباسنی (بروسه) یه کومدورمشدی .
تربه‌سی ، جامعنک یاننده ایدی . اولیاچابی دییورکه : « بروسه‌ده
مدفون اولان سلاطینک جمله‌سندن متعظمانه یاتار . پاک برقبه
میناسی ، صندوقه اوزره منقش ، زردوز ستی واردی .
قبه‌سی ، وصیتی موجینجه ، آچیق براقلمشدی . ایکی سرپوشی ،
کونده‌ک وجمه‌لق قاووغی ، اوزرنده یمک ییدیکی مشین صوفرا ،
تربه‌سنده محفوظ‌یدی . تربه‌سنک قاپیسنه شو کتابه قازدیرلمشدی :
(بسم الله الرحمن الرحيم . الحمد لله المتوحد بالبقاء المنزه عن الزوال
والفیضا وعلى من ارسله بالحنفية البيضاء وآله واصحابه الکريم
اما بعد فقط انتقل من دارالفناء والمغرور الى دارالبقاء والسرور .
ومن منزل الصننا والترح الى محفل العنا والفرح سلطان
سلاطین الدهر مالک البر والبحر سلطان الغزاة والمجاهدين ملحاء

الصعفا و المساكن فخر السلاطين آل عثمان المخصوص بعناية .
 الملك المنان السلطان بن السلطان مراد بن السلطان محمد
 بن السلطان بايزيد خان ايدام الله تعالى على غرقه الجنان وافاض
 عليه شايب الغفران ضحوة اربعا غرة محرم الحرام سنة خمس
 وخمسين وثمانماية)

سلطان محمد (بروسه) يه نادراً كليردى . جلوس مراسمی
 (ادرنه) ده اجرا اولونمشدى . ايكنجى محمد « وسط القامه ،
 خوش قيافت ، مدور كردن ، ملحم بدن ، كشاده آللو ،
 طوغان برونلو ، ايدى . علمايه و شعرايه حرمت ايدردى .
 علم و معرفت اربابى اطرافنه طوپلار ، كندى ده شعرله اشتغال
 ايلردى . زمانه كلنجيه قانار بابالرى « زر كشى كلاه مولوى
 اوزره دستار پچيده صارينورلر ايدى . اسكوف زرينى خدامه
 تعيين ايدوب علمايه مشابعت نيته صوف ، مجوزه رسمنده
 موصوف بر كونه دلبند صارنديلر » (صولاقزاده ، ص ۱۹۰)
 ذوالقادر اوغلونك قىزى مكرمه خاتونله اولنمزدن اول ، ايلك
 زوجه سندن شهزاده مصطفى دنيايه كلشدى . ديكر شهزاده لرى :
 بايزيد ايله سلطان جمدى . شهزاده مصطفى عاقل و فطيندى .
 باباسنك يك زيانده محبتنى جلب ايله مشدى .

سلطان محمدك جلوس مراسمی يك پارلاق اولدى . هر طرفدن
 تعزیه و تبريك ايچين ايلچيلر كلدى . ايچلرنده بيزانسدن و طربزون

ایمپراطور لغندن کلنلرده واردی . ایمپراطور قسطنطینک قاردهشی
طوماس ده بر ایلیچی کوندرمشدی .

(غاطه) دن ، (ساقیز) و (رودوس) آطه لرندن کلن
ایاچیلرده واردی . سلطان محمد ایاچیلری غایت ناز کانه قبول
ایتدی ، حکمدار لر یله صاح و مسالمت ایچنده یاشایاجغنی سویله دی .
بیزانسیدن کلن ایاچیلره داها زیاده اعتبار ایتدی . باباسی
سلطان مرادک ایمپراطورله یاپدیغنی دوستلق معاهده سینه دوام
ایده جکینی ؛ باباسنک ، بالخاصه صوک زمانلرده ، روملره قارشى
کوستردیکى صمیمی حسیاتی کنديسنده ده کوره جکلرینی آکلاتدی .
امیر سلیمانک طورونى وقاسم بکلک اوغلو ، بیزانسیده وفات ایدن
اورخان چابی استانبولده یاشایوردی . اونک مصارفی اولمق
اوزره ، (اوستروما ، استریمون) صوی جوارنده کی اراضیدن
اوچ یوز بیک آچقه ویرمه یه راضی اولدی .

قسطنطین ، ایمپراطور اولور اولماز ، سلطان مرادک طول
زوجه سی ماری ایله اولمک ایسته دی . ماری ، صربستان پرنسینک
قیزی دی . ایمپراطور ، بوقیزله اولمک سایه سنده ، قرالک یاردیمینی
جلب ایتک امیدنده ایدی . بوندن باشقه ، سلطان محمدکده اوکی
آناسنک خالطری ایچین روملره قارشى برشی یاپمایاجغنی ظن
ایدیوردی . بو ازدواجی تصویب ایدنلردن بری ده مؤرخ
فراچحه زی . پرنسس ماری ، الیسنده واردی . بونکله برابر

ایمپراطورک تکلیفی رد ایتدی . تورک سرایندن چقان صرب
پرنسی ، بیزانسه کیرمک ایسته مدهی . مذاکرات بردنبه
دوردی . نهایت قسطنطین ، کورجستان قرالک قیزی ترجیح
ایتدی ؛ فقط اونیده آلمق نصیب اولمادی .

ایمپراطور اولمکه مشغولکن ، سلطان محمدده دوشمانلریله
اوغراشیوردی .

ایکینجی محمدک آناطولوده حقیقی دوشمانی قارامان اوغلوایدی .
قارامان اوغلو ابراهیم بک ، عثمان اوغلارینی ضعیف دوشورمک
ایچین دائماً خریستیانلرله اتفاق ایدردی . اساساً خریستیان
دولتلرده عثمانلی تورکلری اشغال اتمک ایچین قارامان اوغلونو
تشویقندن کری دورمازلردی . فقط بوسفر قارامان اوغلو خریستیان
تشویقندن برتیجه حیقمایه جغنی آکلادی ، سلطان محمدک بوتون
آرزولرینی یرینه کتیردی . سلطان محمد برچوقروم اکابریله کورو-
شدی . بونلر ، ایمپراطورک قاردهشی دیمتریوسک طرفدارلریدی .
هپسی ده سلطان محمدده ایمپراطور قسطنطینک مشروع برایمپراطور
اولمادیغنی ، سلطنتی خدعه ایله آلدی ایتدیکنی سویلیورلر ،
اونی ایمپراطورک علیهنه تشویق ایدیورلردی . مع مافیه قسطنطینده
سلطان محمدده قارشى متبصرانه حرکت ایتموردی . مثلاً ، تام
اوصیراده ، سلطان محمدده خبر کوندردی . امیرسایمانک طورونی
اورخان چلبی ایچین ویریلن پارانک کجیکدیکنندن شکایت ایتدی .

مقدارینک آزلغنی ایلری سوردی . شاید پارا ویرلیه جک اولورسه ، اورخان چلبی صالیویره جکنی ، بناء علیه سلطان محمد ایچین تهلیکه باش کوستره جکنی تهدید مقامنده سویله تدی . سلطان محمد ، ایمپراطور قسطنطینک ایلچیلرینه جواب بیله ویرمهیه تنزل ایتهدی . (اوستروما) جوارنده کی اراضیده اورخان چلبی ایچین ویرلیه جک پارایی تحصیل وظیفه سیله اوطوران روم مأمورینی درحال قوغدوردی .

قسطنطین ، یابدیغنی ایشک نهیه واراجغنی آکلادی . پایا بشنجی نیقولایه باش ووردی . تورکاره قارشی کندیسنه امداد کوندرمه سنی رجا ایتدی . حتی ، پایاک کوزینه کیرمک ایچین بیزانسه دینی تدقیقاتده بولونمایه مأمور منور آداملرده کوندرمه سنی یازدی . پایا ، فلورانسه مجاسی روحانیسند بیوک براقتمدار کوسترن قاردینال ایزیدوری کوندردی .

ایکی کلیسانک برلشمه سی مناسبتیه آیا صوفیا کلیساسنده پارلاق مراسم اجرا ایدلدی . یورکیوس سسقولارییوس ، بونک علیهنده ایدی . (که نادییوس) نامنی آلان بوذات ، لاتینلردن روملره هیچ بر وقت امداد کله جکسه قانع دکلدی .

بیزانسه کلیسا مسئله سی خاقی بربرینه قاتدیغنی صیراده ، سلطان محمد قاراماندن دونمشدی . شیمدی ، بوتون دوشوتجه سی (بیزانس) ی آلمق ایچین حاضرلقده بولونمقدی . اساساً

بوکوزل بلدهك النماسنی باباسی سلطان مرادده وصیت ایتشدی .
اجدادندن برچوغی (بیزانس) ی محاصره ایتشلردی ؛ فقط یا
قاردشلرینك اهاتی ، ویا آوروپالیلرک مهاجماتی یوزندن موفق
اولاماشلردی . سلطان محمد (بیزانس) ی آلاق اولورسه ، بو
کندیسی ایچین بویوک بر شرف اولاجقدی .

ایکینجی محمد، بومقصدده نائل اولابیلمک ایچین بوغازک روم
ایلی قیدینه ، جدی بایزید بکک یاپدیردیغی (کوزله حصار) ک
قارشیشنه ، بر حصار یاپدیرمای دوشوندی . بوسورتله بوغازی
قایا یاقق ، بیزانسه قره د کزدن ارزاق وجببخانه صوقدورمیه جقدی .
حصارک انشاسنه قرار ویرر ویرمز آناطولویه امر کوندردی
(۸۵۶ هـ) .

حصارک انشاسی ایچین مالزمه و عمله ایسته دی . انشات
باشلادی . بر کون ، حصار محله کندیده کلدی (۲۶ مارت) .
عمله یی شوق و غیرته کتیردی . فعالیت خارق العاده
ایدی . پاشالر بیله ، اللرنده قازمالر ، طوپراق قازیورلر ،
طاش و کیره چ طاشیورلردی .

ایمپراطور قسطنطین ، سلطان محمدک بوتشبی اوزرینه ،
دهشتلر ایچنده قالدی . آناطولوده کی ، روم ایلنده کی ،
آطه لرده کی روملر قورقورلرندن تیره یورلردی . حصارک انشاسنی
همان هر کس ، ایمپراطورلرک سقوطنه باشلانغیچ تاقی ایدیورلردی .

قسطنطین نه یاپاجغنی شاشیردی . پاتختک قاپسی اوکنه
 بر حصار یاپیلماسنی آرالرنده موجوده صالحه یه مغایر عدایتدی .
 سلطان محمد ایاجیلری نازکانه قبول ایتدی . روم ایلنده بر
 حصار یاپدیرمایه حتی اولدوغنی ، حصارک یاپیلدیغنی یر نظر
 دفته آلتیجه ، قسطنطینک بوندن تلاشه دوشمیوب بالعکس منون
 اولماسی لازم کله چکنی ، (بیزانس) جوارینه بر حصار یاپیلاجق
 اولورسه یکدیگرینه ده قولا یاردیم ایدیه بیه چکریغنی ، مشترک
 دوشمانلری اولان رودوس ، وندیک و قاتالونیا قورصانلرینه
 قارشى قولای حرکت ایدیه بیه چکنی آ کلاتدی . فی الحقیقه
 بونلرک بیزانس تجارتنه دائما ضررلری دوقونوردی . روم
 ایاجیلری بومطالعهلری قبول ایتمه دیلر ، انشا آتک دور دور و لماسنی ،
 یاپیلان قسملرک ییق دیرلماسنی ایسته دیلر . ایسته اوزمان ، سلطان
 محمد بردن بره پارلادی . هرکسک کندی طوپراغنده حصار
 یاپدیرمایه حتی اولدوغنی ، کندیسنی بو حقتدن محروم ایدیه چک
 بر بابا یکیت وارسه میدانه چیقماسنی سویله دی ، روملرک
 جوابلرینی بیه بکله مده دن هپسینی حضورندن قوغدی . حتی ، تکفورلری
 برداها بومسئه ایچین آدم یوللا یاجق اولورسه ، دیری
 دیری قازیغه ووراجغنی سویله دی . بوجواب ، روملرک آغزینی
 طیقادی ، هپسی ده سسلرینی بیه چیقارمادن بیزانسه دوغرو
 یوله دوزولدیلر .

قسطنطين ، اياچىلارنىڭ آكلاتىقلىرى سىوزلردن چوق
متأثر اولدى . عسكرىنىڭ باشى كچەرك حصارده چالیشان عملەلەر
هجوم ايتىك ايستەدى . اھالى ايلە پاپاسلار مانع اولدىلار ، سلطانى
بوسبوتون قىزدىراجىنى آكلاتدىلار . قسطنطين برآز سكونت
بولدى . سلطان محمدە تجاوز ايدەك اولورسە ، اوغراياجىنى
فلاكتك درجەسىنى اودە آكلاتدى . حرصنى وحدتى بللى
ايتەمەيە قرار وىردى . ايكنجى محمدك ايلك ملاقاتدە اياچىلارنى
سويلەدىكى صاح ومسالت سوزلرنيە اعتماد ايتىش كى كوروندى .
داھا زيادە خوشنە كيتەيە چاليشدى . حصارده چالیشان عملەيە
ارزاق و صو كوندرمەيە باشلادى .

سلطان محمد ، عملەنىڭ باشىدىن آريلايور ، انشا آتە بالذات
نظارت ايدىيوردى .

ايمپراطور قسطنطين ، سلطان محمدە ايتدىكى ايلەكلەرە مقابل
اوندىن دە برأيلك ايستەدى . جوارده كى محصولاتك بر تورك
مفرزەسيە محافظەسىنى رجا ايتدى . سلطان محمد ، ايمپراطورك
بو تكليفىندىن دە استفادەيە باقدى . عسكرىنىڭ آتنى وقىصراغنى
مرعالردە اوتلاتدى ، جوارده كى روملارنى قطعياً راحت برامادى .
ايمپراطور بوندىن دە متأثر اولدى . فى الحقيقە ، كويلر تجاوزە
اوغرايور ، خلق شكايەت ايدىيوردى .

قسطنطين ، بوفلاكتى خبر آلپر آلاماز ، بوسبوتون قىزدى .

استانبولك قاپلارنى قاپاتدى ، كرك كزملك و كرك تجارت ايچين بيزانسه كلن نه قادار تورك وارسه ، هپسنى توقيف ايتديردي . فقط بو توقيف چوق سورمه دي ، توقيف ايتديرديكى آداملرى تكرار صالحو برديردي .

ايمپراطورك بو شاشتمينلقلرينه سلطان محمد هيچ اهميت ورميوردي . حصار فعاليتله انشا ايديليوردى . سلطان محمد ، حصار بيتنجيه قادار ، باشندن آيرلمادى . چالیشان عمله ، بش بيك قاداردى . حصار اوچ گوشه لى ياپيلدى . هر گوشه سنده بر بويوك قوله واردى .

قوله لرك ايكيسى قره يه ، برى د كزه ناظردي . ديوارلرينك قالينلىغى اوتوز ايكي ، اونلرى يكدىكرينه ربط ايدن ديوارلرك قالينلىغى ده يكرمى بش قدمدى . قوله لرك اوزرى قورشون قاپليدى . حصار آغستوس نهايتنده بيتدى (۱۵۴۲ م ، ۸۵۶ هـ) . انشات دوت آي سوردي . آدينه (بوغاز كسن حصارى) دنيلى . سلطان محمد حصاره دوت يوز قادار محافظ يرلشديردي . فيروز آغاي قوماندان نصب ايتدى . كنديسنه بوغازدن هيچ بر كمى يي اذنسز كچيرتمه سنى ، كميلر حصار او كندن كچر كن حصارى سلاملا ماسنى ، كميلردن ويركى آلاماسنى تنبيه ايله دي ، وير كينك نظامنامه سنى ده كندى تنظيم ايتدى . اوكونلرده كچن بر ونديك كميسى ، اذنسز كچديكى ايچين

در حال باطیریلدی .

حصارک انشا ایدیلدیکی بره روملر (لوموقوپیا) دیرلردی .
(لوموقوپیا) حصاری ، اونلرک نظر نده بوتون تهلكه لرك منبعیدی .
تورك عسکرلری اکثریا حصاردن حقیبورلر ، (بیزانس) سورلرینه
قادر کلیورلردی .

ایمپراطور بوندن ده شکایت ایتدی . سلطان محمد ایمپراطوره
قارشى صمیمانه داوراندی . مقصدی ، تدارکاتی بیتیرنجیه قادار ،
ایمپراطوری کنديسندن امین بولوندورمقدی .

سلطان محمد اوربه ن آدلی بر ماجار ملتجی کتیردیلر .
طوپ دوکمه که مهارتی واردی . اساساً ایمپراطور
قسططنینک خدمتده ایدی . فقط ایمپراطوردن آدینی معاش
آز اولدوغی ایچین سلطان محمدک خدمتده کیرمک ایسته دی ،
موفق اولدی .

سلطان محمد اوربه نی آله کچیردیکی ایچین ممنوندی . کنديسنه
اک زیاده لازم اولان طوپدی . اوربه نی چاغیردی ، شیمدی یه
قادر موجود طوپلردن داها بویوک بر چاپده طوپ یامماسنی
امر ایتدی . اوربه ن طوپ یامقله مشغول اولدی ، بو ایشلره
(بوغاز کسن حصار) نده باشلاندى .

سلطان محمد حصاردن قالقدی ، (ادرنه) یه کلدی . بوتون
مشغولیتی بیزانسی آلمق ایچین حاضرلق کورمکدن عبارت اولدی .

(بیزانس) بر درلو کوزینک او کندن کیتیمور ، ذهنی تمامدیا اشغال ایدیوردی . اطرافنده برچوق مهندس لر واردی ؛ بونلر کیجه کوندوز چالیشیورلردی . بعضاً اونلرله مذاکره ایدیور ، کندیلرینه فکر ویریوردی .

سلطان محمد بیزانسیک بر پلاتنی چیزمشدی . بو پلان دائماً اوکنده ایدی . شهره هانکی طرفدن هجوم ایتک داها موافق اولاجغنی بو پلان اوزرنده تدقیق ایدیوردی . باطاریه یرلرینی ، لغم محللرینی ، کدیک آچیلاجق یرلری کاملاً تعیین ایتمشدی . بیزانسی آلتق ایچین هراحتمالی دوشونمشدی . بعضاً عسکرلرینه تعلیملر یاپدیریور ، بعضاده طوپلری تجربه ایتدیریوردی . بو طوپلر آراسنده اوربه نك یاپدیغی طوپده واردی . بو طوپه برده آد قونولمشدی : شاهی .

دورک مؤرخلری ، اوربه ن طرفندن یاپیلان طوپي پك زیاده مدح ایدرلر . فرانجه زك روایتنه کوره طوپك محیطی دو قوز ، قطری اوچ قدمدی . (ادرنه) ده بو طوپ ایلک دفعه تجربه ایدیله جکی زمان ، اهالییه قورقاسینلر دییه خبر ویرلمشدی . فی الحقیقه ، طوپ او یله بر کورولتو ایله پاتلامش که ، مؤرخ دو قاسک قولنجه ، اوتوز میل مسافه دن ایشیدیلش . آتدیغی کولله ده بر میل قادار اوزاغه دوشمش . آلتی قدم درینلکنده طوپراغه صاپلانمش . بیزانس محاصره سنده بالذات بولونان

مدلی یستیوسی ساقیزلی له ئونارده ، بویوک برطوپك شهره پك
 زیاده خسار ویردیکندن بحث ایدر . له ئونارك روایتنه کوره ،
 بو طوپله آتیلان کوللهلردن برینی کندی معاینه ایتمش ، بیک ایکی
 یوز اوقه کلمش . طوپلرک آتدقلری کوللهلر هپ غرانیتدن ایمش .
 سلطان محمد اوربه نك طوپنی بر آن اول (ادرنه) دن یوللادی .
 طوپ ، شباط صوکلرنده یوله چیقاریلدی (۱۴۴۳) ، آنجق ایکی
 آید . بیزانس او کنه کله بیلدی . آلتمش او کوزله چکیلیوردی .
 بعضیلرک روایتنه کوره ، طوپ قیملداتمق ایچین یوز اللی چفت
 باز کیر قوللانیلمش . نقلنه مأمورا اولانلرده ایکی بیک کیشی ایمش .
 بونلرک بر قسمی طوپك دوریله سنه مانع اولمق ایچین یانلرنده
 یورورلر مش . بر قسمی ده طوپك کچه جکی یرلره کوپرولریاپارلر ،
 مانعلری قالدیررلر مش .

سلطان محمد ، یالکز بوغاز کسن حصارینی یایمقله قالمادی ؛
 ایمپراطورک مورده دن ، قارده شلری دیمتریوس ایله طوماسدن ،
 امداد آلاماسی ایچین ، (موره) یه طورخان بکی کوندردی .
 طورخان بك ، سلطان مراد زمانندن بری ، اورالره واقفدی .
 بناءً علیه (قوردهنت ، کرمه حصار) ی چار چابوق کچدی ،
 (آرقادی) یه کیردی ، اوغوللری عمر بکله احمد بك ده یاننده
 ایدی . احمد بك ، دیمتریوس ایله طوماسك جنرالی ماته اوس
 آسانله چارپیشدی ؛ فقط اسیر دوشدی . دیمتریوس احمد بکی

(اسپارطه) ده بر قلعه یه حبس ایتدی .

سلطان محمد حاضر لقلرینی بیتیردی . مقصدینی آرتق بوسبوتون
آچیغه ووردی . ایلک اول بیزانسه دوغرو قاراجه پاشایی
کوندردی . وظیفه سی : (مه زه مبریا) ، (سیلیوری) ، (بیزون)
و (آخیولی) جه تلیرینی تأمین ایتمکدی . بو وظیفه حتمیله ایفا
ایدیلدی . (بیزانس) جوارنده کی اوفاق تفک قلعه لرده بومیانده
ضبط اولوندی . قاراجه پاشانک صولتنه قارشی هیچ برکیمنه
تحمل ایدمه دی . آز بر زمانده (بیزانس) اطرافی تورکلرک
آلینه کچدی . آرتق شهره ارزاق کیرمک ده امکان خارجنده ایدی .
نهایت تورک اوردوسی (ادرنه) دن یوله چیقدی ، نیشانک
ایکنجی کونی بیزانس سورلری قارشیننه کلدی . (بیزانس) ک
فتحنی اک زیاده کوجاشدیرن ، سورلریدی .

(بیزانس) سورلری اوچ گوشه لیدی . ایکی یانی دکزله
چویریلشیدی . غربه دوغره اولان قسمی قره یه ناظریدی .
شمال قسمی (خریسوکه راس ، خلیج) احاطه ایدیوردی . بیزانسی
غلطه دن بولیمان آیریوردی . تورکلر بورایه (لیمون) دییورلردی . سورک
شمال شرقی قسمی (پروپونتیس ، مرمره دکزی) قوشا یوردی .
مرمره نك وجوده کتیردیکی لیمابه (سرای ایمپراطوری لیمانی) دیرلردی .
بوندن باشقه ، برده (بوقوله ئون) لیمانی واردی . اوکا بواسمک
ویرله سنه سبب ، جوارده بربریه کوره شه ن بر آرسلا نله بر

او کوز هیکلی بولونماستندى . (خریسوکه راس) ه (ایچ -
 لیمان) دنیلدیکی کبی ، بولیمانده (طیش لیمان) دیرلردی .
 (غاطه) ، جنویزلر طرفندن آلیمازدن اول بیزانسه تابعدی .
 بیزانسیك تکمیل محیطی اون آلتی میلدی . سلطان محمد ،
 بیزانسی قوشاندیغی زمان ، شهر بووضعیتده ایدی . سورور
 خرابه یوز طوتمشدی .

روملر ، شهرک قوشاتیلدقلرینی کورر کورمز ، صوک درجه
 مأیوس اولدیلر . هرکس آرتق قورتولوش چاردهسی اولمادیغنی
 آکلایوردی . معنوی حسلری اودرجه صارصیلیمشدی که ،
 هرشیده اوغورسنزلق حس ایدیورلردی . بعضاً اورتایه برطاقم
 شایعه لر چیقیور ، کوکدن برامر کلدیکی وبوامرده ، تورکلرک
 شهره کیرمه لرینه ممانعت اولونماسی ، حتی ژوستینیانوس ستوننه
 قادار براقیلماسی ، اوراده برملک ظهور ایدهرک کندیلرینی
 پریشان ایدهجکی آغزدن آغزه کزیوردی . بوشایعه لر ،
 بیزانسی مدافعه ایچین سلاحه صارملق ایسته مینلری ممنون
 ایدیوردی .

تورکلر ، سور خارجنده ، ترتیبات آلمقله مشغول اندیلر .
 نهایت اوردوگاهلارینی (رومانوس پورتاس) رومانوس
 قاپیسنک قارشیسنه قوردیلر ، بوقاپی قره یه ناظردی .
 ایکنجی مرادده ، اوتوز سنه اول بیزانسی قوشاندیغی زمان ،

اوردو كاھنى بورايە قورمىشى . تۈرك اوردوسىنىڭ اشغال ايتىدىكى
محل، آلتى بىك خطوۋە اوزونلغىنىدە ايدى . آنا طولو عسكىرلىرى
صاغ جناحىدە دورىيور ، (خرىس-ويىلى ، يالدىزلى قاپى) يە
قادار اولان اراضى يى اشغال ايدىيوردى . روم ايلي عسكىرى
صول جناحىدە ايدى ؛ بونلردە (قىسىلو پورتاس ، اودون قاپىسى)
و (خرىسو كهراس) ە قادار اولان مسافىدە ايدى . اوردونىڭ
قوتى يوز بىكىدن فضالە تخمىن اولونىيوردى . تۈركلەر بولوندىغى
اوردو كاھىك اطرافىدە درىن بىر خندىك قازىلىش ، شرانىپولار
چاقىلىمىشىدى . اطرافىدە ، يىكىچ يىرلە سرالى اركانى ، نوبت
بىكليورلردى . زىغىوس پاشا (غلطة) لىرىنىدە ايدى . وظيفەسى ، (غلطة)
و (پەرا ، بك اوغلو) ندە او طوران جنويزلر كى حرىكائىنە مانع
اولمىقدى .

سلطان محمد ، بىزانس قارشىسىنە كلىدىكى كۈن ، تۈرك دونانماسى دە
كلىدى . دونانما اوچ كۈرەكلى يوز كى ايله مختلف شىكلە
يوز اوتوز كىدىن مىركىدى . شو صورتلە ، بىزانس قرەدن دە ،
دىكىزدن دە قوشاتىلىمىشىدى .

روملر ، تۈرك دونانماسىنىڭ كلىدىكى كۈرۈنچە ، چارچابوق
لىمانىك زىنجىرلىرىنى كىردىلر . بو زىنجىر (آقروپوليس) دن
(غلطة) قولەسىنە ، (قروويون) ە قادار اوزانىيوردى .
مختلف مسافىلردە صويفە قازىقلر دىكىلىمىشىدى . زىنجىر اولنرە

استناد ایدیوردی . زنجیر بویجه برچوق کیلر دیزلمشیدی .
 لیمانه کیره جک چکدیریلره اولردن مقابله ایدیوردی .
 بوزنجیر روملرک پک زیاده ایشلرینه یارامشیدی . واقعا بیزانسیک
 دونانماسی واردی ؛ حتی مختلف ماتلردن پارا ایله کیلرده
 طوتولمشیدی ؛ فقط دونانمالری تورک دونانماسنه فائق دکلدی .
 سورلری مدافعه ایده جک قوت ایسه ، آز برشیدی .
 تورکار باطاریه لرینی منتظم صورتده یرلشدیردیله . اوربه نک
 یاپدیغی ایری طوپده بونلرک ایچنده ایدی .

ایمپراطور قسطنطین مایوسدی . کیمسه یه امنیتی یوقدی .
 مدافعه اوردوسی قوماندانلغنه جنویرلی ژان ژوستینیانی بی تعیین
 ایتمشیدی . بیزانسی تورکاردن قورتاردیغی تقدیرده کندیسنه
 (لیمنی) آطه سنی ویره جکدی . روملر ایچنده ایمپراطورک الک زیاده
 اعتماد ایتدیکی ذات ده ، لوقاس نوطاراسدی . لوقاس ، مه غادوقس
 رتبه سنی حائزدی . اولندن باشقه طانیلان سیمالر : دیمتریوس
 قانتاقوزینوس ، نیکه فوروس ، وته اوفیلوسدی . بونلردن باشقه ،
 بیزانسه اجنبیلرده واردی که ، بونلرده وندیکیلریدی . ایچلرنده
 قونطارینی ، ترمویزانو ، جیووانی لوره دانو ، غریقتی ،
 بالیوسلری مینوتتو ، اک ممتازلیدی . تورک اولارقده ، امیر
 سلیمانک اوغلو اورخان چابی بولونیوردی (۱) .

[۱] قیریتووولوسه نظراً اورخان بک ، فاتحک عموجه سی وایکنجی

سلطان مرادک قارده شیدی . شو حالدده اورخان بک ، امیر سلیمانک

سلطان محمد ، محاصره نك دها اوچنچي كوني ، استانبول سورلرينه قارشى سپرلر ياپدوردى . بو ، توركلرك تعبيرى وجه ايله ، طوپراق سورمكدي . سپرلر ايلريله دجه ، ايجلرندە چالیشانلر ، شرانپوللر ديكهرك كنديلريني محافظه ايدىيورلردى . هجوم نقطه لرينك هر برينه قارشى درحال اون درت باطاريه قورولدى . بويوك طوپ (خارسيياس پورتاس) اوكنه قونولدى . داها صوكرا ، لغملر ياييلمايه باشلادى . ير آلتندە دهلزلر وجوده كتيريلدى ، شهره بودهلزلردن كيريله جكدى . روملر بيزانسك برقايا اوزرينه مبنى اولدوغنى بيلدكلرى ايجين بولغملردن هيچ قورقميورلردى . اونلرك بوتون مدافعه ايتدكلرى ، سورلردى . فقط لوغرمان آدى بر آلمان ، توركلرك ير آلتندن لغملرله اوغراشدقلىرى كورونجه ، اوده قارشىلق لغملر يايمايه باشلادى . ايكي طرف ير آلتندە قارشىلاشدى . روملر لغملر ايچنه روم آتشي آتديلر ، توركلر چكيديلر . آتشدن دهلزلرك ديرەكلرى چوكنجه ، اوزرنده كي سور قسمى ده مدهش كورولتولرله چو كويوردى .

توركلر ، بوسفر ، بويوك باطاريه لرى (رومانوس پورتاس ،

شهرزاده سى قائم بكك اوغلاويدى . بيزانس مؤرخلرينه نظراً : ايكنچي سلطان مرادك درت قارده شى واردى : علاءالدين ، احمد ، اورخان ، حسن . بناءً عليه بيزانسه كي اورخان ، ايكنچي مرادك قارده شى اورخان بكدي .

طوپ قاپی (قارشینده کتیردیلر، شدتلی طوپچی آتشنه باشلادیلر.
مع مافیہ روملرکده طوپلری واردی .

مؤرخ خالقونندیلیک روایتنه کوره ، بو طوپلر یوزالای
اوقهلق طاش کولله آتاییلوردی . چاپلری ، تورک طوپلرینک
چاپلرینه نظراً کوچوکی . فقط آتیلدینی زمان اوقادار کری
تہیبوردی که ، آلتندہ کی سور قسملری بیلہ ییقیلیوردی .
جیخانہلرده باروت آزدی . بوسبدن ، طوپلرک اوزون مدت
قوللانیلمیہ جنی آشکاردی .

سلطان محمد ، متمادیا چالیشیور ، هیچ بر لحظه راحت
ایتمیوردی . محاربہ بی بالذات تدقیق ایدیور، هر طرفه یتیشیوردی .
باطاریہ لری دولاشیور ، تأثیرلرینه باقیور ، آچدقلری کدیکلری
معاینہ ایدیوردی . اونک الک زیاده کووہ ندیکی ، بویوک طوپدی .
بو طوپ ، حقیقہ شہری پک زیاده تخریب ایدیوردی . فقط
اونکده قوللانیلماسی اوزون سورمہدی . برکون بردنبرہ
پاٹلادی . موجدینیده ، ضابطلرینیده اولدوردی . بوکی
قضالر روملر طرفندہده وقوعه کلدی .

تورکلر ، طوپچی آتشیله سورک بویوک بر قسمنی خراب
ایدر ایتمز، هجوم حاضرلقلری کورمہیہ باشلادیلر . سلطان محمد ،
قرہ طرفندہ کی برنجی خندکک دولدورولماسنی امرایتدی . بواصر،
تورک غازیلری طرفندن سرعتله اجرا ایدیلدی .

خندك دولدورولور دولدورولماز ، توركلر خندكك اوزرندن
 اخشاب بر قوله يوروتمه يه باشلاديلر . بو قوله برقاج قاتليدي .
 اوتارينجه قادار بو نوعدن كورولنلرك اك جسيمى واك خارق -
 العاده سيدي . آلتندە صاغلام تكلر لكلر واردى . بو سايه ده
 غايت قولاي يوروتوله بيليوردي . ايچندە ، عسكر ، جبخانه ،
 سورلرە چيقمق ايچين مرديوەن بيله واردى . ايچى ، يانماق
 ايچين ، تازە كسيلمش صيغير و مانده درياريله قاپليدي . طيشنه
 بزلر آصيليدي . بونلر اوقلرك وطاشلرك تاثيرنى آزالتيوردى .
 قوله ، اول (طوپ قاپي) يه دوغرو ايلريله تيلدي . توركلر ،
 قوله نك ايلريله مەسنى قولايلاشدير مق ايچين بوتون طوپلرله
 آتش ايتديلر . روملر دە بو كا قارشى تكميل سلاحلرندن استفادە يه
 باشلاديلر .

اورتالق داها آغارما مشدى . هجوم باشلامش ديمكىدى .
 اوكون ، ايكي طرف دە ، آقشاملرە قادار محاربە ايتديلر .
 اورتالق قارارمايه باشلاينجه ، آتش كسديلر . ايرتەسى كون ،
 توركلر تكلر ار هجومە حاضر لاندیلر . فقط او كيجه ، روملرك
 بوتون خندەكى تمیزله دكلرينى كورونجه ، حيرتلىر ايچندە قالدیلر .
 ايكي طرف دە هجوم ومدافعه دە صوك غيرتلىرى كوسترييوردي .
 تعرضى سلطان محمد ، مدافعه يي دە ايمپراطور قسطنطين
 اداره ايدىيوردي .

ايرته سي کون، د کزده وقوعه کان بر حادته، سلطان محمدك
 حدتي برقات داها آرتدیردی . آطه لرد کزندن (پروپوندیس،
 مصره) په دورت دوشمان کیسی کیردی . بو کیلردن بری
 ایمپراطور کدی؛ (سیجیلیا) دن محصورینه ارزاق کتیریوردی .
 دیگر اوچی ده جنويز کیسیدی؛ ایچلری آریا، شراب، زیتون
 یاغی، خورما و قورو سبزه دولو ایدی . تورك دونانماسی
 بونلری دور دور مق ایسته دی . فقط اونلر تورك دونانماسنه
 اوقادار آنی بر صورتده هجوم ایتدیله که، ایچلرندن برقاج دانه سنی
 باطیر دیلر . سلطان محمد، بو مجادله یی (بك اوغلو) صرتلرندن
 سیر ایدیوردی . دونانماك بوفلا کتنی کورونجه، صرتلرندن
 آشاغی ییلدیریم کبی ایندی . حدتندن آتی دکره قادار
 سوردی . دونانما قاپودانی شدتله تأدیب ایتدی . فقط دوشمان
 کیلری لیمانه کیرمشلردی .

سلطان محمد، (ایچ لیمان، خریسو که راس) دوشمان آلنده
 قالدجه، موفقیتك کوجله شه جکنی آکلادی . بو لیمانه حاکم
 اولمانك چاره سنی دوشوندی . کیلری قره دن یوروته رك خلیجه
 ایندیرمه یه قرار ویردی . (غلطه) سورلرینك آرقاسندن،
 (آیا قوزما) مناسترینك قارشيسنه قادار بر یول یاپدیردی؛
 چالیلری، آغاچلری کسیدیردی . اوزرلرینه یاغلی قالاصلر
 دوشه تدی، یتمش سکسان کمی یی بو قالاصلر اوزرندن قایدیرارق

کچیرمه یه باشلادی. بو کچیش، نشئه لی بر منظره عرض ایدی یوردی. کچیجیلر تورکو چاغیری یور، بورولر و داووللر چالینیور، تورک دونانماسی قره لری عادتاً دکره تحویل ایدی یوردی. بوده کوستری یوردی که، تورکلرک دوشماندن هیچ پروالری یوقدی. فی الحقیقه، تورکلرک بو داهیانه عزملری، پارلاق بر موفقیتله نتیجه لندی. کیلر بر بوچوق فرسخ مسافه کچدیله، و کاملاً خلیجه ایندیله.

روملر، تورک دونانماسی خلیجه کورونجه دهشت ایچنده قالدیلر. نتیجه یی تمامیه آکلایورلردی. اونلر ایچین دکر دن امداد آلمق آرتق امکان خارجنده ایدی. حتی بوتون بیزانس دونانماسی ده اسقاط ایدیش دیمکدی. سورلرک خلیج طرفنده کی قسملری مدافعه ایدیله میه جک درجه ده ایدی. اونلر لیمانک آغزنده کی زنجیره، لیمانده کی دونانمایه کووه نمشاردی.

تورکلرک فعالیتی کیتدکجه آرتدی. تورکلر غلطه ساحلندن بیزانس یاقاسنه کوپرو یاقامایه قالمیشدیله. اوافق قایقلر اوزرینه قالاصلر دوشه دیله، هپسینی بر برینه دمیرلرله باغلادیله. بو کوپرو، غلطه نك خلیج طرفنده کی سورک (کینه کیون قاپیسی) نه قادار امتداد ایدی یوردی. کوپروی یاقاق ایچین غلطه طرفنه بر باطاریه یرلشدرمشلردی. تورک دونانماسی لیمانه تمامیه حاکمدی.

روملر بوکا قارشى بر چاره دوشوندیله، کیلری یاقامایه

قرار ویردیلر . تورکلر غاطه ده کی جنریزلردن بونی ده خبر آلدیلر . فقط جنویزلرک سیاستلری ایکی یوزلو ایدی : هم تورکلری ، هم روملری التزام ایدیورلردی . مع مافیه تورکلر اونلری ده تأدیبدن خالی قالمادیلر . جنویز دوناماسنی شدتلی برطوچجی آتشنه طوتدیلر ، اونلری بیزانسه یاردیم ایدهمیه جک بر حاله کتیردیلر .

بیزانس قره دن ود کزدن تمامیه صیقیشدیلمشدی . آرتق عمومی هجومک اجراسنه انتظار ایدیلیوردی . سورک ایکنجی قسمی ده ییقلمشدی . تورک طوچجیسی سورلری قرق کوندر آتشنه طوتیوردی . ایمپراطور هیجان ایچنده ایدی . جنویزلر ، قاطالانلر ، پاپانک قاردیناللری ، ایتالیانلر ، کیریدیلر بیزانسی بوتون موجودیتلریله مدافعه ایدیورلردی .

« ایمپراطورک پاراسی یوقدی . مالیه سی بیتیکدی . بوتون قلیلرده انسانیت حسی اوقادارسونمیشدی که ، الکنین بیزانسلیلر بیه ایمپراطورلرینه وطالعسر و طنداشلرینه یاردیم ایدهمیه جک یرده ، هیچ اوتانمادن پارالینی صاقلایورلردی » (۱) .

مع مافیه هرایکی طرف ده سماوی علامتلری ظفرلرینه ویا فلاکتلرینه دلیل عد ایتمکدن کری دورمیورلردی . محاصرهنک اوزاماسی ایکی طرفی ده یورمایه باشلادی .

نہایت ، بر صالح مسئلہ سی اورتایہ چیقدی . ایمپراطور
نومیددی . محاصرہ ، ہرہانکی شرطلرلہ اولورسہ اولسون ،
قالقاجق اولورسہ ، بیزانسی دہ ، حیاتی دہ قورتارمش اولاجقدی .
نہایت سلطان محمدہ آدام کوندردی . محاصرہ نک قالدیرماسی ایچین
ہردرلو شرطلرہ راضی اولدی . سلطان محمد ایمپراطورک
(بیزانس) ی کندیسنہ تسلیم ایتہسنی ، بو آرزوسنہ موافقت
ایتدیکی تقدیردہ ، ایمپراطوری مورہ حکمداری نصبایدہ جکنی ،
ایکی قاردهشی طوماس ایلہ دیمتریوسہ دہ تورک طوپراغندن یرلر
ویرہ جکنی اسویلہدی .

ایمپراطورک کوندردیکی آدامہ برچوق مطالعہ لردہ بولوندی ،
بیزانسی آلمق عزمنی داھا قطعی بر صورتدہ کوسترمک ایچین
سوزینی شو جملہ ایلہ بیتیردی : « یابن بیزانسی آلیرم ، یابیزانس نی ! »
نہایت دیوان طوپلانندی . وزیر اعظم خلیل پاشا روملر
طرفندن آلدہ ایدلمشدی . خلیل پاشا ایمپراطور طرفندن واقع اولان
تکلیفک قبول ایدلمہ سنہ طرفداردی . فقط زغنوس پاشا عکسی
فکرده بولوندی . پاشانک مطالعہ سی دوغروایدی . حتی بومطالعہ
سلطان محمدک دہ خوشنہ کیتدی .

اورتالقدہ برشایعہ واردی : بیزانسه آوروپادن امدادکلدیکی
سویلہ نیوردی . پاپا ، جنویزلر ، ونڈیکلیلر وقاٹالانلر مرکب
بردونانما حاضر لامشدی . فقط ایش ایشدن کچمشدی .

زغنوس پاشا آوروپادن امداد کلمک امکانسز اولدوغنی سویله یوردی .
 سلطان محمد ، قطعی هجومه حاضرلق امرینی ویردی .
 خلیل پاشا متأثر اولدی ، حتی دیوانک مقرراتی قسطنطنینه خبر
 ویردی ، مدافعهیه شدتله دوام ایتمه سنی ده توصیه دن کری
 دورمادی . خلیل پاشانک اهاتی آرتق آشکاردی .
 سلطان محمد ، عمومی هجوم کوتنی تعیین ایتدی : ۲۹
 مایس . تورک اوردوسنده بویوک برفعالیت واردی . سلطان
 محمد ، هجوم قوللرینی دولاشیور ، نطقلر ایراد ایدیوردی .
 « منادی لر اوردوی هایونده ندا قیلدیلر که هر کیم مقدم کدی که چیقہ ،
 اکر درلک تحقق ایتماش کیمسه ایسه عالی همتلر اولوب زیاده جهت اوله .
 واکر درلک ییانلردن ایسه تیماراری ایسه بویوک سوباشی اوله . سوباشی
 ایسه سنجاق بکی اوله . سنجاق بکی ایسه بکار بکی اوله . الیه حکم شریف
 دخی صدقه اوله . تا نسلی منقرض اولنجه یه دکن اولادا کبادی
 دولت آل عثمانی ده که تا قیامت باقی وپاینده اولسون . هر زماندن
 مرعی و محترم اوله (۱) .

تورکلر ، سور طیشنده منادیلر چاغیرتیرلرکن ، بیزانس
 پریشان برحاله ایدی . پاپاسلر آیینلر یاپیورلر ، یالین آیاق ،
 سوقاقلرده دینی آایلر ترتیب ایدیورلردی . بو آلایک پیشنده
 بیزانسیک سناتوسی ، ضابطلری ، سرای خاقی ده متأثرانه

يورۇيورلردى . اختىارلر ، قادينلر ، چوجوقلر سوقاقلره
دوگولشاردى . ھېسىدە كوزلرندن ياشلر دوگەرك استمداد
ايدىيورلردى .

نھايت آين بىتدى . ايمپراطور ، عسكەرلرني طويلاتدى .
اونلرك يورغون دماغلرني نطقلرله اويانديرمق ايستەدى .
ايمپراطورك كوزلرندن ياشلر آقيوردى . نطق بىتدكدن
صوكر ، (آياصوفيا) يە كىتدى ، محرابك اوكنده ديز
چوكدى ، اوزون دعالرده بولوندى . نديملىرى دھاطرافندە ايدى .
آياغە قالقدى ، روملرە مؤثر خطابلرده بولوندى . صوكر
سرائنە كىتدى ، اسكى سلطنتك واحتشامنك كوزلر قاماشديران
كوشەلرني صوك دفعە زيارت ايتدى . سرايدن چىقدى . روحى
متأثردى ، آتە بىندى . سورى دولاشدى ، (رومانوس قاپسى) نە
كلدى . مدافعه حاضرلقلرينە باشلادى .

كيجە ياريىسندن صوكر ، ساعت بردى . تورك هجومى
باشلامشدى . شفق سو كويوردى . بيزانس ھر طرفدن هجومە
اوغرامشدى . توركلرك صوك هجومى مدەششدى : ھېچ بر
تورك حياتنى دوشونمىوردى . دوشەنى ، شھيد اولانى كورەن
يوقدى . بوتون توركلر ، روملرە صوك ضربەنى اينديرمەيە
عنزم ايتىشلردى .

تاجى زادە دىيوركە : « حضرت سلطنت پناھ رحمة الله

دخی فریضه صبحی ادا ایتدکن صکره غزا نیته ساز و سبلن
قوشنوب حصار فتی قصدینه انه برزرین شش پر آلوب آت
آرقاسنه کلدی . علم مقدسی ستون بارگاه فلک اطلس اولوب
ارکان دولت داعیان ساطنت رکاب هایونه جمع اولدی لر .
سنجاقلر چوزولدی . طبل و نقاره لر دوکلدی . غازیلر دلاورلر
حاضر اولوب جنک قولاین کوزلرلر ایدی » (۱) .

سورلر ، اوق ، طاش ، مرمری یاغمورندن کورولموردی .
روملر ، مازغالردن تورکلر اوزرینه قیزغین زیتون یاغلی
دو کویورلر ، دکرمن طاشلری آتیورلر ، مرمری یاغدی ریورلردی .
فقط بوفلا کتلردن قورقان تک بر تورک یوقدی . بوتون فعالیت ،
(رومانوس قاپسی) نه قارشیدی .

روملرک اک چوق کووه ندکلری ، جنرال ژوستینیانی .
فقط تورک آتشی اونی ده سورلردن یووارلار یووارلاماز ،
بوتون امیدلری قیرلدی . ژوستینیانی یارالانمشدی . یاراسنی
ساردیرمق ایچین چکلمک ایسته دی . ایمپراطور تلاش ایچنده
قالدی . کری چکلمه مسی ایچین ممکن اولدوغی قارار زورلادی .
ژوستینیانی دیکله مه دی . بر شالوپایه بیندی ، اول (غاطه) یه ،
اورادن ده (ساقیز ، خیوس) . دوغرو صاووشدی کیتدی .
قسطنطین حالا مدافعه ایدیوردی . تورکلر (رومانوس

قایسی (یاننده کی ایلاک سوری آلدیلر . روملر ایکنجی سوره
چکلدیلر . صفرنده مدھش برقاریشیق واردی . تورک هجومی
بونقطه ده اوقادار مدھش اولدی که ، روملرک برچوغی ازیلدیلر .
برقسیمی ده تورک قیلیجی آلتنده پریشان اولدیلر . مجادله ده
تلف اولانلر آراسنده ، ایمپراطور قسطنطین ده واردی .

صبح ، ساعت سکزدی . تورکلر ، بیزانسه کیرمشلردی .
« آفتاب جهان آرا بو حادثه بی تماشا ایتکچون هنوز منظره افقه
قدم باصمامشدی کم ، حکمت هدایت (نصرت بالصبا) ظهوره
کلوب حبای نصرت (ولقد ...) مہبندن تنسم ایلوب اسدی .
ادرنه قایسی جانبندن اولان کدکده قتال ایدن غازیلر کافرلره
غالب کلوب بش اون غازی دیوار اوزرینه چیقوب سنجاق
دیگدی ، تکبیر وتهلیل وتمجید و تقدیس آوازی ثرادن ثریاه
ایرمشدی . آنی کوروب هر طرفدن بکلر و سرورلر وعامه لشکر
کوکه صعود ایدر دعای مستجاب کی بروجہ ایلہ عروج ایدوب
فضای آسمانی کی حصار ایچنه دوکلدیلر . » (۱) .

تورکلرک ، بر بچق عصردن بری ، بیزانسه قارشی تعقیب
ایتدکلری سیاست ، قطعی برظفرله نتیجه لشمشدی . آرتق بیزانسی
تورک بازوسندن قورتاراجق نه پاپانک اهل صلیب اوردولری ،
نده بیزانس سراینک دسیسه لری قالمشدی . تورکلر

بیک درلو مشقتلرله یورمق و ازمک ایسته دکلی بلدی ، برداها
دوشمان آینه کچمه مک اوزره فتحه موفق اولمشلردی . بوفتح
یالکز تورکک مقدراتنده مهم بردوره تشکیل ایتیموری ؛ جهان
تاریخندهده اوزون بردوره نهایت ویریوردی . تاریخی قرنلره
آیرمق وظیفه سی تورکلرک قیلیجینه نصیب اولمشدی .

فی الحقیقه بیزانس ، تورکلرک سیاسی و حیاتی غایه سیدی .
تورکلر سلطنتلرینی یاشاتمايه چالیشدقلى بویوک کوندن
بری ، هپ بو غایه پیشنده قوشمشلردی . بیزانس ،
اونلرک نظرلرنده تورکه مقدر بر بلدی . تورکک قوتی
قارشیسنده ، پاله اولوغوسلری (تکفور) دن باشقه برشی تالق
ایتمیورلردی . مع مافیه بیزانس اک مدهش ضربه بی ، غریبلردن ،
لاتینلردن یه دی . بو ضربه دن صو کرا ، قسطنطنیه نك سورلری
آراسنده دیریان سلطنت ، یالانجی طاشلرله مزین تاجلر آلتنده ،
بوتون ضعفیله کورونیوردی . بیزانسی پاله اولوغوسلر اداره سنده
داها بر یچق عصر قادار یاشاتان قوت ، نه ملیت ، نه حمیت ،
نه فضیلت ، نه ده سیاستدی ؛ بیزانسی احتضار حالنده بیله
یاشاتان ، ریا و تبصص ، یالان و دسیسه ایدی .

۴۹ مایس ، تورک غازیلرینک وجد ایله آکدقلى برکون
اولدی . شهره کیرن تورکلرک کوزلرینی قاماشدیران ، بیزانسیک
یالکز ثروتی و مبانسی دکلدی . تورکلر واقعا بیزانسی

ضبط ایتشاردی ؛ فقط کندیلاری ده بیزانساك حسنه و آلايشنه
مسخر قالمشاردی .

بومعظم کونی کورمك بختيارلغنه نائل اولان تاجی بكك
اوغلو جعفر چلی دییورکه :

« لعلی کهرریز ، زلفی دلاویز ، قاتی کل بوداغی ، پستانلری
غنیجه نوخیز دوشیزه لرکه ، اوز که کسه مثان کورمش دکل ، وسوار
و خایخالدن غیری بر فرد ساعد و ساقلرینه ایریشمش دکل ،
کفاره مزاور دکلدی ، سعادتلو جانلره نصیب اولدی » .

صوك

بویوك آطه : ۱۹۲۴



MAIN STACKS

MICHAEL M. RIXLEY

